

LEOR

IMITASION JEZUZ KRIST

TROET E BREZONEG

GAND AN AOTROU UGUEN

RAKSKRID

Al leor "Imitasion Jezuz-Krist"

Adembann a reom amañ eun droidigez vrezoneg euz eun oberenn vrudet : "Imitasion Jezuz-Krist", bet skrivet e latin, er XV^{ved} kantved, dindan an titr : "De Imitatione Christi". Peder levrenn a zo enni, an teir genta diwar-benn ar vuhez kristen dre vraz hag ar bederved gouestlet penn-da-benn da zakramant an aoter ha d'ar gomunion. Rannet eo peb levrenn e pennadou berr a-walh, anvet "kenteliou" en droidigez-mañ.

Tabut a zo bet a-viskoaz evid gouzoud piou a zo bet oberour al leor-ze. Ar pezh a zo sur eo bet savet gand eur manah, a skrive evid e genvreudeur, ar pezh a lak a-gostez anoiou evel Gerson ha Groote, meneget a-wechou evel oberourien vartezeet. Hervez eun niver braz euz an dud o-deus studiet ar gudenn, e vefe bet "De Imitatione Christi" skrivet gand Tomaz a Kempis. Ganet e oa bet en eur gêr, anvet Kempen, e-kichen ar ster Rhin, war-dro 1380, ha marvet e 1471, goude beza bet manah en Izelvroioù.

Ar pezh a zo sur eo he-deus an oberenn-ze greet berz braz-tre, adaleg ar Grenn-Amzer beteg kreiz an ugentved kantved. An dornskridou kosa a zo euz 1424 ha chom a ra 800 anezo, euz ar bloavez-se beteg an XVI^{ved} kantved. Moullet eo bet an destenn latin, evid ar wech kenta, e 1472, ha nousped gwech abaoe. Eveljust eo bet troet en eur bern yezou, ar brezoneg en o zouez. E galleg, dre skwer, ez eus, e-touez kalz reou all, troidigeziou greet gand skrivagnerien veur evel Corneille ha Lamennais. An droidigez halleg ziweza 'oa bet embannet e 1957, gand "Club Français du Livre". Bez' e heller lavared, en eur ger, eo bet "Imitasion Jezuz-Krist", eur "best-seller" hag an oberenn vrudeta war-lerh ar Bibl.

Kement-se a ziskouez mad eo al leor-ze, savet koulskoude evid tud o veva en eur gouent, bet lennet

gand eur bern tud all : beleien ha tud fidel forz pegement. Bez' e heller goulenn ouzor an-unan perag e-neus bet kemend a vrud. Emichañs dre m'eo bet skrivet en eun doare sklêr hag êz da gompren gand kristenien ordinal. Tenn a ra an oberour e vad euz ar Bibl hag euz ar pez a wele en-dro dezañ, ha deut eo evel-se da zevel eun oberenn gouest da vaga kalz tud en o buhez speredel. Bez' eo bet, e-pad pemp kantved bennag, leor klasel ar speredelez kristen. N'eus ket keit-se c'hoaz e veze lennet, war-lerh pep pred, er hloerdiou hag er humunieziou relijiel, eur frazenn pe zious tennet euz al leor-ze, ha d'an amzer-ze, e veze aliez embannet, keinet asamblez gand an Testamant Nevez, o-daou da veza lakeet evel-se eun tammig war ar memez live evel boued an ene.

An dra-mañ a zo bet gwir beteg kreiz or hantved med bremañ eo kemmet kalz an traou ha kouezet "Imitation Jezuz-Krist" en eun doare ankounah : deut eo buan da veza eun dra dihiziet evid ar gristenien. Perag seurt kemm ? Red eo derhel soñj euz ar cheñchamañchou c'hoarvezet en Iliz goude ar brezel-bed diweza ha dreist-oll war-lerh ar Zened-Meur Vatikan I. Nebeutoh a dud a jom tost ouz ar relijion med ar re a gendalh d'hen ober a glask donnaad o feiz muioh eged gwechall. Bremañ kalz katoliked a lenn hag a studi ar Bibl : gwelloc'h e kavont mond war-eeun d'ar pez a zo evito komzou Doue eged lenn eul leor, evel "Imitation Jezuz-Krist", hag a glask distrempa ar homzou-ze e-touez eur bern mennoziou all. Sur e vez embannet c'hoaz leoriou a speredelez med kalz tostoh int ouz ar vuhez a-vremañ, hag evel-se eo deut eul leor evel an hini a gomzom anezañ da gemer blaz ar hoz. Daoust hag e teuio e vrud en-dro eun devez bennag ? Den ne oar med souezuz eo memestra he-deus e levezon padet keid-all. Ha chom a ra evidom, forz penaoz, gand an droidigez embannet amañ, talvoudegez ar brezoneg implijet gand an troer.

Troidigez an Aotrou Uguen

Evel m'on-eus lavaret bremaig, troet eo bet "De Imitatione Christi" e brezoneg, hag abaoe pell 'zo. N'on-eus ket savet eur renabl euz an oll droidigeziou savet en or yez, med bez' e heller menegi ar re greet gand Marigo (1756), Troude ha Milin (1864), Per Bellec (1905), hag, evid ar gwenedeg, hini Loeiz Pourchase (1788) ; lod anezo a zo bet embannet meur a wech.

An droidigez a gaver amañ eo hini Yann-Vari Uguen hag a zo bet eur saver braz a leoriou relijiel. Ganet eo bet e Gwiseni, e 1868, ha marvet e Keraodren-Lambezellec, e 1938. Beleget e oe e 1893 ha tremenet e-neus an darn vrasa euz e vuhez o kelenn e Lezneven hag e Kemper, pe o ren kloerdi-bihan Pont-e-Kroaz. Skriva a reas eur bern leoriou e brezoneg ha kenlabouret e-neus e-pad pell gand e genvreur ha mignon Yann-Vari Perrot, rener Feiz ha Breiz. Gand Uguen ivez ez eus bet savet eur mell leor-overenn (1922), e latin hag e brezoneg, bet implijet kalz gand an dud fidel ha nevez 'zo c'hoaz gand ar veleien pa oad kroget, war-lerh Vatikan I, da lida an overennou e brezoneg ha pa ne oa ket prest an troidigeziou all bet greet abaoe. E oberenn "Heuillomp or Zalver pe levr imitation Jezus-Krist" a zo bet embannet evid ar wech

kenta e 1912 ; advoullet eo bet e 1929 ha skrivet eo war bajenn-ditr an embannadur-ze : "Ugentved milier", ar pezh a ziskouez ar berzh a ree al leor d'ar mare-ze.

Ar yezh a ra Yann-Vari Uguen ganti evid e droidigezh a zo yah ha nerzuz. Pa geñverier e skrid gand an destenn latin, e kaver eo bet berreet ar mennoziou eun tammig gand Uguen, a-wechou, med chom a ra feal d'ar vamm-skrid. Ma lakeer kichenn-ha-kichenn an destenn latin, troidigezh vrezoneg Uguen hag ivez unan halleg, e weler dioustu he-deus peb yezh he doare da lavared ar memez mennoz : peurvuia e chom ar galleg tost-tre ouz al latin, an diou yezh-se oh implijoud aliez gerioù difetiz. E brezoneg avad eo gwelloc'h ober gand gerioù all : verbou, anoioù-gwan, troioù-lavar... hag eur maill eo Uguen evid dibab anezo ha beza komprenet gand e lennerien hag a oa brezonegerien ordinal-tre. Menegom eur skwerenn hepken euz kement-se : ar gerioù anavezet-mad "Vanitas vanitatum et omnia vanitas est", a gavom er Gentel I, niv. 3, a zo bet troet war-eeun e galleg dre "Vanite des vanites, tout n'est que vanite", ha padal e ra Uguen gand "Avel, moged ha netra ken eo an oll draoù", ar pezh a ro muioù a vlaz d'an droidigezh vrezoneg evel-just.

Ma seller bremañ ouz ar geriadur, e weler ez eo pinvidig ha n'eo ket re halleket, ar hontrol euz ar pezh a veze kavet e kalz leorioù a zevosion, med nebeutoc'h, gwir eo, evid ar re bet embannet er hantved-mañ. Koulskoude e tizoloer c'hoaz e leor Uguen gerioù evel : defota, korrija, pur, ofanaset, divinite, majeste, debati ... ha ne vezont ket kavet ken er skridoù relijiel a-vremañ : gwelleet eo bet an traou war dachenn ar geriadur brezoneg abaoe ar brezel-bed kenta.

War-lerh peb "Kentel" euz e leor, e-noa Yann-Vari Uguen lakeet pennadou savet gantañ e-unan, dindan an titrou : "Eur zell warnom on-unan", "Selaouit", "Soñjit mad"... Lamet int bet kuit en embannadur-mañ, evel m'eo bet lezet a-gostez ar bern pedennou, kemennou hag alioù mad skrivet gantañ e dibenn e leor. N'eus bet dalhet amañ eta nemed troidigezh ar skrid a orin hepken.

Spi on-eus e kavo kalz brezonegerien o flijadur o lenn al leor-mañ, daoust d'e zavez da veza evito eun tammig diamzeret, dre ma tizoloint ennañ eur yezh reiz ha saouruz, bet implijet e Breiz-Izel e penn kenta an ugentved kantved.

Herve Danielou

(Modernnaet eo bet an doare-skriva).

(N'eo ket ar skrid da heul just an hini a zo eur fotogopienn ganin, mez e chom reiz ar ster bepred. Sur a-walh e oa bet meur a embannadur disheñvel. N'am-eus ket kavet an hini a zo bet implijet gand Herve Danielou. -A. ar Merser).

D'AL LENNERIEN

Levr Imitasion Jezuz Krist eo ar haerra euz al levriou a zo bet skrivet gand an dud. An Aviel, sklêr eo, a zo kalz uhelloh. Med an Aviel hag ar Skritur Zakr a deu deom war-eeun digand Doue, peogwir Doue e-unan a sklêrijenne ar skrivagnerien zantel hag a lakee en o spered an traou o-doa da skriva.

Nebeud amzer goude ar bloaz 1.400 eo bet greet Levr an Imitasion. Ne ouzom ket mad gand piou. Med n'eus forz piou e-neus hen skrivet, e heller lavared e-noa eur spered uhel ha lemm ; desket braz e oa war ar skritur hag ar skiantchou sakr, hag anaoud a ree mad an oll blegou a zo e kalon an den ; med gwelloh e-noa c'hoaz eged eur spered lemm ; e garantez evid Doue a oa birvidig meurbed. Kavet e-neus evid komz ouz Doue geriou kaer, souezuz.

Ar mel euz ar Skritur Zakr, oll furnez, oll deskadurez ar Zent a gaver e levr an Imitasion.

Evid ar relijiusted eo bet skrivet, ha meur a dra a zo ennañ evid ar relijiusted hepken, ar re o-deus troet kein d'ar bed, ha dilezet pep tra evid beza oll da Zoue.

Med daoust m'eo bet skrivet evid ar relijiusted, an oll o-devo da hounid o lenn anezañ. Ya, kemend hini a zo er boan, en anken, kemend hini a zo fallgalonet, kemend hini a zo teñvalijenn war e spered, kemend hini a zo gwasket gand an tentasionou, kemend hini a zo lezireg, dinerz e servich Doue, re droet ouz traou an douar, ar re-ze oll a gavo el levr-mañ peadra da sklêrijenna ha da vaga o ene, da frealzi ha da gennerza o halon.

Evid-se avad, e vezo red lenn ar henteliou gand evez, lenn nebeud bep tro ha lakaad ar spered da zoñjal war ar gwirioneziou a vezo displeget dirazañ.

Den ne hellfe lavared pegement a vad e-neus greet Levr an Imitasion abaoe ma 'z eus anezañ. Skrivet da genta e latin eo bet troet e pep yez hag eo anavezet e pep leh.

Ra vezo lennet e Breiz muih-mui bemdez evid ma tesko d'ar Vretoned bale gwelloh-gwella war roudou Or Zalver Jezuz Krist.

J.-U.

LEVR KENTA

KENTEL 1

Red eo bale war-lerh Jezuz-Krist hag ober fae war blijadureziou didalvez ar bed-mañ.

1. « An hini a deu d'am heul ne vale ket en deñvalijenn », a lavar Or Zalver. Setu komzou Jezuz-Krist : dre ar homzou-ze om galvet gantañ da vale war e roudou, ma fell deom beza sklêrijennet e gwirionez ha diwallet euz pep teñvalijenn a deu war ar galon.

Lakom eta or spered, a-raog pep tra all, da zoñjal war buhez Jezuz-Krist.

2-Kelennadurez Jezuz-Krist a zo dreist-oll kelennadurez ar Zent, hag an hini a vije gantañ spered Jezuz-Krist a gavje eno eur boued dispar kuzet.

Med kalz tud, goude kleved aliez an Aviel, a jom evelato klouar o halon, n'ema ket ganto spered Jezuz-Krist.

C'hoant ho-peus da gompren ha da gaoud blaz mad gand komzou Jezuz-Krist ? Grit gwella ma helloh evid beva evel Jezuz-Krist.

3-Petra 'hounezoh o klask mond don e mister an Dreinded ma n'ez oh ket izel a galon ha ma tisplijit abalamour da-ze d'an Dreinded Sakr ?

N'eo ket renta komzou kaer eo a ra an den just ha santel, eur vuhez dinamm, avad, on gra, mignoned da Zoue.

Gwelloh eo ganin santoud em halon glahar d'am fehedou eged beza gouest da zisplega petra eo ar ger glahar.

Ha goude ma ouezfeh ar Skritur Sakr penn-da-benn ha kemend o-deus lavaret an dud desket, petra a dalvez an dra-ze deoh heb ar hras hag ar garantez ?

Avel, moked ha netra ken eo an oll draou ma ne garer ket Doue, ma ne zervicher ket Doue hepken.

Ar furnez dreist pep furnez eo pignad war-zu an Neñv oh ober fae war ar bed.

4-Rag-se 'ta red eo beza diskiant evid dastum madou a vezo lamet diganeom ha lakaad or fiziañs enno.

Diskiant an hini a red war-lerh an enoriou, a glask sevel an uhella ma hell.

Diskiant, an hini a zent ouz e youlou fall, an hini a glask plijadureziou a raio dezañ beza kastizet.

Diskiant an hini a houlenn beva pell amzer hep lakaad tamm aket da veva mad.

Diskiant an hini a zoñj er vuhez-mañ hepken, tamm ebed er vuhez da zond.

Diskiant an hini a stag e galon ouz ar pezh a dremen ker buan, e-leh kaoud mall da zegouezoud en eürusted n'eus fin ebed dezi.

5-Ra vezo aliez en or spered ar wirionez-mañ : “Al lagad n'e-neus morse e walh gand ar pezh a wel, nag ar skouarn gand ar pezh a glev“.

Poagnit da zistaga ho kalon diouz an traou a welit ha d'en em drei ouz an traou na welit ket.

Rag ar re a ro d'o horv kemend a hoanta a gaillar o ene hag a goll gras Doue.

KENTEL II

Beza izel a galon

1.-Pep den e-neus c'hoant gouzoud, c'hoant deski ; med petra eo an deskadurezh hep Doue ?

Eun denig dister diwar ar mêz, ma servich Doue, a zo eun tamm mad dreist an den desket a zo o studia ar stered med ne ra netra evid e zilvidigez.

An hini en em anavez mad e-neus mez o weled pegen reuzeudig eo e stad ha n'ema ket o klask meuleudi digand an dud.

Goude m'am-bije oll deskadurezh ar bed, ma n'am-eus ket a garantez, petra a hellin diskouez da Zoue, a varn an dud war o oberou ?

2.-Na vezit ket re droet war an deskadurezh, gand aon na rofeh ket d'ho spered boued yalh ha talvouduz.

An dud desket a gar en em ziskouez ha beza meulet evid o deskadurezh.

Kalz traou 'zo ne dalv ket ar boan evid an ene gouzoud anezo, ha diskiant eo an den a laka muioh a boan gand traou all eged gand e zilvidigez.

N'eo ket gand komzou e-leiz eo e vez torret naon an ene ; eur vuhez santel avad a laka laouen ar spered, hag eur goustiañs dinamm a ro fiziañs e Doue.

3.-Seul vui e vezot desket, seul rustoh e vezot barnet ma n'eo ket bet santel ho puhez.

Na dit ket 'ta da gemer lorch nag euz hoh ijin nag euz ho skiant ; bezit kentoh leun a spont abalamour d'ar sklêrijenn roet d'ho spered.

Ma kav deoh gouzoud ha kompren mad kalz traou, evelato ez eus kalz muioh c'hoaz na gomprenit ket.

Na lezit ket an ourgouill da hweza en ho kalon ; gwelloc'h eo deoh anzañ ez eus dreist ho spered. Perag

ho-peus c'hoant beza lakeet a-raog ar re-all, peogwir ez eus kemend a anavez gwelloc'h egedoh lezenn Doue ?

C'hoant ho-peus gouzoud ha deski eun dra a raio vad deoh ? “Karit beza ankounac'heet ha lakeet izelloh eged an oll “.

4.-Ar gwella deskadurez eo en em anaoud hag en em zisprij on-unan.

En em zisprij on-unan ha barn mad ar re all, setu-aze beza fur ha santel.

Ma welfeh eun all o koueza en eur pehed braz pe o klask ober eun taol fall bennag, ne dlefeh ket evid-se en em lakaad gwelloc'h evitañ. Rag ne ouzoh ket beteg pegeid e helloh chom war an hent mad.

Oll om bresk, oll e hellom koueza ; kredit, avad, n'eus den all ebed ken dinerz ha c'hwi.

KENTEL III

Keleennadurez ar wirionez

1.-Eüruz an hini a zo desket gand ar wirionez heh-unan, an hini a wel a-zirag e zaoulagad ar Wirionez evel m'ema, ha nann kuzet a-zindan eur bern geriou.

Or spered hag or skiantchou a zo berr hag a laka ahanom aliez da fazia.

Petra a dallv terri or penn da glask kompren traou diêz ha kuzet, peogwir da zeiz ar varn ne vezim ket tamallet evid beza chomet heb o gouzoud ?

Red eo beza diskiant evid lezel a gostez ar pezh a zo talvouduz hag a zo red da houzoud evid trei ar spered war draou souezuz ha noazuz : daoulgad on-eus ha ne welom ket.

2.-Petra a hounezom o weled an dud desket o reñka an traou er hiz-mañ pe er hiz-se ?

An hini a gomz dezañ ar Verb eternal, e ra forz penaoz e soñj an dud.

Euz ar Verb hag euz ar Verb hepken e teu pep furnez. Eñ eo a zegas deom kemend tra vad a lavarom.

Anez ar Verb, tamm furnez ebed, netra eün e spered an den.

An hini en oll draou na glask nemed eun dra, Doue, hag a laka an oll draou da dalvezoud d'an dra-ze, a zo atao e spered troet ouz Doue ; hennez ne vezo ket o vrall en tu-mañ hag en tu-hont, e galon a vezo e peoh, rag Doue a vezo gantañ.

O gwirionez a zo Doue, grit ma vezin unanet ganeoh er garantez da viken !

Aliez e vezan inouet maro o lenn hag o selaou meur a dra ; ennoh ema kemend a glaskan, kemend a houlenan.

Ra jomo hep komz an doktored, an oll grouadurien a-zirazoh, o va Doue ; c'hwi, ha c'hwi hepken, komzit ouzin.

3.-Seul-vui e oar an den en em lakaad da zoñjal ennañ e-unan ha distaga e spered diouz traou an douar, seul-vui e teu e spered da zigeri ha da zevel uhel hep poan, abalamour ma teu dezañ sklêrijenn an Neñv.

Eur spered dinamm, troet war ar mad, ne deu morse da ziroll e kreiz al labouriou ; ober a ra pep tra evid enori Doue, hag ema e peoh, rag n'en em glask ket e-unan e netra.

Petra a zo o tegas deoh poan hag anken nemed an youlou direzon euz ho kalon ?

An den mad, ar gwir gristen, a reñk da genta en e spered kemend labour e-neus da ober ; ne lez ket ar youlou diroll da gomandi ; ne raio nemed ar pezh a gavo mad ha santel.

Piou e-neus muioh da stourm eged an hini a glask beza treh dezañ e-unan ?

Setu da betra e tlefem labourad bemdez ; da stourm a-eneb or youlou direiz, da veza kreñvoh-kreñva

bemmdeiz, da zevel eun nebeudig bemdez er zantelez.

4.-N'eus den er bed-mañ, pegen mad bennag eo, ha n'en-devije eun tamm stablez bennag ; hag eun tamm teñvalijenn a zo atao war on daoulagad.

En em anaoud on-unan evel emaom, anzav or zempaldurez a zo eun hent gwelloc'h evid mond da Zoue eged klask gouzoud an oll draou kuzet.

N'eo ket ma'z eus da damall an deskadurez : an deskadurez dreizi heh-unan a zo eun dra vad, digand Doue eo e teu ; med dreist an deskadurez e ranker lakaad atao ar goustiañs nêr hag eur vuhez santel.

Med kalz a zo a laka o foan da zeski kentoh eged da veva mad, en em goll a reont aliez hag o labour ne zoug ket a frouez pe ne zoug ket kalz da vihana...

5.-O ! ma lakfem kemend a boan da ziswrienna ar visou fall ha da zevel er zantelez ha da glask kompren traou didalvez, ne vije ket gwelet kemend a zroug, kemend a skweriou fall dre ar bed, na kemend a leziregez e tiez ar veneh.

Da zeiz ar varn ne vezo ket goulennet diganeom petra on-devezo lennet, med petra on-devezo greet ; ne vezo ket goulennet ha komz kaer a ouzom, med ha mad e vezo bet or buhez.

Lavarit din e peleh ema bremañ ar vistri desket-se ; an doktored ho-peus anavezet pa edont war an douar, brudet dre o deskadurez ?

Re all a zo bremañ en o flas ha ne ouzon ket hag e soñjont enno.

E-pad o buhez o-doa an êr da veza eun dra bennag ha bremañ ne gomz den anezo.

O ! na pegen buan e tremen gloar ar bed-mañ ! Mar o-devije c'hoaz gouezet beva evel ma ouient deski ! neuze o-devije gounezet eun dra bennag.

Nag a zo a dud er bed oh en em goll gand o falz deskadurez a ra dezo ankounac'haad Doue !

Hag abalamour e karont muioc'h sevel uhel eged beza izel a galon eh en em gollont en o zoñjou.

Braz eo e gwirionez, an hini a zo braz e garantez. Braz eo, e gwirionez an hini a oar en em izellaad hag a ra fae war enoriou ar bed-mañ !

Fur eo an hini na ra ket muioc'h a van gand madou ar bed-mañ eged gand ar fank, evid gelloud gounid Jezuz-Krist.

Hag ar gwella deskadurez eo ober bolontez Doue ha lezel a-gostez ar pezh a hoanteom on-unan.

KENTEL IV

Red eo teurel evez a-raog ober eun dra bennag

1.-Arabad eo selaou pep ger a vez klevet na senti ouz kemend youl a deu d'ar spered : red eo poueza mad pep tra ha gweled petra a dalv hervez Doue.

Siwaz ! aliesoh e soñjom hag e lavarom droug eged mad euz on nesa : ken douget om d'ar pezh a zo fall.

An dud vad ne gredont ket buan kement tra a glevont, abalamour ma ouzont pegen sempl eo an den, pegen techet d'an droug, pegen douget da zroug-prezeg.

2.-Fur eo an hini a daol evez a-raog ober eun dra bennag ha n'eo ket re benneg da zalher re bell d'ar pezh a zo deuet en e spered.

Fur eo c'hoaz an hini na gred ket kemend a glev ha ne da ket da ingala e pep leh kemend e-neus klevet.

Goulennit kuzul digand eun den fur, eun den a goustiañs ; ha sentit ouz eun all furroh egedoh e-leh ober ho penn hoh-unan.

Eur vuhez santel a ra an den fur hervez Doue hag a zegas dezañ gouiziegez war galz a draou.

Seul-vui e vezo an den izel a galon ha sentuz ouz Doue, seul-vui en devezo e pep tra furnez ha peoh.

KENTEL V

Diwar lenn ar Skritur Sakr

1.-Ar pezh a zo da glask er Skritur Sakr eo ar wirionez ha n'eo ket an doare kaer da zisplega an traou.

Red eo lenn ar Skritur Sakr gand ar memez spered m'eo bet skrivet. Klaskom er Skritur Sakr frouez brao.

Al leoriou dister a gomz euz a Zoue a dleom da lenn gand kemend a blijadur hag al levriou dispar.

Na rit ket forz piou e-neus skrivet al levr : pe braz pe bihan eo e spered, lennit al levr evid klask eun dra hepken : ar wirionez.

Sellit petra a vez lavaret deoh hep klask gouzoud piou eo e-neus skrivet.

2.-An dud a dremen, mez gwirionez Doue a jomo da viken.

Doue a gomz ouzom e meur a hiz ha dre vouez meur a zen.

Pa lennom ar Skritur Sakr, ez om aliez re guriuz o klask kompren pep tra e-leh tremen buan.

Ma fell deoh tenna frouez euz ar Skritur Sakr, bezit izel a galon, lennit gand feiz ha na glaskit ket beza kemeret evid eun doktor.

Bezit mad da houlen ali ar re all ; selaouit, heb lavared ger, komzou ar Zent ; na rit ket fae war lavariou fur ar re goz, rag bez' ez eus da hounid ganto.

KENTEL VI

Ar c'hoantegeziou direiz

1.-Kerkent ha m'en em laka an den da glask eun dra bennag a-eneb an urz vad, e teu da veza diêz e spered.

An den ourgouilluz, an den a stag e galon ouz an arhant, n'e-neus morse peoh ebed ; er hontrol, ar re baour, ar re izel a galon a zo eüruz, atao e peoh.

An den n'e-neus ket mouget a-walh e youlou direiz a zo buan tentet hag a deu da veza trehet en traou disterra...

An hini a zo c'hoaz e spered dinerz, bahet gand ar horv, troet ouz an traou a blij d'ar horv, hennez e-neus mil boan oh en em zistroba diouz madou an douar-mañ.

Rag-se, pa fell dezañ nah ouz e youlou ar pez a hoanteont, e-neus aliez tristidigez hag ez a buan droug ennañ pa vez dalhet penn dezañ.

2.-Mar e-neus bet ar pez a hoantee, kerkent eo broudet gand e goustiañs, abalamour e-neus sentet ouz e youlou fall, ha kollet e-neus ar peoh a glaske.

O talher penn d'ar youlou fall, ha n'eo ket o senti outo, eo e vez kavet ar peoh gwirion evid ar galon.

Peoh ebed evid an den a red war-lerh ar plijadureziou fall, war-lerh madou an douar ; ar peoh eo lod an den a zo e spered hag e galon da Zoue.

KENTEL VII

Red eo beza izel a galon

1. Diskiant eo an hini a laka e fiziañs en dud pe en eun dra krouet, n'eus forz petra eo.

Arabad eo kaoud mez o veza paour hag o servicha ar re all er bed-mañ dre garantez evid Jezuz-Krist.

Na dit ket d'en em harpa warnoh hoh-unan, med war Doue hepken.

Grit ar pez a zo en ho kalloud, ha Doue a deuio d'ho sikour.

Na lakit ket ho fiziañs en ho teskadurez, nag en ijin den ebed, med e gras Doue a gar sikour ar re izel a galon ha diskar a re ourgouilluz.

2.-Na lakit ket ho fiziañs en ho madou nag en ho mignoned, pegen gallouduz bennag e hellfent beza ; lakit ho fiziañs e Doue a ro pep tra hag ouspenn a hoanta en em rei e-unan.

Na dit ket d'en em fougeal abalamour ma'z oh eun den kreñv, eun den brao ; an disterra tra a hell diskar ho kened ha lemel diganeoh ho kaerder.

Na dit ket d'en em fougeal abalamour ma'z oh eur spered kaer a zen, gand aon da zisplijoud da Zoue, rag digantañ e teu pep tra vad er bed-mañ.

3.-Na dit ket d'en em fougeal abalamour d'hoh oberou mad rag Doue ne varn ket evel an dud ; ar pezh a blij d'an dud a zisplij aliez dezañ.

Mar deus eun dra vad bennag ennoh, kredit ez eus muioc'h c'hoaz er re all, hag e chomoh izel a galon.

Ne golloh netra oh en em lakaad izelloh eged an oll ; koll braz ho-pefe avad, oh en em lakaad gwelloh eged eun all, unan hepken.

An den izel a galon a zo atao e peoh ; an den ourgouilluz, avad, n'ez eus en e galon nemed buanegez, gwarizi.

KENTEL VIII

Arabad diskouez re a vignoniaj d'an dud

1.-Na zigorit ket ho kalon d'an oll, hep taoler evez ; digorit anezi d'an den fur ha d'an den a zoujañs Doue.

Na'z it nemed an nebeuta ma helloh gand an dud yaouank hag an dud estren.

Na'z it ket da veuli an dud pinvidig ha na glaskit en em ziskouez dirag an dud vraz.

Klaskit an dud dister, an dud a gar Doue, a zo santel o buhez, ha na gomzit nemed euz traou a raio vad d'hoh ene.

Tehit diouz ar merhed ; na garit ket chom da gaozeal ganto, med pedit an Aotrou Doue da ziwall an oll merhed mad.

Na glaskit nemed mignoniaj an Aotrou Doue hag ar Zent, ha chomit kuzet ouz an dud.

2.-Red eo kaoud karantez evid an oll, med minioniaj n'eo ket ar memez tra.

A-wechou eh istimom eun den hep hen anaoud abalamour d'e vrud vad, ha p'her gwelom eh anzavom e oa bet greet re a veuleudi anezañ.

A-wechou e kav deom plijoud d'ar re all, abalamour ma'z eom aliez war o zro ; ha neuze eo e tisplijom dezo, abalamour d'ar plegou fall a welont ennom.

KENTEL IX

Red eo senti ha dilezel or zoñjou on-unan

1.-Talvouduz-kenañ eo beva o senti, beza dindan eur mestr hep gelloud ober ar pezh a hoanteer.

Eun tamm mmad eo dizañjerusoh senti eged n'eo ket komandi.

Kalz a zo ne zentont nemed abalamaour m'eo red ; e-leh senti a galon vad, ar re-ze o-deus atao da houzañv hag a zo douget d'en em glemm. Ne vezint ket êz, eüruz, nemed pa zentint a-greiz-kalon, abalamour da Zoue.

Redit en tu-mañ hag en tu-hont, ne gavoh ar peoh nemed o senti a galon vad ouz eur mestr. Kalz, o soñjal

e vijent gwelloh e leh all, a zo bet faziet.

2.-An den a zo douget da ober e benn e-unan, hag a ya gand muih a blijadur gand an dud a zoñj eveltañ.

Med, mard ema Doue en on touez eo red deom a-wechou diskrava euz or zoñjou on-unan evid lakaad ar peoh da zond.

E peleh ema an den desket a-walh evid gouzoud mad pep tra ?

Na zalllc'hit ket re d'ho soñjou, selaouit ivez petra a zoñj ar re all.

Mar deo mad ho soñj ha m'en dilezit evelato abalamour da Zoue evid ober ar pezo a c'hoanta eun all, ho-pezo kalz da hounid.

3.-Klevet am-eus aliez lavared eo surroh selaou ar re all, kemered kuzul, eged rei kuzul.

A-wechou eo mad ar pezo a zoñj pep hini ; med chom hep plega d'ar re all pa vez tro ha pa'z eo mad hen ober, a zo beza ourgouilluz, beza pennog.

KENTEL X

Arabad koll an amzer o kaozeal heb ezomm

1.-Tehit, gwella ma helloh, diouz trouz ar bed, n'ez eus nemed koll o komz euz traou an douar-mañ, zoken pa ne vez lavaret droug ebed. Buan e teu an ourgouill da hweza er galon ha da wrizienna enni.

Aliez am-eus bet keuz d'ar pez am-boa lavaret ha da veza bet e-touez an dud.

Perag om ken douget da gaozeal peogwir, pa ehanom, e welom on-eus bep tro koulz lavared, greet droug d'on ene ? Ma karom kemend kaozeal gand ar re all, eo abalamour ma klaskom skañvaad or poaniou, frealzi or spered a zo skuiz ha glaharet.

Hag on-eus plijadur o komz diwar-benn ar pez a garom, pe a hoantaom, pe ivez euz ar pez a ra diêz deom.

2.-Med siwaz ! aliez ne hounezom netra oh ober evel-se. Rag, o klask beza tennet a boan gand an dud e virom aliez ouz gras Doue da zond en or halon d'or frealzi evid mad.

Red eo eta beilla ha pedi, evid na vezo ket kollet an amzer.

Mar ho-peus gwir da gaozeal, mar eo mad hen ober, komzit euz traou a hell ober vad d'an ene.

Ne ouzom ket derhel war on teod, ken boazet om da gaozeal heb ezomm ha ken dievez da glask atao pinvidikaad on ene.

Evelato eo red lavared kemend-mañ. Pa vez tud unanet hervez Doue ha na glaskont nemed en em zantellaad, eo eun dra vad komz euz a draou santel : kement-se a ro nerz d'an ene.

KENTEL XI

Penaoz kaoud ar peoh er galon ; penaoz pignad uhelloh e karantez Doue.

1.-E peoh braz e vijem, ma karfem chom heb taoler evez war lavariou ar re all : an traou-ze ne zellont ket ouzom.

Penaoz e hell beza e peoh an den a vez atao oh en em emel euz aferiou ar re all, o klask tro da weled traou nevez, ha ne oar ket prena kloz e galon da drouz ar bed na diskenn ennañ e-unan ?

Eüruz an dud eün o spered, abalamour m'o-devezo peoh braz.

2.-Perag ez eus bet sent ken braz, ken douget a galon war-zu an neñv ? Abalamour o-deus mouget en o halon oll c'hoantegeziou direiz ar bed-mañ hag o-deus gallet neuze en em rei oll da Zoue ha labourad d'en em zantellaad.

Ni, avad, a zo re liammet gand on techou fall, re enkrezet gand an traou a dremen. N'eo ket stank ar re a deu a-benn evid mad euz o zechou fall ; n'en em lakom ket a-zevri da vond bemdez war-raog hag e chomon yen ha klouar.

3.-Ma vije mouget mad ganeom or youlou, ma vijem distag mad diouz traou an douar, e hellfem neuze kaoud blaz mad gand traou an neñv, hag or spered a vije gouest da jom da zoñjal eun nebeud e Doue.

Ar pezh a vir ouzom da gaoud plijadur e traou an neñv, eo ma n'ez om ket distrob diouz or c'hoantegeziou, or youlou, ha n'ez eom ket a galon vad dre an hent a ziskouez deom ar zent.

Ha pa gouez warnom an disterra droug, ez om kerkent glaharet oll hag e klaskom frealzidigez digand an dud.

4.-Ma lakfem or poan evel soudarded kaloneg da zerhel mad e-pad ar stourmad, e veljem sikour Doue o tond deom euz an neñv.

Rag Doue a zo prest da zikour ar re a zalh mad, ar re o-deus fiziañs en e hrasou.

Eñ eo a ro tro deom da vrezllekaad evid m'on-dezo evel-se tro da hounid.

Ma kav deom lakaad da greski ennom er vuhez kristen oh ober or pedennou hag on oberou a-gorv hepken ha nann a-greiz kalon, e teuio buan or feiz da laoskaad.

Lakom eta ar vouhal war gwriziou ar wezenn, trohom buan on techou fall, evid ma vezo on ene e peoh.

5.-Ma hellfem, bep bloaz, diwrizienna eur pleg fall hepken, e vijem buan santel.

Med aliez e welom, er hontrol, e oam gwelloc'h, santelloc'h, p'on-eus lavaret kenavo d'ar bed eged goude meur a vloaz tremenet el leandi.

Kreski a dleem bemdez e karantez an Aotrou Doue, hag e kav deom eo kalz beza dalhet eun tammig d'ar

garantez on-doa gwechall.

Ma karfem er penn kenta beza eun tamm rust ouzom on-unan, e hellfem, da houde, ober pep tra êz ha gand joa.

6.-Diêz eo dilezel ar pezh om boazet da ober ; med diêsoh eo c'hoaz enebi ouz or c'hoantegeziou.

Koulskoude, ma ne vezit ket treh en traou bihan ha dister, penaoz e vezoh pa vezo stourmadou tenn ?

Harpit mad, er penn kenta, ouz ho youlou, dilezit ho plegou fall gand aon na deufent da greski ha da veza treh deoh.

O ! ma soñjfeh pebez peoh ho-pije, pebez levenez a rofeh d'ar re all o veva evel m'eo dleet, me a gav din e lakfeh muioh ho poan da gaerraad hoh ene.

KENTEL XI

Petra a hellom da hounid gand or poaniou.

1.-Mad eo deom kaoud a-wechou eur boan, eun dra gontrol bennag ; rag kement-se a ra deom diskenn ennom on-unan, hag a zegas da zoñj deom n'ez om war an douar-mañ nemed divroidi ha ne dleom ket lakaad or fiziañs e netra krouet.

Mad eo deom a-wechou kaoud enebiez, beza barnet fall goude beza greet ha c'hoanteet traou mad. Kement-se a ra deom beza izel a galon hag on diwall diouz an ourgouill.

Rag pa vezom disprizet, barnet fall gand an dud, neuze ez om dougetoh d'en em drei ouz Doue, ouz an hini a wel sklêr en or halon.

2.-Evel-se an den a dlefe en em harpa war Doue ha ken stard ma n'en-devije ket ezomm da veza frealzet gand an dud.

P'en em gav eun den a volonteaz vad beza er boan pe en dentasion, pe ankeniet gand soñjou fall, neuze e wel mad e-neus ezomm euz Doue ha ne hell netra hep Doue.

Neuze eo glaharet ; klemm ha pedi a ra abalamour d'ar poaniou a houzañv. Neuze eo inouet gand ar vuhez-mañ hag e karfe mervel evid beza distrobet diouz e liammou hag en em gavoud gand Jezuz-Krist.

Neuze ivez e wel sklêr n'ez eus ket er bed-mañ a beoh gwirion.

KENTEL XII

Red eo enebi ouz an tentasionou

1.-Keit ha ma vevom war an douar-mañ, ne hellom ket beza hep poan, hep trubuilh.

An den santel Job a lavare : « E-pad e vuhez, an den a zo tentet heb ehan ».

Rag-se, pep den a dlefe beza war evez ouz an dentasion, beilla ha pedi bepred, gand aon da veza touellet gand an droug-spered n'ez a morse da gousked hag a zo o trei e pep tu o klask unan bennag da lonka.

N'ez eus den ebed, daoust pegen santel eo, ha n'en-devije ket a-wechou tentasionou, ha ne heller ket beza distrob a-walh diouto.

2.-An tentasionou a zo a-wechou talvouduz, evid an den, dezo da veza diêz ha ponner, rag en dentasion

an den a deu da veza izel a galon, e ene a vez kaerraet, ha meur a dra a zesk.

Ar zent o-deus bet oll kalz tentasionou ha poaniou ha dre an hent-se eo int savet war-zu Doue.

Hag ar re n'o-deus ket gellet harpa ouz an tentasionou o-deus en em zaonet, en em gollet.

N'ez eus na stad santel a-walh na leh distro a-walh ne vije ket ennañ eun dentasion, eun dra gontrol bennag.

3.-N'eus den ebed diwallet diouz an tentasionou 'hed e vuhez, rag ennom ema an eienenn anezo : ganet om gand youlou direiz. Kerkent ha ma'z a diouzom eun dentasion pe eun dra gontrol, e teu eun all, hag atao on-eus eun dra bennag da houzañv ; rag kollet eo evid an dud ar stad eüruz m'oa bet krouet Adam enni.

Kalz a glask tehed diouz an tentasionou hag a gouez da houde gwasoh enno.

N'eo ket a-walh tehed evid beza treh, red eo c'hoaz kaoud pasianted, beza izel a galon ; gand kement-se, avad, e teuom a-benn euz on oll enebourien.

4.-An hini ne ra nemed tehed diouz an droug hep lakaad ar vouhal er wrizienn, n'ez aio ket pell war-raog ; rag an tentasionou a zistroio d'e gavoud hag a vezo kreñvoh-kreñva.

A-nebeudou, gand pasianted, gand amzer ha gand gras Doue, e teuoh a-benn da drehi ho tentasionou, gwelloc'h eged o skei taoliou gand kounnar.

Kemerit aliez kuzul en tentasionou ; na vezit ker rust e-keñver an hini a zo tentet, klaskit, er hontrol, frealzi anezañ evel ma karfeh beza frealzet hoh-unan.

5.-Ar pezh a zo kaoz d'an oll dentasionou eo ma'z eo re skañv or penn, ma lezom or spered da redeg ha m'on-eus nebeud a fiziañs e Doue, rag evel ma vez al lestr hep stur taolet ha distaolet gand an avel, evel-se ivez e vez hejet gand an tentasionou an den a zo skañv e benn, an den na zalh ket mad d'ar pezh e-neus lakeet en e spered.

An tan a ra anaoud an houarn, an dentasion a ra anaoud an den just.

Aliez n'en em anavezom ket ; en dentasion e welom petra om.

Red eo beilla koulskoude, ha dreist-oll er penn kenta, kerkent ha ma teu an dentasion ; rag êsoh e vez beza treh d'an enebour pa ne vez ket lezet da entren er spered, pa vez klozet an nor outi kerkent ha ma vez gwelet.

Eur skrivagner euz an amzer goz e-neus lavaret : « Taolit evez er penn kenta ; re ziwevad eo rei louzeier pa vez lezet ar hleñved da wrizienna er horv ».

Da genta e teu er spered eur zoñj, da houde eur skeudenn skeduz, da houde plijadur, da houde youlou ar horv a deu da vervi ha d'ar fin e vez roet degemer d'ar pehed. Hag evel-se e teu an enebour fall da veza a-nebeudou mestr deom ma n'her hasom ket da bourmen dioustu.

Ha seul-vui e vezer lezireg da harpa er penn kenta, seul-vui e teuer da zemplad bemdez ha seul-vui e

teu an enebour da greñvaad.

6.-Lod a vez tentet ar gwas en amzer genta goude m'int distroet da Zoue, lod en amzer diweza, lod o-deus da stourm e-pad o buhez, koulz lavared.

Lod a vez tentet eun nebeud hepken, hervez furnez ha justis Doue, rag Doue a anavez stad an den, a oar petra a dalv, hag a reñk pep tra evid silvidigez ar re a zo galvet d'ar Baradoz.

7.-Arabad eo deom eta fallgaloni pa vezom tentet, med pedi Doue gand muioh a nerz evid ma teuo d'or zikour en on trubuillou, rag hervez ma lavar sant Paol, Doue a roio tro deom da hounid gand an dentasion, nerz a roio deom da zond a-benn anezi.

Degemerom eta gand doujañs digand Doue on oll tentasionou, ha trubuillou, bezom izel a galon, rag ar re izel a galon a vezo salvet ha goloet a hloar.

8.-E-kreiz an tentasionou, an trubuillou, eo e vez gwelet ha kreñveet eo an den ; eno eo e hell gounid, eno eo e hell diskouez e zantelez.

Hiniennou n'o-deus ket a dentasionou braz, hag a zo trehet bemdez en tentasionou bihan a deu dezo. Kement-se a dle ober mez dezo ha deski dezo ne dleont ket kaoud fiziañs enno o-unan en tentasionou braz, peogwir en tentasionou bihan n'int ket êz da drehi.

KENTEL XIII

Na varnit ket re vuan ho nesa

1.-Troit ho taoulagad warnoh hoh-unan ha na dit ket da varn oberou ar re all. O varn ar re all, an den a goll e boan, a fazi aliez hag a hell ober pehedou, oh en em varn e-unan, avad, e raio atao eul labour talvouduz.

Aliez e varnom an traou hervez ma c'hoant or halon, oh en em gared re on-unan, ne hellom ket beza barnerien leal.

Ma ne glaskfem nemed plijoud da Zoue, on-devije nebeutoh a boan pa'z eer a-eneb deom.

2.-Med aliez e vez eun dra bennag pe er-mêz ahanom pe kuzet ennom o sacha ahanom.

Kalz ne glaskont nemed o mad o-unan e kemend a reont, heb gouzoud dezo.

Doare o-deus da veva e peoh ; ya, pa za pep tra hervez o hoant ; med ma teu an disterra enebiez, kerkent emaint en anken hag en dristidigez.

3.-An doare disheñvel da varn an traou a laka aliez diviz etre ar vignoned, etre an dud euz ar memez bro, ha zoken etre ar relijiusted hag an dud devod.

4.-Eur hiz fall a zo diêz dond a-benn anezi ha den ne gav êz beza kaset gand eun all, pa ne wel ket sklêr an hent dirazañ.

Mard eo gweloh ganeoh en em harpa war ho skiant, war ho spered lemm, kentoh eged beza izel a galon ha senti evel e-neus greet Jezuz-Krist, n'ez avoh ket buan nag uhel e skeul ar zantelez. Doue a fell dezañ gweled ahanom o lakaad or spered da blega a-zirazañ hag o sevel dre dan ar garantez dreist ar pezh a hell kompren.

KENTEL XIV

An oberou a garantez

1.-Evid netra er bed, nag evid plijoud da zen, ne dleer morse ober an disterra droug. Evelato, a-wechou, evid sikour unan bennag a zo er boan pe en ezomm, e hellom gedal a-raog ober eun dra vad bennag a zoñjem ober, e hellom treki ar vad-se ouz eun all, pe ober eur vad all gwelloh ; neuze n'eo ket dilezel ar vad a vez greet, med ober eun dra all gwelloh.

Ma n'ez eus ket a garantez er galon, ar pez a anver oberou a garantez ne dalv netra.

Kemend tra, avad, braz pe vihan, a zo greet dre garantez, a zoug atao frouez.

Rag Doue a zell nebeutoh ouz ar pez a roer eged ouz an doare da rei hag ouz kalon an den.

2.-Kalz labour a ra an hini e-neus kalz karantez. Kalz labour a ra an hini a ra mad pep tra. Ha mad-kenañ a ra an hini a glask, nann ar pez a blij dezañ, med ar pez a zo talvouduz d'an oll.

A-wechou e kav deom ez eus en or halon karantez, ha n'eus nemed youlou direiz. Rouez eo an dud distrob o halon diouz pep c'hoantegez kasauz. Douget d'ober e benn, atao o hedall gounid eun dra bennag, setu penaoz ema an den ; setu petra a glask en e oll oberou.

3.-An hini a zo en e galon ar wir garantez ne glask morse e netra ebed gounid evitañ e-unan ; ne glask nemed eun dra : gloar Doue. N'e-neus avi ouz den ha ne stag ket e galon ouz traou ar bed-mañ ; n'eo ket gantañ e-unan e klask e blijadur ; e Doue hepken e laka e eürusted.

Pa wel ober eur vad bennag, e trugareaka Doue, rag Doue, ha n'eo ket an dud, eo a ra pep tra vad. Doue eo an eienenn euz pep vad, hag e Doue eo e kav ar Zent ehan d'o foaniou hag eürusted da viken.

KENTEL XV

Red eo gouzañv plegou fall ar re all

1.-Ar pezh na hell ket an den lakaad da vond mad pe ennañ e-unan pe er re-all a dle da houzañv gand pasianted beteg ma plijo gand Doue cheñch doare d'an traou.

Soñjit eo marteze gwelloc'h an traou evidoh evel m'emaint, soñjit ho-peus tro da houzañv ha dre-ze, d'en em binvidikaad evid ar Baradoz. Ma n'ouzoh ket gouzañv, hoh oberou n'o-deus ket kalz a dalvoudegez.

Red eo evelato pedi Doue, evid ma sikouro ahanoh da veza treh d'ho poaniou pe d'o gouzañv gand nerz-kalon.

2.-Mar fell da eun den ober e benn goude m'ho-peus roet kuzul dezañ diou pe deir gwech, na jomit ket da goll amzer gantañ ; lakit pep tra etre daouarn Doue, evid ma vo greet bolontez Doue, ma vo enoret gand e oll zervicherien. Doue a oar tenna ar mad euz an droug.

Grit gwella ma helloh evid gouzañv faziou ar re all ha kemend a zo da rebech dezo, rag c'hwi ivez a ro tro d'ar re all da houzañv ganeoh.

Ma ne hellit ket hoh-unan dond da veza kerkoulz ha ma fell deoh, penaoz e hellfeh lakaad ar re all da veza hervez ma c'hoantait ?

Kontant om e ve ar re all hep mank ebed ha ne reom netra evid en em zizober diouz or plegou fall.

3.-C'hoant on-eus gweled ar re all o tilezel o flegou fall ; ni, avad, a zalh d'ar re on-eus.

Displijoud a ra deom e vije lezet re a gabestr gand ar re all ; arabad, avad, e vije nahet netra ouzom-ni.

Ra vezo greet lezennou evid ar re all ; ni, avad, ra vezim lezet digabestr.

Dre ze eo êz gweled pegen aliez on-eus eur muzul disheñvel evidom hag evid or nesa.

Ma ne vije netra da rebech d'ar re all, petra a hellfem da hounid evid Doue euz o ferz ?

4.-Med Doue e-neus reñket an traou en heveleb doare ma tleom deski gouzañv an eil gand egile, rag n'eus den parfed ebed, n'eus den ebed n'en-dije ket e zamm da zougen, n'en-dije ket ezomm da veza kenteliet. Red eo eta deom dougen samm an eil egile, en em freallzi, en em zikour, en em sklêrijenna, en em gentelia.

E-Kreiz ar boan eo e vez gwelet talvoudedez, furnez an den.

N'eo ket ar boan, an enkreiz, eo a lamm e nerz digand an den, med diskouez a reont petra a dalv.

KENTEL XVII

Diwar-benn buhez ar veneh

1.-Red eo deoh en em drehi e meur a dra, mar ho-peus c'hoant da veva e peoh gand ar re all.

N'eo ket eun dra dister beva en eur gouent pe en eur vreuriezh heb rei leh d'ar re all da glemm, ha kement-se beteg ar maro.

Eüruz an hini en-dezo bevet evel-se en eur gouent hag en-dezo dalhet mad beteg ar fin.

Ma fell deoh beza stard ha kreski e santelez, bevit evel eun divroad, eun tremeniad war an douar-mañ.

Red eo dre garantez evid Jezuz-Krist beza diskiant hervez ar bed, ma fell deoh beza eur gwir relijiuz.

2.-N'eo ket gwiskamant na kern-touz ar relijiuz eo o-deus talvoudegez; ar pezh a ra ar gwir relijiuz eo an aket e-neus da jeñch buhez ha da drehi e youlou fall.

An hini a glask eun dra bennag ouspenn kared Doue ha savetei e ene ne gavo nemed trubuil ha poan.

Ne hell ket kennebeud dalher mad pell amzer an hini na laka ket e boan da veza an disterra euz e vreudeur hag ar gwella da zenti.

3.-Evid senti eo ez oh deuet d'ar gouent ; dalhit soñj mad ez oh galvet da houzañv ha da labourad, nann da feneanti ha da zafari.

Ar gouent a ra anaoud an dud evel an tan a ra anaoud an aour.

Er gouent den ne hell harpa ma ne fell ket dezañ beza izel a galon dre garantez evid Doue.

KENTEL XVIII

Skweriou ar Zent

1.-Sellit mad ouz skweriou ar Zent, gwelit pegen santel e oa o buhez, pegen birvidig o feiz, hag e komprenoh eo dister hag evel netra, koulz lavared, ar pezh a reoh.

Ya ! petra eo or buhez e-kichenn o ohini ? Ar Zent, gwir vignoned Jezuz-Krist, o-deus, evid servicha Doue, gouzañvet naon, sehed, yenienn, labour, skuizder, o-deus beillet, yunet, tremenet o amzer o pedi, o soñjal e gwirioneziou ar relijion, a zo bet persekudet, disprizet e peb doare.

2.-Nag a drubuillou spontuz o-deus bet an Ebestel, ar verzerien, ar govesored, ar gwerhezded ha kement hini a zo eet war roudou Or Zalver !

Kasoni o-deus bet outo o-unan er bed-mañ evid savetei o ene er bed all.

Na pegen kaled, pegen poaniuz eo bet buhez an Tadou Santel en deserz ! Nag a dentasionou hir ha kasañz o-deus bet da houzañv ! Pegen aliez int bet heskinet gand an enebour ! Nag a bedennou nerzuz o-deus kaset war-zu Doue ! Nag a binijennou striz o-deus greet ! Nag a aket o-deus bet, nag a youl da greski e karantez Doue ! Pebez brezel o-deus greet d'o zechou fall ! Pegen glan, pegen eün e talhent bepred o halon da Zoue !

En deiz e labourent, en noz e reent pedennou hir, petra bennag ne baouzent e-kreiz o labour da zoñjal e Doue.

3.- O oll amzer a veze implijet mad, berr e kavent an eur a roent da Zoue, ha kemend a joa o-doa o pedi ma ankounac'haent rei d'ar horv ar pezh e-noa ezomm.

Distaga a reent o halon diouz arhant, enoriou, mignoned, kerent ; n'o-doa avi ouz netra war an douar, a-veh e kemerent ar pezh a oa red evid chom beo : taoler evez ouz o horv, zoken pa veze ezomm, a gavent kaled.

Paour e oant euz madou an douar, med pinvidig-mor euz madou an Neñv, grasou Doue hag ar vertuziou.

Da weled d'an dud edont en dienez, med o halon en diabarz a oa pinvidig meurbed, karget gand grasou Doue.

4.-Evid ar bed e oant tud estren, med da Zoue e oant mignoned vraz. En em gemered a reent o-unan evid netra hag ar bed o disprije ; med dirag daoulagad Doue e teue dezo grasou Doue e-leiz.

Roet int bet da skwer d'an oll relijiusted ; war o roudou e tleom bale ha nann war roudou ar re a zo deuet da veza lezireg hag o-deus lezet o halon da glouarraad.

5.-O pegen birvidig e oa karantez ar relijiusted en amzeriou kenta !

Pegen c'hweg e oa o fedennou ! Pegen brao eh en em zougent an eil egile d'ar mad ! Pegen striz e oa ar reolenn ! Pegen laouen e oant o senti ouz o mestr !

Deuet ez eus beteg ennom evel eur skeudenn euz an amzer-ze hag e welom pegen santel, pegen parfed eo bet an dud-se a ree brezel gand nerz-kalon hag a vrese ar bed dindan o zreid.

Hirio e kaver eo kalz chom hep mond eneb al lezenn ha gouzañv gand pasianted ar poaniou a zegouez.

6.-O pegen klouar, pegen dieguz om-ni ! Pegen buan e teuom da fallgaloni, da goll an devosion on-devoa da veza skuiz gand ar vuhez a gavom re bonner!

Ra viro Doue na'z afeh da gousked war hent ar zilvidigez, goude beza gwelet kemend a skweriou kaer roet deoh gand ar Zent !

KENTEL XIX

Penaoz e tremen eur gwir relijiuz e amzer

1.-Buhez eur gwir relijiuz a dle beza karget gand an oll vertuziou, evid ma vezo e goueled e galon ar pezh ma'z eo dirag an dud.

Hag e gwirionez, red eo e vefe e goueled e galon santelloh eged ma'z eo dirag an dud, rag Doue a wel ahanom, hag e tleom, e kemend leh emaom, beza leun a zoujañs evitañ ha bale dirazañ kaer evel an Êlez.

Bemdez e tleom kennerza a-nevez or bolontez, en em lakaad a-zevri da vale war hent ar zantelez, kregi en ol labour evel pa vije an devez kenta m'om en em roet da Zoue.

Sikourit ahanon, Aotrou, da zalher stard d'am labour ha d'ho servija mad, grit din komañs evid mad hirio, rag beteg-henn n'am-eus greet netra.

2.-Diouz ma poniom eo e kreskom e karantez Doue : an den a hoanta mond a-raog a rank beza leun a aket.

Ma teu aliez da goueza an hini a oar kennerza e volontez, petra n'en em gavo ket gand an hini na laka morse, koulz lavared, e boan hag e galon da labour vad ebed ?

Meur a zoare a zo da loskaad, da fallgaloni ; dilezel an disterra tra vad on-doa da ober a zo noazuz d'an ene.

An dud santel evid dalher mad o-deus muioh a fiziañs e gras Doue eged en o furnez o-unan ; ha n'eus forz petra a reont, e Doue eo ema o fiziañs.

Rag an den paour ne oar nemed lavared :

Gand Doue hepken e lavar a vez greet.

3.-Ma tilezom a-wechou or pedennou hag on oberou a zevosion evid eun dra-all a blij muioh da Zoue pe dre garantez evid an nesa, eo êz deom kaoud digoll diwezatoh.

Med ma tilezom anezo dre ziegi, evid an disterra abeg, n'om ket direbech hag ez eom war or hiz.

Deom a-raog gwella ma hellom, dalhom mad ; c'hoaz on devezo meur a lamm bihan.

Red eo deom gweled mad on hent dirazom, ha stourm dreist-oll ouz an traou a zo oh enebi ar muia ouzom.

An traou en diavêz hag en diabarz a rankom anaoud ha reizha mad, abalamour da helloud kreski er zantelez.

4.-Ma ne hellit ket beza atao o selled en ho koustiañs, her grit evelato beb an amzer ha da vihanna mintin ha noz.

Diouz ar mintin grit ho soñj da zalher mad, diouz an noz gwelit ha dalhet ho-peus, gwelit petra eo bet ho komzou ; hoh oberou, ho soñjou, rag dre eno eo ho-peus marteze ofañset meur a wech Doue hag an nesa.

Evel eur zoudard, en me lakit e stad da stourm ouuz ardou an droug-spered.

Ho korv a zo douget d'an debri ha d'an eva : dalhit warnañ hag e vezo êsoh deoh beza treh d'ar gwall youlou.

Na jomit morse dibreder, med lennit, pedit, skrivit, soñjit e Doue pe grit eul labour all bennag war-dro an ti.

Evelato n'en em roit da labouriou ar horv nemed gand evez, rag al labouriou-ze ne zereont ket kemend ouz an eil hag ouz egile.

5.-Ar pez a vez greet dreist ar pez a zo gourhemennet ne dle ket beza diskouezet ; gwelloh eo dalher kuzet an traou a reer evel-se.

Diwallit evelato da zilezel an traou a dle an oll ober evid mond d'ar re a blij deoh ; grit da genta evel an oll ; da houde, mar ho-peus amzer, e helloh ober ar pez a blij deoh, ober ar pedennou a garoh.

Zoken, hervez an amzer, e karer an dra-mañ pe an dra-hont ; devosionou a gaver gwelloh d'ar goueliou, lod all da bemdez.

Lod a ra vad pa vezer tentet, lod all pa vez an ene e peoh ; lod, pa vez eun dra bennag o tiêza ahanom ; lod all, pa vez levenez Doue en or halon.

6.-D'ar goueliou braz e tleom renevezi or harantez evid Doue, ha pedi startoh ar Zent.

Euz eur gouel da hedall eun all, bevom evel pa dleem mervel d'ar gouel a zeu ha degouezoud er gouel a bado da viken.

Ya, en amzeriou santel euz ar bloaz e tleom en em lakaad e stad vad, beza gwelloh da bedi, da zenti ouz kemend a houlen ar reolenn, evel pa dlefem dizale kaoud digand Doue or pae.

7.-Ha ma tale Doue d'or galver, kredom eo abalamour n'emaom ket e stad vad a-walh ha n'on-deus ket gounezet c'hoaz ar gurunenn a hloar a lugerno war or penn en deiz merket. Ha poaniom d'en em brepari gwelloh-gwella a-benn devez or maro

Eüruz, eme an Aviel Sant Lukaz, eüruz ar zervicher a vezo kavet war evez gand e vestr, pa deuio d'hen gervel. E gwirionez hen lavaran deoh, Doue hen lakaio da vestr war e oll vadou.

KENTEL XX

Kared beva sioul, pell diouz an trouz

1.-Klaskit eun tamm amzer bennag evid teuler evez ouzoh hoh-unan, ha soñjit aliez e madeleziou Doue.

Lezit a-goztez an traou a laka glahar en ho kalon kentoh eged ar re a ra plijadur.

Ma karit dilezel ar homzou didalvez, ma ne droit ket ho tiouskouarn da zelaou kemend a zo a-nevez, kemend a zo en em gavet, e kavot amzer a-walh evid soñjal e Doue hag en ho silvidigez.

Ar zent vrasa a ree gwella ma hellent evid tehed diouz an dud a hoantee kaozeal, hag a gave gwelloc'h beva sioul gand Doue.

2.-Eun den e-neus lavaret : « Bep tro m'on bet e-touez an dud, on distroet falloh den eged a-raog ». Ha kement-se a zo en em gavet ganeom ivez p'on-eus kollet on amzer o tiviz.

Êsoh eo tevel eged chom hep komz re.

Êsoh eo chom kuzet er gêr eged taoler evez a-walh er mêz.

An hini eta a hoanta kaoud peoh, levez Doue en e galon, a dle mond gand Jezuz pell diouz an dud. Den ne hell mond heb aon e-touez an dud nemed an hini a gar beza kuzet.

Den ne hell komz heb aon, nemed an hini a gar tevel.

Den ne hell heb aon beza e penn ar re all, nemed an hini a gar beza an disterra.

3.-Den ne hell heb aon komandi nemed an hini na ra e goustiañs rebech ebed dezañ..

Ar Zent, e-kreiz o fiziañs, a veze atao doujañs Doue leun o halon.

Ha war evez e vezent bepred hag izel a galon, daoust pegen skkeduz e oa o eneoù gand ar vertuzioù hag ar zantelez.

Ar beherien a zo dienkreiz abalamour d'o ourgouill ha d'ar fiziañs vraz o-deus enno o-unan ; ha kement-se a deu d'o dalla ha d'o holl.

Na vezit morse heb enkreiz er bed-mañ, ha goude ma vijeh eur relijiuz pe eun ermit santel.

4.-Aliez ar re kavet gwella gand an dud a zo bet taolet en dañjerioù brasa abalamour m'o-doa re a fiziañs enno o-unan.

Rag-se da lod eo gwelloc'h na vijent morse lezel e peoh gand an dentasion, med atao broudet ganti, evid n'en em roint ket da gousked, evid na zeuint ket da veza ourgouilluz na da glask frealzidigez ar bed.

O ! an hini na glaskfe ket ar plijadureziou a dremen, an hini na vije morse touellet gand traou ar bed, pegen kaer e talhfe e goustiañs !

An hini na rafe van gand an traou hep talvoudegez, an hini na zoñjfe nemed e madou an Neñv, e madou e ene, an hini a lakfe e oll fiziañs e Doue, nag a beoh, nag a eürusted en-divije !

5.-Den ne hell gedal beza frealzet gand Doue, nemed poaniet en-divije da gaoud keuz d'e behedou.

Mar ho-peus c'hoant da gaoud keuz d'ho pehedou, it en ho kambr ha lezit pell diouzoh trouz ar bed, evel

m'eo bet skrivet : en ho kambr, en em lakait da gaoud glahar d'ho pehedou. En ho ti e kavoh ar pezh a gollfeh aliez er-mêz. Karit chom en ho kambr hag e teuo da blijoud deoh. Inoùz avad e vezo, ma'z it aliez aer-mêz.

Ma ouzoh, en amzer genta m'ho-peus troet kein d'ar bed, karet ho kambr, chom enni, e stago ho kalon outi hag e vezoh eüruz enni.

6.-O veva sioul ha didrouz, an ene devod a zav uhel er zantelez, hag a zesk an traou kuzet er Skritur Sakr.

Eno e kav eur feunteun a zaelou d'en em walhi, d'en em gaerraad beb noz, da zond da veza seul vrasoh mignoned da Zoue ma'z eo chomet pelloh diouz oll drouz ar bed.

An hini a zilez e gerent, e vignoned, a gavo Doue hag e êlez.

Gwelloh eo chom kuzet ha labourad da gaerraad an ene, eged ober miraklou ha chom hep soñjal en ene.

Eun dra vad eo evid ar relijiuz mond nebeud er-mêz, mouga ar c'hoant da veza gwelet ha da weled ar re all.

7.-Perag e fell deoh gweled traou n'hoh-eus aotre da gaoud ?

Tremen a ra ar bed hag ar plijadureziou.

Kaset e vezom du-mañ du-hont gand or c'hoantegeziou fall ; med da houde petra a jom nemed anken er goustiañs ha peoh ebed evid ar galon?

Aliez e vez laouen ar penn o vond er-mêz ha teñval o tistrei d'ar gêr, ha goude beza chomet pell da hoarzin diouz an noz, e vezer trist o sevel diouz ar mintin.

Evel-se e ra traou kaer ar bed : plijadur a reont da genta, med d'o heul e teu an enkrezh hag ar maro.

Petra a helloh gweled el leh alll ouspenn ar pezh a welit amañ ? Setu an Neñv, an douar ha kement 'zo ; anezo eo deuet pep tra.

8.-Petra a hellfeh da weled en en eun tu bennag hag a vije paduz ?

Kavoud a ra deoh e vezo kontantet ho kalon ? Nann, fazia a rit.

Ha pa vije an oll draou krouet dirag ho taoulagad, petra a welfeh nemed skeudennou goullo ?

Savit ho taoulagad war-zu an Neñv e-leh m'ema Doue, ha pedit evid ho pehedou hag ho mankou.

Lezit an traou didalvez gand an dud o-deus amzer da goll ; troit, avad ho spered war-zu an traou e-neus gourhemennet Doue deoh.

Prennit ho tor warnoh ha pedit Jezuz ho muia-karet. Chomit gantañ en ho kambr, rag e neb leh all ne gavoh kemend a beoh.

Ma ne vijeh ket eet er-mêz da zelaou koñchou, e vije chomet ar peoh en ho kalon. O veza ma klaskit kleved petra 'zo a-nevez, eo red deoh kaoud trubuill.

KENTEL XXI

Kaoud doujañs Doue er galon ha glahar d'ar pehedou

1.-Ma fell deoh pinvidikaad hoh ene, ra vezo atao en ho kalon doujañs Doue, ha na lezit ket re a gabestr gand ho c'hoantegeziou med dalhit mad warno ha n'en em roit ket da levez ar bed.

Ra vezo en ho kalon glahar d'ho pehedou hag ho-pezo ar wir devosion.

Ar glahar d'ar pehedou a zegas kalz vad, med ar vad-se a ya da goll pa vez sentet ouz c'hoantegeziou foll ar galon.

Souezuz eo e hellfe an den kaoud gwir levez er bed-mañ pa zoñj n'ez eo nemed eun divroad war an douar hag ema o veva e-kreiz an dañjeriou.

2.-Pennou skañv n'om ken, tud dievez, ne welom ket or zempladurez na poaniou on ene. Hag eh en em lezom da hoarzin pa vije red leñva.

N'eus na liberte na joa wirion nemed evid an hini e-neus doujañs Doue hag eur goustiañs vad.

Eüruz an hini a hell kas pell dioutañ kemend a ra dezañ beza dievez hag a deu en e galon glahar zantel !

Eüruz an hini a hell kas pell dioutañ kemend a deufe da zaotri, da zamma e goustiañs !

Stourmit gand nerz kalon ; eur pleg fall a heller da derri o lakaad eur pleg mad en e leh.

Ma ouezit tehed diouz an dud, an dud ivez a lezo ahanoh da ober evel a garoh.

3.-Na dit ket d'en em stroba gand kudennou ar re all ha gand aferiou ar re vraz.

Ra vezo ho taoulagad o para warnoh hoh-unan da genta a-raog kentelia ho mignoned.

Ma ne vez ket greet kalz a stad ahanoh, na vezit ket poaniet evid kement-se ; poan a hellit da gaoud abalamour na vevit ket mad a-walh ha ne daoloh ket evez evel ma tlefe ober eur gwir zervicher da Zoue, eur gwir relijiuz.

A-wechou eo gwelloc'h ha surroh chom hep kaoud amañ kalz a frealzidigez, dreist-oll a-berz ar bed.

Evelato pa ne deu ket deom frealzidigez euz an Neñv, pe ma ne deu nemed eun tammig, ni eo a zo kaoz, abalamour ne glaskomm ket glahar ar galon hag emaom o hedal frealzidigez ar bed-mañ, daoust pegen dister eo.

4.-Anzavit ne veritoh ket beza frealzet gand Doue, med kentoh beza gwasket gand ar boan.

P'e-neus an den gwir glahar d'e behedou, neuze ar bed-oll a deu da veza ponner ha c'hwero evitañ.

An den santel e-neus leh atao da gaoud glahar ha da leñva.

O selled outañ e-unan pe o selled ouz ar re all, e wel n'ez eus den dienkreuz er bed-mañ.

Ha seul-vui e sell piz outañ e-unan, seul vrasoh eo e hlahar.

Ar pezh a ro leh deom da gaoud glahar ha tristidigez en or halon eo or pehedou hag or plegou fall ; ken chadennet om gantao, ma n'om ket evid trei trei on daoulagad war-zu traou an Neñv.

5.-Ma karfeh soñjal aliesoh er maro eged en amzer hir ho-peus c'hoaz c'hoant da jom war an douar, heb mar ebed, e labourfeh gwelloc'h d'ober pinijenn euz ho pehedou.

Ma karfeh ivez en em lakaad a galon vad da zoñjal e poaniou an ivern pe e poaniou ar purgator, me a gred e hellfeh neuze gouzañv gand joa ar boan hag an anken ; ne vije netra re bonner evidoh.

Med o veza ne ziskenn ket ar zoñjou-ze er galon, hag e karom an traou d'ar horv, e chomom klouar ha n'ez eom tamm war a-raog.

6.-A-wechou, abalamour m'eo dinerz or spered eo e teu or horv d'en em glemm evid an disterra tra.

Bezit eta izel a galon, ha pedit an Aotrou Doue da rei deoh glahar d'ho pehedou, ha lavarit gand ar Profed :

« Aotrou, roit din da zebri bara va daelou, roit kalir an daelou da derri va zehed ».

KENTEL XXII

Poaniou ar vuhez-mañ

1.-Maleüruz oh n'eus forz e pe leh emaoñ, n'eus forz e pe du en em droit, nemed da Zoue ez afeh.

Perag oh trubuillet war zigarez n'ez a ket an traou evel ma c'hoantait ?

Piou e-neus atao e hoant war an douar-mañ ? Na me, na te, na den ebed.

Den ebed war an douar ne dremen hep kaoud eun tamm trubuil, eun tamm anken bennag goude ma ve Roue ha Pab.

Piou a zo gwella e lodenn ? An hini a zo gouest da houzañv eun dra bennag evid Doue.

2.-Klevet e vez tud diskiant o lavared : « O ! na kaerra buhez e-neus hennez ! pegen pinvidig ! pegen braz ! pegen gallouduz ! pegen uhel eo savet ! »

Med sellit ouz madou an Neñv, hag e weloh ne dalv netra madou ar bed-mañ, n'int ket paduz, n'ez int nemed eur beh ponner, ouz o heul n'ez eus nemed aon hag enkreiz.

N'eo ket madou an douar ha danvez e-leiz eo a laka an den eüruz ; gand eun nebeudig e-neus a-walh.

E gwirionez, kement hini a zo war an douar-mañ a zo maleüruz.

Seul-vui e fell d'an den en em zistaga diouz traou an douar, seul-vui e kav c'hwero ar vuhez-mañ, abalamour ma wel gweloh ha sklêrroh pegemend a fallagriez a zo e kalon an dud, pegemend a deñvalijenn war o spered.

Rag debri, eva, beilla, kousked, diskuiza, labourad ha plega d'an ezommou all euz ar horv, kement-se a zo eur beh ponner ha poaniuz evid an den santel a garfe beza libr ha dsitrob a bep pehed.

3.-Ya, eur beh ponner eo evid an den a zo troet e spered ouz Doue gweled e rank pllega da ezommou ar horv er bed-mañ.

Rag-se ar Profed a houlenn digand Doue gand eur vouez truezuz beza dizammet anezo: « O va Doue, tennit diganin va liammou ponner ».

Med, gwaz a-ze d'ar re na anavezont ket e pe stad truezuz emaint amañ ; gwaz a-ze dreist-oll d'ar re en em blij e-kreiz ar vuhez-mañ, kemend enni a boaniou, a anken.

Darn 'zo e-touez an dud, daoust m'o-deus beh o veva, diouz o labour pe diouz an aluzenn, hag a zo evelato ken stag ouz ar vuhez-mañ, ma chomfent heb ober forz gand rouantelez an Neñv, ma hellfent chom atao war an douar.

4.-Tud diskiant, tud digalon ! Ken troet int ouz traou an douar ma ne gavont blaz mad nemed gand plijadureziou ar horv.

Paour kêz tud ! Na hwero e vezo dezo, d'an deiz diweza, kompren pegen dister, pegen didalvez e oa ar pezh o-deus karet !

Ar Zent, avad, hag oll vignoned Jezuz-Krist, n'o-deus ket sellet ouz ar pezh a blijed d'ar horv nag ouz traou kaer ar bed-mañ ; o fiziañs, o halon a oa troet ouz an Neñv.

Ne hoantaent nemed traou an Neñv, an traou paduz, an traou na weler ker ha tehed a reent diouz an traou a blij d'ar horv, gand aon da veza distroet diouz madou ar Baradoz.

5.-Va breur, na gollit ket fiziañs, mond a helloh war gresk e karantez Doue, amzer ho-peus c'hoaz.

Perag gedal atao warhoaz a-raog kregi el labour ? Savit war ho treid, krogit dioustu ha lavarit : Ema ar mare da labourad, da stourm ; ema ar mare da wellaad va buhez.

P'ho-peus poan hag enkreuz, neuze ema ar mare da hounid evid ar Baradoz.

Red eo deoh tremen dre an tan hag an dour a-raog en em gaoud el leh eüruz

Ma ne stourmit ket gand nerz, ne deuh ket a-benn euz ho techou fall.

Keit ha m'on-devezo ar horv bresk-mañ da zougen, ne hellom ket beza hep pehed, nag hep poan, nag heb enkreuz.

Kared a rafem beza hep poan ebed, med o veza m'eo bet stlabezet on ene dre ar pehed, on-eus kollet ivez ar wir eürusted.

Red eo deom eta kaoud pasianted, lakaad or fiziañs e Doue, ken na vezo tremenet fallagriez ar pehed, ken na vezo lonket ar maro gand ar vuhez.

6.-O ! pegen bresk eo an den ! Atao eo techet d'an droug. Hirio ho-peus keuz d'ho pehedou, warhoaz e kouezit enno adarre.

Bremañ e fell deoh diwall, hag a-benn eun eur, e rit evel ma n'ho-pije bet c'hoant mad ebed.

Red eo deom eta beza izel a galon ha diwall da veza lorhuz, peogir ez om ken bresk, ken dinerz.

Taolom evez bepred, rag o veza dievez e hellom koll buan ar pezh on-doa gounezet gand kalz labour ha kalz grasou.

7.-Petra en em gavo ganeom a-benn an noz, ma'z om ken digalon a-veh ma tarz an deiz ?

Gwaz-a-ze evidom, ma klaskom ehana evel pa vije deuet ar peoh hag an amzer vrao ; poaniom, rag ne weler ket c'hoaz en or buhez an disterra merk euz ar wir zantelez.

Ezomm on-devije da veza kenteliet c'hoaz evel tud yaouank nevez-deuet d'ar gouent ; ma vije da vihanna eun tamm fiziañs da weled ahanom o tond da veza furroh ha santelloh.

KENTEL XXIII

Soñjit er maro

1.-Dizale ho-pezo peurhreet ho peaj er bed-mañ, gwelit 'ta e pe stad emao.

Hirio an den a zo e buhez ha warhoaz n'her gweler mui.

Ha pa ne vez mui gwelet gand an daoulagad, buan e teu da veza ankounac'heet

O ! Pegen dall, pegen diskiant eo an den da deurel kemend a evez ouz traou ar bed-mañ, ken nebeud ouz traou an Neñv.

E kemend a reoh, a zoñjoh, e tlefeh beza evel eun den a wel ar maro dirag e zaoulagad.

Ma vije ho koustiañs e peoh, n'ho-pije ket ezomm da gaoud aon rag ar maro.

Gwelloh eo diwall diouz ar pehedou eged klask tehed diouz ar maro.

Ma n'emaoh ket hirio e stad vad, penaoz e viot warhoaz ?

Marteze e weloh an devez warhoaz, marteze ne weloh ket, ne hellit ket her gouzoud.

2.-Petra a zervij beva pell pa reom ken nebeud evid gwellaad or buhez ?

Eur vuhez hir a-wechou ne ra ket d'an den gwellaad, ne ra nemed kreski samm ar pehedou.

Plijet gand Doue e tremenfem eun devez hepken euz or buhez evel m'eo dleet !

Kalz a zo o konta ar bloaveziou abaoe m'int en em roet da Zoue, med aliez eo dister ar gounid o-deus greet war hent ar Baradoz.

Mar deo spontuz mervel, spontusoh eo c'hoaz marteze chom pelloh war an douar.

Eüruz an hini a zoñj bepred en e eur ziweza, an hini a zo bemdez oh en em lakaad e stad vad da vervel.

Mar ho-peus gwelet eun den bennag o vervel, soñjit e rankoh ivez tremen dre ar memez hent.

3.-P'eo deuet goulou deiz, soñjit n'ez eoh ket marteze beteg an noz.

Ha p'eo deuet an abardaez, na dit ket da gonta war an devez warhoaz.

Bezit atao prest, ha bevit en heveleb doare ma kavio atao ar maro ahanoh e stad vad.

Kalz o-deus eur maro trumm, a zo skoet pa zoñjont an nebeuta, rag Mab an den a deuio d'an eur ma ne vezer ket war-hed anezañ.

Pa vezo deuet an eur-ze, hoh eur diweza, neuze ne weloh mui ho puhez tremenet gand ar memez daoulagad ha kentoh hag ho-pezo keuz da veza bet ken dieguuz, ken lezireg.

4.-Pegen eüruz ha pegen fur eo an den a glask beza bremañ er stad ma c'hoantaio beza da eur e varo.

Fiziañs a hello da gaoud da ober eur maro mad an hini en-devezo greet fae war ar bed, poaniet da greski e karantez Doue, kared senti, ober pinijenn, soubla, en em ankounac'haad e-unan ha gouzañv pep tra dre

garantez evid Jezuz-Krist.

Kalz labour vad a hellit ober e-pad ma'z oh yah ; pa deuiio ar hleñved ne ouzon ket petra a hellfeh da ober.

Rouez eo ar re a deu da wellaad e-pad eur hleñved ; rouez ivez ar re a deu da zantellaad o vond da bardona aliez.

5.-Na dit ket da lakaad ho fiziañs en ho mignoned, en ho kerent, na zaleit da gregi e labour ho sillvidigez ; buannoh eged na gredoh e vezoh ankounac'heet gand an dud.

Gwelloh eo deoh eta gounid bremañ evid an Neñv, pinvidikaad hoh ene dre an oberou mad, eged gedal sikour digand ar re all.

Ma n'oh ket bremañ aketuz da glask ho mad hoh-unan, piou a gav deoh a labourou evidoh en amzer da zond ?

Setu bremañ an amzer talvouduz, amzer an eost, amzer ar zilvidigez.

Siwaz ! ne zoñjit ket a-walh pegen braz priz e-neus eun amzer hag a hell talvezoud deoh da hounid an eternite !

Dond a raio ar mare ma houlennoh eun devez pe eun eur evid en em lakaad e stad vad, ha ne ouzom ket ha c'hwi a vezo selaouet.

6.-Gwelit 'ta, mignoned ker, euz pebez dañjer, eus pebez enkrez e helloh en em denna ma vezit atao war-hed euz ar maro, mar ho-peus aon rag ar maro.

Grit bremañ gwella ma hellit da veva en eun heveleb doare m'ho-pezo tro da veza laouen ha nann glaharet pa zono eur ho maro.

Deskit bremañ mervel d'ar bed, evid ma helloh neuze beva gand Jezuz-Krist

Kastizit ho korv bremañ dre ar binijenn, evid ma helloh neuze beza leun a fiziañs.

7.-A ! den diskiant ! Penaoz e lakit en ho spered beva pell pa n'oh ket sur da gaoud amañ eun devez hepken evidoh !

Ped gwech n'ho-peus ket klevet lavared eo bet lazet hemañ gand eun taol kleze, eo bet henez beuzet, e-neus eun all torret e houzoug o koueza euz eul leh uhel, eo maro eun all e-kreiz debri, eun all e-kreiz c'hoari !

Lod a varv dre an tan, lod dre ar hleze, lod dre ar vosenn, lod a vez lazet gand al laeron ; d'an oll eo red mervel, ha buhez an den a dremen, evel ar skeud.

8.-Piou a zalho soñj ahanoh goude ar maro ? Ha piou a bedo evidoh ?

Grit 'ta bremañ, va mignon ker, ar pez a hellit ober ; rag ne ouzoh ket peur e varvoh na petra en em gavo ganeoh goude ho maro.

E-pad m'ho-peus amzer, dastumit danvez a bado da viken. N'ho-pezit ken c'hoant nemed ober ho

silvidigez, na glaskit nemed servija Doue.

Gounezit bremañ, oh enori ar Zent hag o kemered skwer warno, evid m'ho tigemerint e rouantelez an Neñv pa vezoh eet euz ar bed-mañ.

9.-Bezit war an douar-mañ evel eun divroad, eur beajour a ra fae war draou ar bed.

Dalhit ho kalon distrob, troet war-zu Doue, war-zu an Neñv, rag n'eo ket amañ ema ho pro.

Kasit bemdez war-zu an Neñv ho pedennou, hoh hirvoudou, ho taelou, evid ma hello hoh ene goude ar maro nijal eün d'an eürusted eternal er Baradoz.

Evel-se bezet greet.

KENTEL XIV

Ar varn ha poaniou ar beherien

1.-E kemend a reot, soñjit petra en em gavo war-lerh, soñjit e rankoh mond dirag ar Barner didruez, eur barner na heller kuzad netra outañ, eur barner na heller ket da hounid o kinnig dezañ eun dra bennag, eur Barner na ra van evid kleved digareziou, med a varn gand lealded.

O ! peher maleüruz, peher diskiant, petra a helli da respont da Zoue a anavez da oll behedou, pa weler ahanout a-wechou o krena dirag eun den droug ennañ ?

Perag n'en em breparit ket evid deiz ar varn, peogwir ne hello den beza divennet, didamallet gand eun all ? Rag pep hini en-devezo a-walh gand e zamm e-unan.

Bremañ ho labour a zoug frouez ; ho taelou, hoh hirvoudou a zo selaouet, ho poaniou a zo talvoudeg evid paea ho pehedou ha gwalhi hoh ene.

2.-Ober purgator ha purgator mad meurbed a ra an den a oar gouzañv ; gwalgaset e vez gand ar re all, med ne glemm morse ; glaharet eo muioh o weled pegen fall eo kalon ar re all eged o houzañv euz o ferz ; pedi a ra evid ar re a zo oh enebi outañ hag a-greiz kalon e pardon dezo ; troet eo da gaoud truez ouz an dud muioh eged da vond e kounnar outao ; dalher a ra stard war e youlou fall hag atao e laka e gorv da bleaga d'ar spered. Ya, ober evel-se a zo ober purgator.

Gwelloh eo ober bremañ pinijenn evid ar pehedou ha troha gwriziou ar visou fall eged gedal ar bed all evid paea evito.

Touellet om e gwirionez gand ar garantez re vraz a zougom d'or horv.

3.-Petra en-dezo tan ar bed all da zevi nemed ho pehedou ?

Seul-vui ho-peus bremañ damant d'ho korv, seul-vui e reoh stad anezañ, seul vrasoh poan ho-pezo da houzañv diwezatoh, seul vuioh a zanvez a zastumoh evid an tan.

En izili m'en-dezo an den ar muia pehet ganto en-dezo ivez ar muia da houzañv.

Eno an dud dieguz a vezo broudet gand glaou ruz-tan, al lonkerien a vezo tourmantet gand an naon hag ar zehed.

An dud lubrik, ar re o-dezo en em roet da blijadureziou ar hig, a vezo taolet e-kreiz an tan beo hag ar soufr flêriuz, hag evel chas kounnaret an dud aviuz a yudo gand o foan.

4.-Pehed ebed ne jomo hep kaoud ar boan dleet dezañ.

An dud ourgouilluz a vezo goloet a vez ; ar re o-deus staget o halon ouz an arhant a vezo er brasa dienez.

Eun eur boan er bed all a vezo krisoh eged kant vloaz er bed-mañ e-kreiz ar pinijennou kaleta.

Eno ehan ebed, frealzidigez ebed evid an dud daonet ; n'eo evel amañ, rag war an douar e vez a-wechou ehan d'ar poaniou ha mignoned d'on frealzi.

Bezit eta bremañ leun a enkrez hag a hlahar abalamour d'ho pehedou evid ma helloh beza beb aon da zeiz ar varn kag en em gaoud e-touez ar re eüruz.

Neuze an dud just a zavo sonn o fenn dirag ar re o-deus greet poan dezo, disprizet anezo.

Neuze e vo gwelet o sevel en e zav evid barn, an hini a lez bremañ ar re all d'e varn heb lavared ger.

Neuze an den paour, an den izel a galon, a vezo leun a fiziañs, hag an den lorhuz en-dezo aon vraz.

5.-Neuze e vo komprenet eo bet fur er bed-mañ an hini e-neus gouezet beza diskiant ha disprizet dre garantez evid Jezuz-Krist.

Neuze e vezo laouen an den en-dezo gouzañvet gand pasianted trubuillou ar bed-mañ hag an den fallagr a ranko dalher kloz e henou.

Neuze e vezo eüruz an dud devod, hag an dud difeiz a vezo teñval o fenn.

Neuze e vezo joa evid beza kastizet ar horv muioh eged evid beza atao bevet e-kreiz ar plijadureziou.

Neuze e lugerno an dillad dister, hag an dillad kaer n'o-dezo tamm sked ebed.

Neuze eun tiig paour a vezo kavet gwelloc'h eged eur palez alaouret ;

Neuze e talvezo muioh beza gouzañvet hep klemm eged beza bet oll halloud war an douar.

Neuze e vezo roet muioh a veuleudi d'ar re a vezo bet mad da zenti eged d'ar re o-devezo bet ijin war an douar-mañ.

6.-Neuze e vezo laouennoh an den en-dezo eur goustiañs vad ha digatar eged an den en-dezo eun deskadurez vraz.

Neuze beza greet fae war madou an douar a dalvezo muioh eged beza bet pinvidig braz. Beza bet mad da bedi a dalvezo muioh eged beza debret prejou a briz braz.

Neuze oberou mad a dalvezo muioh eged komzou kaer, hag en eur vuhez a boan, a binijenn, muioh eged oll blijaduriou an douar.

Deskit 'ta bremañ gouzañv poaniou dister evid ma'z aio neuze e-biou deoh poaniou kriz.

Gwelit bremañ da genta petra a helloh da houzañv goude-ze. Ma n'oh ket evid dougen bremañ an disterra poan penaoz e helloh gouzañv ar poaniou a bado da viken ?

Grit ho choaz : ne hellit ket en em rei da blijadureziou ar bed-mañ ha beza eüruz gand Jezuz-Krist.

7.-Ha goude ma vijeh bet beteg bremañ e-kreiz an enoriou hag ar plijadureziou, petra a dalvezfe deoh kement-se, ma rankfeh mervel bremañ dioustu ?

Kared Doue hag e zervija, setu aze petra a zo da ober ; an oll draou all ne dalvezont da netra.

An hini a gar Doue euz a-greiz e galon n'e-neus ket aon rag ar maro, na rag ar poaniou, na rag ar varn, na

rag an ivern ; ar garantez a zigor frank hag eün an hent a gas d'ar baradoz.

An hini a zo c'hoaz stag e galon ouz ar pehed, n'eo ket souezuz e-nije aon rag ar maro ha rag ar varn.

Evelato, ma n'eo ket c'hoaz ho karantez braz a-walh evid pellaad ahanaoñ diouz ar pehed, eo mad e vijeh distroet diouz ar pehed gand ar spont a zegas deoh ar zoñj euz an ivern.

An hini, avad, n'ema ket doujañs Doue en e galon ne hello ket derhel pell en hent mad, med koueza a raio buan e rouejou an droug-spered.

KENTEL XXV

Poaniom da wellaad or buhez

1.-Bezit aketuz, leun a galon vad o servicha an Aotrou Doue ha soñjit aliez evid petra oh deuet amañ, evid petra ho-peus dilezet ar bed. Daoust ha n'eo ket evid beza da Zoue, rei dezañ ho kalon hag he distaga diouz an douar-mañ ?

Labourit 'ta da vond war wellaad, rag dizale e vezo paeet ho labour deoh, ha neuze n'ho pezo mui nag aon na poan ebed.

Eur pennadig ho-pezo amañ da labourad ha da houde ho-pezo eur peoh vraz ha zoken eun eurüsted heb ehan...

Ma talhit da labourad mad beteg ar fin, Doue a ouezo ho tigoll hag ho pae a vezo kaer.

Red eo deoh beza leun a fiziañs hag e hounezoh ho kurunenn ; arabad eo evelato, beza dienkreiz war gement-se gand aon da zond da laoskaad pe da veza ourgouilluz.

2.-Eun deiz, eun den paour a oa luskellet etre ar spont hag ar fiziañs, ha trehet gand an anken ez eas en eun iliz da zaoulina dirag eun aoter ; hag e lavare kemend-mañ outañ e-unan : « O ! ma hellfen gouzoud ha me a jomo c'hoaz fidel da Zoue ! ». Kerkent e klevas mouez an Aotrou o komz d'e galon : « Ma hellfeh gouzoud kement-se, pera a rafeh ? Grit bremañ ar pezh a garfeh ober ha bezit dineh. »

Ha ken buan e oe frealzet, kennerzet, hag eh en em lakeas etre daouarn an Aotrou Doue hag eh ehanas da gaoud aon.

Ne glaskas mui anaoud an traou a dle en em gavoud gantañ diwezatoh ; poania a reas, avad, da glask gouzoud petra a houlenne Doue, evid hen ober raktal.

3.-Lakit ho fiziañs e Doue ha grit ar mad a lavar ar Profed, bevit e peoh war an douar hag an douar a roio deoh peadra d'en em vaga.

Eun dra a vir ouz kalz tud da wellaad, da gaerraad o buhez ; an dra-ze eo an diegi, al leziregez da stourm gand aon rag ar boan.

Ar re eo a ya ar muia war-raog dre hent ar zantelez eo ar re a laka o foan d'en em drehi o-unan en traou a gavont an diêsa hag a zisplij ar muia dezo.

Rag ar pezh a ra d'an den ober ar brasa gounid ha kaoud ar muia grasou eo beza treh dezañ e-unan ha lakaad e spered da zoubla da Zoue.

4.-An eil n'e-neus ket kement hag egile da stourm ha d'en em gastiza.

Evelato, an den a galon vad, ha goude m'en-dije kalz youlou da drehi, a gresko buannoh er zantelez eged

eun den all, reizet mad a-walh e vuhez, med klouar e-keñver sevel uhel er zantelez.

Daou dra, dreist-oll, a ra deom gwellaad or buhez ; en em zistroba a-grenn diouz ar youlou fall hag en em lakaad a-zevri da gemered ar pleg mad on-deus ar muia ezomm anezañ.

Grit ivez gwella ma helloh evid tehed hag en em zizober euz ar mankou a welit aliez er re all hag a zisplij deoh ar muia.

5.-E peb leh, klaskit mond war wellaad ; ma welit skweriou mad, ma klevit ano euz traou kaer, grit hoh-unan kemend-all.

Ma welit, avad, eun dra fall bennag, na rit ket kement-se hoh-unan ; ha ma ho-peus greet, distroit buan war an hent mad.

Evel ma sellit ouz ar re all, ar re all ivez a zell ouzoh.

Pegen kaer, pegen dudiu e gweled breudeur leun a feiz, ar garantez o ren eur vuhez reizet mad !

Pegen poaniu er hontrol, pegen glaharuz eo gweled re all o ren eur vuhez direiz, o tilezel al labour a dleent ober !

Pegemend a zroug a ra d'an den chom heb derhel mad d'ar stad a vuhez en-doa choazet hag en em rei d'an traou n'oant ket goulennet digantañ.

6.-Dalhit soñj euz ho promesaou ha lakit dirag ho spered skeudenn Or Zalver stag ouz ar groaz.

Mez ho-pezo o selled ouz buhez Jezuz-Krist, o veza ma n'ho-peus ket poaniet muioh evid-se da veza heñvel outañ, doust ma'z eus pell amzer abaoe m'ho-peus en em roet da Zoue.

Eur relijiuz en em laka da zoñjal mad e buhez santel hag e poaniu Jezuz-Krist a gavo eno ha fonnuz c'hoaz kemend a zo red dezañ da gaoud, ha n'e-neus ket ezomm da glask eun dra bennag gwelloc'h ouzpenn Jezuz.

O ! ma vije en or halon Jezuz stag ouz ar Groaz, buan e vijem desket braz.

7.-Eur relijiuz mad a gemer hag a ra laouen kemend a zo gourhemennet dezañ.

Eur relijiuz lezireg, fall da bedi, n'e-neus a bep tu nemed trubuill, anken ; n'ema ket ar joa, ar peoh en e galon ha divennet eo outañ klask plijadur gand traou ar bed.

Eur relijiuz na zalh ket d'ar reolenn a zo e dañjer da goueza ha da ober eul lamm braz.

An hini na glask nemed beza diskarget euz e labour, beza en e êz, a gavo poan hag enkreiz ; rag an dramañ pe an dra-hont a vezo atao o tisplijoud dezañ.

8.-Penaos e ra kemend a reljiusted all ken striz o reolenn ? N'ez eont ket aliez er-mêz, beva a reont pell diouz trouz ar bed, o boued a zo paour, o dillad kaled, labourad a reont kalz, nebeud a gomzou a lavaront, beilla a reont pell en noz, abred e savont, hir eo o fedennou, kared a reont lenn ha derhel a reont da gemend a houlenn ar reolenn.

Gwelit menh ar Chartreuz ha Citeaux hag e-leiz a veneh all hag a leanezed ; bemnoz e savont da gana

meuleudiou Doue.

Mezuz eo e vijeh ken lezireg da zervicha Doue pa'z eus dija kemend a relijiusted o rei dezañ o halon.

9.-O ! ma n'on dije netra all da ober nemed meuli Doue a greiz-kalon !

O ! ma n'on-dije ket ezomm morse da zebri, da eva, da gousked ; ma hellfem bepred meuli Doue ha labourad park on ene ! Neuze e vijem eun tamm mad eürusoh eged bremañ ; ne vije ket red deom beza o soursial gand or horv.

O ! ma n'on-dije ket da zoñjal er horv med hepken en ene, pegen eüruz ne vijem ket ; rag bremañ siwaz ! ne hellom rei nemed eun tammig magadurez d'on ene !

10.-Pa vez deuet an den da veza skuiz gand an traou krouet, neuze eo e komañs en em blijoud gand traou an Aotrou Doue ; neuze ivez e vez laouen n'eus forz petra en em gav.

Neuze n'e-neus na re a joa na re a dristidigez, med e oll fiziañs a laka e Doue a zo pep tra evitañ ; gand Doue n'ez a netra da goll, netra ne varv, rag Doue a ro buhez da bep tra, ha pep tra a zent outañ.

11.-Dalhit soñj atao euz ho teiz diweza, dalhit soñj ne deu ket an amzer gollet en-dro.

Anez poania ha kaoud aket ne helloh ket pinvidikaad hoh ene.

Ma komañsit klourad, ez aio buan fall an traou ganeoh.

M'en em roit, avad, a-greiz-kalon da Zoue, e kavoh eur peoh braz hag e vezo skañvoh ho labour, rag ganeoh ema gras Doue hag e garantez.

Eun den kaloneg, leun a aket, a zo prest da ober pep tra.

Diêsoh eo stourm ouz ar plegou hag an techou fall eged en em rei da labouriou tenn.

An hini ne daol ket evez ouz ar pehedou bihan a gouezo a-nebeudou er re vrasa.

Eüruz e vezoh diouz an noz mar ho-peus poaniet e-pad an deiz.

Beillit warnoh hoh-unan, en em gennerzit, taolit evez ; ha n'eus forz penaoz e raio ar re all, na zilezit ket mad hoh ene.

Seul-vui a boan a gemeroh, seul-vui ez eoh war-raog er zantelez.

Evel-se bezet-greet.

LEVR II

KENTEL I

Kaoud Doue er galon ha komz eno outañ

1.-Rouantelez Doue a zo ennoh, a lavar deom Or Zalver. En em droit eta a-greiz ho kalon war-zu Doue ha dilezit ar bed paour-mañ hag e kavoh ar peoh evid hoh ene.

Deskit ober fae war an traou a zo en-dro deoh, klaskit mad hoh ene hag e teuio ennoh rouantelez Doue.

Rouantelez Doue eo ar peoh hag ar joa er Spered-Santel, hag an dra-ze ne vez ket roet d'an dud difeiz.

Deoh e teuio ar Zalver ha digantañ ho-pezo frealzidigez ma lakit ho kalon kaer evid hen digemeret.

E hloar hag e sked a deu euz an diabarz hag e diabarz ar galon eo eh en em blij.

Eno e kar dond aliez da gaoud an den distag diouz traou ar bed, eno e komz outañ en eun doare dudiuze meurbed, hag e ro dezañ frealzidigez, peoh braz, hag e tiskouez dezañ eur garantez souezuz.

2.-Ya, ene kristen, preparit mad ho kalon evid ar pried-se, ma plijo gantañ dond davedoh ha chom ennoh.

Evel-henn e komz : « An hini a gar ahanon a zalho mad d'am homzou hag an Tad hag ar Spered-Santel ha Me a deuio davetañ hag a jomo ennañ ».

Grit plas eta d'Ho Salver ha prennit dor ho kalon d'an oll draou all.

Pa vezo en ho kalon Jezuz-Krist, ez oh pinvidig ha ne vank netra deoh. Eñ a daolo evez warnoh, a zegaso deoh pep tra ha n'ho-pezo ezomm ebed da lakaad ho fiziañs en dud.

An dud a dro buan, ha pa zoñjit an nebeuta, emaoñ dilezet ganto, Jezuz-Krist, avad, a zo da viken, ha n'ho tilezo morse.

3.-N'eus ket da gaoud fiziañs vraz en den, pegen douget, pegen mignon bennag e ve deoh, rag an den a zo bresk hag ar maro a deu d'hen lamed diganeoh. Arabad deoh kennebeud kaoud re a boan spered ma welit unan bennag oh enebi ouzoh.

Ar re a zo hirio ganeoh a hell warhoaz beza 'eneb deoh, hag ar re a zo 'eneb deoh a hello beza ganeoh, rag an dud a dro evel an avel.

Lakit hoh oll fiziañs e Doue, bezit leun a zoujañs hag a garantez evitañ. Eñ a responto evidoh hag a raio pep tra evid ar gwella...

N'emaoh ket amañ evid chom ; n'eus forz e peleh e vezoh war an douar, ez oh evel eun divroad, eur beajour ; n'ho-pezo morse peoh ebed nemed pa vezoh unanet gand Jezuz-Krist.

4.-Petra a glaskit en-dro deoh ? Ne gavoh ket ar peoh amañ. En Neñv ema ho ti gwirion ; na zellit ‘ta nemed evel eun tremeniad ouz oll draou ar bed-mañ.

Tremen a ra pep tra ha c’hwi a dremeno ivez.

Diwallit d’en em staga ouz traou ar bed gand aon da veza kaset ganto da goll.

Da Zoue kasit ho spered hag hep paouez ra zavo ho pedennou war-zu Jezuz-Krist.

Ma ne hellit ket soñjal en traou uhel, e traou an Neñv, soñjit e Pasion Or Zalver, en e houliou Santel. Ma’z it da glask goudor e gouliou Jezuz, er merkou greet gand an tachou hag ar hleze, e teuio deoh kalz nerz evid gouzañv ho poaniou ; neuze ne reoh ket kalz a van evid beza disprizet ha goapaet gand an dud.

5.-Jezuz-Krist ivez a zo falvezet gantañ gouzañv ha beza disprizet, ha c’hwi a gred en em glemm euz eun dra bennag ?

Jezuz-Krist e-neus kavet dirazañ enebourien d’hen dispenn ha c’hwi a fell deoh gweled an oll o kared ahanoh hag oh ober vad deoh ?

Penaos e vezoh kurunet evid beza gouzañvet poaniou, ma ne deu netra da enebi ouzoh ?

Ma ne hellit gouzañv netra, penaos e vezoh mignon da Jezuz ?

Gouzañvit gand Jezuz hag evid Jezuz, ma fell deoh en em gavoud e rouantelez Jezuz-Krist.

6.-Ma vijeh eet eur wech hepken don a-walh e kalon Jezuz, ha m’ho-pije tañveet eun tammig euz e garantez vraz, neuze ne rafeh ket forz pe êz pe diêz e vije ho toare, med kentoh plijjadur ho-pije o veza disprizet gand an dud, rag karantez Jezuz a ra d’an den ober fae warnañ e-unan.

An hini a gar Jezuz e gwirionez, e goueled e galon, an hini a zo distag diouz pep karantez direiz, a hell en em rei êz ouz Doue, en em zevel a spered dreist an douar ha diskuiza o tañva traou an Neñv.

7.-An hini a ro d’an traou an dalvoudegez o-deus e gwirionez ha nann an dalvoudegez a vez roet dezo gand an dud, hennez a zo eun den fur hag e zeskadurez a deu dezañ digand Doue muioh eged digand an dud.

An hini a oar bale hervez ma lavar dezañ e goustiañs sklêrijennet gand Doue, an hini na ra ket kalz forz gand traou an douar, hennez n’eo ket nehet evid kaoud leh pe amzer da bedi Doue. An den a zoñj e Doue a dro êz e spered var-zu an Neñv, rag n’eo morse dalhet oll gand traou ar bed.

Nag al labour nag an tregas e-neus ne hell ober dezañ ankounac’haad Doue, en em ober a ra gand an traou a en em gav gantañ.

An hini a zo e stad vad, e karantez Doue, ne ra ket a van evid gweled petra a ra ar re all, pe vad pe fall eo.

Seul-vui e klask an den sacha gantañ traou an douar, seul-vui e vez e galon distroet ha pelleet diouz Doue.

8.-Ma vijeh ar pez m’eo dleet, distag mad diouz an traou krouet, neuze pep tra a drofe evid mad hoh ene.

Ma vez kalz traou o tegas deoh displijjadur ha trubuill eo o veza n’oh ket c’hoaz maro a-walh deoh hoh-

unan na distrob a-walh diouz oll draou an douar.

N'eus netra o stableza hag o reustla kalon an den evel ar garantez direiz evid an traou krouet.

Ma ne glaskit ket ho plijadur gand traou an douar, e helloh trei ho spered da draou an Neñv ha tañva kalz levez e goueled ho kalon.

KENTEL II

Beza izel a galon ha beza laouen, n'eus forz petra a zegas Doue deom.

1.-Na rit ket kalz forz piou a zo a-du ganeoh ha piou a zo 'eneb deoh ; grit, avad, gwella ma helloh evid ma vezo Doue ganeoh e kemend a reot.

Ra vezo eün ha glan ho koustiañs ha Doue ho tivenno.

An hini a a vezo harpet gand Doue, hennez n'en-dezo ket da gaoud aon rag an dud fall.

Ma ouzoh tevel ha gouzañv, heb mar ebed e teuio Doue d'ho sikour.

Doue a oar peur eo poent ho tenna a boan hag hen ober a zo êz dezañ. N'ho-peus eta nemed gedal anezañ gand fiziañs.

Da Zoue eo d'ho sikour ha da lamed ar vez diwarnoh.

Med aliez, evid ma vezim dougetoh da veza izel a galon, eo mad e vije anavezet ha tamallet or faziou gand ar re all.

2.-Pa oar an den en em izellaad evid e faziou, neuze eo êz dezañ lakaad ar re all da gaoud truez outañ ha terri o hounnar.

Doue a ro skoazell d'an den izel a galon. Kared a ra anezañ ha rei a ra dezañ frealzidigez ; diskenn a ra beteg ennañ, e garga a ra a hrasou, ha goude beza lezet anezañ da veza lakeet izel, e sav anezañ d'ar hloar.

D'an den izel a galon Doue a ro da anaoud traou an Neñv ; hen gervel hag hen sacha a ra davetañ gand madelez.

An den izel a galon, goude eun dismegañs bennag, a zo e peoh evelato rag e Doue ha nann er bed, e laka e fiziañs.

Klevit mad kemend-mañ : ne vezoh eet tamm ebed war-a-raog er zantelez ma n'en em lakit ket disterroh eged pep hini euz an dud all.

KENTEL III

Eüruz an den a gar ar peoh

1.- Ra vezo da genta ar peoh en ho kalon, ha da houde e helloh deski d'ar re all kaoud ar peoh.

Eun den a gar ar peoh a dalv kalz muioh eged eun den desket braz.

An den a heuill e youlou a laka ar mad da drei e droug hag a gred êz an droug.

An den a gar ar peoh a denn ar mad euz pep tra.

An hini a zo er peoh n'ema ket o soñjal fall euz ar re all ; an hini avad, e-neus eun imor diêz ha ginet a zo atao o troug-soñjal, n'e-neus peoh ebed e-unan ha ne lez peoh ebed gand ar re all.

Lavared a ra aliez ar pez na dlefe ket lavared ha chom a ra heb ober ar pez a vije red :

Taoler a ra evez ouz ar pez a dlefe ober ar re all, ne ra ket, avad, ar pez a rankfe ober e-unan.

Labourit 'ta da genta da vond hoh-unan war wellaad ha da houde neuze e helloh kaoud c'hoant da weled ivez ho nesa o wellaad ;

2.-Gouzoud mad a rit klask digareziou evid goloi ho faziou, ne fell ket deoh, avad, selaou digareziou ar re all.

Gwelloh e vije deoh en em damall hoh-unan ha didamall ar re all.

Ma fell deoh beza gouzañvet, gouzañvit ar re all.

Gwelit pegement a vank deoh c'hoaz evid beza e gwirionez karantezuz hag izel a galon, rag an dud karantezuz, izel a galon, n'o-deus droug ouz den, kounnar ouz den nemed outo o-unan.

N'eo ket eun dra diêz en em gleved gand an dud vad, an dud a imor êz ; an dra-ze a zo êz d'an oll ; an oll a gar ar peoh hag a zo douget d'ar re a zo a-du ganto.

Med beva e peoh gand tud kriz, garo, pennou fall, gand tud a gar enebi ouzom kement-se, a zo eur hras kaer, eun dra da veza meulet, eun dra a ziskouez om tud a benn.

3.-Bez' ez eus tud e peoh ganto o-unan hag e peoh ivez gand ar re all. Bez' ez eus re all n'o-deus peoh ebed o-unan ha na lezont peoh ebed gand ar re all ; poan a reont d'ar re all, med dezo o-unan e reont muioh c'hoaz. Ha bez' ez eus ar re a gar ar peoh evito o-unan hag ouspenn a glask deski d'ar re all kaoud ar peoh.

Er bed paour-mañ e kavim ar peoh o houzañv a galon vad or poaniou ha nann o veva hep poan ebed. An hini a oar ar gwella gouzañv en-dezo ar brasa peoh. Hennez a zo mestr dezañ e-unan, mestr d'ar bed, mignon da Jezuz-Krist, ha gounid a raio ar Baradoz.

KENTEL IV

Kaoud eur galon hlan hag eün

1.-Diou askell e-neus an den evid en em zevel diwar an douar-mañ : eur galon eün ha nêt a behed.

Or c'hoantegeziou a dle beza eün hag or harantez a dle beza glan. O veza eün a galon e pigner war-zu Doue, hag o veza glan e heller tizoud beteg ennañ ha tañva e vadelez.

Êz e vezo deoh ober pep tra vad, ma vez distag ho kalon diouz pep karantez diroll.

Ma ne glaskit nemed plijoud da Zoue hag ober vad d'ho nesa, neuze e vezoh libr e gwirionez.

Ma vije eün ho kalon, pep tra krouet a vije evidoh evel eur melezour, evel eul levr da ziskouez deoh eo red beva santel.

N'eus ket unan euz an traou krouet, n'eus forz pegen bihan, pegen dister e ve, ha na zegasfe ket a zoñj deom euz madelez Doue.

2.-Ma vije ho kalon eün ha glan e hellfeh gweled ha kompren êz an oll draou.

Eur galon hlan a wel en Neñv hag en ivern.

Evel m'eo an den a-ziabarz, evel-se ivez e varn an traou a ziavêz.

Mar deu levez er bed-mañ, al levez-se a zo evid an den en eun tu bennag trubuil hag anken, den n'her goar gwelloc'h eged an den fall e goustiañs.

Evel ma teu an houarn taolet en tan da zivergla ha da veza ruz-glaou, evel-se ivez an den en em ro oll da Zoue a deu da goll e leziregez ha da veza disheñvel-krenn diouz ar pezh m'oa a-raog.

3.-Pa gomañs an den klouarraad, neuze e-neus aon rag an disterra poan hag e vez troet da glask frealzidigez en-dro dezañ.

Med pa gomañs beza treh mad dezañ e-unan, pa'z a a galon vad en hent a gas da Zoue, neuze ne ra mui a van gand an traou a gave diêz kentoh.

KENTEL V

Taolom evez mad ouzom on-unan

1.-Ne hellom ket fizioud re ennom on-unan, rag mankoude a ra deom aliez gras Doue ha skiant vad.

Eun tammig sklêrijenn a zo ennom, med buan e kollom ar sklêrijenn-ze dre ol leziregez.

Aliez ivez ne anavezom ket pegen fall om a spered.

Aliez e reom fall, hag e klaskom digareziou or halon hag e kav deom om poulzet gand karantez Doue.

Kavoud a reom abeg e faziou dister ar re all, med serri a reom on daoulagad war or faziou braz on-unan.

Buan e welom hag e vuzulom pegement on-eus da houzañv a-berz ar re all ; ne anavezom ket, avad, pegement o-deus ar re all da houzañv ganeom.

An hini a welfe mad petra a dalv e oberou e-unan, n'en-devije ket kalz a dra da lavared euz an dud all.

2.-An den a zoujañs Doue a daol evez outañ e-unan da genta ; an dra-ze a zo a-raog an oll draou all ; hag an hini a daol evez mad outañ e-unan n'eo ket diêz dezañ rei peoh diwar-benn ar re all.

Ne vezoh morse e gwirionez eun den distag diouz traou ar bed-mañ, eun den a zoujañs Doue, ma ne roit a beoh diwar-benn ar re all evid taoler hoh oll evez ouzoh hoh-unan.

M'en em roit da zoñjal ennoh hoh-unan ha da zoñjal e Doue, ne reot ket kalz a van gand an traou a wel ho taoulagad.

E peleh emao pa ne vezit ket o soñjal ennoh hoh-unan ?

Ha goude beza greet tro ar bed, petra ho-peus gounezet o chom hep soñjal ennoh hoh-unan ?

Ma fell deoh kavoud ar peoh ha beza unanet mad gand Doue, e rankoh dilezel an oll draou all ha taoler evez ouzoh hepken.

3.-Mond a reoh a-raog war hent ar zantelez ma talhit hoh ene distag diouz traou ar bed.

Mond a reoh war a-dreñv ma en em strobot gand traou an douar.

Lavarit : n'eus netra braz, netra uhel, netra mad, netra dudiuz evidon nemed Doue hag ar pez a gomz din euz a Zoue.

Kredit n'eo nemed moged hag avel ar frealzidigez a hellfe rei deoh eun dra krouet bennag.

An ene a gar Doue a ra fae war an traou all.

Doue hepken, an Hini a zo a oll-vizkoaz, an Hini a zo heb ment ebed, an Hini a zo e peb leh, Doue a hell frealzi an ene ha rei d'ar galon ar wir levez.

KENTEL VI

Levenez eur goustiañs vad

1.-Gloar an den eo an testeni a ro dezañ eur goustiañs vad. Ra vezo mad ho koustiañs, hag e vezoh laouen atao.

Gand eur goustiañs vad e heller dougen kalz sammou ha beza laouen e-kreiz ar poaniou.

Gand eur goustiañs fall e vezer aonig atao, ankeniet atao.

Dienkrez e kouskoh ma ne rebech ho koustiañs netra deoh.

Na vezit laouen nemed p'ho-pezo greet eun dra vad bennag.

An dud fall n'o-deus morse gwir levenez na peoh en o halon rag n'eus ket a beoh evid an dud fall, a lavar an Aotrou Doue.

Ha ma lavaront : « E peoh emaom, ne hoarvezo droug ebed ganeom ; piou a hellfe noazoud deom ? ». Na gredit ket anezo. Pa zoñjint an nebeuta, e vezint skoet gand Doue, o oberou a vezo kaset da netra, hag o zoñjou ivez.

2.-Beza eüruz e kreiz ar boan n'eo ket diêz d'an hini a zo karantez en e galon, rag beza eüruz evel-se a zo beza eüruz gand kroaz Or Zalver.

Ne bad ket pell ar hloar a deu digand an dud.

Da heuill gloar ar bed e teu tristidigez atao.

Gloar an dud vad a zo en o houstiañs ha nann e genou an dud ; levenez an dud vad a deu digand Doue hag a zo e Doue, o joa a deu euz eienenn ar wirionez.

An hini a glask ar hloar a bado da viken, a ra fae war gloar ar bed-mañ.

Hag an hini a glask gloar ar bed-mañ pe na zisprij ket anezi en e galon, a ziskouez dre-ze ne gar ket kalz gloar an Neñv.

Peoh braz e-neus en e galon an hini ne ra van evid beza meulet pe damallet gand ar re all.

3.-An hini a zo glan e galon a vo êz dezañ beza eüruz, beza e peoh.

N'oh ket gwelloh evid beza meulet na falloh evid beza tamallet.

Ar pez ma'z oh ez oh ; ha daoust d'ar pez a vezo lavaret, ne vezoh ket brasoh eged n'ez oh dirag Doue.

Ma taolit evez petra a dalv hoh ene, ne reot ket forz petra a hello an dud lavared ahanoh.

An den na wel nemed an diavêz, Doue a lenn er galon.

An den a zell ouz an oberou, Doue a anavez an intañsion.

Ober mad atao hag en em gonta evid netra a zo eur merk eo izel ar galon.

Chom hep klask frealzidigez a-berz ar bed a zo eur merk eo glan ar galon ha leun a fiziañs e Doue.

4.- An hini na glask netra digand an dud a ziskouez e laka e oll fiziañs e Doue.

N'eo ket an hini a ro meuleudi dezañ e-unan a vezo kavet mad gand Doue, a lavar Sant Paol, red eo beza meulet gand Doue e-unan.

Bale a-galon gand Doue, beza distag diouz pep karantez evid an traou krouet, setu stad an den a zo e gwirionez da Zoue.

KENTEL VII

Kared Jezuz-Krist dreist pep tra

1.-Eüruz an hini a oar petra eo kared Jezuz hag ober fae warnañ e-unan abalamour da Jezuz !

Evid kaoud Jezuz da vignon eo red dilezel peb mignon all, rag Jezuz a fell dezañ beza karet e-unan dreist pep tra.

Ar garantez evid ar grouadurien a zo touelluz ha ne bad ket pell ; karantez Jezuz a zo gwirion ha paduz.

An hini a ya d'en em staga ouz an traou krouet a gouezo ganto ; an hini en em ro da Jezuz a vezo stard atao en e zav.

Karit eta, kemerit evid mignon an Hini n'ho tilezo biken goude ma vezoh dilezet gand an oll, an hini n'ho lezo ket da vond da goll pa deuio ho maro.

Red e vezo deoh eun deiz en em zispartia diouz an oll, pe c'hwi a vezo kontant, pe ne vezoh ket.

2.- Dalhit eta tost da Jezuz e-pad ho puhez ha da eur ho maro ; lakit ho fiziañs en Hini hepken a hell ho sikour pa vezoh dilezet gand an oll.

Jezuz, ho mignon, ne fell ket dezañ kaoud hepken an hanter eus ho kalon, ne fell ket dezañ ranna gand eun all ; evitañ e-unan hepken e fell dezañ kaoud ho kalon hag azeza er galon-ze evel war e dron.

Ma vijeh gouuest da gas diwar ho tro an oll grouadurien, Jezuz en-dije plijadur o chom ganeoh.

Kement ho-pezo klasket digand an dud heb en em harpa war Jezuz a vezo evel kollet evidoh. Na dit ket da gaoud fiziañs, na dit ket d'en em harpa war eur gorzenn brallet gand an avel, rag an den a zo evel ar geot seh, e sked a dremen evel bleun ar geot.

3.-Buan e faziot ma varnoh an dud diwar o-doare hepken. Ma klaskit beza frealzet ha sikouret ganto, aliez ho-pezo da goll.

Ma klaskit Jezuz e pep tra, e kavoh Jezuz ; ma en em glaskit hoh-unan eh en em gavot hoh-unan ; med gwaz-a-ze evidoh !

Rag an hini en em glask e-unan heb Jezuz a ra evel-se muioh a haou dezañ e-unan eged na hellfe ober e oll enebourien hag ar bed asamblez.

KENTEL VIII

Dalher tost da Jezuz : beva gantañ evel gand eur mignon

1.-Pa vez Jezuz ganeom, on-deus peb vad ha ne gavom netra diêz da ober ; pa vez Jezuz pell, pep tra a zo poaniuz.

Pa ne gomz ket Jezuz d'or halon, ar frealzidigez a deu deom a-berz an dud a zo dister ; ma lavar, avad, Jezuz eur gomz hepken, ema or halon laouen oll.

Daoust ne welom ket Mari Madalen o sevel buan euz al leh m'edo ennañ, o leñva pa glev he c'hoar Martah o lavared dezi : « Setu en em gavet ar Mestr ; ho kervel a ra ? ».

Pegen dudiuz eo an eur ma vezoh, euz a-greiz an daelou, galvet gand Jezuz da levenez ar spered !

Pegen dizehet, pegen kaled eo ho kalon heb Jezuz ! Pegen diskiant, pegen diboell oh ma c'hoantait eun dra bennag pell diouz Jezuz ! Daoust ha kement-se n'eo ket evidoh brasoh droug eged koll ar bed-oll?

2.-Petra a hell ar bed rei deoh heb Jezuz,

Beva heb Jezuz a zo eun ivern ; beva gand Jezuz a zo dudiuz evel ar Baradoz.

Ma vez ganeoh Jezuz, enebour ebed ne hello noazoud deoh.

An hini e-neus kavet Jezuz, e-neus kavet eun teñzor hag eun teñzor dreist an oll vadou.

Hag an hini a goll Jezuz a ra eur holl braz meurbed, a goll muioh eged ar bed oll.

Paour braz eo an hini a vev heb Jezuz ha pinvidig-mor an hini a zo gantañ Jezuz.

3.-Skiant vraz e-neus an hini a oar komz ouz Jezuz ; ha derhel mad da Jezuz a zo beza fur meurbed.

Bezit izel a galon, karit ar peoh, ha Jezuz a vezo ganeoh.

Bezit mad da bedi, bezit didrouz, ha Jezuz a jomo ganeoh.

Buan e kasoh Jezuz pell diouzoh hag e kolloh e hrasou mar dit d'en em drei ouz traou ar bed. Ha ma zo Jezuz pell diouzoh, mar deo kollet evidoh, da gaoud piou ez eoh, e peleh e kavoh eur mignon ?

Ne hellih ket beva heb mignon, ha ma n'eo ket Jezuz ho mignon brasa, m'ho-pezo nemed tristidigez, melkoni.

Diskiant oh eta ma lakit ho fiziañs, ho plijadur en eun all bennag.

Gwelloh eo kaoud ar bed oll 'eneb deoh eged koll karantez Jezuz.

E-touez hoh oll vignonned, ra vezo eta Jezuz karet atao dreist an oll re all.

4.-Karit an oll abalamour da Jezuz, karit Jezuz evitañ e-unan ;

Jezuz hepken a dle beza karet evitañ e-unan, rag Eñ hepken a zo mad, Eñ hepken eo ar mignon ho karo bepred. Evid Jezuz hag e Jezuz e tleit kared ho mignoned hag hoh enebourien ; evito oll e tleit e bedi evid

ma teuint oll d'e anaoud ha d'e gared.

Na glaskit morse beza meulet ha karet dreist ar re all, rag kement-se n'eo dleet nemed da Zoue. N'eus hini all heñvel outañ.

Na hoantait ket kennebeud kaoud evidoh kalon eun all a-bez na rei d'eun all ho kalon a-bez ; ra vezo atao Jezuz en ho kalon hag e kalon an oll dud vad.

5.-Dalhit atao ho kalon glan ha distrob diouz pep karantez evid ar grouadurien.

Red eo d'ho kalon beza distablez mad evid ma helloh he rei kaer da Zoue, evid ma helloh beza libr ha tañva madelez Doue.

Ne helloh ket en em gaoud beteg eno nemed sachet ha douget e vijeh gand gras Doue ; dilezel a dleit ha taoler pell diouzoh an oll draou krouet avid beza oll a-unan gand Doue.

Pa deu gras Doue d'an den, neuze e hell pep tra ; pa deh dioutañ, ema paour ha dinerz, heñvel ouz unan a zo o hedal beza skourjezet.

6.-Evelato, zoken pa vez evel-se, ne dle ket fallgaloni, med plega da volontez Doue hep klemm, gouzañv pep tra evid Jezuz-Krist ; rag goude ar goañv e teu an hañv, goude an noz e teu an deiz, goude ar gwall amzer e teu an amzer gaer.

KENTEL IX

War an dienez euz pep frealzidigez

1.-N'eo ket diêz ober fae war frealzidigez an dud, pa vezer frealzet gand Doue.

Med eun dra vraz meurbed eo gelloud chom hep beza frealzet gand an dud na gand Doue, gelloud, dre garantez evid Doue, gouzañv e ve ar galon goullo a beb joa, gelloud chom hep ober eur zell warnom on-unan, war an oberou mad a hellfem beza greet.

Ha leh a zo da veza souezet ma vezit laouen ha devod pa vez ganeoh gras Doue ? Pep den a hoanta kement-se.

Êz eo d'an den bale

Pa vez douget gand Doue.

Ha souezuz eo e vije skañv e zamm d'an hini a zo douget gand an Oll-halloudeg hag heñchet gand ar Rener Braz.

2.-Plijadur a ra deom kaoud frealzidigez ha diêz e kavom en em ankounac'haad on-unan.

Ar merzer sant Lorañs, oh ober evel e eskob, a zo bet treh d'ar bed, rag fae e-neus greet war oll blijadureziou an douar-mañ, ha dre garantez evid Jezuz-Krist e houzañvas ivez beza dispartiet diouz an eskob braz Sixt, a gare koulskoude a-greiz e galon.

E garantez evid e Grouer a oe treh d'ar garantez en-doa evid eun den ; evid plijoud da Zoue e tilezas ar frealzidigez a gave en dud.

Evel-se ivez deskit dilezel ho kerent, ho mignoned, dre garantez evid Doue.

Ha na vezit ket poaniet pa vezoh dilezet gand eur mignon bennag, gouzoud a rit e rankim oll en em zispartia eun deiz a vezo.

3.-An den a rank stourm kaled ha pell a-raog deski beza treh mad dezañ e-unan ha rei e galon a-bez da Zoue.

Pa en em harp warnañ e-unan, neuze ez a buan da glask frealzidigez digand an dud.

Med an hini a gar Jezuz e gwirionez hag a glask a-zevri kreski er zantelez, hennez n'ema ket o hedal beza frealzet gand an dud ; n'eo ket plijadur dudiuze a glask ; med labouriou, poaniou tenn, kaled, dre garantez evid Jezuz-Krist.

4.-Pa deu eta d'hoh ene eun tamm joa a-berz Doue, bezit leun a anaoudegez vad, med kredit ne deu deoh kement-se nemed euz madelez Doue, kredit n'eo ket eun dra ho-peus gwir da gaoud.

Na dit ket da veza re laouen, d'en em zével ; bezit izel a galon abalamour d'ar hras roet deoh, ha taolit

muioh a evez, a aket en hoh oll oberou, rag eur ar hras a dremeno hag an dentasion a deuio adarre warnoh.

Pa vez lamet diganeoh joa hoh ene, na dit ket dioustu da goll fiziañs, med bezit pasiant, izel a galon, ha gortozit ma teuio Doue deoh a-nevez, rag e galloud Doue ema rei deoh muioh a hrasou hag a frealzidigez eged a-raog.

An dra-ze n'eo ket eun dra nevez evid ar re a anavez hentchou Doue ; ar Zent vraz hag ar Brofeted gwechall a zo bet savet ha diskaret evel-se.

5.- Unan anezo, gras Doue en e galon, a lavare : « Leun eo va ene gand gras Doue, ne vezin morse diskaret. »

Siwaz ! Ar hras o veza deuet da vankoud e welas petra a oa heb ar hras hag e rankas lavared : « Distroet ho-peus ho taoulagad diouzin ha setu-me trubuillet. »

Evelato ne deu ket da fallgaloni, med en em lakaad a ra da bedi startoh an Aotrou Doue en eur lavared : « O va Doue, krial a rin war-zu ennoh, war-zu ennoh e kasin va fedenn ».

E bedenn erfin a zoug frouez, ha klevit anezañ oh anzav eo bet selaouet : « Doue e-neus bet truez ouzin hag a zo deuet d'am zikour ».

Ha penaoz ? « Troet ho-peus, emezañ, va daelou e levenez, goloet ho-peus ahanon a joa ».

Ma'z eo en em gavet kemend all gand ar zent vraz, arabad eo deom koll fiziañs, paour ha dister evel ma'z om, ma vez or halon a-wechou klouar hag a-wechou tomm.

Doue a zegas deom e spered hag hen lam diganeom evel ma kar, ar pezh a ree d'an den santel Jol lavared : « Diouz ar mintin emaoth gand ho servijer hag en eun taol e stlapit anezañ er boan ».

6.-War biou eta e hellan konta, e piou e hellan lakaad va fiziañs, nemed e trugarez vraz va Doue, nemed er zikour a deuio din euz an Neñv ? ».

Ha pa ve en-dro din tud vad, meneh santel, mignoned leal, levriou santel ; traou kaer enno, kantikou hag himnou dudiuz, an oll draou-ze a zegas nebeud a zikour, a blijadur pa vezan dilezet gand gras Doue e-kreiz va faourentez.

Neuze n'am-eus netra gwelloc'h da ober eged beza pasiant hag en em lakaad etre daouarn Doue ;

7.-N'am-eus kavet morse manah ebed n'en-devije ket santet a-wechou gras Doue o pellaad hag e galon o yena.

Sant ebed n'eo bet savet ha sklêrijennet a-walh evid chom heb beza tentet eur mare bennag euz e vuhez.

N'eo ket din da weled traou kaer an Neñv an hini n'e-neus ket bet eur boan bennag da houzañv evid Doue.

An dentasion a verk peurliesha ema o tond ar frealzidigez ; Doue a ro e levenez d'ar re a zo bet treh d'an tentasionou.

« An hini a vezo treh, me a roio dezañ frouez euz ar wezenn a vuhez ». Doue a deu da frealzi an den evid

rei dezañ nerz da zougen e boaniou.

Hag an tentasionou a deu war-lerh evid ma ne deui ket ar galon da rei digemer d'an ourgouill.

An droug-spered ne gousk morse ha youlou or horv n'int ket maro c'hoaz kennebeud.

Rag-se na ehanit d'en em brepari evid ar brezel, peogwir a-gleiz hag a-zehou ez eus enebourien war evez atao.

KENTEL X

Red eo trugarekaad Doue evid e hrasou

1.-Perag klask ehana pa'z oh greet evid labourad ?

En em lakait e tu da gaoud pasianted kentoh eged frealzidigez, da zougen ho kroaz kentoh eged da veva el levenez.

Piou, e-touez tud ar bed, ne garfe ket kaoud joa ha levenez evid e ene, ma hellfe atao kaoud ?

Levenez an ene a zo dreist oll blijadureziou an douar, dreist oll blijadureziou ar horv.

Rag plijadureziou an douar a zo oll pe vezuz pe houlo.

Levenez an ene, avad, a zo c'hwek, kaer ; direded a ra euz eneienn ar zantelez ha Doue eo he laka en eneou glan.

Med Den ebed ne hell tañva diouz e hoant al levenez-se, rag ne vezer ket pell e peoh diouz an dentasion.

2.-Ar pezh a vir ouz grasou Doue da zond deom eo abalamour ma lezom re a gabestr gand or spered ha m'on-eus re a fiziañs ennom on-unan.

Doue a ra vad d'an den o rei dezañ grasou ar frealzidigez, med an den a ra fall o chom heb diskouez e anaoudegez vad da Zoue.

Ar pezh a ra ma ne deu ket deom e-leiz grasou Doue, eo ma'z om dizanaoudeg e-keñver an hini a ro anezo ha ma ne ouzom ket anzañ euz peleh e tiredont deom.

Doue a ro atao e hrasou d'an hini a ziskouez anaoudegez vad ; o lamed a ra digand an den ourgouilluz evid o rei d'an hini a zo izel a galon.

3.-N'am-eus ket ezomm euz frealzidigez a virfe ouzin da gaoud glahar d'am fehedou ; ne fell ket din sevel uhel a spered war-zu an Neñv evid dond da veza ourgouilluz.

Kemend a zo uhel n'eo ket santel, kemend a vez c'hoanteet, kemend a ra plijadur n'eo ket mad, kemend a garom n'eo ket karet gand Doue.

Gand joa e tigemerin ar hras a raio din beza izelloh a galon, douja muih an Aotrou Doue, en eur ankounac'haad muih va-unan.

An den a zo bet kelennet gand gras Doue o tond, gand gras Doue o tehed, ne gredo ket klask meuleudi evid ar vad a hellfe beza greet, med disklêria a raio n'e-neus netra, ne hell netra.

Roit da Zoue kemend a zo da Zoue, ha kemerit evidoh ho lod : ho lod eo trugarekaad Doue euz e hrasou, ha taoler warnoh hoh-unan ar pehed hag ar boan dleet d'ar pehed.

4.-En em lakait atao el leh izella hag e vezoh savet en uhella. Rag ar pezh a zo savet uhel a rank beza diazezet don hag izel.

Ar Zent kavet brasa gand Doue eo ar re en em laka an disterra. Ha seul-vui int savet uhel er hloar, seul-vui int izel a galon ; ar pezh a garont eo ar wirionez ha gloar an Neñv, ha nann gloar goullo ar bed. Harpet mad war Doue, kennerzet gantañ, ne hellont ket beza taget gand an ourgouill.

Hag ar re a ro da Zoue kemend a zo dezañ, kemend vad o-deus bet digantañ, ne glaskont ket beza meulet gand an dud, ne garont nemed ar hloar a deu digand Doue, n'o-deus ken youl nemed gweled Doue meulet dreist pep tra ganto ha gand an oll zent, ne glaskont nemed an dra-ze.

5.-Bezit eta anaoudeg evid an disterra grasou hag e teuio deoh grasou brasoh.

An disterra gras ho-pezo bet, ra vezo evidoh evel eun dra vraz, bezit leun a anaoudegez vad evid kemend a roio Doue deoh, n'eus forz pegen bihan e ve.

Ma soñjit pegen braz eo an hini a ro deoh, netra euz ar pezh a vezo roet deoh ne vezo paour, dister ; ar pezh a zo roet gand Doue Oll-Halloudeg ne hell ket beza bihan.

Goude ma tegasfe poaniou, gwaligner, e tleom beza anaoudeg, rag evid or zilvidigez eo e lez da en em gavoud kemend a hoarvez ganeom.

An hini a hoanta dalher gras Doue en e galon, a rank trugarekaad pa vez roet dezañ, ha gouzañv hep klemm pa vez lamet digantañ.

Pedi a rank evid ma teuio adarre ar hras ; beza war evez e rank ivez, hag izel a galon gand aon d'he holl.

KENTEL XI

Pegen nebeud a zo o kared kroaz Jezuz-Krist

1.- Kalz tud a hoanta kaoud lod gand Jezuz en e Rouantelez, med nebeud, avad, a zo o houlenñ dougen e groaz.

Kalz a hoanta beza frealzet gantañ, nebeud a gar kemered lod euz e boaniou. Kalz a gav da azeza ouz e daol, nebeud da ober pinijenn gantañ.

An oll a hoanta kaoud levenez gand Jezuz, nebeud hepken a gar gouzañv eun dra bennag evitañ.

Kalz a ya da heul Jezuz beteg debri gantañ ar bara, nebeud beteg eva o lod euz kalir e Basion.

Kalz a gav kaer e viraklou, nebeud a zo da helloud samma war o diouškoaz e groaz vezuz.

Kalz a gar Jezuz pa ne vez netra oh ober diêz dezo.

Kalz a veulo anezañ keit ha ma vezint frealzet gantañ.

Ma teufe, avad, Jezuz da guzad ha d'o dilezel eun tammig, emaint dioustu o klemm, o fallgaloni.

2.-Ar re, avad, a gar Jezuz evid Jezuz, ha nann evid beza frealzet gantañ, ar re-ze a gan meuleudi dezañ, pe int a zo en anken hag en drubuill, pe int a zo el levenez.

Ha goude ma ne rofe morse dezo tamm joa ebed, evelato e kasfent meuleudi dezañ hag e vijent anaoudeg en e geñver.

3.-O ! pegen gallouduz eo karantez Jezuz pa vez glan, distag diouz pep karantez evidom on-unan.

Ar re a zo atao o klask frealzidigez, daoust ha n'int ket heñvel ouz tud na reont netra hep beza paeet ?

Daoust ha n'o-deus ket muioh a garantez evito o-unan eged evid Jezuz-Krist ar re a zo atao o klask o êz, o klask o mad ?

E peleh ema an hini a zervicho Doue evid netra ?

4.-Rouez eo an dud troet a-walh ouz Doue evid gelloud en em zistaga diouz oll draou ar bed.

Piou a gavo eun den e gwirionez paour a spered ha distrob mad e galon diouz an oll grouadurien ?

Pell e vezo ranket her hlask, beteg ar penn pella euz ar bed.

Ha goude m'en-dezo an den roet kemend e-neus, an dra-ze n'eo c'hoaz netra

Ha goude m'en-dezo greet pinijenn vraz, eo c'hoaz nebeud a dra.

Ha goude m'en dezo desket kemend a hell an den deski, ema pell c'hoaz.

Ha pa vezo deuet da veza santel ha devod braz, e vank c'hoaz kalz dezañ.

Mankoud a ra dezañ eun dra red dreist an oll draou all.

Petra neuze ? Setu amañ : goude beza distaget e galon diouz pep tra, en em zilezel e-unan, en em

ankounac'haad a-grenn, dalher tamm karantez ebed evitañ e-unan.

P'en-dezo greet kemend en-doa da ober, e tle kredi n e-neus greet netra.

5.-Ne dle ket beza lorhuz ma vez greet stad anezañ gand ar re all, anzav a dle n'eo e gwirionez nemed eur servicher didalvez..

Evel-se e komz ar Wirionez heh-unan : « P'ho-pezo greet kemend a zo gourhemennet deoh, labvarit : N'om nemed servicherien didalvez ».

Neuze e helloh beza e gwirionez noaz ha paour a spered ha lavared gand ar Profed : « Lezet on e-kreiz ar baourentez ha den en-dro din ».

N'eus den pinvidikoh, den n'e-neus muioh a frankiz, a halloud, eged an hini a oar en em zilezel e-unan ha dilezel pep tra, hag en em lakaad er reñk izella.

KENTEL XII

Hent ar groaz, an hent a gas d'ar rouantelez

1.-Kaled eo evid kalz kleved ar homzou-mañ : « En em zilezit hoh-unan, krogit en ho kroaz hag it war-lerh Jezuz. »

Med kalz kaletoh e vezo kleved ar homzou-mañ, ar homzou diweza : « Pellait diouzin, tud villiget, evid mond d'an tan a bado da viken. »

Ar re a zelaou bremañ hag a heul mouez ar Groaz n'o-dezo ket neuze da gaoud aon da veza daonet.

Neuze oll zervicherien ar Groaz, ar re o-dezo renet o buhez hervez ma houlen Jezuz krusifiet, a dostaio ouz Jezuz ar Barner gand ar vrasa fiziañs.

2.-Perag eta kaoud aon da zougen ar groaz a gas d'ar rouantelez ?

Er Groaz ema ar zilvidigez, er Groaz ema ar vuhez, er Groaz e kaver skoazell ouz an enebourien.

Er Groaz ema feunteun al levenez evid an ene, er Groaz ema an nerz, er Groaz ema joa ar galon.

Er Groaz eo e kaver peadra da gaerraad an ene, da bignad er zantelez.

Ne heller ket savetei an ene, ne heller ket kaoud fiziañs da en em gavoud er vuhez eternel, nemed dre ar Groaz.

Dougit eta ho kroaz, kerzit war-lerh Jezuz, hag eh en em gavot er vuhez eternel.

Jezuz a zo eet en ho-raog ; e groaz gantañ war e ziouskoaz, maro eo evidoh war ar Groaz, evid ma toughoh ivez ho kroaz ha ma varvoh a galon vad warni.

Ma varvoh gand Jezuz, ho-pezo perz gantañ er vuhez.

Ma kemerit eul lodenn euz e boaniou ho-pezo ivez eul lodenn euz e hloar.

3.- Dougen ar Groaz, mervel warni, setu petra a zo red : N'ez eus hent all ebed evid en em gaoud er vuhez ha kaoud ar peoh d'an ene, nemed hent ar Groaz, nemed ober pinijenn bemdez.

It el leh ma karot, klaskit ar pez a garot ; ne gavoh ket a-zioh ho penn eun hent uhelloh, ne gavoh ket a-zindan ho treid eun hent surroh eged hent santel ar Groaz.

Lakit ha reñkit pep tra hervez ho c'hoant, evelato e kavoh eun dra bennag da houzañv, pe blijo deoh, pe ne blijo ket, hag evel-se e vezo atao ar Groaz war ho hent.

Gwech ho-pezo eur boan gorv bennag, gwech e vezo ankeniet ho spered.

4.-A-wechou e vezoh dilezet gand Doue, a-wechou e vezoh heskinet gand an dud, hag ar pez a zo gwasoh, aliez ho-pezo eur gwall zamm ganeoh hoh-unan.

Louzhou ebed ne hello ho para ; ne helloh beza frealzet, sikouret gand netra ; red e vezo deoh gouzañv

keit ha ma plijo gand Doue.

Doue a fell dezañ gweled ahanoh o teski dougen ho poaniou hep klask beza frealzet, abalamour da bleaga dezañ evid mad ha da veza izel a galon goude beza bet en anken.

N'eus den da zantoud en e galon petra eo bet poaniou Jezuz-Krist evel an hini e-neus ranket gouzañv ar memez poaniou.

Ar groaz a zo eta dirazoh atao, oh ho kedal e peb leh.

N'oh ket evid tehed diouz ar Groaz, n'eus forz e peleh e redfet, n'eus forz pe du trei, rag en em zougen hoh-unan a rit e peb leh hag atao ho-pezo ar zamm-ze war ho kein.

Savit d'ar gorre, diskennit d'an traoñ, klaskit a-ziavêz, a-ziabarz ; e peb leh e kavot ar Groaz, e peb leh e vezo red deoh kaoud pasianted, ma fell deoh kaoud ar peoh d'ho kalon ha gounid ar gurunenn a bado da viken.

5.-Ma tougit ho kroaz a galon vad, ar Groaz ho tougo, ho kaso da benn ho peach, d'al leh n'ho-pezo mui da houzañv ; med n'eo ket war an douar ema al leh-se.

Ma tougit ho kroaz gand diegi, e kreskit ho samm, ha goude kaoud muioh a boan, e rankoh evelato he dougen.

Ma taolit eur Groaz diouzoh, e kavoh eun all heb mar ebed, ha marteze unan pounnerroh.

6.-Den ebed ne jom hep poan, ha c'hwi a zoñj deoh e vezo greet gwelloh deoh eged d'ar re all ?

Pehini euz ar zent a zo bet er bed-mañ hep kroaz hag anken ?

Or Zalver Jezuz-Krist e-unan n'eo ket bet eun eur hepken hep poan, keit ha m'eo bet war an douar.

Red e oa d'Or Zalver gouzañv, ha sevel euz a varo da veo, hag en em gavoud evel-se e gloar e rouantelez ?

Ha penaoz e klaskit eun hent all e-leh an hent-se a gas d'ar rouantelez, hent santel ar groaz ?

7.-Buhez Jezuz-Krist penn-da-benn n'eo bet nemed kroaz ha merzerenti, ha c'hwi a glask peoh ha levenez ?

Fazia, fazia a rit, o klask traou all e-leh poaniou da houzañv, rag buhez an den war an douar n'ez eo nemed trubuillou, kelhet eo gand kroaziou.

Ha seul-vui ma sav an ene kristen e skeul ar zantelez, seul-vui e teu ar hroaziou da bounnerraad evitañ, rag dre ma kresk e garantez, e kompren muioh n'ez eo nemed eun divroad war an douar.

8.-Evelato an hini a zo war e gein kalz kroaziou n'ema ket hep beza frealzet eun tamm bennag, rag santoud a ra e kresk e veritou o tougen e groaz.

O plega a galon vad dindan ar zamm e laka e veh a enkreiz da drei en eur fiziañs vraz e Doue.

Ha seul vui e vez kastizet ar horv dre ar poaniou, seul-vui e vez kennerzet an ene gand gras Doue.

A-wechou zoken ar youl da gaoud trubuill ha poan dre garantez evid Jezuz-Krist a ro dezañ kemend a

nerz ma ne garfe ket chom hep kaoud poan ha trubuil.

Rag gouzoud a ra e plij seul-vuioh da Zoue m'e-neus brasoh poan da houzañv evitañ.

N'eo ket nerz an den, med gras Jezuz eo a ra sevel ken uhel-ze ; ar hras a zo ken gallouduz war an den reuzeudig ma teu dreizi da hoantaad ha da gared a galon ar pezh m'eo douget da dehed dioutañ, ar pezh m'eo douget da gasaad.

9.-Nann, an den n'eo ket douget da gemered, da gared ar groaz, da gastiza e gorv, d'ober dezañ plega, da dehed diouz an enoriou, da houzañv a galon vad beza disprizet, d'en em zisprij e-unan, da houlenn beza disprizet, da houzañv pep koll, pep enebiez, da jom hep c'hoantaad tamm eürusted er bed-mañ.

Ma sellit ouz ho nerz hoh-unan, e welit ne helloh ober netra euz a gement-se.

Med, ma lakait ho fiziañs e Doue, e teuo deoh nerz euz an Neñv hag e vezoh treh d'ar bed ha d'ar hig.

N'ho-pezo ket da gaoud aon rag an droug-spered, hoh enebour, p'ho-pezo ar feiz ha Kroaz Jezuz-Krist d'ho tivenn.

10.-En em ginniget eta, evel eur zervicher mad ha fidel, evid dougen kaloneg kroaz Jezuz-Krist, a zo bet krusifiet dre garantez evidoh.

En em lakait e tu da zougen poan war boan er vuhez paour-mañ, rag evel-se eh en em gavo ganeoh n'eus forz e peleh ez eoh, n'eus forz e peleh e vezoh kuzet.

Evel-se eo red deoh beza, ha n'ho-peus ken louzou a-eneb ar boan hag an anken nemed en em houzañv hoh-unan.

Evid ar galon vad, ar halir a ginnig deoh ho mestr, ma fell deoh beza mignon dezañ ha kaoud perz en e eürusted.

Lezit Doue d'ho frealzi pa blijio gantañ.

C'hwi, avad, en em lakait e stad da houzañv trubuilou, ha kemerit anezo evel frealzidigez, rag oll boaniou an douar-mañ, ha goude ma kouezfent oll warnoh, n'int netra e-kichenn ar hloar a zo da hounid.

11.- Pa vezoh savet beteg eno, beteg kaoud plijadur o houzañv evid Jezuz-Krist, kredit neuze ez a mad an traou evidoh, rag kavet ho-peus ar Baradoz war an douar.

Keit ha ma kavoh diêz gouzañv ho poan, keit ha m'ho-pezo c'hoant gweled ar boan o tehed, ez aio fall an traou ganeoh, ha kaer ho-pezo, an anken a yelo d'ho heul.

12.-M'en em roit a galon vad d'ar pezh ho-peus da ober, da lavared eo da houzañv ha da vervel, buan e wellaio ho stad hag e teuo deoh ar peoh.

Ha goude ma vijeh pignet gand Sant Paol beteg an uhella euz an Neñv, n'oh ket sur evid-se ne en em gavo netra ebed mui da enebi ouzoh.

« Diskouez a rin dezañ, a lavar Jezuz, pegement e-neus da houzañv evid va ano ».

Gouzañv, setu eta ho lodenn, ma fell deoh kared Jezuz ha servicha anezañ bepred.

13.-Ra blijo da Zoue e vijeh kavet din da houzañv eun dra bennag evid ano Jezuz ! Pebez gloar a vije o hedal ahanoh ! Pebez joa evid ar zent ! Pebez skwer vad evid ho nesa !

Rag an oll o-deus meuleudi da rei d'ar basianted, daoust ma'z eo rouez ar re a gar gouzañv poan.

Mad e vije evidoh gouzañv eun draig bennag evid Jezuz-Krist, pa'z eus kalz o houzañv poaniou brasoh evid ar bed.

14.-Gouezit ervad e rankit tremen ho puhez evel eun den a zo red dezañ mervel.

Ha seul-vui e varv an den dezañ e-unan, seul-vui e vev evid Doue.

Den n'eo gouest da gompren traou an Neñv, ma n'e-neus ket gouezet plega da zougen poaniou evid Jezuz-Krist.

Netra ne blij muioh da Zoue, netra gwelloh evidoh war an douar-mañ eged gouzañv a galon vad evid Jezuz-Krist.

Ha ma vije roet deoh da joaz, e tlefeh kemered ar boan evid Jezuz-Krist kentoh eged ar joa hag ar frealzidigez, abalamour ma vijeh heñvelloh ouz Jezuz-Krist, heñvelloh ouz an oll Zent.

N'eo ket kaoud kalz plijadur ha frealzidigez a ra deom beza gwelloh ha kreski er zantelez, ar pez a ra vad deom, eo kaoud poaniou kaled ha kroaziou pounner da zougen.

15.-Ma vije bet evid savetei an dud eun dra bennag gwelloh ha talvoudusoh eged ar boan, Jezuz-Krist en-dije desket deom kement-se dre e gomzou ha dre e skweriou.

E ziskibien hag ar re a hoanta mond d'e heul a zo pedet frêz gantañ da zougen ar groaz ha lavared a ra dezo : « Ma c'hoanta unan bennag dond d'am heul e tle en em ankounac'haad e-unan, kregi en e groaz ha dond d'am heul ».

Goude beza lennet pep tra, sellet piz ouz pep tra, lavarom eta evid kloza ar gentel : « Red eo deom tremen dre galz a drubuillou evid en em gavoud e rouantelez Doue ».

TREDE LEVR

KENTEL I

Jezuz o komz ouz an ene mad

1.-AN DISKIBL. Selaou a rin ar pezh a lavar an Aotrou Doue d'am ene.

Eüruz an ene a zelaou Doue o komz outañ hag a zigemer ar homzou a frealzidigez a deu euz e henou !

Eüruz an diskouarn a glev mouez dous an Aotrou Doue ha na reont van ebed ouz traou ar bed.

Eüruz-kenañ an diskouarn na zelaouont ket an trouz a deu euz an diavêz, med a glev en diabarz ar Wirionez o komz dezo.

Eüruz an daoulagad a zo serret evid an traou a-ziavêz, ha digor mad war an traou a-ziabarz.

Eüruz ar re a wel an traou a-ziabarz hag a laka o foan da gompren gwelloc'h-gwella bemdez traou an Neñv !

Eüruz ar re a ro o amzer da Zoue hag a oar en em zistroba euz oll liammou ar bed !

Evesait mad ouz kement-se, o ! va ene, serrit an doriou ouz plijadureziou ar horv evid ma hellfot kleved ar pezh a lavar Doue deoh en diabarz.

2.-JEZUZ-KRIST. Setu petra a lavar ho muia-karet : « Me eo ho silvidigez, ho peoh, ho puhez ».

En em zalhit tost din hag ho-pezo ar peoh.

Lezit an traou a dremen, ha klaskit ar madou a bado da viken.

Petra eo an traou a dremen, nemed traou touelluz ?

Peseurt sikour ho-pezo digand ar grouadurien, ma'z oh dilezet gand Doue, ho Krouer ?

Lezit eta pep tra, ha lakit ho poan da blijoud d'ho Krouer, da veza fidel dezañ evid ma hellot mond d'ar gwir eürusted.

KENTEL II

Ar wirionez a gomz en diabarz heb ma vije klevet trouz he homzou

1.-AN DISKIBL. Komzit, va Doue rag ho servicher a zo o selaou.

Me a zo ho servicher, roit din sklêrijenn vid kompren ho komzou.

Grit d'am halon kleved ho komzou, ra vezint evidon ar pezh ma 'z eo ar gliz d'ar geot.

Gwechall bugale Izrael a lavare da Voizez : « Komzit deom, c'hwi, hag e selaouom ho mouez ; ra jomo Doue hep komz deom, gand aon na varfem. »

N'eo ket evel-se, va Doue, n'eo ket evel-se eo e pedan, med evel ar profed Samuel e lavaran gand humilite ha gand eur feiz birvidig : « Komzit, va Doue, rag ho servicher a zo o selaou. »

N'eo ket Moizez na profed all ebed a fell din da glevet, med C'hwi, va Doue, C'hwi ho-peus roet kuzul ha sklêrijenn d'an oll Brofeted, rag hepto C'hwi hoh-unan a hell va deski mad ; ar re-ze, avad, ne hellint netra hebdoh.

Geriou a hellont lavared, spered avad, ne roont ket.

2.-Komz kaer a reont, med, ma chomit sioul, ne entanont ket ar galon.

Lizerennou a ziskouezont, med C'hwi eo a zesk deom petra 'zo kuzet enno.

Misteriou a lavaront din, med Chwi eo o displeg.

Gourhemennou a embannont, med C'hwi eo am zikour d'o heul.

An hent a ziskouezont din, med c'hwi eo a ro nerz da vale dreizañ. N'o-deus galloud nemed war an diavêz, med C'hwi a ro nerz ha sklêrijenn d'ar halonou.

Doura a reont ar park, med C'hwi eo a laka an traou da zével gand nerz.

Krial a reont, med C'hwi eo a laka or spered da gompren.

3.-N'eo ket Moizez eta a fell din kleved, med C'hwi, va Doue, C'hwi ar wirionez a-oll viskoaz.

Rag anez e hellfen mervel ha chom heb gounid netra, ma vijen sklêrijennet euz an diavêz heb ma vije entanet va halon en diabarz, ma vijen barnet evid beza klevet, anavezet, kredet komzou Doue ha chomet heb o heul, heb o hared, hob o mired.

Komzit eta, va Doue, rag ho servicher a zo o selaou ; komzit, rag gand ho komzou ema ar vuhez peurbaduz.

Komzit ouzin, ma vezo frealzet va ene, ma teuio va buhez da wellaad, ha ma vezo meulet hag enoret hoh ano da viken.

KENTEL III

Red eo selaou kommzou Doue gand eur galon izel ; kalz ne daolont ket evez outo kement ha ma vije dleet.

1.-JEZUZ-KRIST. Va mab, selaouit va homzou, komzou dous-meurbed ha dreist skiant an oll dud gouizieg, an oll dud desket euz ar bed.

Va homzou a zo spered ha buhez ha n'eo ket gand skiant an dud e heller o hompren.

N'eo ket evid kaoud plijadur eo e tleer klask anezo, red eo o zelaou heb lavared ger hag o degemered gand eur galon izel ha leun a garantez.

2.-AN DISKIBL. Me am-eus lavaret : « Eüruz an hini ho-peus kelennet, an hini ho-peus desket dezañ ho lezenn ; e boaniou a vezo skañvaet ha ne vezo ket dilezet war an douar. »

3.-JEZUZ-KRIST. Me eo am-eus kenteliet ar Brofeted abaoe ar penn kenta, he bete-vremañ n'am-eus ket ehanet da gomz ouz an dud, med kalz a jom serret o diskouarn ha kaled o halon evel ar mên.

Kalz a zo dougetoh da zelaou ar bed eged da zelaou Doue.

Kalz a zo gwelloc'h heul youlou ar hig eged senti ouz Doue.

Ar bed a ginnig traou a dremen, traou didalvez, hag evelato an dud a dro gantañ gand mall braz.

Me a ginnig traou talvouduz, traou da badoud da viken, hag an dud a jom klouar o halonou.

Piou a zo ken aketuz d'am zervicha ha zenti ouzin e pep tra evel da zervicha ar bed hag e vistri ?

Plegit ho penn gand ar vez, Sidon, a lavar ar mor braz, ha ma houlenit perag, selaouit :

Evid gounid eun nebeudig arhant e vez greet eur veaj hir, hag evid gounid ar vuhez peurbaduz, a-veh e vez savet an troad diouz an douar.

Poania a vez greet evid kaoud eun dra dister ; evid eur pezh arhant ez eer hep mez ebed dirag ar barner ; evid eun dra hep talvoudegez kinniget da hounid eh en em skuizer noz-deiz heb aon ebed.

4.-Med diwaz ! evid ar madou a bado da viken, evid eur rekompañs dispar, evid enoriou dreist an oll enoriou, evid eur hloar na ehano ket, e vez diegi oh en em skuiza eun tammig hepken.

Bezit goloet a vez, servicher lezireg hag heskiner, o weled ar re-ze o lakaad muioh a bres d'en em goll eged c'hwi d'en em zavetei.

Muioh e plij dezo an traou touelluz eged deoh-c'hwi ar wirionez.

Koulskoude meur a vech e vezont touellet, n'o-deus ket ar pezh a hedont. Me, avad, a zalh atao d'am fromesa hag an hini a laka ennon e fiziañs e-neus atao e houlen.

Ar pezh am-eus lavaret rei a roin evel am-eus lavaret, da vihanna ma chomer beteg ar fin em harantez.

Me a ro o fae d'an oll dud vad hag a sko kaled war an oll dud devod evid anaoud o nerz.

5.-Lakit don en ho kalon va homzou, soñjit mad enno, ezomm ho-pezo anezo pa deuio an dentasion.

Ar pezh na gomprenit ket pa vezit o lenn, a vezo sklêr evid ho spered pa zeuin d'ho kweled.

E diou hiz e teuan da gaoud va bugale, dre an dentasion ha dre ar frealzidigez.

Ha diou gentel a lennan dezo bemdez, unann o tamall dezo o fehedou, eun all oh alia anezo da vale gwelloc'h war hent ar zantelezh.

An hini a anavez va homzou hag a ra fae warno a gavo eur barner d'an deiz diweza da houlenñ kont digantañ.

Pedenn da houlenñ gras an devosion.

6.-Va Doue, c'hwi a zo va oll vad. Ha piou on-me evid kredi komz ouzoh ?

Me a zo ar paourra euz ho servicherien, eur preñv-douar, kalz paourroha ha disterroha eged na ouzon ha na gredan lavared.

Ho-pezh soñj evelato, va Doue, n'ouzon netra, n'am-eus netra, ne hellan netra

C'hwi hepken a zo mad, just ha santel. C'hwi a hell pep tra, a ro pep tra, a garg an oll euz ho madou, nemed ar peher a lezit heb netra.

Dalhit soñj euz ho trugarez, va Doue, skuillit ho krasou e va ene, rag ne garit ket gweled goulo ar pezh ho-peus greet.

7.-Penaos e hellfen-me dougen samm ar vuhez maleüruz-mañ ma ne deuit d'am hennerza gand ho trugarez hag ho kras ?

Na zistroit ket ho taoulagad diouzin, na zaleit ket da zond beteg ennon, na vankit ket d'am frealzi, gand aon na deufe va ene da veza heñvel ouz eun tamm douar dizeh.

Va Doue, deskit din ober ho polontez, deskit din bale dirazoh evel m'eo dleet ha gand humilite.

Rag C'hwi eo va furnez, C'hwi a oar petra on e gwirionezh hag a anaveze ahanon a-raog ma 'oa euz ar bed, pell a-raog m'oan ganet.

KENTEL IV

Red eo beva dirag Doue er wirionez ha gand eur galon izel.

1.-JEZUZ-KRIST. Va mab, kerzit dirazon dre hent ar wirionez ha klaskit ahanon bepred gand eur galon eün.

An neb a vale dirazon dre hent ar wirionez a vezo diwallet diouz ar stourmadou dañjeruz, ar Wirionez hen divenno diouz troidellerez ha fallagriez an dud fall.

Ma vezit divennet gand ar Wirionez, neuze e vezoh libr evid mad ha ne reoh van ebed gand komzou goulo an dud.

2.-AN DISKIBL-Aotrou, gwir eo ar pezh a lavarit ; grit ma c'hoarvezo ganin evel-se.

Ra zeuio ho kwirionez d'am helenn, d'am diwall, d'am divenn, beteg ma en em gavin e porz ar zilividgez.

Ra vezin ganti miret diouz pep karantez fall ha direiz, hag e kerzin dirazoh gand eur galon distrob a beb liamm.

3.-JEZUZ-KRIST-Me a zesko deoh, a lavar ar Wirionez, ar pezh a zo mad hag a blij din.

Soñjit en ho pehedou gand keuz ha glahar, ha na dit morse da gredi e talvezfeh eun dra bennag abalamour d'hoh oberou mad.

N'oh nemed eur peher e gwirionez, atao war-nez beza taget gand e-leiz a youlou fall, atao nehet ganto.

Dreizoh hoh-unan oh troet d'an traou na dalvezont netra, ha buan e kouezit, buan emaoth trehet, buan emaoth war-nez koll nerz, war-nez fallgaloni.

N'eus netra ennoh da rei leh deoh d'en em veuli, kalz tro ho-peus, avad, d'en em zisprizoud, rag ez oh dinerz kalz muioh eged na hellit kompren.

4.-En hoh oberou na dit morse da weled netra vraz, netra talvouduz, netra da veza brudet, meulet ; n'eus netra uhel, netra da veza prizet ha c'hoanteet e gwirionez, nemed ar pezh a bado da viken.

Karit ar Wirionez dreist pep tra.

Ha disprizit dreist pep tra ho paourantez a zo braz meurbed.

N'ho-pezhit aon rag netra kement ha rag ho pehedou hag ho youlou fall, tehit diouto muioh eged diouz pep tra all, rag muioh e tleont displijoud deoh eged an oll gollou a hellfeh ober war an douar.

Hiniennou 'zo ne gerzont ket dirazon gand eur galon eün, med poulzet gand o hoant da houzaout pep tra ha gand an ourgouill, e klaskont kemend a ouzon, kemend a oar Doue, ha ne zoñjont ket enno o-unan nag en o zilividgez.

Ar re-ze o-deus aliez tentasionou braz hag a ra pehedou abalamour d'o ourgouill ha d'o hoant da houzoud pep tra, rag me a dro kein dezo.

5.-Krenit o soñjal e barnedigez Doue, ho-pezit aon rag kounnar an Oll-Halloudeg.

Na dit ket da glask kaoud abeg e oberou an Aotrou Doue, med klaskit kentoh ho pehedou, gwelit pegen aliez oh kouezet, pegement a oberou mad ho-peus lezet da vond e-biou.

Lod a laka o devosion el levriou hepken, lod en imachou, lod e neuziou ha simillou a zianveaz.

Lod a zo atao va ano en o genou, med nebeud, avad, en o halon.

Lod, sklêrijennet o spered ha digatar o halon, a zo atao oh huanadi war-zu traou an Neñv, o-deus poan pa glevont komz euz traou an douar, ne blegont nemed en desped dezo d'ar pezh a houlenn ar horv evid beva.

Ar re-ze a anavez mad petra a lavar enno ar spered a Wirionez ; deski a reont gand spered Doue ober fae war draou an douar ha kared traou an Neñv, dilezel ar bed hag hirvoudi noz-deiz war-zu ar Baradoz.

KENTEL V

Pegen braz burzudou a ra karantez Doue

1.-AN DISKIBL. Bennoz deoh va Zad euz an Neñv. C’hwi, Tad va zalver Jezuz-Krist, bennoz deoh, abalamour ho-peus bet ar vadelez da gaoud soñj euz ar paourig ma’z on.

O Tad leun a drugarez, C’hwi a zegas pep frealzidigez, bennoz deoh da veza prizet va frealzi beb an amzer, daoust ma ne veritan ket.

Bennoz deoh bepred ha meuleudi ; hag ivez d’ho mab Unik ha d’ar Spered-Santel.

Ya, va Doue, va harantez santel, pa vezot deuet em halon, e trido gand al levenez.

C’hwi a zo va gloar, dudi va halon, C’hwi a zo va fiziañs, va skoazell pa deu poan warnon.

2.-Med o veza n’eo ket c’hoaz stard va harantez, na kreñv a-walh va zantelez, am-eus ezomm da veza kennerzet ha frealzet ganeoh.

Deuit eta aliez davedon ha roit din ho kelennou santel.

Va mirit diouz ar gwall-youlou ha pareit va ene euz pep karantez direiz, ma vezo yah ha digatar, ma vezin gouest d’ho kared ha kreñv a-walh evid dougen va foaniou ha kenderhel war an an hent mad.

3.-Eun dra vraz eo ar garantez, eun dra vad-meurbed ; ganti ar zammou ponner a vez kavet skañv hag an traou digompez a vez kompezet.

Ar garantez a zougen he beh hep poan ebed hag a ro douster, a ro blaz vad d’an traou c’hwerro.

Karantez Jezuz a zo uhel-meurbed hag on doug da ober traou braz, da glask atao an traou santella. Ar garantez a fell dezi sevel war-nij ha beza distrob euz oll draou an douar.

Ar garantez a fell dezi beza heb liamm ebed, distag diouz oll draou an douar, gand aon ne hellfe ket trei en diabarz he daoulagad war-zu Doue, gand aon na vije dalhet gand ar zoñj euz madou an douar ha diskaret gand eur boan pe eur holl bennag.

N’eus netra dousoh eged ar garantez, netra kreñvoh, netra uhelloh, netra leldannoh, netra dudiusoh, netra leunnoh, netra gwelloh en Neñv ha war an douar, rag digand Doue eo e teu ar garantez hag e Doue, dreist an oll draou krouet, eo e rank beza diazezet.

4.-An neb e-neus karantez a nij, a red, a lamm gand ar joa, n’eus netra stag outañ, netra ouz hen derhel.

Lezel a ra pep tra evid kaoud pep tra, rag en em harpa a ra war an Hini a zo dreist pep tra, an hini a zered anezañ an oll vadou.

Ne zell ket ouz ar madou roet, med sevel a ra dreist an oll vadou beteg an Hini a ro anezo.

Ar garantez aliez n’he-deus muzul ebed, med evel an dour o vervi, lammed a ra dreist ar bord.

Ar garantez ne zant ket ar beh, ne zell ket ouz ar poaniou, brasoh eo he c'hoant eged he galloud.

Ne glask ket digareziou evid lavared ez eus eun dra bennag en tu-all d'he nerz, rag soñjal a ra e hell pep tra ha n'ez eus netra divennet outi. Hag, evid gwir, gelloud a ra pep tra, ober a ra labouriou ha traou a zo dreist nerz an hini n'e-neus ket a garantez.

5.-Ar garantez a zo atao digor he daoulagad ; e-pad ma kousk ne zerr nemed eul lagad, pa vez beh warnezi e chom evelato nerz ganti ; war aon e hell beza, med ne gren ket ; evel eur flamm tan, eur houlaouenn o sklêrijenna, e sav atao d'an uhel heb mankoud morse ;

An hini e-neus karantez a oar mad petra eo ar garantez. Eur griadenn vraz war-zu Doue, setu petra eo tan ar garantez hag an ene tommet gand an tan-ze a lavar : « Va Doue, va harantez, C'hwi a zo pep tra evidon, ha me a zo deoh. »

6.-O va Doue, lakit va harantez da greski, evid ma hellin tañva e goueled va halon pegen dudiuz eo kared, pegen dudiuz beza teuzet gand ar garantez. Ra vezin dalhet gand ar garantez, ha savet dreist va fenn va-unan gand tan ha nerz ho karantez.

Ra ganin kanaouenn ar garantez, ra 'z in en uhel d'hoh heul, C'hwi va muia-karet.

Ra vezo, oh ho meuli, teuzet nerz va ene, o tridal gand ar garantez.

Ra garin ahanoh muioh egedon va-unan ; ra en em garin va-unan ennoh hepken, ha ra garin ivez ennoh an oll dud all o-deus gwir garantez evidoh, evel ma verk lezenn ar garantez ho-peus lakeet da bara war an douar.

7.-Ar garantez a zo lijer, leal, devod, leun a vadelez, habask, kreñv, sioul, feal, war evez, mad da houzañv, kaloneg, ha n'en em glask morse heh-unan.

Rag an den en em glask e-unan n'en-deus mui a garantez.

Ar garantez a daol evez, a zalh pell diouz an ourgouill, a ya gand an hent eün, n'eo ket flask na diboell, na troet gand an traou didalvez ; atao eo reizet mad, glan, stard, sioul, war evez ouz ar skiantchou.

Ar garantez a oar plega ha senti ouz ar vistri, heh-unan eh en em laka dister ha reuzeudig, ha leun eo a feiz, a anaoudegez vad e-keñver Doue, ennañ e laka atao he fiziañs, zoken en amzer ma vez evel dilezet gantañ, rag ne heller ket beva er garantez heb eur boan bennag.

8.-An hini n'eo ket prest da houzañv pep tra ha da gaoud mad ar pezh a fell da Zoue, ne heller lavared en-devije karantez e gwirionez.

An hini e-neus karantez a rank kemered a-greiz kalon evid e Vuia Karet an oll draou kaled ha c'hwero, ha morse ne dle pellaad dioutañ, n'eus forz petra a vezo da houzañv.

KENTEL VI

Penaoz e vez anavezet ar wir garantez

1.-JEZUZ-KRIST. Va mab, n'eo ket c'hoaz na kreñv na stard a-walh ho karantez.

AN DISKIBL. Perag Aotrou ?

JEZUZ-KRIST. Abalamour evid an disterra tra a zo oh enebi ouzoh e tilezit ar pezh ho-poa komañset, hag e klaskit gand re a vall beza frealzet.

An hini e-neus gwir garantez a zalh mad e-kreiz an tentasionnou, hag a ra skouarn vouzar ouz komzou touelluz an enebour.

Pa'z a mad an traou gantañ e plijañ dezañ ; pa'z a fall an traou, n'en em gemer ket ouzin.

2.-An hini a oar kared ne zell ket kemend ouz ar pezh a ro dezañ e vignon hag ouz garantez e vignon.

Ar garantez a ra muioh a blijadur dezañ eged ar pezh a reseo.

An hini a zo braz e garantez n'eo ket ar pezh a roan a ra joa e galon, med Me va-unan eo a blij dezañ dreist an oll vadou.

Na gredit ket e ve kollet pep tra ma c'hoarvez ganeoh a-wechou kaoud evidon pe evid ar zent nebeutoh a garantez eged n'ho-pije c'hoant.

Ar garantez-se mad ha tener a domm a-wechou ho kalon a verk ema va gras ennoh hag a zo evel eun tañva euz joa ar Baradoz ; arabad eo deoh konta re war ar stad-se, rag mond ha dond a ra.

Med stourm, avad, a-eneb ar gwall-youlou, kas da bourmenn an droug-spered hag e ardou, setu merk ar zantelez, setu en em binvidikaad evid ar baradoz.

3.-Na dit ket da goll ho penn abalamour d'ar zoñjou a hellfe dond en ho spered n'eus forz petra e vijent.

Dalhit stard war an hent mad hag it atao eün dirag Doue.

Na vezit ket sebezet ma c'hoarvez ganeoh beza a-wechou dibradet uhel war-zu Doue ha diskaret kerkent beteg ar zoñjou direiz a vez peurlieusa en ho spered.

Rag gouzañv a rit ar zoñjou-ze kentoh eged na glaskit anezo, ha keit ha ma tisplijont deoh ha ma stourmit outo, n'eo ket pehi eo a rit, med gounid evid ar baradoz.

4.-Red eo deoh gouzoud mad ema an droug-spered, enebour an dud a-bell 'zo, o klask mired ouzoh da zalher war an hent mad, o klask distrei ahanoh diouz ar bedenn hag an oberou santel evel enori ar zent, soñjal em Fasion, soñjal en ho pehedou, dalher war ho kalon ha bale stard war hent ar zantelez.

Degas a ra deoh soñjou fall evid skuiza ha sponta ahanoh, evid mired ouzoh da bedi ha da lenn levriou santel.

Displijoud a ra dezañ ar govesion greet mad ha mar gellfe ho tistrei diouz ar gomunion, her grafe.

Na selaouit ket anezañ, na rit van ebed gantañ, kaer en-devo taoler e lasou evid paka ahanoh.

Eñ eo a zegas d'ho spered soñjou fall ha louz.

Lavarit dezañ : « Pell diouzin, Spered louz ; n'ho-peus ket a vez, Spered hudur ma'z oh, o c'hweza d'an diskouarn traou ken divalao? »

« Pell diouzin, Toueller milliget, n'ho-pezo krog ebed ennon, rag Jezuz a vezo ganin evel eur brezeller kaloneg, ha c'hwi a vezo goloet a vez.

« Gwelloh eo ganin mervel ha gouzañv pep poan eged plega deoh.

« Peoh din, ne fell ket din mui ho selaou, kaer ho-pezo klask ober poan din.

« Doue eo va sklêrijenn ha va zilvidigez, rag piou am-bije aon ? “

« Doue eo va skoazell, Doue eo va zalver.

« Ha pa vije 'eneb din eun arme a-bez, n'am-bije ket aon. »

5.- Stourmit, evel eur zoudard kaloneg.

Ha ma kouezit dre zempladurez, savit adarre gand muih a nerz eged a-raog, kemerit fiziañs e teuio muih a hrasou deoh a-berz Doue, ha diwallit d'en em blijoud ennoh hoh-unan, d'en em rei d'an ourgouill.

An ourgouill eo a laka kalz da veza touellet ha da veza dall, ken dall ma ne heller ket o farea.

Evid beza troet da daoler evez ha da veza izel a galon, soñjit pegen izel eo kouezet an dud ourgouilluz o-doa re fiziañs en o nerz o-unan.

KENTEL VII

Red eo kuzad en eur galon izel ar grasou a deu digand Doue.

1.-JEZUZ-KRIST. Va mab, pa vez gras Doue en ho kalon, eo gwelloh ha talvoudusoh evidoh kuzad kement-se, chom heb en em fougeal nag ober hir gomzou na kredi e ve eun dra vraz-kenañ ; bezit kentoh troet d'en em zisprijoud ha krenit gand aon ne vijeh ket din euz ar grasou roet deoh.

N'ho-pezit ket re a fiziañs er garantez virvidig ho-peus bremañ, rag buan e hell trei ha mond pell diouzoh.

Pa vez ganeoh gras Doue, soñjit pegen dister ha pegen paour oh heb ar hras.

N'eo ket hepken pa'z oh frealzet gand ar hras eo ez eot war-raog e karantez Doue, med pa houzañvit gand eur galon izel, hep klemm, hep fallgaloni, beza dilezet gand ar hras, pa gendalhit evelato da bedi ha da ober an oll draou mad oah boazet da ober, o lakaad ho poan gwella ma hellit, oh harpa ouz ar zehor, ouz an anken a zo en hoh ene.

2.-Kalz 'zo, pe n'ez a ket mad an traou evito, a goll nerz ha kalon, dioustu.

N'ema ket e galloud an den reiza e vuhez evel ma kar ; da Zoue eo da rei e hras hag e frealzidigez pa gar hag evel ma kar, d'an hini a fell dezañ hag evel ma fell dezañ, ha netra ken.

Meur a hini o-deus en em gollet gand ar hras a zevosion, rag m'o-deus c'hoanteet ober muioh eged na hellent ; ne zellent ket ouz o zempladurez.

Hag o veza m'o-deus klasket sevel uhelloh eged na blije da Zoue, o-deus kollet ar hras.

Paour int deuet da veza ha mezuz o-doare. An dud-se a gave dezo edont o vonnd da nijal d'an Neñv, bremañ diskaret ha lakeet war an douar noaz, o-deus desket ne hellont ket nijal gand o diouaskell o-unan, eo red dezo en em harpa warnon-me.

Ar re a zo nevez eet war hent an Neñv, hag a zo c'hoaz berrwelet, a hell buan fazia hag en em goll ma ne zentont ket ouz kuzuliou an dud fur.

3.-Ma fell dezo ober o fenn o-unan e-leh senti ouz an dud a skiant, e raint gwall fin, da vihanna ma ne heller o distrei.

Ar re a gav dezo int fur ne houzañvont ket aliez a galon vad beza sturiet gand ar re all.

Gwelloh eo deoh kaoud nebeud a skiant gand eur galon izel eged deskadurez vraz ma teu an ourgouill da heul.

Gwelloh eo deoh kaoud nebeutoh eged kaoud peadra da veza lorhuz.

N'eo ket evezieg a-walh an hini en em ro oll d'al levenez hag a ankounac'ha e baourentez a-ziagent, an

hini ne zoñj mui e doujañs Doue, doujañs santel a ra d'an den kaoud aon da goll ar grasou kinniget dezañ.

Ne ra ket mad kennebeud an hini, pa zeu eun dra bennag d'hen diêza ha d'her gwaska, a goll e nerz-kalon ha ne laka ket e fiziañs ennon-me kement hag e vije red.

4.-An hini a vezo re zizoursi e mare ar peoh, aliez e vezo, e mare ar brezel, re zinerzet he re aonig.

Ma oufeh bepred beza izel a galon hag en em lakaad dister, reiza mad ho spered, ne gouezfeh ket ken buan en dañjer nag er pehed.

Eun dra vad eo, e-pad ma vez tomm ar galon gand karantez Doue, soñjal er pezh en em gavo pa deuiio ar glouarienn.

Ha pa en emgavo an amzer-ze, soñjit e hell adarre ar sklêrijenn dond en-dro ha n'am-eus he zennet eur pennad diganeoh nemed evid ho prasa mad ha va gloar.

5.-Gwelloh eo evidoh kaoud da houzañv evel-se eged kaoud atao an traou hervez ho c'hoant.

Ar pezh a ra talvoudegez an den n'eo ket kaoud ar hras da weled Doue ha beza frealzet eo, n'eo ket beza gouizieg war ar Skritur Sakr ha savet en eur garg uhel, med beza izel a galon, beza leun a garantez evid Doue, klask atao gloar Doue ha netra ken, en em zispriz e gwirionez ha karoud gwelloh beza disprizet, gwallgaset gand ar re all eged beza meulet ganto.

KENTEL VIII

Red eo en izellaad dirag Doue.

1.-AN DISKIBL-Komz a rin ouz va Doue, beza n'on nemed poultr ha ludu.

Ma kav din e talvezan eun dra bennag ouspenn, e welan ahanoh o sevel 'eneb din ; va fehedou a zoug ivez 'eneb din eur gwir testeni ha ne hellan ket dislavared.

Ma ouzon, avad, en em izellaad, en em gemered evid netra, en em zisprizoud, anzao n'on nemed poultrenn (ar pezh a zo gwir), neuze e teuo din ho kras, ho sklêrijenn a lugerno em halon hag an disterra soñj a hellfen da gaoud d'en em veuli a vezo buan beuzet e goueled va zempladurez hag a yelo da netra evid atao.

Gand ho sklêrijenn e tiskouezot din petra on, petra on bet, euz peleh e teuan, rag n'on netra, nemed sempladurez.

Kerkent, avad, ha ma rit eur zell warnon, ez on kreñv, ez on adarre leun a levenez.

Ha souezuz eo e vijen ker buan savet em zav ha degemeret etre ho tivreh gand kemend a garantez, me ken douget dreizon va-unan d'en em drei ouz traou an douar.

2.-Ho karantez eo a ra kement-se, oh en em ginnig din ahanoh hoh-unan, o tond d'am zikour e-kreiz va ezommou ken niveruz, o tiwall ahanon diouz an dañjeriou braz, o tenna ahanon diouz va foaniou a zo heb niver, koulz lavared.

Oh en em gared fall va-unan, em eus en em gollet ; o klask ahanoh ha c'hwi hepken, o kared ahanoh evel m'eo dleet, em-eus en em gavet va-unan ha kavet ahanoh, ha dre ho karantez am-eus anavezet gwelloh c'hoaz n'on netra.

Rag C'hwi, va Doue mad-meurbed, a ra evidon muioh eged na veritan, muioh eged na hellan da gredi, da houlenn.

3.-Mil bennoz deoh, va Doue, rag daoust ma n'on ket din da reseo netra diganeoh, evelato ho madelez hag ho trugarez heb muzul ne ehanont da ober vad zoken d'an dud dianaoudeg ha d'ar re a zo pell diouzoh.

Troit ahanom war-zu ennoh evel ma vezim anaoudeg en ho keñver, izel a galon, devod, rag C'hwi hepken a ra or zilvidigez, or furnez, on nerz.

KENTEL IX

Red eo ober pep tra evid Doue, ar Mestr war gement 'zo.

1.-JEZUZ-KRIST. Va mab, din-me e tleoh kinnig kemend a reoh, ma fell deoh beza eüruz, rag me eo ar penn kenta hag ar penn diweza euz kement 'zo.

Gand ar zoñj-se ho karantez a deui da veza kaerroh-kaerra, e-leh en em drei evel bremañ re aliez ouzoh hoh-unan hag ouz ar grouadurien.

M'en em glaskit hoh-unan en eun dra bennag, kerkent e teu ho kalon da glouarraad ha da zeha.

Lakit 'ta ho poan da ober pep tra evidon-me, rag diganin-me eo e teu pep tra.

Soñjit e teu an oll vadou digand an Hini a zo mad dreist pep tra, rag-se din-me, evel d'o eienenn, eo e tleer degas adarre en-dro an oll vadou

2.-Diganin-me, evel euz eun eienenn veo, e teu an dour a vuhez d'an hini bihan ha d'an hini braz, d'ar paour ha d'ar pinvidig, hag ar re en em laka d'am zervicha a-greiz kalon a resevo grasou war grasou.

An hini, avad, a glasko e hloar pell diouzin-me, an hini a glasko e blijadur en eun dra bennag o tilezel ahanon-me, hennez ne gavo ket a joa wirion, e galon ne vezo ket leun gand al levez, med rouestlet hag enkrezet e vezo e pep doare.

Na lavarit eta morse ho-peus greet eur vad bennag dre ho nerz hoh-unan, na lavarit morse e-neus eun den bennag furnez dreizañ e-unan ; roit pep tra da Zoue, rag hep Doue an den n'e-neus netra.

Me eo am-eus roet pep tra, me a fell din en distro kaoud pep tra, ha falvezoud a ra din a-grenn beza trugarekeet.

3.-Setu aze ar wirionez a laka da dehed gloar goulo ar bed.

El leh ma'z a grasou an Neñv hag ar garantez, eno ne vezo ket a warizi, nag enkrez er galon, na karantez evid traou krouet.

Rag karantez Doue a zo treh da bep tra hag a laka da greski nerz an ene.

Ma vezit fur, e klaskot ho levez ganin-me hepken, e lakot ho fiziañs ennon-me hepken, rag Doue hepken a zo mad. Doue a zo da veuli dreist pep tra, da venniga e pep tra e-pad an oll amzer. Evel-se bezet greet.

KENTEL X

Pegen mad eo servicha Doue hag ober fae war ar bed

1.-AN DISKIBL. Komz a rin ouzoh adarre, Aotrou, ha ne davin ket. Lavared a rin d'am Doue, va Mestr, va Roue a zo e gorre an Neñv : « Pegen braz eo, va Doue, an dudi ho-peus pourchaset evid ar re o-deus doujañs evidoh ! »

Med petra na rit ket evid ar re ho kar, evid ar re a zervich ahanoh a-greiz-kalon !

Ne hell den lavared pegen braz eo al levez a skuillit war ar re a dro ouzoh o daoulagad, war ar re ho kar.

Diskouzet ho-peus dreist-oll pegen dous eo ho karantez evidon e kemend-mañ : « N'oa ket ahanon hag ho-peus sachet ahanon war-zu ennoh evid ho servicha, ha gourhemennet ho-peus din ho kared. »

2.-Eienenn ar garantez a bad da viken, petra 'lavarin ahanoh ?

Penaoz e hellin ankounac'haad ahanoh, goude m'ho-peus bet ar vadelez da zoñjal ennon, daoust ma'zo an dizeh hag o vond da goll ?

Bet oh bet madelezuz e-keñver ho servicher dreist ar pezh a helle gedal, roet ho-peus dezañ ho krasou hag ho karantez en tu-all d'ar pezh a oa dleet.

Petra a hellin-me kinnig deoh evid ar grasou-ze ? N'eo ket roet da bep hini trei kein da oll draou ar bed-mañ ha mond da veva en eul leandi.

Daoust hag eun dra vraz eo servicha ahanoh, peogwir an oll grouadurien a dle ho servicha ?

Arabad eo din kredi e ve eun dra vraz o servicha va Mestr.

Ar pezh a dle beza braz ha souezuz evid va daoulagad eo ho-pije ar vadelez d'am hemered e reñk ho servicherien garet, me ken paour, ken fall.

3.-Deoh kemend am-eus, kemend a hellan da lakaad en ho servich.

Ha koulskoude ar hontrol eo a zegouez, c'hwi a zervich ahanon muioh eged n'ho servichan.

Setu--aze an Neñv hag an douar ho-peus krouet evid an den : emaint aze dirazoh ha bemdez e reont ar pezh ho-peus gourhemennet dezo ; n'eo kat a-walh c'hoaz : krouet ho-peus ivez Êlez evid servicha an den !

Med ar pezh a zo dreist an oll draou-ze eo ho-pije, C'hwi, prizet dond da zervicha an den ha lavared eh en em rofeh hoh-unan dezañ.

4.-Petra a roin deoh evid ar madoberou-ze heb niver ?

Plijet ganeoh e hellfen ho servicha bep devez euz va buhez !

Plijet ganeoh e hellfen, eun devez hepken, ho servicha evel m'eo dleet !

Dleet eo deoh beza servichet, dleet eo deoh peb enor, peb meuleudi.

C'hwi a zo e gwirionez va Mestr ha me a zo ho servicher ; va dever eo ho servicha euz va oll nerz hag ho meuli heb morse en em skuiza.

Setu petra a glaskan, petra a hoantaan, roit din ar pezh a vankfe din.

Braz eo an nenor, ar hloar a zo o servicha ahanoh hag o tisprizoud pep tra abalamour deoh.

Karget e vezo a hrasou ar re o-devo en em roet a galon vad d'ho servich santel.

Frealzidigez ar Spered Santel, dous-meurbed, a ziskenno en o halonou, o eneou a vezo dishual-kaer, abalamour m'o-devezo, evid hoh ano, kemeret an hent striz ha tehet diouz an oll draou a vez o touella an dud war an douar-mañ.

5.-O ! pegen mad, pegen dudiuz eo servicha Doue, peogwir dre eno an den a deu da veza e gwirionez libr ha santel !

O ! stad santel ar relijiusted a laka an den heñvel ouz an Êlez, mignon da Zoue, gallouduz a-eneb an droug-sperejou a gren dirazañ ha din da veza meulet gand an oll gristenien.

O ! stad a vuhez, servich santel, stad a dle ober avi d'an dud, stad a dle beza klasket, peogwir dreizi eh en em gaver pep Mad, hag en eürusted a bado da viken.

KENTEL XI

Red eo poueza ha reiza mad kemend c'hoant a deu er galon

1.-JEZUZ-KRIST. Va mab, kalz traou a jom c'hoaz ganeoh da zeski, traou na anavezit ket mad a-walh.

AN DISKIBL. Pere Aotrou ?

JEZUZ-KRIST. Trei hoh oll hoantegeziou hervez ma plij din, kaoud youl ha c'hoant braz da ober ar pezh a fell din, e-leh en em gared hoh-unan.

Aliez e teu en ho kalon c'hoantegeziou kreñv ha nerzuz, med gwelit ha poulzet oh ganto war-zu ar pezh a ra enor din-me pa war-zu ar pezh a ra plijadur deoh-c'hwi.

Mard eo me a zo a sach ahanoh, e vezoh eüruz, n'eus forz petra a vezo gourhemennet deoh.

Ma klaskit, avad, an disterra ho mad hoh-unan, setu a-walh evid hoh huala hag hoh ankenia.

2.-Diwallit 'ta da zalher d'ho c'hoantegeziou, heb beza goulennet kuzul diganin-me ; gand aon n'ho-pije keuz da houde ha na zisplije deoh ar pezh a gareh da genta o soñjal e oa ar gwella.

Arabad eo heul diouz tu kemend c'hoantegez a gav deoh a zo mad, na tehed diouz tu diouz kemend c'hoantegez a zisplij deoh.

A-wechou eo talvouduz harpa zoken ouz ar youlou ha c'hoantegeziou mad evid mired na ve ho spered tregaset ha distroet diouz Doue, evid mired ivez na rofeh skwer fall d'ar re all oh ober traou o-deus an doare da veza a-eneb ar reiz vad, evid mired ivez na zeufeh da fallgaloni ha da gaoud enkreiz abalamour ma talh ar re all penn deoh.

3.-A-wechou, avad eo red mond a-daol ha stourm kaled ouz youlou ar Horv heb ober van ouz ar pezh a hoanta pe ne hoanta ket, red eo stourm, hen lakaad da bleaga d'ar spered zoken en despet dezañ.

Hag e gastiza, e lakaad da bleaga a vezo red, beteg ma plijo gantañ señti e pep tra, en em gontanti gand nebeud a dra, kared an traou disterra ha morse en em glemm evid netra.

KENTEL XII

Red eo poania da veza pasiant ha stourm ouz ar youlou fall.

1.-AN DISKIBL. Doue, va Aotrou, gweled a ran am-eus ezomm braz euz ar basianted, rag e-leiz a draou a zo oh enebi ouz an den war an douar-mañ. Ne heller ket beza amañ hep poan, hep brezel, n'eus forz petra a vezo greet evid kaoud ar peoh.

2.-JEZUZ-KRIST-Evel-se ema an traou, va mab. Ne fell ket din, avad, gweled ahanoh o klask eur peoh na vije stag outi na tentasion nag enebiez ebed ; kredit ho-pezo kavet ar peoh pa vezoh bet heskinet gand tentasionou hag enkreziou a bep giz, pa vezo bet kalz traou oh enebi ouzoh.

3.-Ma lavarit ne hellit ket gouzañv kemend a boaniou, penaoz e helloh gouzañv tan ar Purgator ?

Etre diou boan e ranker atao kemered an disterra.

Evid tehed diouz poaniou ar vuhez all, deskit gouzañv gand pasianted, evid Doue, poaniou ar vuhez-mañ.

Ha kavoud a ra deoh n'o-deus tud ar bed netra pe nebeud a dra hepken da houzañv ?

Ne gavoh hini ebed hep poan, zoken e-touez ar re a zo eürusa o buhez.

« Med, a lavarit, plijadur o-deus e-leiz ; ober a hellont hervez o hoant, hag abalamour da-ze e kavont skañv o foaniou. »

Lakom ema evel-se ganto, o-deus kemend a hoantaont. Med pegeid, a gav deoh, e pado kement-se ?

4.-Tremen a raint evel moged ar re a zo e-kreiz an danvez er bed-mañ, ha ne vezo mui ano ebed euz o flijadureziou.

Med zoken e-pad o buhez n'emaint ket e-touez o madou heb neh, hep tristidigez, heb aon.

En traou a dlee, war o mennoz, ober plijadur dezo, e kavont aliez poan.

Ha mad 'zo greet dezo. Klask a reont plijadureziou heb reiz ebed ; n'eo ket fall e teufe da heul mez ha melkoni.

5.-Pegen berr, pegen faziuz, pegen direiz, pegen mezuz an oll blijadureziou-ze !

Koulskoude, mezvet ha dallet, ne gomprenont ket ; med heñvel ouz an anevaled mud ez eont da glask eun tammig plijadur er vuhez-mañ ken bresk hag e roont d'o ene taol ar maro.

C'hwi eta, va Mab, na dit ket da heul ho c'hoantegeziou, en em zistagit diouto, klaskit ho plijadur gand an Aotrou Doue, hag ho-pezo ar pez a hoanta ho kalon.

6.-Rag ma klaskit kaoud gwir blijadur ha beza frealzet e-leiz ganin-me, grit fae war oll vadou ar bed, pellait diouz oll blijadureziou an douar ; neuze va bennoz a gouezo warnoh hag ho kalon a vezo karget a joa.

Ha seul-vui ho-pezo dilezet frealzidigez an dud, seul-vui e vezo dudiuz ha kreñv ar frealzidigez a roin-me deoh.

Med er penn kenta ne helloh ket tañva ar joa a roan-me heb beza stourmet, heb beza bet eun tamm tristidigez.

Eur pleg fall bennag a enebo ouzoh, med eur pleg fall a heller lakaad eur pleg mad en e leh.

Ar hig a glemmo, med dalhet e vezo reiz gand nerz an ene.

Hegaset ha broudet e vezot gand an êrouant milliget, an hini a zo o touella an dud a-bell 'zo, med gand ar bedenn e lakot anezañ da dehed, hag oh en em rei d'eul labour vad bennag e stankoh outañ dor hoh ene.

KENTEL XIII

Beza izel a galon ha senti evel Jezuz-Krist.

1.-JEZUZ-KRIST-Va mab, an neb a fell dezañ chom hep senti a bella diouz ar hras hag o klask kavoud eun dra bennag evitañ e-unan hepken e koll ar madou roet d'an oll.

An neb na bleg ket a galon vad d'an hini a zo karget d'e ren a ziskouez n'eo ket deuet c'hoaz a-benn euz youlou e gorv, peogwir e klever c'hoaz ar horv o klemm hag o klask mouzad.

Deskit 'ta senti buan ouz an hini e-neus karg ahanoh, mar ho-peus c'hoant da veza treh d'ho kory.

Êz e vezo dond a-benn euz an enebour a ziaavêz pa ne vezo ket a vrezel en diabarz.

N'ho-peus ket gwasoh na falloh enebour d'hoh ene eged c'hwi hoh-unan pa n'ema ket ganeoh ar peoh.

En em zispriza a rankit evid mad ma fell deoh beza treh d'ar hig ha d'ar gwad.

En em gared re a reoh c'hoaz ; setu perag e kavit diêz plega d'ar pez a houlen diganeoh ar re all.

2.-Ha koulskoude, daoust hag eun dra vraz eo ho kweled soubla da eun den abalamour da Zoue, c'hwi poultrenn ha netra, peogwir me an Oll-Halloudeg, an Doue Uhel dresit pep tra, an hini e-neus krouet euz an netra kemend 'zo, am-eus en em lakeet dister ha sentet ouz an den abalamour deoh ?

An disterra, an diweza euz an dud ez on em lakeet evid diskar hoh ourgouill.

Poultr ma'z oh, deskit senti. Poultr ha ludu, deskit beza izel a galon ha plega dindan treid an oll.

Deskit terri ho polontez hoh-unan ha senti ouz an oll.

3.-Bezit rust ouzoh hoh-unan, na lezit ket an disterra tamm ourgouill da hweza en ho kalon, med en em lakit ken bihan, ken sentuz, ma hello an oll bale warnoh ha flastra ahanoh evel fank an hentchou.

Den a netra, perag ez afeh da glemm ?

Peher hudur, petra a helloh da lavared d'ar re a ra rebechou deoh, goude m'ho-peus ken aliez ofañset ho Toue, ken aliez meritet an ifern ?

Med va madelez he-deus espernet ahanoh, abalamour d'an dalvoudegez e-neus hoh ene evidon, evid ma hellfeh gweled va harantez, ma vijeh anaoudeg evid va madoberou, ma vijeh atao laouen o senti hag oh en em izellaad, ha gouest da houzañv gand pasianted beza disprizet.

KENTEL XIV

Soñjom e barnidigez Doue evid na zeuio ket or halon da c’hweza abalamour d’ar vad on-eus greet.

1.-AN DISKIBL-Va Doue, ho parnidigez a lakit da grozal dirag va fenn, va oll eskern a gren gand ar spont, ha va ene a zo strafuillet oll.

Mantret e choman ha spontet o soñjal n’eo ket kaer a-walh an neñv a-zirazoh.

Mar ho-peus kavet pehed en Êlez, ha ma n’ho-peus ket espernet anezo, petra a hoarvezo ganin-me ?

Ar stered a zo kouezet eus an Neñv, ha me, poultr ma’z on, petra a hellan da hedall ?

Ar re a oa o oberou din da veza meulet a zo kouezet ken izel ha ma heller koueza, hag ar re a zebre bara an Êlez am-eus gwelet o lonka gand plijadur boued ar moh.

2.-N’eus santelez ebed, va Doue, ma paouezit da harpa an den. Furnez ebed ne dalv netra ma n’ema ket ar stur ganeoh.

Nerz ebed ne hell ober vad ma chomit heb he harpa.

Kalon ebed ne hell padoud da jom glan ma n’he diwallit ket.

Ha ne dalv netra taoler evez ma n’emaoh ket hoh-unan o veilla.

Lezet gand ho nerz on-unan ez eom d’ar goueled, ez eom da goll.

Pa deuit davedom, ez om leun a vuhez hag e savom war on treid.

Horjella a reom, med c’hwi a deu d’or skora ; klouar om, med c’hwi a deu da entana or halon.

3.-O ! Nag ez eo red din anzañ ez on izel ha nebeud a dra !

Na pegen nebeud a dalvoudegez a dlean da staga ouz an tammig vad a hellfen da ober !

Nag e tlean soubla, o va Doue, dirag ho parnedigez a zo kemend dreist spered an den ! Ne don netra, n’eus netra ahanon, netra !

E peleh e kavo an ourgouill eun toull da guzad ? E peleh ez aio ar fiziañs e-noa en e halloud e-unan ?

Oll voged an orgouill a zo eet da netra dirag ho parnedigez o koueza warnon.

4.-Petra eo an den dirazoh ? Eur pod pri daoust hag en em zevel a hell a-eneb an hini e-neus her greet ?

An hini a zo e gwirionez e galon da Zoue, penaoz e hellfe c’hweza gand al lorch o kleved meuleudi didalvez an dud ?

Ar bed oll ne hellfe ket lakaad da hweza kalon an hini a zo evid mad gounezet gand ar wirionez, oll veuleudiou an dud ne hellint netra war an hini e-neus lakeet e oll fiziañs e Doue.

Rag ar re a gomz ne dint netra kennebeud, tremen a raint ker buan ha trouz o homzou.

Gwirionez Doue, avad, a bado da viken.

KENTEL XV

Penaos e rankom ober, petra a dleom da lavared pa deu eur c'hoant en or halon.

1.-JEZUZ-KRIST-Va mab, lavarit evel-henn e pep tra : « Va Doue, ra vezo greet kement-se, ma plij deoh. Va Doue, ma'z eo evid ho kloar, ra vezo greet en hoh ano. Va Doue, ma kredit eo mad ha talvoudeg evidon, roit din an dra-ze evid m'hen implijin evid ho kloar. Med ma kav deoh e vezo noazuz din ha ne dalvezo netra d'am zilvidigez, pellait diouzin ar c'hoant-se. »

Rag pep c'hoant na deu ket a-berz ar Spered-Santel, ha goude ma vije kavet mad hag eün gand an den.

Diêz eo gouzoud difazi pe an êl mad pe an droug-spered a zo o tegas d'ho spered ar c'hoant-se, pe c'hwi hoh-unan.

Meur a hini o-deus gwelet a-benn ar fin e oant faziet, hag a zoñje dezo da genta beza poulzet gand ar Spered-Santel.

2.-Rag-se eo red deoh beza leun a zoujañs evid Doue ha kaoud atao eur galon izel pa hoantait, pa houlennit eun dra bennag ; en em lakait etre va daouarn-me gand fiiziañs ha lavarit : « Va Doue, c'hwi a oar petra 'zo ar gwella evidon, grit an dra-mañ evel ma plijo ganeoh. Roit din ar pezh a garoh, kemend a garoh hag er mare ma plijo ganeoh. Grit ahanon evel a garoh, hervez ma ouzoh e vezo ar gwella evidon hag evid ho kloar. Lakait ahanon el leh ma karoh ha grit ganin e pep tra ar pezh a blij deoh. En ho taouarn emaon, kasit ha degasit ahanon e pep giz. Me a zo ho servicher, kontant da ober n'eus forz petra. N'eo ket evidon va-unan, med evidoh eo e fell din beva hag en eun doare mad ha kaer kenañ, setu va youl.

Pedenn evid goulenn ar hras da ober bolontez Doue.

3.-AN DISKIBL. O va Jezuz, leun na vadelez, roit din ho kras, ma vezo, ma labouro ganin ha ma chomo ennon beteg ar fin.

Grit ma klaskin, ma c'hoantain atao ar pezh a blij ar muia deoh, ar pezh a gavit ar gwella.

Ra vezo ho polontez va hini-me, ra vezo va bolontez hervez hoh hini e pep tra.

Ra vezin a-unan ganeoh evid c'hoantaad ar pezh a hoantait hag en em zistrei diouz ar pezh m'en em zistroit hoh-unan, evid ma rin eveldeh e pep tra.

4.-Grit ma varvin da gement tra 'zo er bed ha ma karin abalamour deoh beza disprizet hag ankounac'heet war an douar-mañ.

Grit ma klaskin ar peoh en ho kichenn, grit d'am halon dilezel kemend a heller c'hoantaad evid beza ganeoh.

C'hwi eo peoh gwirion ar galon, he gwir eürusted, pell diouzoh n'eus nemed trubuill, anken.

Er peoh-se, da lavared eo ennoh hag ennoh hepken, C'hwi ar mad dreist pep mad, ar mad a bado da viken, e fell din kousked ha diskuiza. Evel-se bezet greet.

KENTEL XVI

Digand Doue hepken e tleer goulenn ar wir frealzidigez

1.-AN DISKIBL-Kemend a hellan c'hoantaad pe zoñjal evid beza frealzet n'eo ket evid ar vuhez-mañ, evid ar vuhez all eo ez eo.

Ha p'am-bije evidon va-unan oll frealzidigez an douar-mañ, oll vadou ar bed, sklêr eo ne badfent ket pell.

Rag-se, va ene, ne helli ket kaoud frealzidigez, levezet leun, gwirion, nemed e Doue, an hini a ro dizoan d'ar re baour hag harp d'ar re izel a galon.

Gortoz eur pennad, va ene, gortoz ma roio Doue ar pezh e-neus prometet hag e vezi o neui e-kreiz oll vadou ar Baradoz.

Ma klaskez gand re a vall traou an douar, e kolli madou an Neñv, ar madou a bad da viken.

Kemered a hellez hervez da ezomm traou ar bed, med soñj atao er madou peurbaduz.

Ne hellez ket terri da naon gand hini ebed euz an traou krouet, rag n'out ket greet evito.

2.-Ha goude m'az-pije an oll draou krouet, ne hellez ket beza eüruz ha laouen, med e Doue. Krouer pep tra, eo ema da eürusted, da levezet ; an eürusted-se n'eo ket ar pezh a zoñj an dud diskiant a stag o halon ouz ar bed, med eun eürusted evel m'ema o hedal gwir zervicherien Jezuz-Krist hag a vez tañveet a-wechou er bed-mañ gand ar re a zo o halon troet war-zu an Neñv ha glan, gand ar re a zo o zoñj er Baradoz.

Kement frealzidigez a deu euz ar bed a zo evel moged, ne bad ket pell.

Ar wir frealzidigez, an hini a ra vad d'ar galon, a deu en diabarz digand ar Wirionez.

Hag an den devod a zoug gantañ e pep leh Jezuz, e frealzidigez, hag a lavar dezañ :

« O Jezuz, va Aotrou, bezit ganin e pep leh hag e pep amzer.

« Ra vezo evidon eur frealzidigez ar c'hoant da jom heb beza frealzet gand an dud.

« Ha ma chomit hep va frealzi, ra vezin eüruz o soñjal eo ho polontez hag e fell deoh gweled petra a dalvezan.

« Rag ho kounnar ne bado ket atao, ne gendalhot ket atao da hourdrouz. »

KENTEL XVII

E Doue hepken e tleom lakaad or fiziañs.

1.-JEZUZ-KRIST. Va mab, lezit ahanon da ober ganeoh ar pezh a garan, rag me a oar petra a zo mad evidoh.

Ho soñjou a zo evel soñjou an dud, hag e meur a dra e varnit evel ma c'hoanta ho kalon.

2.-AN DISKIBL. Aotrou, gwir eo ar pezh a lavarit, c'hwi a daol kalz muioh a evez warnon eged na hellan taoler va-unan.

N'eo ket stard en e zav an hini na glask ket e pep tra en em harpa warnoh.

Aotrou, gand ma talhin atao mad deoh, gand ma vezo va spered troet eün war-zu ennoh, grit ahanon ar pezh a gerot.

Kemend a reot din ne hell beza nemed mad.

Ma fell deoh e ven en deñvalijenn, meuleudi deoh ; ma fell deoh e ven er sklêrijenn, meuleudi deoh adarre.

Ma plij deoh va frealzi, meuleudi deoh ; ma plij ganeoh va ankenia, meuleudi deoh atao.

3.-JEZUZ-KRIST. Va mab, evel-se eo e tleit beza, ma fell deoh bale ganin.

Ken eüruz e tleit beza o kaoud poan evel o kaoud levenez.

Ken eüruz o veza en ezomm, er baourentez evel o veza e-kreiz an danvez, ar binvidigez.

4.-AN DISKIBL. Aotrou, laouen e vezin o houzañv evidoh kement tra a deuio din diganeoh.

Dizourzi meur e tegemerin euz ho torn ar mad evel an droug, an dous evel ar c'hwero, al levenez evel an anken hag euz kemend a hoarvezo, me ho trugarekaio, o va Doue !

Diwallit ahanon diouz pep pehed ha n'am-bezo aon na rag ar maro na rag an ivern.

Gand ma ne vezin bannet pell diouzoh e-pad ar beurbadelez, na tennet va ano diwar al leor a vuhez, n'am-bezo droug ebed, n'eus forz pegen braz trubuilhou a gouezfe warnon.

KENTEL XVIII

Dougom gand nerz-kalon poaniou ar vuhez-mañ evid ober evel Jezuz-Krist

1.-JEZUZ-KRIST. Va mab, me a zo diskennet euz an Neñv evid ho savetei, kemeret am-eus ho poaniou,

n'eo ket ouz red, med dre garantez, evid deski deoh gouzañv ha dougen hep klemm poaniou ar vuhez-mañ.

Azaleg m'on deuet war an douar beteg va maro war ar groaz, n'am-eus ket ehan da houzañv.

E-kreiz an dienez ar vrasa on bet, klevet am-eus aliez tamall ahanon, heb en em glemm am-eus gouzañvet an dismegañs hag ar bafouerez ; evid va madoberou n'am-eus kavet war an douar nemed tud dianaoudeg, va burzudou a zo bet droug-prezeget, va henteliou a zo bet kavet abeg enno.

2.-AN DISKIBL. Aotrou, peogwir oh bet pasiant e-pad ho puhez, hag ho-peus evel-se dreist-oll greet hervez gourhemennou ho Tad, eo red din-me ivez, peher paour, gouzañv gand pasianted kemend a zegasoh din ha dougen evid ma zilvidigez, keit ha ma plijo ganeoh, beh ar vuhez reuzeudig-mañ.

Rag, daoust ma vez kavet pounner beh ar vuhez-mañ, evelato, dre ho kras eo deuet da veza eur feunteun a veritou, hag abalamour d'ho skwer ha da skweriou ar Zent eo evid ar re zempl êsoh da zougen. Kalz eürusoh eo bremañ ar vuhez eged gwechall en amzer al Lezenn goz, p'oa klozet dor an Neñv, p'oa teñval an hent, p'oa ken nebeud a dud o klask gounid ar Baradoz. Ar re just, zoken, ar re a dlee beza salvet, ne hellent ket mond d'ar Baradoz a-raog m'ho-poa gouzañvet ho pasion ha paeet o dle o vervel evito.

3.-O ! nag e tlean ho trugarekaad evid ar vadelez ho-peus bet da ziskouez din ha d'an oll dud fidel an hent mad a gas eün d'ho rouantelez.

Rag ho puhez eo on hent, hag o houzañv gand pasianted santel ez eom war-zu ennoh, c'hwi a zo or hurunenn.

Ma ne vijeh ket eet en or-raog, ma n'ho pije ket diskouezet deom an hent, piou a zoñjfe mond d'ho heul ?

Nag a hini a jomfe pell a-dreñv ma ne vije ket ho skweriou santel dirag o daoulagad.

Setu emaom c'hoaz klouar, goude anaoud ho purzudou hag ho kenteliou.

Petra 'vijem 'ta anez ar sklêrijenn gaer-ze d'on heñcha ?

KENTEL XIX

**Gouzañv an dismegañs, penaoz eh anavezer
an hini a zo pasiant e gwirionez.**

1.-JEZUZ-KRIST- Petra a lavarit, va mab ?

Ehanit d'en em glemm o soñjal e va Fasion hag e hini ar Zent.

N'oh ket c'hoaz eet beteg skuill ho kwad.

Nebeud a dra eo ar pezh a houzañvit e-kichenn ar pezh o-deus bet kemend all da houzañv, e-kichenn an tentasionou, an trubuilhou o-deus bet, ar poaniou a bep giz a zo kouezet warno ken stank.

Lakit ho spered da zoñjal e poaniou braz ar re all evid gelloud dougen êsoh ar poaniou buan ho-peus evid ho lod.

Ha ma ne gav ket deoh int bihan, gwelit ha kement-se ne deu ket euz ma n'ho-peus ket a basianted.

Pe 'z int bihan pe vraz, grit gwella a helloh evid o dougen gand pasianted.

2.-Seul-vui e labourit da veza pasiant, seul-vui ez oh fur, seul-vuioh e hounezit ha seul skañvoh e kavot ho peh, rag ho nerz-kalon a gresko hag en em voaza a reot ivez.

Na lavarit ket : “Ne hellan ket gouzañv kemend a-berz an den-ze, n'eo ket traou da houzañv eo ar re-ze ; re a zroug e-neus greet din, rebechi a ra din traou n'am-eus morse soñjet enno. A-berz eun all, avad, on kontant da houzañv ha gouzañv a rin evel ma plijo ganin“.

Diskiant eo heveleb komzou, rag an hini a zoñj evel-se ne zell ket pegement a heller da hounid gand ar basianted, ne zell nemed ouz an droug greet dezañ hag ouz an dud o-deus her greet.

3.-N'e-neus ket a basianted, e gwirionez, an hini ne fell ket dezañ gouzañv nemed kement ha ma plij dezañ hag evel ma plijo gantañ.

An hini a zo pasiant e gwirionez ne zell ket piou a ra poan dezañ, pe e vestr pe eun den euz e stad, pe unan disteroh evitañ, pe eun den mad ha santel, pe unan fall ha droug, med ne ra forz digand piou e teu poaniou dezañ, ne ra forz pegement ha pegen aliez e-neus da houzañv, kemered a ra pep tra digand Doue gand anaoudegez vad ha kredi a ra e-neus bep tro da hounid kalz rag n'eus forz pegen dister eo ar pezh a vez gouzañvet evid Doue, ma vez kinniget da Zoue, eo talvouduz evelato.

4.-Bezit eta prest da stourm ma fell deoh kaoud an treh. Hep stourm ne hellit ket gounid kurunenn ar basianted.

Ma ne fell ket deoh gouzañv, ne fell ket deoh beza kurunet.

Ma fell deoh beza kurunet, stourmit kaloneg, gouzañvit gand pasianted.

Hep labour ne heller en em gavoud en ehan, hep stourm ne heller ket kaoud an treh.

5.-AN DISKIBL-Va Doue, grit din ober, gand ho kras, ar pezh na hellan ket dre va nerz va-unan.

Gouzoud a rit e hellan gouzañv nebeud a dra hag emañ dinerzet kerkent ha ma teu an disterra tra da enebi ouzin.

Grit ma teuin da gared ha da hoantaad an oll boaniou evid hoh ano.

Rag gouzañv ha kaoud dismegañs abalamour deoh a zo evidon talvouduz braz

KENTEL XX

Anzavom ez om dister - Poaniou ar vuhez-mañ

1.-AN DISKIBL. Anzav a rin ez on eur peher, o va Doue, anzav a rin dirazoh ez on eur peher.

Aliez an disterra tra a hell va diskar hag ober poan din.

Lakaad a ran em zoñj labourad kaloneg, ha kerkent ha ma teu an disterra tentasion, ez on enkrezet oll.

A-wechou eun dra vihan-kenañ a zo a-walh evid degas warnon eun dentasion vraz, ha pa gav din emañ eun tammig er goudor, e teu pa ne zoñjan ket eun enezennig vihan warnon hag ez on hanter ziskaret.

2.-Gwelit eta, va Doue, va zempladurez, gwelit pegen dister on, her gouzoud a rit.

Ho-pezit truez ouzin, ha tennit ahanon euz ar fank evid na 'z in ket donnoh e-barz ha na jomin ket e-barz evid atao.

Setu ar pezh a ra poan ha glahar din ha med ivez dirazoh ; gwelet on ker buan da goueza, ken dinerz eneb an tentasionou.

Rag beza ma ne hellont ket va lakaad a-walh da gemered plijadur ganto, evelato e kavan diêz, poaniuz, beza evel-se broudet ganto, skuiz on o vev bemdez er brezel.

Ar pezh a ra din dreist-oll gweled va zempladurez eo ma teu ar zoñjou louz em spered kalz buannoh eged na 'z eont er-mêz.

3.-Doue Izrael, Doue oll-halloudeg, divennour an eneou mad, sellit a-druez ouz poaniou ha glahar ho servicher ha roit skoazell dezañ e kement tra en-dezo da ober

Kennerzit ahanon gand an nerz a deu euz an neñv evid,na vezo ket an treh d'an den koz a zo c'hoaz beo ennon, evid na vezo ket an treh d'ar hig brein-mañ n'eo ket c'hoaz sentuz a-walh ouz ar spered hag a zo red ober brezel dezañ keit ha ma vezer er vuhez-mañ leun a anken.

Siwaz ! pebez buhez ! n'eus enni nemed trubuillou ha poaniou.

E pep tu n'ez eus nemed rouejou, enebourien.

Kerkent ha m'eo tremenet eur boan, eun dentasion, e teu eun all ; n'om ket c'hoaz diskrav diouz ar stourmad kenta hag en eun taol ez eus deuzet warnom eur maread a dentasionou all hag e rankom stourm adarre.

4.-Penaos e heller kared eur vuhez a zo enni kemend a anken, kemend a drubuill, kemend a boan ?

Ha koulskoude, kalz a gar ar vuhez, kalz a glask enni plijadureziou.

Aliez e vez klevet rebech d'ar bed eo touelluz, ne ro nemed moged, ha koulskoude n'eo ket êz en em zistaga dioutañ abalamour da youlou ar horv 'zo mistri d'an den.

Traou a zo a ra deom kared ar bed, traou all a ra deom hen disprijoud.

Youlou ar hig, c'hoant direiz an daoulagad, ourgouill ar vuhez, setu petra a ra deom kared an douar-mañ ; med ar poaniou hag an enkreziou a deu da heul a ra deom kaoud kas ouz ar bed ha fasta gantañ.

5.-Med siwaz ! ar blijadur fall a deu da veza treh d'an ene en em ro d'ar bed hag e teu an ene-ze d'en em blijoud o veza hualet gand plijdureziou ar horv abalamour n'e-neus na gwelet na tañvaeet madelez Doue hag ar blijadur dudiuz a ro ar zantelez.

Ar re a ra e gwirionez fae war ar bed hag a glask beva evid Doue dindan eur reolenn zantel, ar re-ze ne jomont ket heb anaoud al levez santel prometet gand Doue d'ar re a dro kein d'ar bed ; ar re-ze a wel mad pegement e fazi ar bed, pegement e vez tromplet.

KENTEL XXI

E Doue dreist an oll vadou ha donezonou e tleom klask ar peoh hag an eürusted.

1.-AN DISKIBL. E pep tra ha dreist pep tra, va ene, klaskit ar peoh e Doue, rag Eñ a ro d'ar Zent ar peoh a bad da viken.

O ! va Jezuz dous ha mad, grit ma klaskin ennoh ar peoh muioh eged en oll grouadurien, muioh eged er hloar hag an enoriou, muioh eged er galloud hag er hargou uhel, muioh eged en deskadurez hag er spered hag er spered lemm, muioh eged en danvez hag an traou kaer greet gand an dud, muioh eged er joa hag al levenez, muioh eged er vrud hag er meuleudiou, muioh eged e pep joa ha frealzidigez, muioh eged e pep fiziañs ha promesa, muioh eged e pep vad hag e pep c'hoant, muioh eged en oll donezonou hag en oll madoberou a hellit da rei, muioh eged en oll joa ha levenez a hell an ene kaoud ha tañva, muioh eged en Êlez hag en Arhêlez hag en oll draou, ar re a weler hag ar re na weler ket, muioh eged e kement tra ne deo ket c'hwi eo, rag c'hwi eo va Doue, c'hwi a zo mad dreist pep tra.

2.-C'hwi hepken a zo uhel dreist pep tra, oll halloudeg ; c'hwi hepken n'ho-peus ket ezomm euz hini all ebed, rag ne vank netra deoh ; c'hwi hepken a zo dous meurbed hag a oar frealzi ar halonou ; c'hwi hepken a zo kaer ha karantezuz meurbed, braz ha skeduz dreist pep tra ; ennoh ema asamblez ha leun, an oll vertuziou a zo, a zo bet hag a vezo ; rag-se eo re vihan, re zister evidon kemend a roit din ma n'en em roit hoh-unan ; kemend a lavarit diwar ho penn, kemend a brometit, ma ne hellan ket ho kweled hag ho kaoud evid mad.

Va halon ne hell ket kaoud ar peoh gwirion na beza leuniet a-walh nemed oh en em lakaad en ho kichenn hag o sevel dreist an oll vadou, dreist an oll grouadurien.

3.-O ! va Fried karet, O ! Jezuz va mignon kaer meurbed, mestr an oll grouadurien ! Piou a roio din-me diouaskell ha gwir frankiz ma hellin nijal beteg ennoh hag harpa va halon war hoh hini ?

O ! pegoulz e hellin beza distrob diouz pep tra ha tañva pegen mad oh, o va Doue !

Pegoulz e hellin beza oll deoh ken beuzet en ho karantez ma n'en em zantin ket va-unan, ma na zantin nemedoh en eun doare dudiuz meurbed, en eun doare ne hell ket an oll anaoud !

Bremañ ne ran nemed klemm hag e tougan gand glahar va foaniou.

Rag en draonienn-mañ a zaelou e teu kalz poaniou d'am gwaska, da zegas din glahar ha tristidigez, d'am stroba, d'am zouella evid mired ouzin da vond war-eün d'ho kavoud, da veza briatet ganeoh evel ma vez ar Sperejou eüruz bepred !

Ho-pezit truez ouz va hlemmou, ouz ar poaniou am-eus da houzañv ker stank war an douar !

4.-O Jezuz, sklêrijenn ar hloar a bado da viken, frealzidigez an ene war an douar ! dilavar on dirazoh, med c’hwi a gompren ahanon evelato !

Pegeid e taleo c’hoaz va Doue da zond ?

Ra zeuio da gavoud e zervicher paour, d’hen lakaad laouen !

Ra astenno e zorn evid va zenna euz peb anken, maleüruz ma ‘z on.

Deuit, deuit, rag heptoh n’am-bezo nag eun devez nag eun eur a beoh ; c’hwi eo va levez, hepdoh n’am-eus netra da derri va naon.

Maleüruz on, heñvel ouz eun den taolet er prizon ha karget a jadenno, beteg ma teuot d’am hennerza gand ho sklêrijenn, d’am distroba euz va liammou, da ziskouez din ho pizaj karantezuz.

5.-Ra glasko ar re all ar pez a garint e-leh ho klask-c’hwi ; evidon-me ne blij ha ne blijo netra all din nemedoh, va Doue, c’hwi va fiziañs, va zilvidigez !

Ne ehanin d’ho kervel, d’ho pedi, ken na deuio ho kras din, ken na lavarot din : “Setu-me amañ, deuet on d’ho kavoud abalamour m’ho-peus va galvet“.

A, va Doue ! ho taelou, c’hoant hoh ene, ho kalon izel, glaharet, an oll draou-ze o-deus sachet ahanon ha va degaset beteg ennoh.

6.-Ha me am-eus lavaret : “Va Doue, ho kalvet am-eus, c’hoant am-eus e vijeh din ha prest on da zilelel pep tra evidoh.

C’hwi eo ho-peus ar henta degaset din ar c’hoant da veza deoh.

Bennoz deoh, va Doue, evid ar vadelez, an drugarez vraz ho-peus bet evid ho servicher.

Petra a hell lavared dirazoh ho servicher, o va Doue, petra a hell ober nemed en em lakaad bihan dirazoh o soñjal atao pegen dister, pegen peher eo.

O ! va Doue, n’eus ket heñvel ouzoh e-touez oll draou kaer an Neñv hag an douar.

Hoh oberou a zo mad kenañ, ho parnidigez a zo gwirion, hag ho furnez a ren pep tra.

Meuleudi eta ha gloar deoh, o Furnez an Tad Eternel !

Ra viot meulet ha benniget gand va genou, gand va ene, hag ivez gand an oll draou krouet !

KENTEL XXII

Dalhom soñj euz madoberou Doue a zo heb niver

1.-AN DISKIBL. Va Doue, digorit va halon d'ho lezenn, ha deskit din bale dre hent ho kourhemennou. Grit din kompren petra a houlennit diganin ha derhel soñj gand doujañs, gand evez mad, euz ho madoberou, ar re o-deus perz an oll enno hag ar re ho-peus roet din-me hepken, evid ma hellin ho trugarekaad evel m'eo dleet.

Her gouzoud hag hen anzañ a ran, n'on ket evid ho trugarekaad a-walh evid an disterra euz ho madoberou.

Dreist ar pez a veritan ema an oll vadou a roit din, ha pa zoñjan pegen braz oh, e teu va spered da veza spontet.

2.-Kement tra on-eus en on ene hag en or horv, kemend on-eus e diavêz hag en diabarz, madou an douar ha madou an Neñv, a deu digand ho madelez hag a ra deom anzañ ho trugarez, ho karantez evidom, ho karantez eo eienenn an oll vadou.

Da unan e vez roet muioh, d'eun all nebeutoh, med diganeoh e teu pep tra hag heptoh ne hellom kaoud an disterra tra.

An hini a zo roet muioh dezañ ne hell ket en em fougeal na klask en em zevel dreist ar rre all nag ober goap ouz an hini e-neus nebeutoh ; rag ar gwella, ar brasa eo an hini a vez gwelet an nebeuta oh en em fougeal, an hini a zo izel e galon hag a zo ar muia troet da drugarekaad Doue.

Hag an hini en em laka izelloh ha falloh eged an oll, hennez a zo er gwell stad evid kaoud ar madou brasa.

3.-An hini e-neus bet nebeutoh ne dle ket beza teñval e benn, ne dle ket en em glemm, na gaoud avi ouz an hini a zo bet roet muioh dezañ ; gwelloh eo dezañ sevel e spered war-zu ennoh ha meuli ho trugarez a ro d'an oll dud ho madou ken puill, a galon vad hag hep selled da biou e roit.

Pep tra a deu diganeoh hag evel-se eo red ho meuli evid pep tra.

C'hwi a oar petra a zo mad da rei da bep hini, perag hemañ e-neus nebeutoh hag hennez muioh ; n'eo ket deom-ni med deoh-c'hwi a oar pep tra a dalv pep den.

4.-Abalamour da ze, va Doue, e kemeran evid eur hras vraz kaoud nebeud euz ar madou a deu d'o heul, meuleudi ha gloar a-berz an dud.

Hag an hini a zo o selled pegen paour ha pegen dister eo, e-leh kaoud diêz an dra-ze, e-leh beza teñval e benn ha fallgaloni, a dle kentoh beza eüruz ha laouen-kaer, rag c'hwi va Doue, ho-peus dibabet an dud

paour ha dister, an dud disprizet gand ar bed evid beza ho mignoned hag ho servicherien.

Evid testou ema an Ebestel ho-peus lakeet da vistri war ar bed oll. Bevet o-deus war an douar-mañ heb en em glemm, izel a galon, eün a spered, heb ober droug da zen, hep klask trompla ; laouen e oant o veza disprizet abalamour deoh ha gand joa vraz eh en em roent d'an traou ha labouriou a ra an dud fae warno.

5.-Netra ne dle ober kemend a blijadur d'an hini a gar ahanoh hag a anavez ho madoberou, evel soñjal e rit ennañ ho polontez hag ar pezh a zo merket a oll-viskoaz evitañ. Ar zoñj-se a dlefe rei dezañ kemend a levenez hag a frealzidigez ma lakfe anezañ da gaoud c'hoant da veza an diweza evel m'o-deus re all c'hoant da veza da genta, ma rafe dezañ kaoud kemend a beoh hag a joa er plas diweza hag er plas kenta, ha beza ken eüruz o veza disprizet, lakeet dister heb ano kaer na brud, evel ma'z eo ar re all o veza meulet hag enoret er bed-mañ.

Rag, o va Doue, ho polontez hag hoh enor a dle da lakaad dreist pep tra hag an daou dra-ze a dle rei dezañ muih a frealzidigez hag a blijadur eged an oll vadou e-neus bet pe en dezo diganeoh.

KENTEL XXIII

Diwar-benn pevar dra da zegas ar peoh en ene

- 1.-JEZUZ-KRIST-Va mab, me a zesko deoh hent ar peoh hag ar gwir liberte.
- 2.-AN DISKIBL-Aotrou, grit evel a lavarit, rag plijadur a ra din kleved heveleb komzou.
- 3.-JEZUZ-KRIST-Va mab, klaskit ober bolontez ar re all kentoh eged ho polontez hoh-unan.

Klaskit atao kaoud nebeutoh eged muioh.

Klaskit atao ar plas diweza ; klaskit beza izelloh eged ar re all.

C'hoantait atao ha pedit ma vezo greet bepred ennoh kemend a fell da Zoue.

An den a ra evel-se a zo war hent ar peoh hag an eürusted.

4.-AN DISKIBL.-Aotrou, ho kenteliou n'int ket hir, med leun int a zentelez ; n'int ket kalz a dra da gleved, med leun a skiant ha frouez puill a hellont da rei.

Rag ma hellfen dalher mad dezo, ne vije ket distreset va ene ker buan ha ma vez.

Bep tro ma vezan ankeniet ha trubuillet, e welan eo abalamour am-eus dilezet ho kenteliou.

Med c'hwi, c'hwi a hell pep tra, hag a gar gweled an ene oh en em zantellaad, kreskit ho kras ennon evid ma hellin ober evel ma lavarit din hag en em zavetei.

PEDENN evid beza treh d'ar zoñjou fall.

5.-Aotrou, va Doue, na bellait ket diouzin ; va Doue, deuit d'am zikour, rag savet ez eus em spered soñjezonou diskiant ha va ene a zo beuzet er spont hag en enkreuz.

Penaos e hellin chom hep kaoud droug ? Penaos e hellin kaoud an treh ?

6.-Me (a lavar an Aotrou Doue) a yelo en ho raog ; izellaad a rin tud vraz an douar, digeri a rin dor ho prizon ha dizelei a rin deoh an traou kuzeta.

7.-Grit, Aotrou, evel a lavarit, ha ra vezo gwelet an oll zoñjezonou fall o tehed dirazoh.

N'am-eus ken fiziañs ha ken frealzidigez nemed ennoh.

Etre ho tivreh ez in pa vezin trubuillet, ennoh e vezo va fiziañs, ho pedi a rin a greiz va halon ha gand pasianted e hedin ma teuot d'am frealz1.

PEDENN da houlen sklêrijenn evid an ene.

8.-Sklêrijennit ahanon, o va Jezuz, leun a vadelez, gand sklêrijenn an Neñv ha pellait diouz va ene pep teñvalijenn.

Kabestrit an huñvreou fall ha torrit nerz an tentasionou a zo o waska ahanon.

Stourmit gand nerz evidon, kasit pell al loened fall-ze, da lavared eo ar c'hoantegeziou touelluz, evid ma teuo din ar peoh gand ho sikour, ma vezo klevet kana ho meuleudi en ho Templ santel, da lavared eo en eur gouustiañs dinamm.

Grit d'an avel ha d'ar barr amzer plega deoh ; lavarit d'ar mor : “Chom sioul“ ha d'an avel “Ehan“ hag e vezo sioul pep tra.

9.-Degasit ho sklêrijenn hag ho kwirionez, ma lugernit war an douar, rag heñvel on ouz eun tamm douar skarnilet ha difrouez beteg ma vezin sklêrijennet ganeoh.

Taolit ho kras euz gorre an Neñv, treuzit va ene gand ho kras, degasit dour ar garantez da drempa kohenn an douar, evid ma tougo frouez mad ha kaer.

Dibradit va ene a zo gwasket gand samm ar pehedou, troit va oll hoantegeziou war-zu madou an Neñv, evid m'am-bezo doñjer ouz traou an douar goude beza bet o tañva dudiu an Neñv.

10.-Dibradit ahanon ha distagit ahanon diouz frealzidigez ar bed-mañ, frealzidigez a dremen buan ; tra krouet ebed ne hell leunia na frealzi a-walh va halon.

Stagit ahanon ouzoh gand liammou nerzuz ar garantez, rag c'hwi hepken a ro d'am halon he c'hoant, hag hepdoch an oll draou a zo hep talvoudegez.

KENTEL XXIV

**Arabad eo beza troet da ober enklask
war buhez ar re all.**

1.-JEZUZ-KRIST. Va mab, na vezit ket kuriuz, na dit ket da veza enkrezet gand traou na dalvezont ket ar boan.

Petra a ra an dra-mañ pe an dra-hont deoh ? Deuit d'am heul.

Hemañ a ra, a lavar en doare-mañ, hennez en doare-ze. Petra a ra deoh kement-se ? N'ho-peus ket da respont evito, ne respontoh nemed evidoh hoh-unan. Perag en em ziêza gand ar re all ?

Me a anavez an oll dud hag a wel kemend a dremen a-zindan an heol, me a oar e pe stad ema pep den, petra a zoñj, petra a glask, petra a hoanta.

Lezit eta pep tra ganin-me, bevit e peoh, ha na rit van evid gweled an hini a gar an trouz oh ober trouz kement ha ma karo.

Warnañ e kouezo kemend a lavaro, kemend a raio, rag netra ne jom hep beza anavezet ganin.

2.-Na glaskit ket beza brudet kaer na beza deuet mad gand kalz a dud na karet gand eun nebeudig a vignoned.

An oll draou-ze a zistag ar spered diouzin-me hag a zegas er galon teñvalijenn vraz.

Laouen e vijen o komz ouzoh, o tizelei dirazoh va gwirioneziou kuzet, ma vijeh war-hed ahanon, ma karfeh digeri din ho kalon.

Bezit war evez, beillit, pedit heb ehan hag e pep tra bezit izel a galon.

KENTEL XXV

Penaos kaoud ar peoh gwirion evid ar galon ha kreski e kantez Doue.

1.-JEZUZ-KRIST. Va mab, evel-henn am-eus lavaret : “Ar peoh a lezan ganeoh, ar peoh a roan deoh, ar peoh a roan n’eo ket heñvel ouz ar peoh a ro ar bed”.

An oll a glask ar peoh, med ne reont ket ar pezh a zo red evid e gaoud.

Ar peoh a roan d’ar re zous hag izel a galon.

Ar peoh ho-pezo m’ho-peus kalz pasianted.

Ma selaouit ahanon, ma sentit ouz va homzou, ho-pezo ar peoh leiz ho kalon

2.-AN DISKIBL-Aotrou, petra a rin ‘ta ?

3.-JEZUZ-KRIST-E pep tra, taolit evez ouz ar pezh a rit, a lavarit, ha na glaskit nemed eun dra hepken : plijoud din-me, hep c’hoantaad na klask netra nemedon-me.

Na varnit ket re vuan komzou nag oberou ar re all, na dit ket d’en emel euz an traou n’int ket fiziet ennoh, ha ne vezot trubuillet nemed eun tammig ha nebeud a wech.

4.-Chom hep kaoud tamm enkrez ebed, poan gorv na poan spered ebed, an dra-ze ne hell beza roet da zen er bed-mañ, rag kement-se a zo stad an dud eüruz er Baradoz.

Na gredit ket ho-peus kavet ar peoh gwirion ma n’ez eus netra o tiazeza ahanoh, na gredit ket ez a mad pep tra ma n’ez eus den oh enebi ouzoh, na gredit ket ne vank netra deoh ma c’hoarvez pep tra hervez ho c’hoant.

Na gredit ket kennebeud oh savet uhel, oh karet kenañ gand an Aotrou Doue ma santit ho kalon leun a levenez ha troet da bedi ; n’eo ket eno eh anavezet an hini a gar e gwirionez ar zantelez, n’eo ket an dra-ze a ziskouez ez a an den war wellaad e hent ar Baradoz.

5.-AN DISKIBL. Petra eo ‘ta neuze Aotrou ?

6.-JEZUZ-KRIST. Setu-amañ : En em ginnig da Zoue euz a greiz ho kalon hep klask morse ar pezh a blij deoh nag en traou bihan nag en traou braz, nag en traou ar bed-mañ nag er bed all, beza ken laouen, trugarekaad ahanon ha degemeret en eun heveleb doare kemend a zegouez ganeoh pe blij pe ne blij ket deoh ar pezh a roan.

Mar deo kreñv ha nerzuz a-walh ho fiziañs evid lakaad ho kalon, pa vez lamet pep frealzidigez, e stad da houzañv c’hoaz poaniou kaletoh, ma ne zoñjit ket lavared oh direbech ha santel, neuze emaoch e gwirionez war an hent mad hag eün, an hent a ro ar peoh hag e hellot kaoud fiziañs da veza adarre laouen ha d’am

gweled.

Ma hellit dond a-benn d'en em zisprizoud, bezit sur neuze ho-pezo peoh e-leiz kemend ha ma hell an den kaoud war an douar-mañ.

KENTEL XXVI

**Gwir frankiz ar galon ;
evid he haoud eo gwelloc'h pedi eged lenn al levriou santel**

1.-AN DISKIBL. Aotrou, savet eo uhel-kenañ er zantelez an hini na zistag ket e spered diouz traou an Neñv, an hini a dremen e-kreiz trubuillou ar bed-mañ evel pa ne vije netra oh hen diêza, hag a ra evel-se, nann dre leziregezh, med abalamour eo libr e ene distag diouz pep karantez direiz e-keñver ar grouadurien.

2.-O va Doue, mad dreist pep tra, mirit ouzin da veza re luziet gand traou an douar-mañ, gand plijdureziou ar horv, diwallit ahanon diouz kement tra a ra droug d'an ene gand aon na deufen da fallgaloni ha da zinerza.

Ne gomzan ket euz an traou-ze a weler an dud diskiant o klask anezo, med euz ar poaniou a deu da waska ha da bounerraad ene ho servicher, poaniou a zo evel eur malloz taolet war an dud oll, poaniou a vir ouz an ene da gavoud kemend a frankiz hag a hoanta.

3.-O ! va Doue dous meurbed, grit ma kavin c'hwero kemend frealzidigez a deu a-berz ar bed, hag a hellfe am distaga diouz traou an Neñv o touella va halon en eur ziskouez din ez eus eur blijadur fall bennag ouz va gedal.

Grit, va Doue, na vezin ket trehet gand ar hig hag ar gwad, na touellet gand ar bed hag e hloar a dremen ken buan, grit na vezin ket diskaret gand ardou an droug-spered.

Roit din nerz da stourm, pasianted da houzañv, ha kalon evid kendelher.

E-leh oll frealzidigez ar bed, roit din levenez dudiuz. Ho Spered Santel ; e-leh kared ar grouadurien, grit ma karin hoh ano.

4.-An debri, an eva, an dillad ha kemend a houlenn ezommou ar horv a zo eur beh pounner evid an hini a gar Doue.

Grit na gemerin an traou-ze nemed kement ha m'eo red, grit din dalher war va hoant.

Ne heller ket ober fae war an oll draou, rag red eo maga ar horv.

Klask, avad, ar pezh n'eus ket ezomm da gaoud, ar pezh na ra nemed plijadur, kement-se a zo divennet gand ho lezenn zantel.

Rag anez ar hig a deufe d'en em zevel a-eneb ar spered.

E-kreiz an traou-ze, va Doue, ra vezin hentchet ha gouarnet gand ho torn, evid na 'z in ket re hir en eun tu pe en eun tu all.

KENTEL XXVII

Ar garantez evidom on-unan a vihan ennom ar garantez evid Doue.

1. JEZUZ-KRIST. Va mab, red eo deoh en em rei oll din evel m'en em roan oll deoh, ne dleit dalher netra evidoh.

Kredit mad, ar garantez ho-peus evidoh hoh-unan a ra muih a zroug deoh eged oll draou ar bed.

Seul-vui e plij deoh eun dra bennag, seul-vui eh en em stagit ouz an dra-ze.

Ma vez ho karantez glan ha reizet mad, ne vezot strobet gand netra.

Na hoantait ket ar pezh a zo divennet ouzoh.

Na glaskit ket kavoud ar pezh a hell huala ahanoh ha mired ouz ho kalon da veza libr.

Souezuz eo n'en em rofeh ket din euz a-greiz ho kalon, o kinnig din kemend a hoantait, kemend a glaskit.

2.-Perag dizeha gand an anken heb abeg ebed ? Perag skuiza ho spered gand traou didalvez ?

Grit ar pezh a blij din-me, ha n'en em gavo droug ebed ganeoh.

Ma klaskit an dra-mañ pe an dra-hont, ma klaskit beza amañ pe a-hont evid ma vezo gwelloc'h ho toare ha brasoh ho plijadur, ne gavot morse ar peoh, ne viot morse heb enkreiz, rag e pep tra e vezo eur mank bennag hag e pep leh unan bennag da enebi ouzoh.

3.-N'oh ket gwelloc'h eta evid bernia ha dastum madou ; ar pezh a zo talvoudeg evidoh eo ober fae warno ha distaga evid mad ho kalon diouto.

Ha ne gomzan ket hepken euz an arhant hag ar binvidigez, med ivez euz an enoriou, ar meuleudiou, traou a dremen oll gand ar bed-mañ.

N'ez eus leh ebed evid diwall an den ma n'eo ket troet e galon ouz Doue.

Hag ar peoh a glaskit a ziavez ne bado ket pell ma n'eo ket diazezet war stad ar galon, da lavared eo ma n'en em harpit ket warnon-me, e hellit trei ha distrei, med n'ez eot ket war wellaad.

Rag c'hoarvezoud a raio ganeoh beza poulzet adarre hag e kavot ar pezh ho-peus dilezet ha gwasoh marteze.

PEDENN da houlenn eur galon hlan hag ar furnez a deu digand Doue.

4.-Kennerzit ahanon, va Doue, gand nerz ar Spered Santel.

Grit ma teuin da veza kreñvoh a-ziabarz, ma pellain diouz va halon kemend a zo oh enkrezi hag o tiêza ahanon ma ne vezin ket touellet gand an traou didalvez na gand an traou a briz, ma kemerin anezo evel traou a dle tremen eveldon, rag n'ez eus netra dindan an heol da badoud atao, n'ez eus amañ nemed skeud ha poan-spered.

O ! pegen fur eo an hini a wel an traou en doare-ze.

5.-Roit din, Aotrou, furnez an Neñv, evid ma teskin ho klask dreist pep tra hag ho kavoud, m'am-bezo c'hoant da veza deoh ha d'ho kared dreist pep tra hag e lakin an oll draou all en o reñk hervez ho furnez-c'hwi.

Grit din tehed diouz an hini a ro meuleudi, ha gouzañv gand pasianted an hini a enebo ouzin.

Rag fur braz eo an hini na ra van ebed gand ar homzou a glev, an hini na dro ket e skouarn da zelaou ar meuleudiou trompluz ; oh ober evel-se ez eer gand an hent hep droug ebed.

KENTEL XXVIII

Greom fae war ar pez a lavar a-eneb deom an dud fall

1.-JEZUZ-KRIST.- Va mab, na rit van evid kleved tud o trougsoñjal ahanoh, o lavared diwar ho penn traou na blijont ket deoh;

Hoh-unan e tleit soñjal gwasoh ahanoh ha kredi n'ez eus den disterroh evidoh.

Ma'z eo troet ho kalon ouz Doue, ne reot ket kalz a van evid kleved komzou a ya gand an avel.

Fur eo, ha n'eo ket eun nebeud hepken, an hini a oar tevel pa zav gwall amzer, hag en em drei ouzin-me hep beza glaharet gand ar pez a zoñj an dud.

2.-N'eo ket e komzou an dud e tleit lakaad ho peoh.

Pe zroug pe vad a lavarint ahanoh, n'oh ket evid-se cheñchet.

E peleh ema ar peoh, ar hloar wirion ?

Ha n'eo ket ennon-me eo ?

Hag an hini na glask ket plijoud d'an dud, an hini na ra van evid displijoud dezo, en-dezo peoh braz en e galon.

Ar garantez direiz, an aon rag an dud, eo a zegas enkrez war ar galon hag a laka dievez ar spered.

KENTEL XXIX

Penaoz e tleom meuli ha pedi Doue e-kreiz on trubuillou.

1.-AN DISKIBL. Ra vezo meulet hoh ano da viken, va Doue, a zo plijet ganeoh e kouezfe warnon an dentasion hag an trubuillou-ze.

Ne hellan ket tehed diouti ha red eo din dond davedoh evid ma teuot d'am zikour ha da ober din gounid gand va foan.

Ya, va Doue, e-kreiz an drubuill emañ, va halon a zo enkrezet, ar youlou fall a zo o waska ahanon.

Tad karantezuz, petra a lavarinn deoh bremañ ?

E-kreiz an anken on gwasket.

Saveteit ahanon dioustu bremañ.

Gouzoud a ran evid petra on bet er boan beteg vremañ : evid ma kreskfe ho kloar goude ma vijen bet diskaret da genta ha da houde saveteet ganeoh.

Plijet ganeoh, va Doue, dond d'am zevel. Rag petra a hellan-me ober, paour-kêz ma'z on ? Heptoh, da beleh ez in.

Roit din pasianted en dro-mañ c'hoaz va Doue.

Selaouit ahanon, va Doue, ha n'am-beze aon rag netra, n'eus forz pegen gwasket e vijen.

2.-Ha bremañ e-kreiz va foaniou, petra a lavarinn deoh c'hoaz ?

Va Doue, ho polontez bezet greet.

An drubuill, an anken am-eus bet a oa dleet din. Red eo din eta gouzañv ha grit ma houzañvin gand pasianted, da hedall ma tremeno ar barr-amzer ha ma'z aio gwelloc'h an traou.

Ho torn gallouduz a zo gouest da lamed diwarnon an dentasion-mañ, da derri he nerz, evid na vezin ket diskaret da vad ; her greet ho-peus meur a wech beteg-henn din, o va Doue, leun a drugarez !

An dra-ze a zo ken êz deoh-c'hwi, o va Doue, oll-halloudeg, evel ma'z eo diêz din-me.

KENTEL XXX

Red eo goulenn sikour digand Doue ha kaoud fiziañs e teuio adarre e hras deom

1.-JEZUZ-KRIST. Va mab, me eo an Aotrou Doue, an hini a ro nerz e-kreiz an drubuill.

Deuit davedon-me pa vezo eun dra bennag o tiêza ahanoh.

Ar pezh a ra dreist-oll ma ne deu ket buan deoh frealzidigez an Neñv, eo ma taleit re da bedi.

Rag, a-barz pedi ahanon gand evez ez it da glask frealzidigez e leh all ha d'en em drei ouz ar grouadurien.

Hag e kavit nebeud a vad evel-se, beteg ma teuit da weled eo me a ro sikour d'ar re a laka o fiziañs ennon, ha n'ez eus ket hepdon-me kuzul mad ha talvoudeg ebed, na louzaouenn ebed gouest da barea evid mad.

Bremañ 'ta pa'z eo tremenet ar barr amzer war ho sperred, en em gennerzit e sklêrijenn va zrugarez, rag me a zo en ho kichenn (a lavar Doue) evid restaol deoh kement ho-peus kollet, ha zoken evid rei deoh muioh eged n'ho-poa a-raog.

2.-Daoust hag eun dra bennag a zo diêz din-me ? Daoust hag heñvel on-me ouz ar re a lavar ober ha na reont ket ?

E peleh ema ho feiz ?

Dalhit stard din-me ha kendalhit.

Bezit pasiant ha leun a nerz-kalon, frealzet e viot pa vezo deuet ar mare.

Gedit ahanon, gedit.

Me a deuo hag a bareo ahanoh.

Ar pezh a zo oh ober poan deoh n'eo nemed an dentasion hag heb abeg ennoh o krena.

Perag en em ziêza gand an traou a hell degouezoud diwezatoh ? Ne reoh evel-se nemed bernia tristidigez war dristidigez.

Da beb devez eo a-walh e boan.

Ne dalv netra kemered glahar pe dristidigez diwar-benn traou a zo c'hoaz da zond ; marteze n'en em gavint ket.

3.-Med an den a zo evel-se : lezel a ra soñjou goull da luskellad e ene, ha sklêr eo n'e-neus ket c'hoaz kalz a nerz ma vez ker buan touellet gand ardou an Enebour.

On enebour ne ra ket forz pe gwir pe haou eo an traou a zegas d'or fazia ha d'on touella, gand ma

kouezim ne ra forz pe dre ar garantez evid traou ar bed, pe dre ar spont evid an traou da zond e c'hoarvezo kement-se.

Na dit ket 'ta da veza enkrezet, na dit ket da grena.

Kredit ennon-me ha lakit ho fiziañs em zrugarez.

Pa zoñj deoh emaoñ dilezet ganin, neuze aliez emaoñ an tosta deoh.

N'eo ket kollet pep tra pa hoarvez eun dra bennag eneb deoh.

Arabad eo deoh barn an traou diouz ar pezh a zoñjit en eur a vremañ, na fallgaloni evid eur boan bennag, n'eus forz euz peleh e teu, evel pa vije kollet peb fiziañs d'en em denna euz ar boan-ze.

4.-Na gredit ket e vije dilezet da vad ganin p'am-bezo taolet evid eur pennadig eur boan bennag war ho kein, pe c'hoaz p'am-bezo lamet ar frealzidigez m'edoh o hedal.

Evel-se eo ez eer da Rouantelez an Neñv.

Hag e gwirionez eun tamm mad eo gwelloc'h evid hag evid va oll zervicherien kaoud eur boan bennag da houzañv eged gweled pep tra oh en em gavoud hervez ho c'hoant.

Me a anavez ar zoñjou kuzet, ha talvouduz-braz eo evid ho silvidigez e vije a-wechou dizaour hoh ene, gand aon na deufeh da gaoud re a lorh ha da gredi ez oh ar pezh n'oh ket.

Ar pezh am-eus roet a hellan da lamed ha da rei a-nevez pa blij din.

5.-Pa roan, va zra eo a roan ; pa gemeran, n'eo ket ho tra a gemeran, rag din-me eo kemend vad a zo ennoh, kemend a zo bet roet deoh.

Ma tegasan deoh eur boan, eun dra gontrol bennag, na dit ket da gounnari na da fallgaloni, rag me a hell buan ho sevel ha lakaad ar boan da drei e levenez. Hag oh ober evel-se en ho keñver, me a zo just, ha va meulia a dleit.

6.-Ma'z eo fur ho soñjou, ma varnit an traou hervez ar wirionez, ne dle ket beza ho spered en dristidigez pa deu eun dra bennag da enebi ouzoh ; er hontroll, red eo deoh beza laouen ha trugarekaad ; ne dlefeh zoken kaoud joa all ebed nemed honnez ; beza gwasket ganin dre ar boan hep m'am-bije truez ouzoh.

Evel m'on bet karet gand va Zad, me ivez a gar ahanoh, am-eus lavaret d'am diskibien, ha koulskoude n'am-eus ket o haset da blijadureziou an douar med d'ar stourmou kaled ; n'eo ket enoriou med dismegañs am-eus kinniget dezañ, n'eo ket da ziskuiza, da jom kroaziet o divreh am-eus kaset anezo, med da labourad ha da hounid frouez dre ar basianted.

Va mab, dalhit soñj euz ar homzou-ze.

KENTEL XXXI

Red eo dilezel ar grouadurien evid kaoud ar Hrouer

1.-AN DISKIBL- Aotrou, ezomm am-eus da gaoud c'hoaz brasoh grasou ma fell din en em gavoud uhel a-walh evid beza distag mad diouz pep den, diouz an oll draou krouet.

Rag, e-pad ma vez eun dra bennag o talher ahanon, ne hellan ket beza libr a-walh evid nijal war-zu ennoh.

C'hoant braz en-doa da veza libr da nijal an hini a lavare : “Piou a raio din diouaskell evel he-deus ar goulm hag e nijin hag eh en em gavin el leh ma hellin diskuiza ?“

Piou e-neus muioh a beoh eged an hini na dro e zaoulagad nemed war-zu ennoh ? Piou e-neus muioh a frankiz eged an hini na hoanta netra war an douar ?

Red eo eta en em zével dreist an oll grouadurien, en em ankounac'haad mad an-unan, selled a spered ouz Doue ha gweled n'ez eus netra er grouadurien da dostaad ouz ar Hrouer.

An hini na vezo ket distag mad diouz an oll grouadurien ne hello ket beza libr da zoñjal e traou an Neñv.

Ar pezh a ra ma'z eus nebeud a dud o trei o spered war-zu Doue, eo ma'z eus nebeud oh en em zistaga a-grenn diouz an traou krouet, an traou a dremen.

2.-Evid-se es eus ezomm grasou braz da zével an ene d'hen dibrada dreistañ e-unan.

Ha ma n'ez eo ket an den savet a spered distrob diouz an oll draou krouet hag en em unanet mad gand Doue, kemend a oar, kemend e-neus n'eo ket c'hoaz kalz a dra.

Dister hag izel e chomo pell amzer an hini a gav dezañ ez eus eun dra vad bennag ouzpenn ar Mad braz dreist pep mad, ar Mad a bad da viken.

Kement tra n'eo ket Doue n'eo netra hag a dle beza kontet evid netra.

Eun tamm mad a gemm a zo etre furnez eun den a feiz sklêrijennet gand Doue ha deskadurez eun doktor gouizieg ha troet war ar studi.

Eun tamm mad eo kaerroh an deskadurez a deu euz an Neñv digand furnez Doue eged an hini a hell an den da gaoud dre e spered e-unan o lakaad e boan.

3.-Kalz a hoanta sevel a spered war-zu Doue, med ne lakaont ket o foan da ober ar pezh a zo red evid kement-se.

Ar pezh a zo o talher anezo eo ne gemeront euz an devosion nemed an diavêz, an neuziou, ha n'emaint ket e poan d'en em gastiza e gwirionez.

Ne ouzom ket petra eo, peseurt spered on-eus, petra a glaskom ; evid tud devod om kemeret, hag or poan,

al labour a room da draou a dremen, da draou hep talvoudegez, ha ne zoujom mad nemed eur wechig an amzer e traou an Neñv.

4.-Siwaz ! Dioustu goude beza soñjet e goueled or halon, eh en em droom ouz an traou a-ziavêz hep selled mad e pe stad emaom.

Ne daolom ket evez e peleh ema stad or halon, n'om ket glaharet o weled pegen hudur eo kemend a zo ennom.

An dud oll o-doa en em roet d'ar pehed hag abalamour da ze e teuas eun diluj braz.

Pa vez or halon troet ouz ar pehed, on oberou a vez fall ivez, rag ne vez ket a vuhez, a dan ennom.

Pa vez glan ar galon, ar vuhez a ro frouez mad.

5.-Goulennet e vez petra e-neus greet an den-mañ pe an den-ze ; ne vez ket klasket gouzoud, avad, ha santel eo e oberou.

Goulennet e vez ha kaloneg e oa, pinvidig, koant, desket, mad da gana, ijinuz war eun vicher bennag.

Kalz, avad, ne lavaront ger diwar-benn gouzoud hag-eñ e oa paour a spered, pasiant, dous, devod, distag diouz traou ar bed.

Ar bed ne zell nemed ouz diavêz an den, ar hras, avad, a zell ouz an diabarz.

Ar bed a fazi aliez, ar hras, avad, a laka he fiziañs e Doue evid ne vezo ket tromplet.

KENTEL XXXII

Red eo deom en em zilezel on-unan ha laza on oll c'hoantegeziou

1.-JEZUZ-KRIST. Va mab, ne hellit ket beza libr e gwirionez ma ne ziskrogit evid mad euz ho polontez hoh-unan.

Hualet eo ar re a zalh d'o bolontez o-unan, ar re en em gar o-unan, ar re a zo c'hoantuz, kuriuz, atao nehet gand eun dra bennag, atao o klask o êz ha nann ar pezh a blij din-me, hag aliez o vaga soñjou war draou na hellint ket padoud.

Rag, kemend ne deu ket digand Doue a yelo da netra.

Lakit en ho spered ar homzou-mañ, berr med pinvidig : “Dilezit ho c'hoantegeziou hag e kavot ar peoh“.

Soñjit mad er homzou-ze, ha pa reot diouto, c'hwi a gompreno pep tra.

2.-AN DISKIBL. Va Doue, an dra-ze n'eo ket eur c'hoari eo, na labour eun devez, rag er homzou-ze, daoust ma'z int berr, ema merket oll santelez ar relijiusted.

3.-JEZUZ-KRIST. Va mab, arabad eo deoh tehed diouzin na fallgaloni o kleved ano euz hent ar

zantelez, med kentoh lakit ho poan da bignad d'an uhel, ha da vihanna r'ho-pezo c'hoant da bignad.

Ra blijfe gand Doue e vije evel-se, ha n'ho-pije mui karantez evidoh hoh-unan, med e vijeh atao prest da ober va bolontez ha bolontez va zad ! Neuze e plijfeh kalz din hag ho puhez a dremenfe oll el levenez hag er peoh.

Kalz traou ho-peus c'hoaz da zilezel ; ma n'en em zistagit ket a-grenn diouto evid plijoud din-me, n'ho-pezo ket ar pez a houlennit.

Me a ro deoh an ali da brena diganin an aour a zo bet en tan, evid dond da veza pinvidig, da lavared eo ar furnez euz an Neñv a ra fae war oll draou didalvez an douar-mañ.

Ar furnez a dleit da lakaad dreist furnez an douar, dreist meuleudi an dud ha dreist ar pez a ra plijadur deoh.

4.-Lavared a ran deoh : prenit evidoh an traou disterra e-leh an traou a zo prizet braz gand an dud.

Rag evid eun dra dister, hep talvoudegez, eun dra da lezel a-gostez, eo kemered ar furnez wirion a deu euz an Neñv ; ar furnez-se n'en em lez ket da vond d'an ourgouill, ne glask ket meuleudiou an douar ; kalz a gav kaer anezi, med ne reizont ket o buhez diouti.

Koulskoude ar furnez-se a zo eur mên prisiuz kuzet ouz kalz.

KENTEL XXXIII

Kalon an den a dro ; greom pep tra evid Doue

1.-JEZUZ-KRIST. Va mab, n'ho-peus ket da fizioud war stad ho kalon ; ar stad a-vremañ a droio buan hag a roio plas d'eun all.

Keit ha ma vevot, e vezo evel-se, e cheñchot zoken en despet deoh, a-wechou e viot laouen, a-wechou teñval ho penn, a-wechou e peoh, a-wechou kounnaret, a-wechou troet da bedi, a-wechou inouet o pedi, a-wechou birvidig ho karantez, a-wechou klouar ; a-wechou den-a-benn, a-wechou penn-skañv

An den fur hag a skiant vad a zalh stard en e zav e-kreiz ar freuz-se, ne ra ket a van gand ar pezh a dremen ennañ, e pe du e tro an avel a zo o kas anezañ. Ne zoñj nemed eun dra : trei e spered war an hent mad, an hent eün.

Evel-se eo e hello dalher mad ha beza e peoh o trei e lagad, e zoñjou war va zu e-kreiz an oll freuz.

2.-Seul-vui e vezo eün ha santel ar zoñjou, seul startoh e vezo gellet dalher e-kreiz an oll barrou-amzer.

Kalz a zo eur gohen war o lagad ha n'eo ket eün o zoñjou. Rag en em drei a reont buan da zelled ouz eun dra a blij dezo ha rouez eo an dud a zo distag diouz pep tra ha ne glaskont ket o mad en-dro dezo.

Evel-se gwechall ar Juevien a oa deuet da di Vari ha Marta, nann evid Jezuz hepken, med evid gweled Lazar.

Red eo eta e ve glan lagad ar galon evid ma vezo eün ha mad ha m'en em droio war va zu dreist d'an oll draou.

KENTEL XXXIV

Pegen mad eo Doue evid ar re a gar anezañ :
an oll draou, an dud oll n'int netra en e gichenn.

1.-AN DISKIBL. Setu amañ va Doue, va oll vad.

Petra a glaskan ouspenn ? Petra a hellfen da hoantaad hag a ve gwelloc'h evidon ?

O ! komz dous, komz dudiuz evid an hini a gar ar Verb, Mab Doue, ha nann ar bed hag an traou a zo er bed !

Va Doue, va oll vad !

Evid an hini a gompren, ar homzou-ze a zo a-walh, hag o lavared a-nevez a ra plijadur d'an hini e-neus gwir garantez.

Pa vezit ganeom, eo dous pep tra ; pa vezit pell, an traou n'o-deus blaz ebed.

C'hwi eo a laka ar galon en heh êz, c'hwi eo a ro peoh braz hag eürusted leun.

Diskarit ar re a hoanta ober brezel, flastrit anezo gand nerz ho preh.

Diskouezit dezo, me ho ped, pegen nerzuz oh ; ra vezo kaset deoh meuleudi abalamour d'ho kalloud, rag evidon-me n'ez eus ken fiziañs, ken skoazell nemed ennoh, o va Doue.

KENTEL XXXV

N'ez eus ket a beoh diouz an dentasion er vuhez-mañ

1.-JEZUZ-KRIST. Va mab, morse er vuhez-mañ ne hellot beza heb enkreiz, med keit ha ma pado ho puhez, an armou a deu euz an Neñv a ranko beza en ho taouarn.

E-kreiz enebourien emaoch o vale, a-gloiz hag a-zehou e skoont warnoh.

Ma n'ema ket eta en-dro d'ho korv gouriz ar basianted, ne vezot ket pell hep beza gloazet.

Ouspenn-ze, ma ne droit ket stard ho kalon war va zu, ma n'oh ket laouen o houzañv pep tra evidon, ne hellot ket herzel ouz tan ar brezel na gounid kurunenn ar zent.

Red eo deoh eta tremen heb aon a druez pep dañjer ha stourm gand nerz a-eneb kement tra a zo oh enebi ouzoh.

Rag ar mann a zo roet d'an hini e-neus an treh ; an den digalon ne vezo lezet gantañ nemed poaniou.

2.-Ma klaskit diskuiz er bed-mañ, penaoz e hellot en em gavoud en Neñv, evid diskuiza eno da viken ?

Na rit ket ho soñj da ziskuiza war an douar, med da gaoud kalz pasianted.

Klaskit ar peoh gwirion nann war an douar, med en Neñv, nann en dud nag er grouadurien all, med e Doue hepken.

Dre garantez evid Doue e rankit a galon vad gouzañv pep tra, poaniou ; labouriou, tentasioniou, trubuilliou, dienez, kleñvejou, dismegañs, teodadou, rebechou, med tamaliou, dispriz.

An oll draou-ze a laka an ene da drei war hent ar zantelez, drezo e vez anavezet gwir zervicherien Jezuz-Krist, dreizo e hounezet kurun ar Baradoz.

Me a roio eur rekompañs eternel evid eur boan verr, hag eur hloar deist ar pez a hell kompren ar spered evid eun tamm dismegañs a dremen buan.

3.-Ha soñjal a rit ho-pezo atao frealzidigez an Neñv hervez ho c'hoant ?

Ar zent a zo er Baradoz n'o-deus ket bet atao kement-se, med gouzañvet o-deus kalz poaniou, kalz tentasionou, kalz tristidigez.

Med gand pasianted o-deus gouzañvet an oll draou-ze, ha muioh a fiziañs o-doa e Doue eged enno o-unan, o veza ma ouient n'eo netra poaniou ar vuhez-mañ e skoaz ar hloar a zo da hounid.

Ha c'hoant ho-peus da gaoud dioustu ar pez a zo bet koustet d'ar re all kalz daelou ha kalz poaniou ?

Gortozit Doue, labourit kaloneg ha dalhit mad, na gollit ket fiziañs, na dit ket war ho kiz hag hep kaoud aon da goll ho puhez, stourmit heb ehana evid gloar Doue

Digollet mad e vezot ganin, rag me 'vezo ganeoh e-kreiz hoh oll poaniou.

KENTEL XXXVI

Na rit van ebed evid beza barnet fall gand an dud

1.-JEZUZ-KRIST. Va mab, en em daolit gand fiziañs etre daouarn ho Toue ha n'ho-pezit ket aon rag barnidigez an dud pa lavar deoh ho koustiañs emaoñ e stad vad ha direbech.

Eun dra vad ha talvoudeg eo gouzañv traou evel-se, ha n'eo ket kement-se a raio poan d'an hini a zo izel a galon hag e-neus muioh a fiziañs e Doue eged ennañ e-unan.

Kemend a draou a vez lavaret gand an dud : N'ez eus ket da gredi kalz dezo.

Kontanti an oll, den ne hell hen ober.

Sant Paol, evitañ da glask plijoud da Zoue e pep tra, evitañ da lakaad e boan da ober ar muia ma helle a vad d'an dud, evelato ne ree forz gand barnedigez an dud

2.-Labouret e-neus evid santellaad ha savetei ar re all, gwella ma helle, med n'e-neus ket gellet mired da veza barnet ha disprizet gand ar re all.

Rag-se e lakee pep tra etre daouarn Doue a anavez kement 'zo, ha dre ar basianted hag an umilite eh en em zivenne ouz an teodou fall, ouz ar re a zrougprezege anezañ, a ree goap anezañ, a lavare diwar e benn kemend a deue en o spered.

A-wechou evelato e-neus savet e vouez d'en em zivenn, gand aon na deufe ar re zempl, o weled anezañ o chom sioul, da zilezel an hent mad.

3.-Piou oh-c'hwi 'ta mar ho-peus aon rag eun den a dle mervel ?

Hirio ema e buhez ha warhoaz n'her gwelot mui.

Ho-pezit aon rag Doue ha n'ho-pezo ket da gaoud aon rag an dud.

Petra a hellont ober deoh gand o homzou hag o malloziou ?

Muioh a zroug a reont dezo o-unan eged deoh-c'hwi ; ha ne hellint ket tehed a-raog barnedigez Doue, n'eus forz piou int.

Dalhit atao ho taoulagad war an Aotrou Doue, ha na gollit ket ho poan o klemm

Ma soñj deoh ez oh bremañ trehet, hag ho-peus da houzañv dismegañs n'ho-peus ket meritet, arabad ez afe droug ennoh evid kement-se, na dit ket da goll pasianted ha da vihannaad dre-ze ho kurunenn, med troit ho taoulagad war-zu an Neñv, war-zu ennon-me, rag, me a zo gouest da denna ar vez hag an dismegañs diwarnoh ha da rei da bep hini hervez e oberou.

KENTEL XXXVII

**Red eo d'an den en em lakaad da vad
etre daouarn Doue, evid kaoud gwir liberte ar galon.**

1.-JEZUZ-KRIST. Va mab, en em zilezit hoh-unan hag e kavot ahanon. Na glaskit netra, n'ho-pezit netra, hag ez aio ho madou war gresk.

Rag brasoh grasou a vezo roet deoh kerkent ha m'ho-pezo en em zilezet hoh-unan a-grenn.

2.-AN DISKIBL. Aotrou, ped gwech e rankin en em rei deoh, ha petra am-eus da zilezel ?

3.-JEZUZ-KRIST. Atao, ha da beb eur, en traou bihan evel en traou braz.

Ne lezan netra ganeoh, ha distag e rankit beza diouz pep tra.

Anez, penaoz e hellot beza din ha me deoh, ma ne hellot ket diskregi diouz ho polontez hoh-unan, en diavêz hag an diabarz ?

Seul vuannoh e reot kement-se, seul welloh ez aio an traou evidoh ; seul welloh eh en em zilezot gand lealded, seul vuioh e plijot din-me, seul brasoh e vezo ho kounid.

4.-Lod en em zilez o-unan, med o talher eun draig bennag ganto.

N'o-deus ket a fiziañs a-walh e Doue hag e kav dezo e rankont lakaad eun dra bennafg a-gostez.

Lod en em ro evid mad da genta, med da houde, pa deu an dentasion da hweza, e tistroont adarre d'an traou a garent, hag abalamour da-ze n'ez eont tamm war-raog.

Ar re-ze ne hellint morse kaoud gwir liberte ar galon, ne hellint ket kaoud ar joa da starda o halon ouz va hini-me, ma n'en em zilezont ket o-unan da genta, ma ne lakont ket bemdez o bolontez da vervel, rag kement-se a zo red evid gelloud beza din ha chom unanet ganin.

5.-Lavaret am-eus aliez deoh hag hen lavared a ran adarre : En em zilezit hoh-unan, diskrogit euz ho c'hoantegeziou hag hoh ene en-devezo peoh braz.

Roit pep tra hag ho-pezo pep tra, na glaskit netra, na houlennit netra, chomit ganin-me evid mad heb marhata, hag e vezin deoh, hag ho kalon a vezo distrob ha ne vezo ket warnoh a deñvalijenn.

Lakit ho poan, pedit, grit gwella ma hellot evid kaoud ar hras-se da ziskregi diouz ho polontez hoh-unan, d'en em lakaad e noaz evid heulia Jezuz e noaz, da vervel deoh hoh-unan ha da veva ganin-me e-pad an eternite.

Neuze ez aio diwar ho tro ar zoñjou goullo, an enkreziou fall, ankeniou didalvez.

Neuze ivez ez aio diouzoh peb aon direiz ha pep karantez diskiant a varvo en ho kalon.

KENTEL XXXVIII

**Penaoz en em denna mad gand traou ar bed ;
penaoz en em erbedi ouz Doue en dañjeriou.**

1.-JEZUZ-KRIST. Va mab, lakit mad ho poan evid beza libr, mestr deoh hoh-unan e pep leh, e pep hini euz ho labouriou, hoh oberou, evid ma lakeot pep tra da blega deoh ha ma chomo hep plega da netra, ma vezo hoh oberou reizet, gouarnet ganeoh, ma ne vezot ket kaset ha degaset evel eur sklav ; bezit kentoh eur gwir vugel euz Izrael, prenet ha galvet da veza libr e-kreiz bugale Doue : Bugale Doue a zav dreist madou an douar-mañ evid selled ouz madou an Neñv ; o lagad kleiz a droont war ar madou a dremen, hag o lagad dehou war madou an Neñv ; n'int ket sachet gand madou an douar, n'en em stagont ket outo ; er hontrol, lakaad a reont ar madou-ze da dalvezoud evid ar gwella, evel m'eo bet reizet gand Doue, ar Micherour braz e-neus lakeet urz vad e kemend e-neus krouet.

2.-E kemend a hoarvez ma ne jomit ket da zelled ouz an diavêz gand daoulagad ar horv, ma ne varnit ket ar pezh a glevit hervez ma varn an dud, med ma'z it hep dale gand Moiz en Tabernakl da houlenn kuzul digand Doue, neuze e klevot mouez Doue o komz d'ho kalon hag e teot en-dro kelennet war kalz traou, koulz war an amzer a-vremañ ha war an amzer da zond.

Atao Moiz a glaske sklêrijenn an Tabernakl p'en-deze eun dra-bennag diêz da zirouestla, atao ez ee da houlenn sikour rag fallagriez an dud.

Evel-se e tleit-c'hwi ivez en em denna e diabarz ho kalon evid ma vezo birvidikoh ho pedenn da houlenn sikour Doue.

Lenne a reom e oe Jozue ha bugale Izrael tromplet gand tud Gabaon, abalamour n'o-doa ket a-raog goulennet kuzul digand an Aotrou Doue, ha m'o-doa kredet re vuan da gomzou flour ar Gabonoited ha d'o ardou.

KENTEL XXXIX

Arabad eo en em rei gand re a bres da aferiou ar bed.

1.-JEZUZ-KRIST. Va mab, lakit etre va daouarn hoh oll aferiou ; me a zibuno anezo evid ar gwella pa vezo deuet an amzer.

Gedit ahanon da reñka pep tra, hag e welot ez aio mad evidoh.

2.-AN DISKIBL. Aotrou, ne gavan ket diêz fizoud pep tra ennoh, rag gand va spered va-unan n'on ket evid mond pell war-raog.

Plijet ganeoh ne vijen ket diêzet gand an traou da zond, med atao prest d'en em ginnig deoh ha da ober ho polontez.

3.- JEZUZ-KRIST- Va mab, aliez an den e-neus mall braz da gaoud ar pezh a hoanta, ha p'e-neus bet e hoant, e komañs soñjal disheñvel diouz a-raog, rag ne bad ket pell da gared ar memez tra, e galon a dro diouz eun dra war-zu eun all.

N'eo ket eun dra vihan diskregi diouz or bolontez zoken en traou dister.

4.-En em zilezel e-unan, setu petra a ra d'an den mond war a-raog, hag an den en em zilez e-unan a zo dishual braz ha n'e-neus da gaoud aon rag netra.

Med an enebour koz kounnaret ouz an oll dud vad ne ehan d'o zenti, noz-deiz ema o stegna e rouejou, o klask touella ha paka an hini na vije ket war evez.

Beillit ha pedit, a lavar ar Mestr, evid na gouezot ket en dentasion.

KENTEL XL

An den n'e-neus netra vad anezañ e-unan ha ne hell en em fougeal gand netra.

1.-AN DISKIBL. Aotrou, petra eo an den evid m'ho-pije soñj anezañ ? Petra eo mab an den evid ma teufeh d'e gaoud ?

Peseurt vad e-neus greet an den evid kaoud ho krasou ? Aotrou, penaoz e hellfen-me en em glemm ma'z on dilezet ganeoh ?

Petra a hellfen da lavared ma na rit ket ar pezh a houlennan ?

A-dra-zur e hellan soñjal ha lavared evel-henn gand gwirionez : “Aotrou, n'on netra, n'am-eus netra vad dreizon va-unan, e pep tra e ran eur faot bennag hag atao emañ war-nez mond da netra.

Ha ma ne vezan ket sikouret ganeoh, ma ne vez ket sklêrijennet va ene ganeoh en diabarz, e teuan da veza klouar ha digalon.

2.-C'hwi, avad, Aotrou, a zo atao ar memez hini, hag a vezo da viken, atao mad, just ha santel ; mad ha deread ha gand santelez e rit pep tra, ha gand furnez e reñkit pep tra.

Me, avad, a zo buannoh da zond war va hiz eged da vond war-a-raog, ne badan ket pell er memez stad ha cheñch a ran seiz gwech bemdez.

Evelato ez a buan an traou war wellaad gannin pa blij ganeoh, pa astennit ho torn d'am zikour, rag c'hwi hepken a hell hep sikour den ebed, va skoazella ha va dalher ken stard ma ne droin mui du-mañ du-hont, med ma vezo va halon harpet warnoh hag o tiskuiza en ho kichenn.

3.-Rag-se, ma ouezfen dilezel an oll frealzidigez a deu digand an dud pe evid gounid devosion, pe abalamour m'eo red din ho klask (rag den ebed ne hell va frealzi), neuze e hellfen kaoud fiziañs da reseo ho krasou ha beza laouen evid ar grasou nevez resevet.

4.-Ho trugarekaad a ran, c'hwi a deu pep tra diganeoh, pa zegouez ganin eun dra vad bennag.

Me n'on nemed moged, n'on netra dirazoh, n'on nemed eun den diboell, eun den dinerz.

Evid petra e hellfen kemered lorh, perag e klaskfen beza meulet ?

Daoust hag e vije abalamour n'on netra ? Kement-se a vije beza sod-braz.

Ya, en em fougeal a zo eun dra fall-kenañ, eun dra diskiant, rag pellaad a ra diouz ar hloar wirion ha lamet a ra diganeom gras Doue.

P'en em blij an den enañ e-unan, e tisplij deoh ; pa glask kaoud meuleudi an dud, e kas kuit ar gwir vertuziou.

5.-Ar hloar wirion, al levenez santel a gaver oh en em veuli ennoh, nann ennom on-unan ; oh en em laouennaad en hoh Ano, nann er vad a hellfem kaoud ; o chom hep klask or plijadur en hini ebed euz ar grouadurien, med ennoh hepken.

Ra vezo meulet hoh Ano, nann va hini ; meulet hoh oberou, nann va re-me ; ra vezo benniget hoh ano, ha ra na gouezo warnon-me tamm meuleudi ebed a-berz an dud.

C'hwi eo va gloar ha va levenez. Ennoh e lakin va gloar ha va levenez e-doug an deiz ; evidon-me ne glaskin tenna gloar nemed euz va zempladurez.

6.-Ra glasko ar Juzevien ar hloar a ro an dud an eil d'egile, me ne glaskan nemed ar hloar a deu digannd Doue.

Rag oll hloar ar bed, oll enoriou, oll fouge an douar-mañ, e-kichenn gloar an Neñv, n'int nemed moged, follentez.

O ! va gwirionez, va zrugarez, va Doue, O ! Dreinded eüruz, deoh hepken meuleudi, enor ha gloar e-pad an oll amzer hag en eternite. Evel-se-bezet-greet.

KENTEL XLI

DIWAR-BENN DISMEGAÑS AN OLL ENORIOU

1.-**Jezuz-Krist.** -Va mab, arabad e ve glaharet ho kalon ma welit ar re all enoret ha savet uhel, ha c’hwi disprizet ha lakeet izel.

Savit ho kalon war-zu ennon-me en Neñv, ha ne viot ket en dristidigez evid beza disprizet gand an dud war an douar.

2.-AN DISKIBL.-Aotrou, ni a zo dall, traou goullo ar bed a deu buan d’on touella

Ma sellan mad ouzin va-unan, e welan n’o-deus morse ar grouadurien greet gaou ouzin.

N’am-eus ket eta a leh d’en em glemm ahanoh.

O veza, avad, am-eus aliez pehet ha gwall behet eneb deoh, o-deus gwir ar grouadurien d’en em zevel oll eneb din.

Me ne veritan nemed memez ha disprizañs, deoh avad, eo dleet peb meuleudi, enor ha gloar.

Ha ma ne ran ket va zoñj da veza kontant o weled an oll groudurien o tisprizoud, o tilizel ahanon, o kemered ahanon evid netra, ne hellan ket kaoud ar peoh d’am halon na beza kreñv, na kaoud ho sklêrijenn, na beza unanet mad ganeoh.

KENTEL XLII

Ne hellom ket gedal peoh ar galon digand an dud

1.-JEZUZ-KRIST.-Va mab, ma hedit ar peoh evid ho kalon digand eun den bennag o veza eh en em blijit an eil gand egile ha ma vevit tost an eil d'egile, ho-pezo enkreuz ha neh.

Med, m'en em droit war-zu ar Wirionez a bad hag a vev da viken, ne viot ket glaharet evid eur mignon o trei kein deoh pe o vervel.

Ar garantez evid eur mignon a dle beza harpet warnon-me, hag abalamour din-me eo e tleit kared kement hini a blij deoh, kement hini a zo douget ho kalon war-zu ennañ.

Hepdon-me ne dalv netra ha ne bado ket ar garantez ; n'eo ket glan na gwirion ar mignoniaj n'eo ket skoulmet ganin-me.

Ken distag e tleit beza diouz heveleb karantez evid an dud tosta d'ho kalon, ma viot prest (kement ha m'eo posubl) da houlenn beza heb darempredi den ebed.

Seul-vui e tiskenn don en e galon evid en em lakaad izel, seul vui e sav uhel war-zu Doue.

2.-An hini a laka eun dra vad bennag war e ano e-unan, hennez a vir ouz gras Doue da zond, rag gras ar spered Santel ne ziskenn nemed en eur galon izel.

Ma oufeh en em zisprizoud hag anzav ne dalvezit netra, ma oufeh taoler euz ho kalon pep karantez evid traou an douar, neuze e teufen en ho kalon gand eur mor a hrasou.

Pa droit ho taoulagad war ar grouadurien, e lakit ho Krouer da drei e benn diouzoh.

Deskit e pep tra beza treh deoh hoh-unan dre garantez evid ho Krouer, ha neuze e hellot anaoud ho Toue.

Eun dra hepken, n'eus forz pegen dister eo ma stagit re ho kalon pe ho taoulagad outañ, a vir ouzoh d'en em gaoud gand ar Mad dreist pep mad, hag a gaillar hoh ene.

KENTEL XLIII

A-eneb deskadurez didalvez ar bed

1.-**Jezuz-Krist.** Va mab, na rit van ebed euz komzou kaer ha lemm an dud, rag n'eo ket e komzou ema rouantelez Doue, med er vertuziou.

Taolit evez ouz va homzou a laka tommder er galon ha sklêrijenn er spered a zegas glahar d'ar pehedou ha pep frealzidigez.

Na lennit morse evid beza kavet furroh ha desketoh gand an dud, med labourit da voustra war ho plegou fall, rag kement-se a dalvezo muioh deoh eged beza desket war kalz traou diêz da gompren.

2.-Goude beza lennet ha desket eur maread a draou, e rankoh atao dond war-zu an Hini a zo ar penn kenta euz a bep tra.

Me eo an hini a ro d'an den ar skiant hag a laka e spered ar re vihan muioh a sklêrijenn eged ne hell rei an dud.

An hini a gomzan dezañ a deu buan da veza desket, hag e spered a resevo kalz sklêrijenn.

Gwaz a ze evid ar re a zo o klask deski kalz traou gand an dud, ha n'emaint nemeur e poan da zeski an doare d'am zervija !

Dond a raio an amzer ma vezo gwelet Mestr ar vistri, Jezuz-Krist, mestr an êlez, o tond da houlenn e gentel digand pep hini ; da lavared eo, da lenn e koustiañs pep den, ha neuze, eur goulou gantañ en e zorn, e furcho kêr Jeruzalem : dizoloet e vezo an traou a zo kuzet en deñvalijenn, hag an teodou ne gavint netra da lavared.

3.-Me eo an hini a zibrad en eun taol spered an den humbl, hag a zesk dezañ muioh a draou war ar Wirionez eternal eged na zesk an hini a zo bet deg vloaz o studia er skoliou.

Me a zesk ha ne vez klevet trouz va homzou ; frêz e tisplegan an traou, disheñvel on diouz an doktored a vez lorch enno hag a gar en em daga an eil egile.

Me eo an hini a zesk disprizoud traou an douar, ober fae war madou ar bed-mañ, klask ha kared madou an Neñv, terhed diouz an enoriou, chom heb ober van ouz ar skweriou fall, lakaad an oll fiziañs ennon-me, hep c'hoantaad netra nemedon, ha va hared dreist pep tra a greiz-kalon.

4.-Rag, o kared ahanon stard, meur a hini o-deus desket traou an Neñv hag o-deus gallet lavared komzou dudiuz.

Muioh o-deus gounezet o tilezel pep tra eged o studia an traou diêsa.

Da lod eh en em ziskouezan sioul, kuzet a-zindan skeudennou ha parabolennou, da lod all e tisklêrian va misteriou e-kreiz ar vrasa sklêrijenn.

Al levriou a ziskouez ar memez tra d'an oll kement ha kement, rag me eo a zesk ar wirionez en diabarz, me eo a zell e goueled ar halonou, me a anavez ar zoñjou, me eo a zoug d'an oberou mad, ha da bep hini e roan hervez ma kavan deread.

KENTEL XLIV

Arabad eo en em staga ouz traou ar bed

1 -**Jezuz-Krist.** Va mab, e meur a dra e tleit beza evel eun den na anavez ket ar pezh a lavarer, evel eun den a zo maro d'an douar hag a zo maro evitañ ar bed oll.

Red eo beza bouzar war meur a dra ha soñjal kentoh en traou a zegas ar peoh d'ho kalon.

Gwelloh eo distrei ho taoulagad diouz ar pezh a zisplij deoh ha lezel pep hini da zoñjal evel ma kar eged koll hoh amzer o tisputal.

Ma talhit mad d'an Aotrou Doue, ma soñjit en e varnidigez, e houzañvot hep poan beza trehet.

AN DISKIBL. O va Doue, pegen izel om diskennet !

Leñva a vez greet war gollou an douar, evid eur gounid dister e poanier, e reder ha ne daoler evez ebed war gollou an ene, pe da vihanna n'her reer nemed war an diwezadou.

Selled a vez greet ouz ar pezh a dalv nebeud pe netra, hag an dra-ze red dreist oll a vez lezet da vond a-biou, rag an den en em lez da vond a-bez d'an traou a ziaavêz, ha ma ne deu ket buan da drei kein dezo, e chom stag outo.

KENTEL XLV

**N'eo ket mad kredi d'an oll ;
buan e vanker dre gomz.**

1.-**AN DISKIBL.** Va Doue, selaouit ahanon ; rag n'ez eus ket fonta war an dud.
Pegen aliez n'am-eus ket kavet skor el leh ma kave din em-bije kavet !
Pegen aliez am-eus kavet e leh ma hortozen an nebeuta !
N'eus ket 'ta da fizioud war an dud ; ennoh, o va Doue, ema silvidigez an dud just.
Ra viot benniget, va Doue, e kement tra zigouez ganeom.
Dinerz om ha bresk, buan om tromplet, buan e cheñchom.

2.-E pe leh ema an den a hell en em ziwall e pep tra gand kemend a aket hag a evez ma chom hep kaoud morse poan-spered na tamm enkreiz ebed ?

Med an hini a laka e fiziañs ennoh, va Doue, hag a glask ahanoh gand eur galon eeun, ne gouez ket ker buan.

Ha ma teu warnañ eun tamm trubuill, pegen rouestlet bennag e hellfe beza, buan e vezo savet ha frealzet ganeoh, rag c'hwi ne zilezit ket an hini a laka beteg ar fin e fiziañs ennoh.

Rouez ar vignoned a zalh mad d'o mignoned en o brasa trubuillou.

C'hwi hepken, va Doue, a zo atao fidel ha n'ez eus hini all ebed evelдох.

3.-O ! pegen fur n'oa ket an ene santel a lavare "Va ene a zalh stard rag diazezet eo war Jezuz-Krist".

Ma vijen evel-se, n'am-bije ket da gaoud kemend a aon rag an dud, e rafen nebeutoh a van gand o homzou.

Piou a hell anaoud a-raog ma teuont, an oll daoliou fall, hag en ziwall diouto?

Ma ra poan an taoliou a ouiem a gouezfe warnom, pegen kaled n'eo ket ar re a gouez pa ne vezom ket o hedal ?

Med perag, paour-kêz ma'z on, n'am-eus ket taolet muih a evez warnon ? Perag am-eus kredet ken aliez ar re all ?

Siwaz ! tud om ha tud vresk, daoust ma'z eus kalz a gred hag a lavar ez om êlez

E piou, va Doue, e hellan-me kredi ? E piou nemed ennoh-c'hwi ?

C'hwi eo ar wirionez ; ne hellit ket on lakaad da fazia, na fazia hoh-unan.

Hag ouspenn pep den a zo gaouiad, dinerz, buan da jeñch, buan da goueza, dreist-oll dre e gomzou rag-se e ranker taoler evez mad a-raog kredi zoken ar homzou o-deus doare da veza eün.

4.-Pegen fur an ali ho-peus roet deom da daoler evez ouz an dud ! rag enebourien an den eo an dud a zo o veva gantañ, ha n'ez eus ket da gredi d'an hini a lavar :

“Amañ pe a-hont ema ar Hrist. “

Diwar va houst ez eus deuet din deskadurez, ha plijet gand Doue e vijen muioh war evez e-leh beza diskiant.

“Taolit evez (a lavar unan bennag), taolit evez, dalhit mad d'ar pezh a lavaran deoh“.

Hag e-pad ma choman sioul ha ma kredan on kuzet, an hini e-neus lavaret din chom sioul ne hell ket rei peoh e-unan, med kerkent e verz ahanon hag eh en em werz e-unan hag ez a kuit.

Diwallit ahanon, va Doue, diouz ar seurt kaoziou ha diouz an dud dievez-se evid na gouezin ket etre o daouarn ha na rin morse evelto.

Lakit e va genou komzou gwir ha leal, ha dalhit va zeod nêt diouz ar gevier.

Ne dlean ket rei leh d'ar re all da houzañv ganin ar pezh ne hellan ket gouzañv ganto.

5.- O ! pegemend, pegemend talvoudeg d'ar peoh eo chom sioul diwar-benn ar re all, diwall da gredi re vuan kemend a glever ha da gonta d'ar re all hep taoler evez ; pegemend eo chom hep digeri ar galon nemed da unanig bennag, hag ho klask c'hwi, va Doue, evid selled em houstiañs ; pegemend eo en em vired diouz komzou goullo an dud ha dalher atao da reizha or buhez en diabarzh hag en diavêz hervez ho polontez !

O ! evid dalher gras Doue en ene, pegemend talvoudeg eo tehed diouz an traou a zo o touella an dud er bed, chom hep c'hoantaad ar pezh a zegas peurlieusa meuleudi, med lakaad an oll boan da wellaad ha da zantellaad ar vuhez.

Nag a dud o-deus bet koll braz abalamour m'eo bet o furnez anavezet ha meulet re abred !

Pegemend a hounid o-deus ber re all o talher kuzet en o halon gras Doue e-pad ar vuhez vresk-mañ n'eo nemed tentasion, nemed brezel heb ehan.

KENTEL XLVI

Lakaad ar fiziañs e Doue pa vezer taget gand teodou an dud

1.-**Jezuz-Krist**- Va mab, dalhit mad ha lakit ho fiziañs ennon. Ar geriou, petra int, nemed geriou ?

Nijal a reont en êr, med ne reont droug ebed d'ar mên.

Mar deus ennoh eun dra bennag da damall, soñjit e tleit kaoud c'hoant d'en em barea ; ma ne rebech netra ho koustiañs deoh, soñjit e tleit beza laouen da houzañv evid Doue.

An nebeuta a hellit ober eo gouzañv beb an amzer eur ger flemmuz pa n'oh ket gouest c'hoaz da houzañv taoliou ken bihan, nemed o veza ma'z oh c'hoaz reizet gand ho korv ha ma rit muioh a van eged na vije red gand komzou an dud ?

Rag gand aon da veza disprizet ne fell ket deoh kleved rebechou evid ho mankou hag e klaskit digareziou evid mired da veza tamallet.

2.-Sellit gwelloc'h en ho koustiañs hag anavezit eo beo c'hoaz ennoh youlou ar bed hag ar youl diskiant da blijoud d'an dud.

Rag pa glaskit mired da veza izelleet, da gaoud mez evid ho mankou, eo anad n'oh ket c'hoaz e gwirionez izel a galon, n'oh ket c'hoaz maro a-walh d'ar bed ha n'eo ket ar bed maro a-walh evidoh.

Selaout va homzou ha ne reot ket a van gand komzou an oll dud.

Ha goude ma vije lavaret eneb deoh kemend a gav fallagriez an dud da lavared, peseurt droug a rafe an traou-ze deoh ma lezit anezo da dremen heb ober muioh a evez outo eged ouz ar goloenn kaset gand an avel ?

Daoust ha lamet a hellont diganeoh eur vlevenn hepken ?

3.-An hini n'eo ket e galon distag diouz ar bed, an hini n'ema ket Doue dirag e zaoulagad a zo lakeet diêz gand an disterra rebech.

An hini a laka e fiziañs ennon-me, ha ne zalh ket re d'e zoñjou e-unan n'en-dezo ket aon rag an dud.

Me eo an hini a varn, an hini a anavez an oll draou kuzet.

Me a oar penaoz eo tremenet an traou, piou e-neus lavaret geriou flemmuz ha piou e-neus gouzañvet.

Diganin-me eo deuet ar ger-ze, me am-eus lezet kement-se d'en em gaoud evid ma vije dizoloet ar pez a zo kuzet e kalz kalonou.

Me a varno an den peher hag an den didamall, me a-raog, o varn dre guz, am-eus c'hoanteet gweled petra oant an eil hag egile.

4.-Barnedigez an dud a fazi aliez, va barnedigez-me a zo eün, a bado ha ne vezo ket dislavaret.

Peurlieusa va barnidigez a jom kuzet ha nebeud a dud a anavez anezi; morse, avad, ne fazi na ne hell fazia, goude ma vije kavet fall gand an dud diskiant.

Ouzin-me 'ta eo e ranker en em drei e pep barnedigez, hag arabad d'an den fizioud warnañ e-unan.

An den just ne vezo ket trubuillet, n'eus forz petra a deuo dezañ a-berz Doue.

Ha pa ve tamallet e gaou, ne raio ket kalz a van ; ne gollo ket ken nebeud e benn gand ar joa ma teu ar re all, gand gwir, d'hen didamall.

Soñjal a ra e furchan er halonou, e welan an oll youlou, rag n'eo ket hepken war ar vizaj ha war an diavêz eo e varnan.

Aliez, me a gav faotou el leh ma n'o-deus an dud nemed meuleudi da rei.

AN DISKIBL.-5.-Aotrou, barner just, gallouduz ha pasiant, a anavez sempladurez ha fallagriez an dud, bezit va nerz ha va fiziañs, rag n'eo ket a-walh evidon testeni va houstiañs.

C'hwi a anavez ar pezh ne anavezan ket, ha setu perag, bep rebech am-eus klevet, am-eus reñket souba va fenn ha gouzañv heb lavared ger.

Pardonit din ma n'am-eus ket greet evel-se bep tro, ha roit din nerz da houzañv gwelloc'h en amzer da zond.

Ha muioc'h a dalv din ho trugarez da gaoud ar pardon eged na daolo testeni va houstiañs goude ma lavarfe din eo direbech va buhez.

Ha pa ne gavfen netra war va houstiañs, ne hellan ket evid-se an em lakaad direbech rag anez ho trugarez den ebed ne vezo kavet hep faot ganeoh.

KENTEL XLVII

Red eo gouzañv an oll boaniou pounner evid gounid ar vuhez eternel.

1- **Jezuz-Krist.**-Va mab, na dit ket da fallgaloni dindan ar zamm euz al labouriou ho-peus kroget enno evid va gloar, na dindan pouez an trubuillou ; ar bromesa am-eus greet a dle beza ho nerz hag ho konsolasion e kemend a hoarvez ganeoh. Me a zo galloudeg a-walh evid paea ahanoh en tu-all d'ar pezh a hellit gedal ha fizioud.

Ne viot ket pell o labourad amañ, ne viot ket atao e-kreiz ar poaniou.

Gortozit eur pennadig, hag e welot dizale an termen euz ho poaniou. Dond a raio eun deiz ma vezo fin d'al labour ha d'an enkreiz.

Dister ha berr eo kemend a dremen gand an amzer

2.-Grit ar pezh a rit, dalhit da labourad em gwinienn, me a vo ho rekompañs.

Skrivit, lennit, kanit, klemmit, tavit, pedit, gouzañvit gand nerz-kalon peb enebiez ; ar vuhez eternel a dalv ar priz-se ha muioh c'hoaz.

Dond a raio ar peoh en eun devez a zo anavezet gand Doue.

Ne vezo na noz na deiz en amzer-ze, med eur sklêrijenn vraz-meurbed, eur peoh stard hag eul leh dienkrez evid diskuiza ...

Ne lavarot ket neuze : “Piou am dizammo euz ar horv-mañ a varo ?

Ne viot ket klevet o krial : “Siwaz ! pegen pell e choman en harlu !“

Rag ar maro en-dezo bet lamm hag ar zilvidigez a bado da viken, ne vezo enkreiz ebed, med levez eüruz o veva e-kichenn Doue hag ar zent.

3.-O ! m'ho-pije gwelet o lugerni en Neñv ar hurunennou a zoug ar zent da viken ; m'ho -pije gwelet ar hloar o-deus bremañ an dud-se a oa gwechall disprizet gand ar bed beteg ma ne vezent ket kavet din da veva war an douar, ya, neuze eh en izellaafeh beteg an douar hag e vije gwelloh ganeoh soubla d'an oll eged beza mestr war unan hepken ; ne glaskfeh ket kaoud levez war an douar-mañ, med kentoh beza trubuillet abalamour da Zoue ; ha beza kemeret evid netra gand an dud a vije evidoh eun dra talvoudeg-braz.

4.-O ! ma plijfe deoh ar gwirioneziou-ze, ma yafent don en ho kalon, penaoz e hellfeh en em glemm eur wech hepken ?

Daoust ha n'eo ket red gouzañv an oll draou poaniuz evid gounid ar vuhez eternel ?

N'eo ket eun dra vihan gounid pe goll rouantelez an Neñv.

Savit 'ta ho penn war-zu an Neñv. Setu-me amañ hag an oll zent en-dro din ; war an douar o-deus bet da ober brezel ; bremañ int eüruz, int frealzet ; n'o-deus mui a enkreuz, er peoh emaint ha da viken e chomint ganin e rouantelez va Zad.

KENTEL XLVIII

Diwar-benn deiz an eternite ha poaniou ar vuhez-mañ

1- **AN DISKIBL.** O ! rouantelez ar Baradoz ! Pegen eüruz ar re a zo o chom ennoh !

O ! deiz an eternite, deiz skeduz heb noz ebed, atao sklêrijenn ar Wirionez o lugerni ennañ, deiz atao leun a levenez, a beoh, deiz ne jeñcho biken !

Me a garfe e vefe deuet an deiz-ze hag e vije fin da oll draou ar bed-mañ.

Lugerni a ra evid ar zent an deiz-se en eun doare sketuz, med evidom-ni a zo c'hoaz oh ober or beaj war an douar ne welom ar sklêrijenn nemed a-bell ha ne welom nemed ar skeud anezi.

2.- An dud eüruz er Baradoz a oar pegen laouen eo an devez-se, ni bugale Eva a zo o klemm amañ en harlu, ken c'hwero ha ken inouüz eo ar vuhez-mañ.

Deveziou ar vuhez-mañ a zo berr hag ankeniuz ha leun a boaniou hag a drubuillou.

Er vuhez-mañ, e strob ouz an den kalz pehedou, kalz youlou a zo oh heskinad anezañ, e-kreiz ar spont ema o vale, atao ez eus warnañ eur boan galon bennag ; e spered a zo troet ha distroet gand ar c'hoant da houzoud pep tra, dallet eo gand kalz a draou diskiant, a falskredennou ; brevet eo gand al labouriou, gwasket gand an tentasinou, dinerzet gand an dienez.

3.-O ! peur 'vo fin d'an oll boaniou-ze ? Peur e vezin distrob diouz chadenn an techou fall ?

Peur am-bezo soñj ahanoh hepken, va Doue ? Peur e hellin en em laouennaad ennoh evid mad ?

Peur e vezin dishual ha libr e gwirionez hep netra da zegas din poan-gorv na poan-spered ?

Peur am-bezo eur peoh stard, paduz, dienkrez, ar peoh en diabarz hag en diavêz, ar peoh reizet mad e pep giz ?

O ! Jezuz leun a vadelez, peur ez in dirazoh da helloud ho kweled ? Peur e paro va daoulagad war gloar ho rouantelez ? Peur e vezot va oll vad ?

Dilezet on bet paour hag emzivad war eun douar leun a enebourien el leh ma 'z eus brezel da ober bemdez ha poaniou a bep seurt da houzañv.

4.-Frealzit ahanon, den divroet ma'z on, torrit nerz va foaniou, rag hirvoudi a ra war-zu ennoh va halon a-bez.

Eur zamm eo evidon kemend tamm frealzidigez a ginnig din ar bed.

C'hoant am-eus beza ganeoh, med ne hellan ket kaoud va hoant.

Youl am-eus d'en em staga ouz traou an Neñv, med diskaret e vezan gand traou an douar ha gand va

youlou n'int ket kabestret a-walh.

A-spered e fell din komandi d'an oll draou, med plega a rankan en desped din da youlou ar hig.

Evel-se den maleüruz ma'z on, am-eus brezel ganin va-unan, eur beh on evidon va-unan ; va spered a hoanta sevel uhel, ha va horv a dro ouz traou an douar.

5.-O ! nag a boan am-eus diabarz ennon ; e-pad ma vez va spered diouz tu ar berniou ar zoñjou vil dirazon e-kreiz va fedenn.

Va Doue, na bellait ket diouzin, en ho kounnar na dehit ket diouz ho servicher.

Strinkit ho tarziou tan ha skubit ar zoñjou fall diwar va zro, taolit ho pirou ma'z aio pell diouzin troidellerez va enebour.

Troit va skiantchou war-zu ennoh, grit din anhounac'haad oll draou ar bed, grit din kas buan diwar va zro ha dispriza ar zoñjou fall degaset gand an enebour.

Sikourit ahanon, Gwironieziou eternal, evid na vezin ket trehet gand follenteziou ar bed.

Deuit, dousder an Neñv, ha ra deho dirazoh pep tra hudur.

Pardonit din ivez, ho-pezit truez ouzin, bep tro ma 'z a pell va spered diouzoh a-greiz pedi.

Anzao a ran on boaz da veza dievez-meurbed.

Aliez a-veh ne vezan ket el leh ma vez va horv, med kentoh el leh ma kas va spered ahanon.

El leh ema va zoñj emañ, hag el leh ema aliez va zoñj ema va harantez.

Ar pezh a ra plijadur din, ar pezh on boaz da gared eo a deu da genta d'am spered.

6.-Abalamour da-ze, c'hwi ar wirionez, ho-peus lavaret sklêr : "El leh ema ho teñzor, eno ema ho kalon".

Ma karan an Neñv, am-eus plijadur o soñjal e traou an Neñv.

Ma karan ar bed, e vezan eüruz p'en em gav traou laouen er bed, ha trist p'en em gav darvoudou.

Ma karan plijadureziou ar hig, e teu aliez d'am spered soñjou fall d'am dougen d'ar plijadureziou-ze.

Ma karan plijadureziou ar spered, on douget da zoñjal enno.

Laouen e vezan o komz hag o kleved komz euz an traou a garan, hag ar zoñj euz an traou-ze a ya ganin d'ar gêr.

Med eüruz eo, va Doue, an hini a brenn dor e galon, abalamour deoh, ouz an oll draou krouet, an hini a ra d'ar hig plega, an hini a stag ouz ar groaz e youlou fall gand karantez e galon, evid ma hello gand eun ene glan kinnig deoh pedennou kaer, ha ma vezo din da gana gand an Êlez ho meuleudiou, goude beza taolet pell dioutañ, an diabarz hag en diavêz, an oll draou krouet.

KENTEL XLIX

**Ar youl d'en em gavoud er vuhez eternel :
peseurt madou braz a zo kinniget d'ar re
a stourmo kaloneg.**

1- **Jezuz-Krist.** Va mab, pa zantit o tond euz an Neñv en ho kalon ar c'hoant euz an eürusted eternel hag ar youl da nijal euz prizon ar horv, evid gweled va sklêrijenn-me, n'ez eus warni koabrenn ebed, digorit neuze frank ho kalon ha degemerit gand levez ar c'hoant-se.

Trugarekait a-greiz-kalon madelez ho Toue, a zo ken trugarezuz en ho keñver, a deu d'ho kavoud gand karantez, a deu da domma ho kalon, da zibrada ahanoh gand aon na vijeh taolet ouz an douar gand ar pouez euz youlou ar horv.

Rag kement-se ne deu ket deoh euz ho spered, euz ho nerz hoh-unan, med euz trugarez Doue a ro deoh e hras dre vadelez evidoh, evid ma teuot da greski er zantelez hag en humilite, m'en em breparot d'ar stourmadou da zond, m'en em stagot ouzin gand oll nerz ho kalon, ha ma viot troet mad d'am zervicha gand karantez.

2.-Va mab, aliez e vez krog mad an tan, med evelato ar flamm tan ne zav ket en êr hep moged.

Rag-se ne glaskont ket gloar Doue hepken e kement tra a houlennot ken stard digantañ.

Evel-se ema aliez ho c'hoant, hag ar bedenn a rit heb ehan hen diskouez sklêr.

N'ez eus netra glan na deread a-walh pa glaskom or mad on-unan.

3.-Na houlennot ket ar pezh a blij deoh, ar pezh a zo mad deoh, med ar pezh a blij din-me, ar pezh a ra enor din-me, rag ma'z eo eeun ho spered, e tleit lakaad a-raog ho c'hoant hag ho koulenn ar pezh a zo gourhemennet ganin-me.

Me a anavez ho c'hoant, ha klevet am-eus aliez hoh hirvoudou.

C'hwi a garfe beza a-vremañ er hloar hag el liberte o deus bugale Doue ; youl ho-peus da veza er palez a bado da viken, e-kreiz levez vraz an Neñv, med n'eo ket deuet c'hoaz an eur-ze, emaoz c'hoaz e amzer ar brezel, amzer al labour hag ar boan.

C'hoant ho-peus e ve leuniet ho kalon gand an Hini a zo ar Mad dreist pep mad, med ne hellit ket c'hoaz kement-se.

Me eo ar Mad dreist pep mad ; gortozit ahanon (a lavar an Aotrou) ken na deuio rouantelez Doue.

4.-Ezomm am-eus c'hoaz d'ho lezel war an douar, da houzañv kalz poaniou evid gweled petra a dalvezit.

A-wechou e viot frealzet, med joa leiz ho kalon n'ho-pezo ket.

Bezit eta kaloneg ha nerzuz evid ober ha gouzañv an traou a zisplij deoh.

Red eo deoh beza evel eun den nevez, evel eun den all.

Red eo deoh aliez ober ar pez a zisplij deoh ha dilezel ar pez a blij deoh.

Ar pez a blij d'ar re all a droio mad, ar pez a blij deoh c'hwi n'ez aio tamm ebed war-araog.

Ar re all a vo selaouet, ho komzou-c'hwi ne vo greet van ebed evid o hleved.

Ar re all a houlenno hag o-dezo o goulenn, c'hwi a houlenno ha ne viot ket selaouet.

Ar re all a vo meulet ha savet uhel gand an dud, diwar ho penn-c'hwi ne vo lavaret ger.

Er re all e vo fiziet an dra-mañ pe an dra-hont, c'hwi ne viot ket mad evid netra.

5.-Abalamour d'an traou-ze an den a gouez a-wechou en dristidigez, ha gounid braz e-neus ma oar gouzañv hep klemm.

En traou-ze hag e re all heñvel eo e kustum an Aotrou Doue êsaad e zervicher evid gouzoud beteg pegeid eo gouest d'en em zilezel ha d'en em drehi e-unan e pep tra.

Gwech ebed n'ho-pezo kemend a ezomm da vervel deoh hoh-unan evel pa vezo red deoh gweled ha gouzañv an traou a zo eneb d'ho soñj, ha dreist-oll pa vezo roet urz deoh d'ober traou na zereont ket ousoh ha n'ousoh ket da betra int mad.

Hag o veza emaoth dindan eur mestr ha na gredit ket dalher penn outañ, e kavit kaled bale war urz eun all hep galloud lavared petra a gavit hoh-unan a vije mad da ober.

6.-Med, va mab, soñjit e teuio buan an termen d'ar poaniou-ze hag ho-pezo digoll braz ; gand ar zoñj-se n'ho-pezo ket leh da gavoud enkreuz, med kreski a raio ho pasianted.

Rag evid ar c'hoantegeziou-ze, traou dister, a zilezit bremañ a galon vad, ho-pezo en Neñv pep tra diouz ho c'hoant.

Eno e kavot kemend a blijo deoh, kemend a hellot c'hoantaad.

Eno ho-pezo an oll vadou, heb aon ebed d'o holl.

Eno, ho polontez a vezo atao a-unan gand va hini ha ne glasko netra nemedon-me, netra er-mêz ahanon-me.

Eno, den ne zalho penn deoh, n'en em glemmo ahanoh, ne glasko ober poan deoh, enebi ousoh : an traou ho-pezo c'hoant da gaoud a vezo oll dirazoh er memez amzer ; leuniet e vezo ho kalon, he gwalh he-dezo.

Eno, me a roio gloar evid an dismegañs, meuleudi evid an daelou, hag e leh ar reñk izela kemeret war an douar, eun tron em rouantelez e-pad an eternite.

Eno e lugerno frouez ar zentidigez, an hini en-dezo greet pinijenn a vezo laouen, an hini a vezo bet izel a vezo kurunet a hloar.

7.-Plegit eta bremañ gand humilite dindan an oll, hep klask gouzoud piou e-neus lavaret pe

gourhemennet deoh ober eun dra bennag. N'eus forz piou, pe ez eo uhelloh, pe vezo euz ho reñk pe izelloh evidoh, n'eus forz piou en-dezo goulennet, c'hoanteet eun dra bennag diganeoh, kemerit pep tra a galon vad hag her grit gwella ma hellot.

Lezit ar re all da glask an dra-mañ pe an dra-hont, d'en em fougeal gand an dra-mañ pe an dra-hont, r' o-dezo mil ha mil meuleudi ; evidoh-c'hwi na glaskit ket hoh eürusted en traou-ze, med bezit eüruz pa viot disprizet, bezit eüruz oh ober ar pezh a blij din, o labourad evid va gloar.

Ne dleit kaoud ken c'hoant nemed ma vo meulet Doue dreizoh, dre ho puhez ha dre ho maro.

KENTEL L

Penaoz e tle an den glaharet en em daoler etre daouarn Doue

1.-**AN DISKIBL.** Va Doue, Tad santel, ra viot benniget bremañ ha da viken rag evel ma fell deoh eo bet greet hag ar pezh a rit a zo mad.

Ra gavo ho servicher e levezenn ennoh, nann ennañ e-unan nag en hini all ebed, rag c'hwi hepken eo al levezenn wirion, c'hwi eo va fiziañs, va hurunenn, va joa, va enor, o ! va Doue.

Petra e-neus ho servicher nemed ar pezh e-neus resevet diganeoh, hep beza meritet ?

Deoh eo kemend ho-peus roet, kemend ho-peus greet.

Me a zo eur paour-kêz hag er poaniou abaoe va yaouankiz ha va ene a vez a-wechou glaharet beteg ma teu an daelou em daoulagad, a-wechou ivez e vez spontet o weled ar gwall youlou o tond.

2.-C'hoant am-eus da gaoud ar joa a deu da heul ar peoh, goulenn a ran ar peoh a roit d'ho pugale a zo maget en ho sklêrijenn hag en ho frealzidigez.

Ma roit ar peoh, ma skuillit warnon al levezenn santel, ene ho servicher a drido hag a gano hep paouez ho meuleudi.

Med ma tehit diouzin evel ma rit aliez, ne hello ket hoservicher redeg dre hent ho kourhemennou, koueza a raio avad, d'an daoulin, da skei war boull e galon gand ar hlahar, o veza ma ne rit ket dezañ evel deh hag en derhent pa lugerne ho sklêrijenn dirag e benn p'oa diwallet dindan ho skoazellou a-eneb an tentasionou a hoarvez.

3.-O tad just ha din da veza atao meulet, deuet an eur da weled petra a dalv ho servicher !

Tad karantezuz, red eo e c'houzañvfe bremañ ho servicher eun dra bennag evidoh ?

Tad da veza meulet atao, deuet an eur anavezet ganeoh a beb eternite, ma tle ho servicher beza trehet eur pennad da vihanna en diavêz dirag daoulagad an dud, rag en diabarz eo atao beo ha troet ouzoh.

Ra vezo eur pennad disprizet, izelleet, diskaret beteg an douar dirag an dud, broudet gand ar youlou fall, brevet gand ar poaniou, evid ma savo adarre ganeoh pa houalaouo an deiz nevez, hag evid ma lugerno skeduz an Neñv.

Tad santel, c'hwi ho-peus reñket ha c'hoanteet an traou evel-se, hag ar pezh ho-peus gourhemennet a zo bet greet !

4.-Grasou eo a roit d'ho mignoned o rei tro dezo da houzañv poan ha trubuil er bed-mañ dre garantez evidoh, n'eus forz peur, n'eus forz digand piou e teu ar poaniou-ze.

Ne hoarvez netra er bed-mañ heb reiz, heb providañs, heb rezon.

Eun dra vad eo evidon, va Doue, beza izelleet ganeoh, evid ma teskin soñjal e justis va Doue ha ma taolin pell diouzin al lorh hag an ourgouill.

Dre-ze am-eus desket kaoud aon rag ho parnedigez a zo dreist spered an den, peogwir e skoit war an den just kerkoulz ha war ar peher, med morse heb laealded, heb rezon.

5.-Meuleudi deoh abalamour m'ho-peus skoet dizamant warnon ha m'ho-peus va gwasket dre garantez gand poaniou a bep seurt, trubuill, anken en diabarz hag en diavêz.

N'eus netra war an douar da helloud va frealzi ; n'eus nemedoh, va Doue, medisin divin an eneou ; c'hwi a sko hag a bare, c'hwi a gas beteg ar bez hag a zegas adarre en-dro.

Ho skourjez a zo a-zioh va fenn hag ho kwalenn a zegaso din skiant.

6.-O Tad muia karet, setu-me etre ho taouarn ; soubla a ran dindan ar wialenn ho-peus kemeret d'am horija, skoit war va hein, war va chouk, ma plego ma fallagriez dindan ho polontez.

Grit ahanon eun diskibl mad hag izel a galon, evel ma ouezit ober, evid ma kerzin atao hervez hoh urz.

Me en em ro deoh gand kemend am-eus evid beza kastizet ; gwelloh beza kastizet er bed-mañ eged er bed-all.

Anaoud a rit an oll draou ha pep hini anezo, n'ez eus netra kuzet evidoh e koustiañs an den.

An traou da zond a anavezit a-raog ma vezont deuet, ha n'ho-peus ket ezomm e teufe unan bennag da lavared deoh, da zeski deoh petra a dremen war an douar.

C'hwi a oar petra a zo mad evid va lakaad da greski er zantelez, ha pegen talvoudeg eo an trubuillou evid lemel mergl an techou fall.

Grit din hervez ma plijo ganeoh, na zisprikit va buhez karget a behedou hag anavezet ganeoh gwelloh, sklêrroh eged gand n'eus forz piou.

7.-O va Doue, roit din ar hras da anaoud ar pezh a zo mad din da anaoud, da gared ar pezh a zo mad din, da gared da veuli ar pezh a blij ar muia deoh da brizoud, ar pezh a zo kavet talvoudeg ganeoh, da zisprijoud ar pezh a zo divalo dirag ho taoulagad.

N'am lezit ket da varn an traou diouz o gweled na diouz ar pezh a glevan an dud diskiant o lavared ; grit ma ouezin barn traou ar horv ha traou an ene hervez ar wirionez, ha dreist-oll kared ar pezh a blij deoh.

8.-An dud a fazi aliez o varn hervez o skiantchou ; ar re a gar ar bed a fazi ivez o kared hepken an traou a welont.

Daoust ha gwelloh eo an den pa vez savet gand ar re all uhelloh eged n'eo dleet ?

An den a zo o fougeal eun all a zo eur gaouiad, eun diskiant, eur paour kêz dall, eur paour kêz den simpl o trompla eun all heñvel outañ ; hag evid gwir, ar seurt meuleudiou-ze, komzou goull, a ra muioh a vez eged a enor.

Rag ar pezh a dalv an den dirag ho taoulagad, o va Doue, kement-se a dalv ha netra ken, eme an den humbl

Sant Frañsez.

KENTEL LI

**Pa vezer skuiz o soñjal en traou uhel,
e tleer en em rei d'an oberou dister.**

1- **Jezuz-Krist** : Va mab, ne hellit ket beza entanet bepred gand youlou santel ar vertuziou, med a-wechou, dinerzet evel ma'z oh gand ar pehed orijinel eo red deoh diskenn beteg an traou izel, ha dougen, en desped deoh, beh ar vuhez paour-mañ.

Keit ha ma viot er horv-mañ kondaonet da vervel, e viot inouet hag e vezo sammet ho kalon.

Red eo deoh eta aliez, e prizon ho korv, sevel ho mouez da glemm a-eneb ar horv-se a vir ouzoh da staga d'ar bedenn ha da veza o soñjal e traou an Neñv.

2.-Neuze eo mad deoh en em rei d'al labouriou dister, da labouriou ar horv, hag en em skuiza gand oberou mad ; gedit gand eur frealz stard ma teuin davedoh adarre euz an Neñv ; gouzañvit gand pasianted an harlu hag ar zehor a galon ken na deuin d'ho kweled adarre ha da denna an oll boaniou diwarnoh.

Me a raio deoh ankounac'haad ho poaniou ha tañva ar peoh en hoh ene.

Digeri a rin dirazoh prajou dudiuz al Levriou Santel evid ma hellot adarre, leun ho kalon a joa, en em lakaad da redeg dre hent va gourhemennou.

Hag e lavarot : "N'eo netra poaniou ar vuhez-mañ e-kichenn ar hloar a vezo taolet warnom".

KENTEL LII

An den ne dle ket soñjal e virit beza frealzet med kentoh beza kastizet.

1- AN DISKIBL. -O va Doue, n'on ket din da veza frealzet ganeoh, n'on ket din e teufeh davedon, ha rag-se, hervez ar pezh a zo just e rit din pa lezit ahanon en dienez kag en anken.

Ha goude ma skuillfen kemend a zaelou hag a zour a zo er mor, ne vijen ket c'hoaz din da veza frealzet ganeoh.

Ne veritan nemed beza skourjezet ha kastizet, rag m'am-eus aliez ofañset ha gwall ofañset ahanoh ha m'am-eus greet kalz pehedou.

Ya, o poueza mad an traou, ne veritan tamm frealzidigez ebed.

Med c'hwi, o ! va Doue mad ha trugarezuz, ne fell ket deoh ez afe da goll ar pezh a zo bet greet gand ho taouarn ; evid diskouez ho madelez hag ho trugarez dreist-muzul ho-peus c'hoanteet frealzi ho servicher en tu all d'ar pezh a verite hag en eun doare din euz Doue.

Rag ho frealzidigez n'eo ket heñvel ouz hini an dud.

2.-Petra am-eus greet, va Doue, evid kaoud diganeoh eun tamm frealzidigez euz an Neñv ?

N'am-eus soñj ebed da veza greet eun dra vad bennag, med atao on bet techet d'an droug ha lezireg da zistrei war an hent mad.

Gwir eo kement-se ha ne hellan ket nah.

Ma lavarfen er hiz all, c'hwi a zavfe em eneb ha ne vije den d'am divenn.

Petra 'zo dleet d'am fehedou nemed an ifern hag an tan eternal ?

Hen anzañ a ran gand gwirionez, dleet eo din pep dispriz ha dismegañs, va flas n'ema ket e reñk ho servicherien.

Pegen diêz bennag e kavan kleved an traou-ze, evelato e tamallin e gwirionez va fehedou din va-unan, evid meritoud gwelloc'h ho trugarez.

3.-Petra a lavarfen, paour-kêz peher goloet a vez ?

Ne deu em genou nemed ar gomz-mañ : "Pebet am-eus, va Doue ; ho-pezit truez ouzin, pardonit ahanon".

Lezit ganin eur pennad amzer da leñva war va fehedou a-raog ma'z in e bro an deñvalijenn, d'an douar a zo goloet gand skeud ar maro.

Petra a houlennit dreist-oll digand ar peher paour ha reuzeudig nemed m'en-dezo glahar ha ma torro e

ourgouill o soñjal en e behedou ?

En eur galon hlaharet hag izel e tiwan an esperañs da veza pardonet, ar peoh a deu d'ar goustiañs ; gras Doue kollet a deu a-nevez en-dro, an den n'en-dezo mui da gaoud aon rag kounnar Doue ; Doue e-unan a ya da ziambroug an ene glaharet hag hen digemer dre eur pok santel.

4.-Glahar humbl ar beherien a zo eur zakrifis a blij deoh, va Doue, hag ar c'hwez vad a deu anezi a gavit gwelloc'h eged c'hwez an ezañs.

Ar hlahar eo al louzou mad ho-peus c'hoanteet e vije skuillet war ho treid, rag morse n'ho-peus pelleet diouzoh eur galon hlaharet, eur galon humbl.

Ar gwir glahar eo ar goudor el leh ma heller tehed a-eneb kounnar an enebour.

Ganti e vez pareet ha gwalhet an oll behedou a oa staget ouz an ene, a zaotre anezañ a-ziagent.

KENTEL LIII

Gras Doue ne ya ket d'ar re a zo stag o halon ouz traou an douar

1.-**J**ezuz-Krist. Va mab, ar hras a zo eun dra a briz braz, ne houzañv ket beza kemmesket gand traou an douar, frealzidigez an douar.

Red eo eta taoler pell diouzoh kemend a hell stanka ouz ar hras, ma fell deoh e vez skuillet war hoh ene.

Klaskit eul leh dister, karit beza hoh-unan, na glaskit ket kaozeal gand ar re all, med kentoh savit ho pedennou birvidig war-zu Doue, evid m'ho-pezo atao doujañs Doue ha ma chomo nêt hoh ene.

Kontit ar bed oll evid netra.

Lakit ar blijadur da veza gand Doue a-raog oll draou ar bed-mañ.

Ne hellot ket beza din-me ha klask er memez amzer ho plijadur gand an traou a dremen.

Diouz ho kerent hag ho mignoned eo red deoh tehed ha dalher ho spered distag diouz pep frealzidigez euz ar bed-mañ.

Evel-se eo e lavar an abostol eüruz sant Per d'ar re a zo fidel da Jezuz-Krist : “Bevit er bed-mañ evel tremenidi, divroidi, distrob diouz c'hoantegeziou ar horv a ra brezel d'an ene“.

2.-**O** ! pegen braz e vezo fiziañs an den war e dremenvan ma 'z eo distag mad e galon diouz ar bed-mañ !

Med distaga mad ar galon diouz oll draou ar bed-mañ a zo dreist galloud an ene a zo klañv c'hoaz, hag an den re droet gand e gorv ne anavez ket al la liberte e-neus eun ene en em roet da Zoue.

Ha koulskoude, ma fell dezañ sevel beteg Doue e rank en em ziframma diouz e gerent ha diouz an dud estren, hag en em ziwall outañ e-unan muioh eged ouz an oll dud all.

Ma teuit a-benn ahanoh hoh-unan, e vezo êsoh deoh beza treh d'an traou-all.

Kaerra gounid a hell ober an den eo beza treh dezañ e-unan.

An hini a ra d'e galon plega, an hini a laka ar horv da zenti ouz ar spered, hag ar spered da zenti ouzin-me e pep tra, hennez a zo mestr dezañ e-unan. Hennez a zo mestr d'ar bed.

3.-**M'**ho-peus c'hoant da zevel ken uhel-ze, eo red deoh kregi el labour gand nerz-kalon, lakaad ar vouhal e gwrizienn ar wezenn, evid lemel ha troha an oll youlou direiz a vije, hep gouzoud deoh, o staga ahanoh ouzoh hoh-unan pe ouz an traou krouet.

Euz ar pleg fall-ze, da lavared eo euz ar garantez direiz e-neus an den evitañ e-unan e tiwan en e galon an darn vuia euz an techou fall a rank da drehi ha da ziwrizienna.

Eur wech trehet ha lazet ar pleg-se e vezo kavet kerkent peoh braz en ene.

Med nebeud a dud a zo maro mad evito o-unan, nebeud en em zistag mad diouto o-unan evid sevel beteg

o Doue, ha rag-se e chomont rouestlet e-kreiz o hoantegeziou ha ne hellont ket en em zibrada a spered dreist an douar.

An hini a hoanta bale ganin-me a dle kabestra e oll hoantegeziou fall ha direiz ha distaga e galon diouz pep karantez evid ar grouadurien.

KENTEL LIV

Petra a houlenn youlou an den ha petra a houlenn gras Doue

1- **Jezuz-Krist** -Va mab, soñjit mad petra a hoanta youlou an den ha petra a hoanta ar hras. Aliez ez eont dre heñchou disheñvel en eun doare diêz da anaoud, ha n'ez eus nemed an dud zantel troet atao o spered war-zu Doue o weled sklêr kemend-mañ.

An oll a glask ar mad, hag e kemend a reont hag a lavaront e klaskont atao eun tamm mad bennag, hag o veza ma kredont ober mad, kalz a fazi.

2.-Youlou an den a zo troidelluz ha kalz a vez sachet, rouestlet, touellet ganto ; e pep tra youlou an den ne glaskont nemed o mad o-unan.

Gras Doue a ya gand hent e-eun, tehed a ra diouz kement tra e-neus an doare da veza fall, ne glask ket touella, ober a ra pep tra evid Doue hepken hag ennañ eo e klask atao ar peoh.

3.-Youlou an den ne garont ket kleved ano euz mervel, na beza lakeet da blega, da zenti a galon vad.

Ar hras, avad, a gar ober pinijenn, a stourm ouz ar c'hoantegeziou direiz, a glask kaoud tro da zenti, da veza trehet, ne fell ket dezi kaoud liberte, gwelloh eo ganti bezañ bleniet ; ne fell dezi komandi d'ar re all med beva dindan dorn Doue, dindan e lezenn, chom atao gand Doue, hag evid Doue eo prest da blega gand humilite dindan an oll grouadurien.

4.-Youlou an den a ra dezañ labourad evid e vad ha selled e pep tra ouz ar gounid da ober.

Ar hras ne zell ket ouz ar pez a zo talvoudeg, ouz ar gounid a zo da ober, med ouz ar pez a raio vad da galz a dud.

5.-An den oh heul e youlou, a gemero gand plijadur an enoriou ; ar hras a gas peb enor, pep enor, pep gloar da Zoue.

6.-Oh heul e youlou, an den e-neus aon da veza disprizet, da gaoud mez ; ar hras a gar gouzañv pep dismegañs evid Jezuz-Krist.

7.-Oh heul e youlou, an den a gar a ehana e gorv ; ar hras ne hell ket beza dibreder, kregi a ra heb aon el labour.

8.-Youlou an den a zoug anezañ da glask traou kuriuz ha kaer, da gaoud euz ouz an traou a zo iskiz, garo ; ar hras a blij dezi an traou sempl ha dister, n'he-deus ket aon rag an traou garo, na mez o wiska dillad fall.

9.-Oh heul e youlou, an den a dro e zaoulagad war madou ar bed, a vez laouen pa hounid, teñval e benn pa goll eun dra bennag, hag evid an disterra goaperez ez a droug ennañ.

Ar hras a zell ouz madou an Neñv, n'en em stag ket ouz madou an douar, ne vez ket glaharet evid

kleved komzou yud, rag he zeñzor, he levenez a zo en Neñv hag eno netra n'ez a da goll.

10.- Oh heul e youlou, an den a hoanta dastum danvez, a gav gwelloc'h kemered eged rei, a gar ar pezh a zo dezañ.

Ar hras, er hontrol, a ra d'an den kaoud truez ha lodenna gand ar re all, ha kaoud muioc'h a blijadur o rei eged o reseo.

11.-Oh heul e youlou an den a gar ar grouadurien, plijadureziou ar hig, follenteziou hag ebatou ar bed.

Ar hras a zoug da Zoue ha d'ar zantelez, a laka an den da drei kein d'ar grouadurien, d'ar bed, da hoantegeziou ar horv, a vir outañ da redeg du-mañ du-hont o veza m'e-neus mez oh en em ziskouez e-touez an dud

12.-Oh heul e youlou, an den a glask frealzidigez en-dro dezañ, traou da ober plijadur d'ar horv.

Ar hras ne glask ket frealzidigez nemed gand Doue, ne glask levenez nemed gand an Hini a zo ar Mad dreist peb mad, an Hini a zo dreist an oll draou krouet.

13.-Gand e youlou an den a zo douget da ober pep tra evid gounid eun dra bennag, eun dra da dalvezoud ; evid pep tra e fell dezañ beza paeet ; evid ar pezh a ra pe a ro e-neus c'hoant e ve greet kalz stad anezañ, hag e-nije den dizro kemend pe vuioh, meuleudi pe madou all.

Ar hras ne glask ket an traou a dremen, ne glask ken rekoupañs nemed Doue, hag euz madou ar bed-mañ ne hoanta nemed ar pezh a zo red evid sikour da hounid madou an Neñv.

14.-Gand e youlou, an den a zo douget da gaoud plijadur o vev e-kreiz kalz mignoned ha kerent, d'en em fougeal abalamour ma'z eo a reñk uhel, da hoarzin ouz an dud o hargou braz, da ober stad euz ar re binvidig, da veuli ar re heñvel outañ.

Ar hras a gar an enebourien, n'eus ket a lorh enni evid kaoud eun niver braz a vignoned, ne yelo ket da veuli ar reñk uhel, an ano braz, ma ne vez ket da heul brasoh santelez ; muioc'h a stad a ra euz ar paour eged euz ar pinvidig ; muioc'h a druez he-deus ouz ar re direbech eged ouz ar re hallouduz ; en em blijoud a ra muioc'h gand ar re a gar trompla ; alia a ra ar re vad da vond war wellaad evid beza heñvel dre o zantelez ouz Mab Doue.

15.-Oh heul e youlou an den a deu buan da glemm pa vank dezañ an disterra tra, pe-neus an disterra boan ; ar hras a houzañv kaloneg an dienez.

16.-Oh heul e youlou, an den a ra pep tra evitañ e-unan ; pa stourm, pa zav e vouez evitañ e-unan eo.

Ar hras a gas pep tra da Zoue, d'an Hini a deu digantañ pep tra, ne laka netra vad war he hont he-unan, n'he-deus ket an hardizegezh-se ; ne gar ket debati na lakaad ar re all da blega d'ar pezh a lavar ; soubla a ra atao a galon hag a spered d'ar Furnez eternal, da varnedigezh Doue.

17.-Oh heul e youlou an den a glask anaoud pezh a dremen e kuz, a houlenn petra a zo a-nevez, a gar en em ziskouez, anaoud kalz trapou dreizañ e-unan, a gar beza anavezet ha brudet evid e oberou ; kaoud enor

ha meuleudi.

Ar hras ne glask ket anaoud an traou kuzet, an nevezentiou, rag kement-se oll a deu euz an techou fall gwriziennet en or halon ; n'ez eus, e gwirionez netra nevez na paduz war an douar.

Ar hras a zesk dalher war ar skiantchou, tehet diouz an ourgouill, ar fouge, kuzad e plas an humilite kement tra a zo da veza meulet ha fougeet, ha klask en oll draou, en oll ouiziegez, mad an ene, meuleudi hag enor an Aotrou Doue ; ne fell ket dezi beza brudet, med c'hoant he-deus e ve meulet Doue evid e oll zonezoniou, rag euz karantez Doue e teu pep tra d'an den.

18.-Ar hras-se a zo eur sklêrijenn euz an Neñv, roet d'an den gand Doue e-unan ; ar hras-se eo merk ar zent, herez ar zillvidigez eternal ; distaga a ra an den diouz madou an douar evid e lakaad da gared madou an neñv ; heb ar hras e vefe douget d'e gorv ; gand ar hras e teu e ene da drei ouz Doue.

Seul-vui eta e vez lakeet youlou ar horv da blega, da zenti, seul-vui e vez grasou nevez a deu bemdez dezañ ; an den ne ehan da wellaad ha da zond da veza bemdez ouz Doue.

KENTEL LV

Pegen techet eo an den d'an droug ha pegen nerzuz eo gras Doue.

1 -AN DISKIBL.- Va Doue, c'hwi ho-peus va hrouet heñvel ouzoh, roit din ho kras a zo ken braz ka ken red evid va zilvidigez evel ho-peus diskouezet din evid ma vezin treh d'am youlou fall a zo atao o kas ahanon da behi ha d'en em goll.

Santoud a ran em horv lezenn ar pehed oh enebi ouz lezenn ar spered, o lakaad ahanon da blega ha da zenti e kalz traou ouz youlou ar horv, ha ne hellan ket delher penn dezo ma ne deu ket ho kras santel d'am zikour en eur domma va halon.

2.-Ezomm am-eus euz ho kras hag euz grasou braz evid beza treh da youlou va horv atao o tougen ahanon d'an droug abaoe ma'z eus anezo.

Kalon an den a zo bet saotret gand pehed an tad kenta Adam, hag an oll a zoug ar boan euz ar pehed-se.

Ha rag-se, va Doue, kalon an den ho-poa greet mad ha yah n'eus bremañ enni nemed gwall youlou ha sempladurez eur galon saotret, ha dreizi heh-unan eo douget d'an droug, da draou an douar.

An tammig nerz a zo chomet enni a zo evel eun tammig glaou e-touez al ludu.

Ha setu petra eo ivez spered an den ; goloet a deñvalijenn, gouzoud a ra anaoud ar mad diouz an droug, ober kemm etre ar gwir hag ar gaou, daoust ma ne hell ket ober kemend a gav a zo mad ha n'e-neus ket gwir sklêrijenn ar wirionez daoust ma n'eo ket glan e hoantegeziou.

3.-Abalamour da ze, o va Doue !, e plij ho lezenn d'am ene, gouzoud a ran eo mad, just ha santel he gourhemennou ; divenn a reont pep droug, deski a reont tehed diouz pep pehed.

Dre va horv e plegan da lezenn ar pehed o senti ouz va youlou fall kentoh eged ouz va spered.

Dre-ze am-eus c'hoant da ober ar mad, med nerz d'hen ober n'am-eus ket.

Aliez e teu d'am spered c'hoant da ober vad, med o veza ma ne vez ket ho kras o sikour va zempladurez, evid an disterra tra oh enebi ouzin e teuan da laoskaad ha da goueza.

Anaoud a ran mad hent ar zantelez, gweled a ran sklêr penaoz e rankfen ober, med trehet gand pouez va zechou fall, ne hellan ket pignad dre hent ar zantelez.

4.-O va Doue, nag ezomm am-eus euz ho kraz, evid kregi er mad, evid mond a-raog ha kas da benn al labour !

Ne hellan netra heb ar hras ; kennerzet, avad, gand ho kras, e hellan pap tra.

O sikour zantel a ziskenn euz an Neñv ! hepdoh ne hellan gounid netra ; hepdoh kemend am-eus a-hend-all ne dalv netra.

Na deskadurez, na genel, na danvez, na nerz, nag ijin na teod mad ne dalvont netra dirazoh heb ar hras.

Rag donezonou ar horv a vez roet d'ar re vad evel d'ar re all ; med d'ho mignoned, o va Doue, e roit ho kras, merk ho karantez, ha ganti e hellont gounid ar vuhez eternel.

Kemend a dalvoudegez he-deus ar hras-se, ma ne dalv netra hepti na beza profed, nag ober miraklou, nag anaoud ar gwirioneziou kuzet.

Nag ar feiz zoken, nag an Esperañs nag ar vertuziou all ne blijont deoh heb ar garantez hag ar Hras.

5.- O Gras eüruz-meurbed, c'hwi a laka an hini a zo paour a spered da veza pinvidig dre e vertuziou, hag izel a galon an hini e-neus madou braz.

Deuit, diskennit ennon, kargit va halon mintin mad a frealzidigez, evid na deuio ket va ene da skuiza ha da zizeha.

O va Doue, me ho ped, grit ma kavin gras dirazoh, a-walh eo ; m'am-eus ho kras, n'am-eus ket ezomm euz an traou all a hoanta youlou va horv.

Ma teu warnon tentasionou ha trubuillou, n'am-bezo aon ebed ma vez ganin ho kras.

Ho kras eo va nerz, dreizi e teu din furnez ha sikour.

6.-Galloudusoh eo eged an oll enebourien ha furroh eged an oll dud fur assemblez.

Deski a ra ar wirionnez, an urz vad, sklêrijenn a ro d'ar galon, diêz 'oan, e kreiz an anken ; kas a ra pell an dristidigez, lamed a ra ar spont, maga a ra an devosionou, lakaad a ra an daelou da redeg.

Petra on heb ar hras nemed eur skourr seh, eur penn-kef mad da daoler kuit ?

Ra zeuio ho kras eta, va Doue, da zacha ha da boulza ahanon, ra vezin ganti atao aketuz d'an oberou mad, en ano Jezuz-Krist ho mab. Evel-se bezet greet.

KENTEL LVI

Red eo deom lezel or bolontez on-unan ha dougen or hroaz evel Jezuz-Krist

1 -Jezuz-Krist. 1.-Va mab, seul-vui e hellot en em ziskrava ahanoh hoh-unan, seul-vui e hellot tostaad ouzin-me.

Chom hep c'hoantaad netra a ziavêz a ro peoh d'ar galon ; evel-se ivez en em zilezel mad a stag ouz Doue.

C'hoant am-eus e teskfeh en em zilezel evid mad hoh-unan hag en em rei oll din me hep marhata, hep klemm.

Deuit d'am heul. Me eo an hent, ar wirionez, ar vuhez.

Heb hent ne heller ket bale, heb ar wirionez ne heller anaoud, heb ar vuhez ne heller ket beva.

Me eo an hent a rankit da heul, ar wirionez a rankit da gredi, ar vuhez a rankit da hortoz.

Me eo an hent ne gas ket da goll, ar wirionez ne hell ket fazia, ar vuhez n'ez eus fin ebed dezi.

Me eo an hent eün-tenn, ar wirionez dreist pep gwirionez, ar vuhez wirion, ar vuhez eüruz a zo bet a-viskoaz.

Ma chomit e va hent, eh anavezot ar wirionez, hag ar wirionez ho tenno a boan hag eh en em gavot er vuhez eternel.

2.- Ma fell deoh en em gavoud er vuhez, heuillit va gourhemennou.

Ma fell deoh anavezoud ar wirionez, kredit e va homzou.

Ma fell deoh beza va diskibl, dilezit ho polontez hoh-unan.

Ma fell deoh en em gavoud er vuhez eüruz, grit fae war buhez an douar-mañ.

Ma fell deoh beza savet uhel er Baradoz, en em lakait izel war an douar-mañ.

Ma fell deoh beza ganin em rouantelez, dougit ho kroaz ganin.

Rag gwir zervicherien ar Groaz hepken a gav hent an eürusted hag ar wir sklêrijenn.

3.-AN DISKIBL. O Jezuz, va Aotrou, peogwir e oa striz an hent m'hoh-eus greet dreizañ, peogwir oh bet disprizet gand ar bed.

Ar servicher n'eo ket brasoh eged e vestr, nag AN DISKIBL uhelloh eged e Aotrou.

Ra zeuio ho servicher da gemered skwerdiwar ho puhez rag eno ema va zilvidigez, va gwir zantelez.

Kemend a lennan, a glevan a-hend-all, ne ra din na vad na plijadur wirion.

4.-Jezuz-Krist. Va mab, pa anavezit kement-se, p'ho-peus lennet an traou-ze oll, e vezot eüruz, ma rit

evel-se.

An hini a anavez hag a heul va gourhemennou eo an hini a gar ahanon, ha me d'am zro a garo anezañ, me en em ziskouezo dezañ hag hen lakaio da azeza ganin e rouantelez va Zad.

5.-**AN DISKIBL**. Aotrou, ra hoarvezo ganin evel m'ho-peus lavaret ha prometet.

Kemeret am-eus er groaz euz ho torn, he dougen a rin beteg va maro en doare m'ho-peus he lakeet war va diouskoaz.

E gwirionez buhez eur relijiuz a zo eur groaz, med eur groaz a zoug d'ar Baradoz.

Kroget on en hent, ne hellan ket mond war va hiz ; ne hellan ket diskregi euz va hroaz.

6.-Kerzom 'ta, va breudeur, Jezuz a vezo ganeom.

Evid Jezuz on-eus kroget en or hroaz ; dre garantez evid Jezuz dalhom mad dezi.

Gantañ e vezim sikouret, rag eñ a ziskouezo deom an hent hag a gerzo en or raog.

Setu or Roue o vond en or raog war an dachenn ; eñ a stourmo evidom.

Deom kaloneg da heul, arabad e ve den o kaoud aon ; bezom prest da vervel kaloneg er stourmad ha na deom ket da zaotri or gloar o tehed diouz ar Groaz.

KENTEL LVII

Arabad koll ar penn ma teuer da goueza en eur pehed bennag

1.-**Jezuz-Krist.** Va mab, ar basianted hag an humilite, e-kreiz ar poaniou a blij din-me muioh eged al levenez vraz hag an devosion e-kreiz an eürusted.

Perag beza glaharet evid an disterra ger lavaret eneb deoh ?

Ha goude ma vije bet gwasoh c'hoaz, ne vije ket bet red beza poaniet.

Lezit an traou-ze da vond e-biou ; n'eo ket ar wech kenta, n'eo ket eun dra nevez evidoh, ha n'eo ket ar wech diweza eh en em gavo ganeoh kemend all, ma chomit pell war an douar.

Nerz a-walh ho-peus pa ne vez netra oh ober poan deoh, oh enebi ouzoh.

Eun den a guzul vad oh ivez, gouzoud a rit lavared komzou kaer evid rei kalon d'ar re all.

Med pa deu ar boan da skei eun taol war ho tor, neuze ez a da netra ho kuzul, ho nerz.

Gwelit pegen braz eo ho sempladurez en traou disterra en em gav ganeoh eh anavezit kement-se.

Evelato evid ho sillvidigez e c'hoarvez ganeoh an traou-ze, n'eus forz pere int.

2.-**Kasit** pell diouz ho kalon kement tra a ra diêz deoh, ha ma'z eus diskennet eun tamm glahar bennag e goueled ho kalon, na gollit ket ho penn ha na zalhith ket pell ar boan-ze ganeoh.

Da vihanna gouzañvit gand pasianted ma ne hellit ket beza laouen.

Mar ho-peus poan o klevet traou kasauz, ma'z a droug ennoh, dalhit war hoh imor, na lezit ger ebed da zond euz ho kenou gand aon da rei skwer fall d'ar re zempl.

Buan e torro nerz hoh imor, ha gand ar hras o tistrei deoh, ho poan a deuio da zouplaad.

Me a zo beo c'hoaz (a lavar an Aotrou), prest d'ho sikour, d'ho frealzi muioh eged kustum, ma lakit ho fiziañs ennon, ma pedit ahanon a-greiz ho kalon.

3.-En em gennerzit hag en em lakit e tu da houzañv poaniou brasoh c'hoaz.

N'eo ket kollet pep tra war zigarez m'ho-peus aliez trubuillou ha tentasoniou kaled.

Eun den oh, nann eun Doue, eur horv ho-peus, n'oh ket eun êl.

Penaos e hellfeh chom atao er memez stad a zantelez peogwir an êl en Neñv hag an den kenta er baradoz n'o-deus ket gellit chom er stad-se ?

Me eo an hini a zav an dud kouezet a-zindan samm an anken, hag ar re a anavez o zempladurez a zo dibradet beteg va divinite.

4.-**AN DISKIBL.** Aotrou, bennoz deoh evid ho komzou a zo dousoh d'am halon eged na 'z eo ar mel d'am genou.

Petra a rafen e-kreiz kemend a drubuill hag a anken ma ne deufeh ket d'am hennerza gand ho komzou santel ?

Gand m'en em gavin eun deiz e porz ar zilvidigez, petra a ra-ze din peseurt ha pegen braz poaniou am-bezo gouzañvet ?

Grit m'am bezo eur maro mad, n'am-bezo eun treuz eüruz o vond euz ar bed-mañ.

Ho-pezit soñj ahanon, va Doue, ha blegnit ahanon dre an hent beteg ho rouantelez. Evel-se bezet greet.

KENTEL LVIII

Ne glaskit ket anaoud an traou uhel hag an traou kuzet a zo anavezet gand Doue hepken.

1.-**Jezuz-Krist.** Va mab, na dit ket da glask komz diwar-benn an traou uhel, an traou e-neus kuzet Doue ouz an den ; na glaskit ket perag hemañ a zo lezet evel-henn hag hennez savet ken uhel e gras Doue, perag hemañ e-neus kemend da houzañv hag hennez kemend a levez.

An traou-ze a zo dreist spered an den ; spered den ebed, kaer en-dezo klask ha disput, ne hell tizoud beteg an traou kuzet e Doue.

Pa deu eta an droug-spered da zegas heveleb soñjou deoh, pa vez greet ar goulennou-ze gand tud kuriuz, grit respont ar Profed : “Va Doue, c’hwi a zo just, hag e-eun eo ho parnedigidez. “

Ha c’hoaz. “Barndigez Doue a zo just, n’ez eus rebech ebed d’ober dezi“. Va barnedigeziou-me (a lavar Doue) a ranker douja dezo, rag spered an den n’eo ket evid o hompren.

2.-Na dit ket kennebeud da zisput diwar-benn miritou ar Zent, da glask gouzoud pehini eo ar zantella, ar brasa e rouantelez an Neñv.

Ahano e sav meur a wech enebiez, komzou treñk ha komzou didalvez, ourgouill ha fouge diskiant, gwarizi ha yenijenn o veza ma laka hemañ eur zant a-raog eun all, ha ma klask hennez lakaad e hini er reñk uhella.

C’hoant gouzoud an traou-ze, ober enklask warno ne dalv netra ebed ; kement-se a zisplij zoken d’ar zent, rag me n’on ket eun Doue da lakaad dizunvaniez e-touez an dud, med da lakaad ar peoh, hag ar peoh a zo en humilite, nann en ourgouill.

3.-Hiniennou o-deus muioh a zevosion evid ar zent-mañ pe evid ar re-ze, med o devosion a deu euz o halon o-unan kentoh eged na deu a-berz Doue.

Me eo am-eus greet an oll zent, am-eus roet dezo ar hras hag ar hloar.

Me a anavez meritou pep hini, me am-eus o goloet euz va mennoziou kaerra.

Me a nanavez a beb eternite ar zent euz ar Baradoz.

Me eo am-eus o dibabet euz ar bed, n’eo ket i o-deus da genta choazet ahanon.

Me am-eus o galvet dre ar hras ha tennet anezo war-zu ennon dre va zrugarez.

Me am-eus henchet anezo a-dreuz pe peseurt tentasoniou, ha skuillet am-eus warno frealzidigez heb muzul.

Me am-eus roet dezo nerz da genderhel, ha kurunet am-eus o fasianted.

Anaoud a ran ar henta evel an diweza hag evito oll am-eus eur garantez dispar.

Me eo a zo da veza meulet dre an oll zent, da veza benniget dreist pep tra hag enoret e pep hini euz ar zent, o veza m'am-eus o zavet uhel hag o dibabet, hep m'o-dije miritet e doare ebed.

4.-An hini eta en-dezo disprizet an disterra anezo, ne enor ket kennebeud an hini braz, rag bihan ha braz, oll int bet greet ganin-me.

Mankoud da unan euz ar zent a zo mankoud din-me ha d'an oll zent euz ar Baradoz.

Oll ne reont nemed unan, stag int etrezo dre ar garantez, oll o-deus ar memez mennoziou, ar memez c'hoantegeziou, hag ennon-me eh en em garont oll.

5.-Kaerroh c'hoaz ; muioh e karont ahanon-me eged n'en em garont o-unan ha na garont o miritou.

Rag dibradet dreisto o-unan ha distag diouz ar garantez evito o-unan e tizont oll d'am hared-me hag em harantez-me e kavont ar peoh hag an eürusted.

N'ez eus netra da helloud o distaga hag o diskar ahano, rag o spered a zo leuniet gand ar wirionez a bado da viken hag o halon a verv gand tan ar garantez, tan na varvo morse.

Ra ehano eta an dud a zo douget da blijadureziou an douar evel anevaled ; ra ehanint da ziviz diwar-benn ar zent, rag ne ouzont kared nemed an traou a zegas dezo plijadur.

Lakaad pe lemel a reont hervez o froudenn, ha nann hervez ma varn ar wirionez eternel.

6.-Kalz 'zo ne anavezont netra euz an traou-ze, dreist-oll ar re n'int ket sklêrijennet ha na ouzont ket kared o nesa a spered hervez ma houlen Doue.

Douget int c'hoaz, ha kalz, gand pleg o halon hag eur garantez n'ez eus enni netra euz an Neñv, hag ez eont d'ar zent-mañ pe d'ar re-ze, hag evel ma varnont traou an douar, evel-se ivez e varnont traou an Neñv.

Med kemm braz a zo etre soñjou an dud n'int ket parfed ha soñjou ar re a zo sklêrijennet o spered gand Doue.

7.-Dirollit eta, va mab, da gomz diwar-benn an traou-ze a zo dreist ho spered, med lakait kentoh ho poan hag hoh evez da gaoud eur plas, ha pa vije an diweza, e rouantelez an Neñv.

Ha goude ma anavezfe unan bennag piou eo ar zantella, piou eo ar brasa e rouantelez an Neñv, da betra e talvezfe dezañ anaoud kament-se nemed d'en em izellaad dirazon-me ha da rei brasoh meuleudi d'am ano ?

Kalz muioh e plij da Zoue an hini a zoñj pegen braz eo e behedou, pegen bihan e zantelez, pegen pell ema c'hoaz diouz uhelder ar zent eged an hini a zo o tiviz diwar-benn gouzoud pehini eo ar brasa ha pehini ar bihanna e-touez ar zent.

Gwelloh eo pedi ar zent a-greiz kalon ha gand daelou ha goulenn o skoazell gallouduz gand humilite eged koll an amzer o klask gouzoud pe reñk o-deus an Neñv.

8.-Ar zent a zo eüruz hag eüruz-tre ; kared a rafent gweled an dud ken eüruz all hag oh ehana gand o homzou diskiant.

Ar zent n'emaint oh en em fougeal euz o miritou, ar vad o-deus greet n'hen taolont ket warnezo o-unan,

med warnon-me hepken, o veza m'am-eus roet dezo pep tra dre va madelez dreist-muzul.

Ken leun eo o halon gand karantez Doue ha gand ar joa ma ne vank netra d'o gloar, d'o eürusted.

Seul-vui int savet uhel er hloar, seul-vui int izel a galon, ha seul dostoh e teuont din-me, seul donnoh ez eo, em harantez.

Abalamour da-ze eo skrivet e taolent o hurunennou dirag Doue hag e kouezent war o fenn dirag an Oan hag eh adorent an hini a zo beo a oll-viskoaz.

9.-Kalz a zo o klask gouzoud piou eo ar brasa e rouantelez an Neñv ha ne ouzont ket ha kavet e vezint o-unan din da veza lakeet e-touez ar re zisterra.

Beza ar bihanna er Baradoz a zo c'hoaz eun dra vraz, rag er Baradoz an oll a zo braz peogwir eno an oll a zo galvet bugale Doue hag a vezo atao bugale Doue.

P'edo an diskibien o houlenn piou eo ar brasa e rouantelez an Neñv, Or zalver a lavaras dezo evel-henn : "Ma n'en en droit ouz Doue ha ma ne deuit da veza heñvel ouz ar vugale, n'ez eot ket e rouantelez an Neñv".

Malloz d'ar re ne fello ket dezo en em lakaad izel evel ar bugel-ze, rag ne hellint ket mond dre zor ar Baradoz: n'eo ket uhel a-walh evito.

10.-Malloz d'ar re binvidig o-deus amañ o flijadur, rag gweled a raint ar re baour o vond dre zor ar Baradoz hag int a jomo er-mêz da grial forz.

Bezit laouen, tud humbl ; tud paour, lammit gand joa, rag deoh eo rouantelez an Neñv, gand ma talhot da heul hent ar wirionez.

KENTEL LIX

On oll fiziañs a dleom da lakaad e Doue

1.-**AN DISKIBL.** Va Doue, peseurt fiziañs a hellan-me da gaoud er vuhez-mañ ? Petra a hell va frealzi ar muia e-touez an traou a zo dindan bolz an Neñv ?

Daoust ha n'eo ket c'hwi eo, va Doue ? rag ho trugarez a zo dreist-muzul.

E peleh on en em gavet mad hebdoh ? E peleh on bet diêz p'edoh ganin ?

Gwelloh eo ganin beza paour abalamour deoh eged beza pinvidig hebdoh.

Gwelloh eo ganin mond d'hoh heul evel eun divroad war an douar eged beza en Neñv hebdoh.

El leh emaoñ ema an Neñv, hag el leh n'emaoh ket ema ar maro hag an ifern.

C'hwi eo a fell din kaoud, rag-se eo red hirvoudi, krial war-zu ennoh hag ho pedi.

Ne hellan ket lakaad va oll fiziañs e den ebed na gedal beza sikouret gand den em ezommou, nemed ganeoh hepken, va Doue.

C'hwi eo va esperiañs ha va fiziañs, c'hwi am frealzo rag c'hwi a zalh atao d'ho ker.

2.-An oll a glask o mad o-unan ; c'hwi ne glaskit nemed va zavetei hag ober din mond war wellaad ha pep tra a lakit da drei da vad din.

Zoken pa zegazit din tentasoniou ha poaniou, e lakit anezo da dalvezoud din rag boaz oh da gastiza ho mignoned e mil doare.

Pa zegasit poaniou e tleit beza karet ha meulet evel pa zegasfeh e-leiz a frealzidigez.

3.-Ennoh eta, va Doue, e lakaan va oll fiziañs ha va oll epserañs, warnoh e taolan ar zamm euz va oll drubuillou hag ankeniou, rag kemend a welan er-mêz ahanoh a zo evel moged, n'eo nemed sempladurez.

Ne dalvezo netra din kaoud kalz mignoned, na tud hallouduz d'am zikour na tud a furnez da guzulia ahanon, na levriou an doktored da lenn, na traou a briz braz d'am dilivra, na leh distro ebed d'am huzad, ma ne deuit hoh-unan, va Doue, d'am skoazella, d'am zikour, d'am hennerza, d'am frealzi, d'am helenn, d'am diwall.

4.-Rag an oll draou o-deus an doare da zegas ar peoh hag an eürusted n'int netra pa vankit deom ha ne zegasont tamm eürusted.

C'hwi eo an termen euz an oll vadou, ennoh ema ar wir vuhez, ar wir ouizegez, kag o lakaad ennoh o fiziañs eo e kav ho servicherien o brasa frealzidigez.

War-zu ennoh e tro va daoulagad, ennoh e lakaan va fiziañs, va Doue, Tad leun a drugarez.

Bennigit ha santellait va ene o skuilla warnon bennoz ar Baradoz, evid ma vezo santel ho ti ha ma hello

degemeret ho kloar eternel, evid ma ne vezo en templ ho-peus ar vadelez da zond ennañ netra da zisplikoud d'ho taoulagad.

Gand ho madelez hag ho trugarez dreist-muzul, sellit ouzin ha selaouit pedenn ho paour-kêz servicher harluet pell diouzoh e bro hag e teñvalijenn ar maro.

Diwallit ha mirit ene ho servicher paour hag e-kreiz oll drubuillou ar vuhez vresk-mañ hentchit anezañ gand ho kras, kasit anezañ dre hent ar peoh beteg bro ar sklêrijenn eternel. Evel-se bezet greet.

D'AL LENNERIEN

Beteg-henn ho-peus klevet traou kaer, kenteliou uhel meurbed.

An tri levr kenta o-deus diskouezet deoh e peleh ema an eürusted hag ar joa wirion evid an nen ; o kared Doue, o tilezel ar grouadurien, ar bed hag e blijadureziou, evid en em rei da draou an Neñv. Greet om evid ar Baradoz : ra vezo eta troet atao on daoulagad war-zu or bro wirion, hag evid en em gavoud eno bezom laouen o houzañv poaniou ar vuhez-mañ.

Bremañ, er pevare levr, e kevot traou kaerroh c'hoaz.

Digorit dor ho kalon evid lenn ar pezh a zo amañ war-lerh diwar-benn Sakramant ar Garantez, ar Zakramant meulet ra vezo euz an Aoter.

PEVARE LEVR

DIWAR-BENN SAKRAMANT AN AOTER

Mouez Jezuz-Krist-1. *Deuit d'am havoud, c'hwi oll a zo poaniet ha sammet ha me ho tiboanio, a lavar ar Mestr.*

2.-Ar bara a roit din-me eo va horv evid silvidigez ar bed.

3.-Kemerit ha debrit. Setu-amañ va horv a vezo lakeet d'ar maro evidoh . Grit kemend-mañ evid dalher soñj ahanon.

4.- An hini a zebr va horv hag a ev va gwad a jom ennon ha me a jom ennañ.

5.- Ar homzou am-eus lavaret deoh a zo evidoh spered ha buhez.

KENTEL I

Gand pebez doujañs e tleer degemeret korv Jezuz-Krist

1 -AN DISKIBL.-Setu aze ho komzou, o Jezuz ! gwirionez eternel ! beza ma n'ho-peus ket o lavaret er memez amzer ha n'int ket skrivet er memez leh.

Ha pa deuont diganeoh, pa'z int gwirion, e tlean o hemered oll gand feiz hag anaoudegez vad.

Ho komzou int, euz ho kenou eo int kouezet, mez din-me int ivez ar homzou-ze, o veza m'ho-peus o lavaret evid va zilvidigez.

O hemered a ran diganeoh gand joa evid ma'z aint don em halon.

Dibradet on gand komzou ken madelezuz, ken dous, ken karantezuz, med aon am-eus o soñjal em fehedou ha va houstiañs saotret a vir ouzin da dostaad ouz eur Zakramant ken braz.

Poulzet on war-zu ennoh gand ho komzou ken dous, med distroet on gand ar zamm euz va fehedou.

2.-Urz a roit din da vond deoh gand fiziañs, ma fell din kaoud va lod ganeoh er Baradoz ; urz a roit da zebri bara an Neñv, ma fell din en em gavoud er vuhez hag er hloar eternel.

Deuit d'am haoud, a lavarit, c'hwi oll a zo sammet ha poaniet, ha me ho tenno a boan.

O pebez ger dous ha karantezuz evid skouarn ar peher ! Va Doue, ar peher paour hag ezommeg a zo pedet ganeoh da zegemer ho korv santel !

Med piou on-me, va Doue, evid kredi tostaad ouzoh.

An Neñvou n'int ket braz a-walh evid rei plas deoh hag e lavarit : “Deuit oll din-me !“.

3.-Perag kemend a vadelez, perag or pedi gand kemend a garantez ?

Penaoz e kredin-me tostaad ouzoh, pa ne gavan em halon netra vad ?

Penaoz e tegemerin ahanoh em zi, p'am-eus ken aliez ofañset ho madelez ?

Dirazoh an Êlez hag an Arhêlez a zo leun a zoujañs, ar Zent hag an dud just leun a spont hag e lavarit : “Deuit oll davedon“.

Ma n'ho-pije ket lavaret hoh-unan ar gomz-se, piou a gredfe eo gwir ? Ha ma n'ho-pije ket hoh-unan gourhemennet, piou a gredfe tostaad ?

4.-Noe, an den santel, a labouras kant vloaz war e arh evd ma vije salvet gand eun nebeudig tud all, ha me, penaoz e hellin, en eun eur, en em lakaad e doare vad da zegemer Krouer ar Bed ?

Moizez, ho servicher braz, ho mignon ker, a reas eun arh gand koad na helle ket breina hag en diabarz e lakeas eur gwiskad aour euz ar re gerra evid gorren eno taoliou al Lezenn ; ha me, n'on nemed breinadurez, me a gredfe ken êz-se ho tegemeret, c'hwi ho-peus greet al Lezenn ha roet ar vuhez ?

Salomon, ar furra euz rouaned Izrael, a lakeas seiz vloaz da zével eun templ kaer-meurbed evid hoh enori, hag e-pad eiz devez e reas gouel dedi an templ-se ; kinnig a reas mil aneval ; ha degas a reas an Arh a Aliañs e-kreiz al levenez, d'al leh a oa bet greet eviti ; ha me, maleüruz ma'z on, me an disterra e-touez an dud, penaoz ho tegemerfen em zi ? A-veh e hellan en em rei d'ar bedenn e-pad eun hanter- eur ha c'hoaz ma hellfen eur vech hepken tremen mad o pedi eun amzer berroh eged eun hanter- eur.

5.-O va Doue, nag a boan o-deus lakeet an dud-se da blijoud deoh !

O ! na pegen bihan eo ar pez a ran ! Pegen berr amzer a lakaan da brepari va ene evid komunia !

Nebeud a wech e vez va spered troet oll war-zu ennoh ; nebeutoh a wech c'hoaz e vez distrob diouz soñjou all.

Ar pez a zo sur, er mare ma vezan dirazoh, va Doue, ne dlefe dond em spered soñj divalo ebed, rag n'eo ket eun êl mmed mestr an Neñv ez an da reseo.

6.-Eun tamm mad a gemm a zo koulskoude etre an Arh a Aliañs gand an traou a oa enni hag ho korv glan-meurbed gand e oll hrasou, etre sakrifisou al Lezenn Goz n'oant nemed ar skeud euz ar zakrifisou da zond, hag osti wirion ho korv he-deus peurhreet oll zakrifisou al Lezenn Goz.

Perag eta ne verv ket muioh va harantez pa vezan dirazoh ?

Perag ne lakaan ket muioh a aket d'en em brepari da reseo ho Sakramant, p'o-deus ar Batriarched, ar Brofeted, ar Rouaned, hag ar Briñsed euz al Lezennnn Goz gand o fobl a-bez, diskouezet kemend a feiz hag a garantez e servich Doue

7.-David, ar Roue santel, a oe gwelet o tañsal, en-dra ma helle, dirag Arh Doue, evid trugarekaad abalamour d'an oll draou en-doa greet Doue d'e dadou koz.`

Ober a reas kalz binviou da vuzikad, sevel a reas psalmou ha lakaad a reas o hana, hag e-unan e kanas anezo aliez war eun delenn, poulzet ma'z oa gand gras ar Spered Santel ; deski a reas da bobl Izrael meuli Doue a-greiz kalon, kana oll a-unan d'E adori bemdez ha da lavared bennoz dezañ.

Mar o-doa neuze an dud kemend a zevosion ma oe kanet kemend a veuleudi dirag an Arh a Aliañs, pegemend a zoujañs, a zevosion, ne dlean-me ket kaoud hag an oll gristenien ivez dirag ar Zakramant ha pa resevom korv sakr Jezuz-Krist !

8.-Kalz a red du-mañ du-hont d'al lehiou a zo enno relegou eur zant bennag hag a zo mantret o kleved ar pez e-neus greet ar zant-se, souezet int o weled pegen braz eo an iliz savet d'e enori, pokad a reont d'e relegou gorroet e-kreiz an aour hag ar zeiz ha setu emañ amañ em hichenn war an Aoter, va Doue, c'hwi, santelez ar Zent, Mestr an Êlez !

Aliez an dud a ya da bardona a vez douget gand ar c'hoant da weled traou nevez, traou n'o-deus ket gwelet c'hoaz, hag e tennont euz o beaj nebeud a frouez, dreist-oll pa vezont dievez ha pa n'o-deus ket gwir glahar d'o fehedou.

Med amañ e Sakramant an Aoter, emaoñ oll, va Doue, c’hwi, Doue ha Den, Jezuz-Krist, ha bep tro ma vezit resevet dellezeg ha gand devosion e vez gounezet madou braz evid ar vuhez eternel.

Evid ho reseo n’eo ket ar c’hoant da weled traou nevez, ar guriozite a dle or poulza, nag ar c’hoant da gaoud plijadur evid or horv, med ar feiz kreñv, ar fiziañs stard, ar garantez wirion eo a dle on dougen.

9.-O Doue kuzet, Doue Krouer ar bed, pebez traou souezuz ho-peus greet evidom ! pegen dous, pegen braz ho madelez evidom ! p’en em ginnigit hoh-unan deom er Zakramant ! Kement-se a zo en tu-all da spered an dud, kement-se a gas war-zu ennoñ kalonou an dud devod hag a laka o harantez da vervi.

Ho servicherien fidel a laka o foan e-pad o buhez penn-da-benn da vond war-wellaad, dre reseo ar Zakramant-mañ, a wel o harantez o kreski, hag a deu aliez da veza dougetoh d’ar zantelez.

10.-O nerz burzuduz kuzet er Zakramant-mañ, anavezet hepken gand mignoned Jezuz ! an dud difeiz hag ar beherien ne hellont ket anaoud an dra-mañ !

Er zakramant-mañ e vez roet nerz d’an ene, ar yehed kollet a vez kavet a-nevez hag an ene saotret gand ar pehed a deu da veza kaer adarre.

Ken braz e vez ar hras a resever a-wechou, ma teu, gand nerz an devosion a ziskenn ennom, n’eo ket hepken on ene, med ivez or horv leun a zempladurez da zantoud eun nerz nevez o tond dezañ.

11.-Eun dra trist ha truezuz eo e vijem klouar ha dianaoudeg e-keñver eun Doue kan mad, e vijem ken lezireg da reseo Or Zalver a zo oll fiziañs, oll mirit ar re a dle beza salvet.

Eñ eo a ra santel ahanom a zaveteio ahanom, Eñ eo frealzidigez ar re a zo oh ober o beaj war an douar-mañ, Eñ eo eürusted ar Zent er Baradoz.

Truezuz eo e ve kalz tud na reont ket muioh a stad euz ar mister-mañ a zilvidigez, a ra levez an Neñv hag a zalh ar bed oll en e zav!

O ! pegen dall eo an dud ! pegen kaled eo o halon, pa ne daolont ket muioh a evez ouz an donezon dispar-mañ pa jomont klouar e-kichenn eur Zakramant o veza m’her havont bemdez war an aoter !

Ma ne vijent roet ar Zakramant meulet ra vezo nemed en eul leh hepken er bed-oll, pegement a vall a zoñj deoh, n’o dije ket an dud da vond di, da gleved lavared an oferenn ?

Bremañ, avad, ez eus kalz beleien hag e kalz lehiou e vez kinniget sakrifis an oferenn evid ma welo muioh an dud madelez ha karantez Doue evito, dre ma’z eo skignet pelloh ar Gomunion dre ar bed.

Bennoz deoh, Jezuz madelezuz, Pastor eternel, a zo plijet ganeoh or maga gand ho korv prisiuz, or hannerza gand ho hwad, ni tud paour hag emzivad ; c’hwi hoh-unan eo ho-peus pedet ahanom da reseo Sakramant an Aoter p’ho-peus lavaret ar homzou-mañ : “Deuit davedon, c’hwi oll a zo poaniet ha sammet, ha me ho tenno a boan“.

KENTEL II

Karantez ha madelez Doue a zo diskouezet d'an den e sakramant an Aoter

1.-AN DISKIBL-Leun a fiziañs en ho madelez hag en ho trugarez vraz, va Doue, e tostaan, me klañv, ouz an Hini am faero : leun a naon hag a zehed e teuan d'ar feunteun a vuhez ; paour-kêz e teuan da Roue an Neñv ; servicher e teuan d'am Mestr ; krouadur e teuan d'am Hrouer ; goloet a vez e teuan d'an Hini am frealzo.

Med penaoz am-eus ar hras-se d'ho kweled o tond davedon ? Piou on-me evid ho tegemered ?

Penaoz e kred eur peher en em ziskouez dirazoh ? Ha penaoz e prizit dond beteg eur peher ?

Anaoud a rit ho servicher ha gouzoud a rit n'ez eus ennañ netra vad da veritoud kement-se.

Anzao a ran eta on dister, anaoud a ran ho madelez, meuli a ran ho trugarez ha mil bennoz a lavaran deoh evid ho karantez dreist muzul.

Evidoh hoh-unan eo e rit kement-se, nann evid va meritou ; evid disklêria gwelloh ho madelez, evid kreski va harantez, ha deski din en izellaad muioh.

Pa blij deoh eta kement-se, p'ho-peus gourhemennet evel-se on laouen o tegemered ar hras a roit din, ha plijet ganeoh ne ve ket va fehedou oh enebi outi.

2.-O Jezuz dous ha madelezuz meurbed, pebez doujañs a zo dleet deoh, pebez anaoudegez vad ! pebez meuleudi a dlefe beza kanet deoh heb ehan evid ar hras da reseo ho korv santel ! rag n'eus den da helloud displega mad talvoudegez ar hras-se.

Med petra a zoñjin o reseo ho korv santel ; o tostaad ouz va Doue ; n'on ket evid hoh enori evel m'eo dleet, ha koulskoude am-eus c'hoant ho reseo gand devosion.

Petra a zoñjin gwelloh ha talvoudusoh eged en em izellaad da vad dirazoh ha meuli ar vadelez dreist-muzul a ziskouezit evidon.

Ho meuli a ran, va Doue, ho meuli a rin da viken.

3.-En em zisprizoud a ran va unan hag en em izellaad a ran dirazoh kement ha ma hellan.

C'hwi eo ar Zantelez dreist pep santelez ha me eo ar falla euz ar beherien ; diskenn a rit beteg ennon ha n'on ket din da zevel va daoulagad war-zu ennoh.

Dond a rit beteg ennon, c'hoant ho-peus beza ganin, va fedi a rit da azeza ouz ho taol !

C'hoant ho-peus rei din bara an Neñv da zebri, bara an Êlez, hag ar bara-ze eo c'hwi hoh-unan, c'hwi ar bara buhezeg a zo diskennet euz an Neñv hag a ro ar vuhez d'ar bed.

4.-Setu-aze eienenn ho karantez ha sked ho trugarez ! pebez bennoz, pebez meuleudi a zo dleet deoh

evid ho madoberou !

O ! pegen mad, pegen talvouduz evidom ho-pije lakeet en ho spered sevel sakramant an Aoter ! Pebez dudi azeza ouz ho taol zantel, p'en em roit hoh-unan da vagadurez !

Pegen kaer hoh oberou, va Doue ! pegen braz ho kalloud ! pegen uhel ho kwirionez !

Eur ger ho-peus lavaret, hag an oll draou a zo bet krouet, hag ar pezh ho-peus gourhemennet eo a zo bet greet.

5.-Eun dra zouezuz eo ha gwir evelato, eun dra a zo dreist spered an den, e vijeh-c'hwi va Doue, gwir Doue ha gwir, oll dindan eun nebeudig bara ha gwin, hag e kendalfeh da jom ganeom, kaer a zo ho reseo hag ho tebri.

C'hwi, Mestr war bep tra, c'hwi n'ho-peus ezomm euz den, ho-peus c'hoanteet dre ho Sakramant beva ganeom, dalhit va halon ha va horv glan evid ma hellin, gand eur goustiañs laouen ha digatar, ho reseo er Zakramant evid va zilvidigez eternel, er Zakramant-se ho-peus savet dreist-oll evid ho kloar hag evid ma talhin soñj ahanoh da viken.

6.-Bezit laouen, va ene, ha trugarekait Doue evid eun donezon ken kaer, a hell degas deoh kemend a frealzidigez en draonienn-mañ a zaelou.

Rag bep tro ma tostait ouz ar mister-mañ ha ma tegemerit korv Jezuz-Krist, bep tro ez oh evel prenet a-nevez gand ho Salver hag e kemerit perz en e oll veritou.

Rag karantez Jezuz-Krist, ne da morse war vihannaad hag eienenn e veritou ne hell ket beza dizehet.

Red eo eta deoh renevezi bep tro ho feiz hag ho karantez pa dostait ouz Sakramant an Aoter ha teuler evez mad ouz mister braz ho silvidigez.

An devez ma lavarit pe ma klevit an oferenn a dle beza evidoh eun devez ken braz, ken nevez, ken mad, evel pa vije deuet en devez-se Jezuz-Krist d'en em ober den e korv ar Werhez Vari, pe c'hoaz evel ma vije bet staget ouz ar Groaz evid silvidigez an dud ha ma vije maro eno e-kreiz ar poaniou krisa.

KENTEL III

Talvouduz eo komunia aliez

1.-AN DISKIBL. Setu-me o tond d'ho kavoud, va Doue, evid tenna va mad euz an donezonou a ginnigit deom, evid kaoud va lod a joa er fest santel ho-peus bet ar vadelez da brepari evid ar paour.

Ennoh ema kemend a hellan, kemend a dlean c'hoantaad. C'hwi eo va zilvidigez, c'hwi ho-peus va frenet, c'hwi eo va fiziañs, va nerz, va enor, va gloar.

Laouenait eta hirio ene ho servicher, rag savet am-eus va ene war-zu ennoh, o va Jezuz !

Me a hoanta ho reseo bremañ gand devosion, gand doujañs, c'hoant am-eus d'ho tegemeret em zi, evid ma hellin evel Zache beza benniget ganeoh ha beza lakeet e reñk bugale Abraham.

Va ene a hoanta reseo ho korv sakr, va halon he-deus mall da veza unanet ganeoh.

2.-En em roit din hag am-eus a-walh.

Hebdoh netra ne hell va frealzi.

Hebdoh ne hellan ket beva, ne hellan ket beva ma ne deuit d'am hichenn.

Red eo din eta mond aliez d'ho kavoud hag ho tegemeret evid kennerza va ene gand aon da zemplaad war an hent dre zienez euz ar boued-se a deu euz an Neñv.

Evel-se, Jezuz leun a vadelez, o prezeg d'ar bobl, hag o para kalz kleñvejou ho-peus lavaret gwechall : “Ne fell ket din o lezel da vond d'ar gêr war yun, gand aon na gouezfent war an hent“.

Grit ‘ta din-me bremañ evel-se, peogwir oh chomet ganeom er Zakramant evid frealzi ho servicherien.

C'hwi eo magadurez an ene, magadurez mad-kenañ, hag an hini en-dezo debret ahanoh, evel m'eo dleet, en-dezo e lod e gloar an Neñv.

Red eo din-me, am-eus kemend a boan, kemend a behedou, a zo ker buan da laoskaad ha da goueza, red eo din pedi aliez, mond aliez da goves, da gomunia evid kennerza, gwalhi, tomma va halon, gand aon na deufen da ziskregi diouz va youlou mad o chom re bell hep tostaad.

3.-An den a zo douget d'an droug abaoe e yaouankiz, ha ma ne vez ket kennerzet gand ar boued a ro Doue dezañ e kouezo buan izelloh-izella.

Ar gomunion zantel a bella an den diouz an droug hag a ra dezañ chom startoh war hent ar mad.

Ma'z on bremañ ken dieguz, ken klouar pa gomunian ha pa lavaran an oferenn, petra a deufen da veza ma ne gemerfen ket ar boued nerzuz kinniget din, ma ne glaskfen ket d'am zikour eun dra ken mad ?

Ha daoust ne hellan ket bemdez beza e stad vad na bepred a-walh evid tostaad ouzoh, evelato e lakin va foan evid gelloud, en deziou d'eread, ho tegemeret ha kaoud va lod euz ar hras kaer a ginnigit deom.

Rag brasa frealzidigez an ene kristen, e-pad m'ema an harlu er horv-mañ kondaonet d'ar maro, eo soñjal aliez en e Zoue ha degemeret gand devosion e vuia-karet.

4.-O burzud a vadelez evidom ! C'hwi va Doue, c'hwi buhez ha krouer an oll speredou, a briz diskenn en eun ene paour-kêz evid terri e naon o tond ennañ evel Doue ha den !

O ! nag eüruz eo ar spered, nag eüruz eo an ene a zo e stad vad d'ho tegemeret, c'hwi e Zoue, ha da veza karget ganeoh a levez.

Na pegen braz eo an Doue a reseo, pegen mad an hini a ziskenn ennañ, pegen kaer eo beva gantañ ; pebez mignon fidel ! pebez pried skeduz hag a reñk uhel ! eur pried a zo da veza karet dreist kemend a heller da gared pe da hoantaad.

O va Jezuz dous ha karantezuz, ra jomo sioul dirazoh an Neñv hag an douar ha kement tra gaer a zo enno, rag digand ho madelez eo deuet dezo kemend o-deus a sked hag a goanteri ha biken ne hellint tostaad ouz ho kloar, rag ho furnez-c'hwi a zo dreist-muzul.

KENTEL IV

E-leiz a hrasou a zo roet d'ar re a ya da gomunia gand devosion

1.-AN DISKIBL-O va Doue, roit ho pennoz evid ma hellin tostaad ouz ho sakramant gand feiz ha karantez.

Tommit va halon gand tan ho karantez ; kousket on, grit din dihuna.

Deuit d'am zavetei, ma hello va ene tañva an douster euz ho madelez a zo kuzet a-bez er Zakramant-mañ evel dour eun eienenn.

Sklêrijennit ivez va daoulagad ma hellint gweled eur mister ken braz, ha kreñvait va feiz ma hellin redi stard anezañ.

Rag, c'hwi ho-peus savet ar Zakramant-se ; an den n'en-dije ket gelllet hen ober ; c'hwi eo ho-peus roet deom eun heveleb donezon, an den n'en-dije ket gelllet soñjal eun dra ken uhel.

N'eus den ebed da helloud kompren dreizañ e-unan ar mister-ze, en tu-all zoken da spered an Êlez.

Petra a hellin-me 'ta, peher paour ma'z on ; me douar ha ludu, petra a hellin-me klask dizolei diwar-benn eur mister ken braz, ken kuzet ?

2.-O va Doue, gand eur galon eün, gand feiz kreñv, evid senti ouzoh, me a dosta gand fiziañs ha gand doujañs, me a gred emaoz aze er Zakramant gwir Zoue ha gwir den.

Ho polontez eo e tegemerin ahanoh evid en em unani ganeoh dre ar garantez.

Pedi a ran eta ho madelez, goulenn a ran grasou braz diganeoh evid ma teuio va halon da deuzi oll en hoh hini gand tan ar garantez, ha ma ne glaskin mui frealzidigez all ebed.

Rag ar Zakramant-mañ, ken braz, ken uhel, a zo silvidigez an ene hag ar horv, pareañs oll gleñvedou an ene ; terri an techou fall ; moug a ra ar gwall youlou ; trehi a ra an tentasionou ha bihannaad a ra o nerz, degas a ra grasou brasoh en ene ; lakaad a ra ar zantelez da greski ar feiz da startaad, ar fiziañs da greñvaad, ar garantez da vervi ha d'en em astenn.

3.-Kals grasou ho-peus skuillet hag a skuillit c'hoaz er Zakramant-mañ war ho pugale a ya d'ho rezeo gand devosion, va Doue, c'hwi nerz va ene, c'hwi an hini a zegas d'am halon pep frealzidigez.

Ya, frealzi a rit ho pugale en o zrubuillou ken stank ; pa vezont fall-galonet, e savont adarre gand ar fiziañs e vezo ho torn astennet war-zu enno ; grasou nevez a roit dezo d'o hennerza ha d'o sklêrijenna, hag evel-se int, enkrezet, klouar a-raog komunia, goude beza resevet ho korv hag ho kwad, a deu da veza tud all, kalz gwelloh.

Evel-se e rit d'ho mignoned, evid ma welint sklêr hag anad pegen dister int dreizo o-unan, ha pegen braz

madou ha grasou a deu dezo diganeoh.

Dreizho o-unan e oant yen, dizehet, hep karantez ; gand ho kras avad, eo birvidig o feiz, leun o halon a nerz, a garantez.

Hag, e gwirionez, piou a hellfe tostaad gand humilte ouz eienenn an douster hep kas gantañ eun tamm douster ?

Piou a hellfe tostaad ouz eun tan braz hep beza tommet e izili dezañ ?

C’hwi a zo eun eienenn atao leun, atao o redeg, c’hwi a zo eun tan atao beo ha ne varv morse.

4.-Rag-se, ma ne hellan ket tenna dour euz a-greiz ar feunteun leun-tenn, ma ne hellan ket eva diouz va zehed, evelato e tostain va genou ouz penn ar han a zegas grasou an Neñv, evid ma hellin da vihanna kaoud eun diveradennig da derri va zehed, ha na vezin ket devet oll gand ar skarnil.

Ha, ma ne vez ket evelato va spered oll en Neñv, na va halon ken tomm hag hini ar Cherubined hag ar Serafined, me a lakaio evelato va foan da veza da Zoue ha da brepari va halon evid ma teuio ennon eun elfennig euz karantez Doue pa rezevin gand humilite ar Zakramant a vuhez.

O va Jezuz madelezuz, Salver santel, dre ho madelez hag ho trugarez, roit din kemend am-eus ezomm, rag c’hwi a zo plijet ganeoh gervel davedoh an dud oll p’ho-peus lavaret : “Deuit davedon, c’hwi oll a zo poaniet ha sammet ha me ho tenno a boan“.

5.-Me a labour beteg ma tiver ar hwezenn diouz va zal, va halon a zo gwasket gand ar hlahar, plega a ran dindan ar beh euz va fehedou, enkrezet on gand an tentasionou, rouestlet ha brevet gand e-leiz a dechou fall, ha n’ez eus den d’am zikour, d’am diboania ha d’am zavetei, n’ez eus nemedoh, va Doue, va Zalver ; etre ho taouarn eh en em daolan gand kemend am-eus, diwallit ahanon, ha va hasit d’ar vuhez eternal.

Va digemerit evid enor ha gloar hoh ano, peogwir ho-peus prepartet ho korv hag ho kwad evid va maga.

O va Doue, va Zalver, grit ma teuin, o reseo aliez ho Sakramant santel, da gaoud muioh a feiz hag a garantez.

KENTEL V

Pegen braz eo Sakramant an Aoter, ha pegen uhel karg ar veleien.

1.-**Jezuz-Krist.** Ha pa vijeh glan evel an Êlez, santel evel sant Yann Vadezour, ne vijeh ket din evelato da reseo ar Zakramant-mañ na da douch outañ gand ho taouarn.

Rag n'eo ket abalamour d'e veritou eo e hell eun den konsakri korv e Zalver, touch outañ hag en em vaga euz bara an Êlez.

Pebez mister braz ! Pegen uhel eo stad ar veleien a zo roet dezo eur galloud n'o-deus ket an Êlez !

N'ez eus nemed ar veleien resevet ganto hervez al lidou santel sakramant an Iliz hag o-dije ar galloud da lavared an oferenn ha da gonzakri korv ar Zalver.

Ar beleg a zo, e gwirionez, ministr Doue, lavared a ra komzou Doue hervez m'eo bet gourhemennet dezañ gand e Zalver pa zavas Sakramant an Aoter.

Doue eo ar brasa oberour er Zakramant-mañ, beza n'her gweler ket, rag pep tra a zent ouz bolontez Doue, pep tra en em gav hervez e hourhemenn.

2.-Bez' e tleit eta, er Zakramant dispar-mañ, kaoud muioh a feiz e komzou Doue oll-halloudeg eged en ho skiantchou, en ho taoulagad hoh-unan.

Gand doujañs ha gand respet e tleit tostaad ouz ar Zakramant-mañ.

Evesait eta ha gwelit pebez karg a zo bet roet deoh gand an Aotrou 'n Eskob pa zavas e zaouarn a-zioh ho penn.

Setu-c'hwi greet beleg, galvet da gonsakri korv ar Zalver ; lakit evez bremañ ha lavarit an oferenn gand feiz ha karantez en amzer m'eo red ha bezit direbech.

N'ho-peus ket skañvet ho preh, med liammet oh startoh eged a-raog, hag ho puhez a dle beza santelloh.

3.-Ar beleg, gwisket gantañ an dillad oferenna, a zalh plas Jezuz-Krist, karget eo da bedi Doue gand nerz hag humilite evitañ hag evid ar bobl a-bez.

War e beultrin e toug ar groaz evid ma evesaio ouz poaniou Jezuz-Krist ha m'en-dezo nerz da vond kaloneg d'e heul.

War e gein e toug ar groaz evid ma tesko gouzañv gand pasianted evid Doue an oll boaniou a deuo dezañ a-berz an dud all.

War e beultrin e toug ar groaz evid leñva war e behedou e-unan ; war e gein evid leñva war behedou ar re-all, evid ma ouezo eo lakeet etre Doue hag ar peher ha ne dle ket ehana da bedi ha da oferenna beteg m'en-dezo lakeet da ziskenn war an douar grasou ha bennoz an Aotrou Doue.

Ar beleg oh oferenna a zegas enor da Zoue, joa d'an Êlez, skoazell d'an Iliz, sikour d'ar re veo, peoh d'ar re varo, hag e-unan e-neus e lod euz oll grasou Doue.

KENTEL VI

Ar hristen a houlen penaoz ober a-raog kommunia

1.-AN DISKIBL -O va Doue, pa zoñjan pegen braz oh ha pegen nebeud a dra on, e krog ar spont ennon hag ez on goloet a vez.

Ma ne dostaan ket ouzoh, e tehan diouz ar vuhez, ha ma tostaan e stad fall, ho kounnar a gouezo warnon.

Petra a rin, o va Doue, c'hwi va skoazell, va sklêrijenn em ezommou ?

2.-Deskit din an hent eün, lavarit din petra a zo mad evid ober en em brepari da gomunia.

Rag talvouduz eo gouzoud penaoz ober evid lakaad va halon e stad d'ho reseo gand feiz ha doujañs, gand frouez ivez, penaoz ober evid lavared an oferenn zantel.

KENTEL VII

Red eo egzamina ar goustiañs hag ober ar zoñj da vond war wellaad.

1.-**Jezuz-Krist.** A-raog pep tra eo red kaoud eur galon izel, eun doujañs vraz, eur feiz kreñv, eur c'hoant santel da enori Doue evid lavared an oferenn, touch ouz sakramant an Aoter pe hen rezeo.

Klaskit mad en ho koustiañs ha gwella ma hellot gwalhit, nêtaït anezi oh ober a-greiz kalon eun akt a gontrision pe o koves gand humilite, evid na jomo netra da grignad deoh ho koustiañs na da vired ouzoh da vond heb aon d'an daol zantel.

Ra vezo en ho kalon keuz d'ho pehedou oll, ha gouelit, huanalit war ar re a rit bemedez ; mar ho-peus amzer, anzavit ouz Doue, e goueled ho kalon, an oll enkreziou a deu da heul ho youlou fall.

2.-Huanadit ha gouelit o veza ma'z oh c'hoaz eun den douget d'ar hig ha d'ar bed, ken stag ouz ar gwall-youlou, ken dalhet gand an techou fall ; ken lezireg da veilla war ho skiantchou, da gas euz ho spered ar zoñjou goulo.

Ken troet ouz an traou a ziavêz, ken dievez ouz an traou a ziabarz.

Ken buan da hoarzin ha da hoari, ken lugud da gaoud keuz ha da leñva ; ken troet da glask êz ha plijadur ar horv, ken dieguz d'en em rei d'ar binijenn ha d'ar bedenn. ken c'hoanteg da gleved traou nevez, da weled traou brao, ken digalon da gregi en traou buan ha dister, ken c'hoanteg da zastum madou braz, ken dieguz o rei, ken stag ouz ho traou ; ken dievez en ho komzou ma ne ouzoh ket tevel : ken direiz en ho puhez, ken diroll en hoh oberou ; ken troet war an debri, ken bouzar ouz mouez Doue ; ken mad da glask diskuiza, ken lezireg da labourad ; ken dihun evid kleved keleier, ken buan da gousked pa vez da bedi en Iliz ; ken boazet da gaoud mall o wele d'echui ar pedennou, ken dievez e-pad ar pedennou, e-pad an ofis santel, ken klouar o lavared an oferenn, ken seh o komunia, ken mad da lezel ho spered da redeg, ken fall da zerri dor ho kalon ouz an traou a ziavêz, ken buan da vond e kounnar ha da ober poan d'ar re all ; ken douget da varn ho nesa, ken kriz d'hen tamall ; ken laouen pa'z a mad ganeoh an traou, ken dinerzet pa'z eont fall ; ken boazet da hoantaad traou mad, ken lezireg da gas anezo da benn.

3.-Goude beza anzavet ar mankou-ze ha re all gand kalz glahar ha displijadur o soñjal en ho sempladurez, goude beza bet keuz dezo, lavarit stard e c'hoantait cheñch buhez ha mond war wellaad.

Da houde, a-greiz kalon hag a volonteze vad, en em ginnigit din-me evid enori va Ano, war aoter ho kalon, evel eun osti da jom atao dirazon ; kinnigit din ho korv hag hoh ene, evid ma hellot evel-se kaoud ar hras da lavared an oferenn ha da reseo gand frouez sakramant va horv.

4.-N'ez eus netra gwelloc'h da ginnigit da Zoue, netra talvoudusoh evid lamed ar pehedou eged en em rei

oll da Zoue gand korv Jezuz-Krist en oferenn hag er gomunion.

Ma ra an den ar pezh a zo en e halloud, m'en-deus gwir glahar d'e behedou, bep tro ma teuio d'an haoud evid kaoud pardon ha sikour : “Me hen tou (eme an Aotrou), me ne glaskan ket maro ar peher, ne glaskan nemed eun dra ; ma tistroio ouzin ha ma vevo ; n'am-bezo mui soñj euz e behedou, pardonet int oll dezañ “.

KENTEL VIII

Jezuz-Krist a zo en em ginniget war ar groaz ; ni a dle ivez en em ginnig dezañ

1.-**Jezuz-Krist.** Me a zo en em ginniget war ar Groaz, astennet va daouarn ha noaz va horv, me am-eus en em ginniget a-greiz kalon d'am Zad evid da behedou, hep derhel netra ganin ha na ve ket bet kinniget e sakrifis da justiz Doue, evel-se e tleit ivez en em ginnig din, a galon vad, bemdez en oferenn evel eun hosti pur ha santel, gand hoh oll nerz hag hoh oll karantez, gwella ma hellot.

Petra a houlenan diganeoh nemed poania d'en em rei oll din ?

Kemend a roit din heb en em rei hoh-unan ne dalv netra evidon ; n'eo ket ar pezh a roit, med c'hwi eo a glaskan.

2.-Ne dalvezfe netra deoh kaoud an oll draou hebdon-me ; evel-se ivez kemend am-bezo diganeoh ne blijo ket din ma n'en em roit hoh-unan.

En em ginniget din-me, en em roit oll da Zoue, hag e vezo kavet mad ar pezh a roit.

Me am-eus en em ginniget oll d'am Zad evidoh, roet am-eus va horv ha va gwad oll evid ho maga evid beza oll deoh, evid ma chomfeh atao ganin.

Ma talhit da ober ho penn hoh-unan, ma n'en em lakit ket a galon vad da ober va bolontez-me, n'en em ginniget ket oll din, ha ne vezo ket unvaniez striz etrezom.

Rag-se 'ta, a-raog hoh oll oberou e tleit en em lakaad a galon vad etre daouarn Doue, ma fell deoh beza libr ha kaoud va grasou.

Ma'z eus ken nebeud a dud o kaoud digand Doue sklêrijenn ha liberte, eo abalamour ne ouzont ket en em zilezel a-grenn o-unan.

Va homzou a jomo gwir da viken : “An hini ne fell ket beza va diskibl”.

C'hwi eta, ma c'hoantait beza va diskibl, en em ginniget din gand kement tra a garit.

KENTEL IX

En em ginnig a dleom da Zoue gand kemend on-eus da bedi evid an oll.

1.-AN DISKIBL.-Va Doue, deoh eo lement tra zo en neñv ha war an douar.

Me a fell din en em ginnig deoh a galon vad ha beza deoh da viken.

Va Doue, hep troidellad, me en em ginnig deoh hizio evid beza ho servicher da viken, evid senti ouzoh, evid poania heb ehan da hounid gloar d'hoh ano.

Degemerit ahanon gand ar zakrifis santel-mañ euz ho korv a ginnigan deoh hizio dirag an Êlez a zo amañ hep ma vijent gwelet, evid ma vezo eur zakrifis a zilvidigez evidon hag evid ho pobl a-bez.

2.-Aotrou, me a ginnig deoh ivez an oll behedou ha mankou am-eus greet dirazoh ha dirag hoh Êlez santel, azaleg an devez kenta m'am-eus gelllet pehi beteg an devez hizio ; o hinnig a ran deoh war aoter ho trugarez, evid ma vezint devet ha distrujet oll gand tan ho karantez, evid ma lamot an oll verkou euz va fehedou, ma reot glan kaer va houstiañs, ha ma root din adarre ho kras am-boa kollet dre ar pehed ; pardonit din va oll fehejou, ho-pezit truez ouzin ha degemerit ahanon en eur rei din eur pok a beoh.

3.-Petra a hellan-me ober evid va fehedou nemed o hoves gand humilite ha leñva warno, hag ho pedi heb ehan da gaoud truez ouzin.

Selaout ahanon, me ho ped, va Doue, peogwir emeon dirazoh.

Keuz braz am-eus d'am fehedou, ne fell din koueza mui enno, leñva a ran ha leñva a rin warno keit ha ma vevin, prest on da ober pinienn ha da baea evito hervez va galloud.

Pardonit din, va Doue, pardonit din va fehedou ; abalamour d'hoh Ano santel saveteit va ene ho-peus prenet gand ho kwad priziuz.

Me en em daol etre ho tivreh karantezuz, me en em laka etre ho taouarn.

Grit ganin hervez ho madelez, ha nann diouz va fallagriez ha va fehedou.

4.-Kinnig a ran deoh ivez kemend a zo ennon a vad, daoust pegen bihan ha pegen dister eo ; gwellait ha santelait ar pez am-eus ; ra blijo deoh, ra vezo kavet kaer a-walh gand ho taoulagad, va lakit da vond war wellaad ha grit m'en em gavin en eürusted eternal, petra bennag n'on nemed eur paour-kêz den, lezireg, didalvez.

5.-Kinnig a ran ivez deoh oll mennoziou an dud devod, ezommou va herent, va mignoned, va breudeur, va hoarezed, hag ezommou kement hini a garan, ezommou ar re o-deus greet vad din pe d'ar re all abalamour deoh, ar re o-deus lavaret din pedi ha kinnig an oferenn evito hag evid o zud, pe i zo beo, pe i zo maro ; evid m'o-dezo oll sikour ho kras, ho frealzidigez, ma vezint diwallet diouz an dañjeriou, tennet a

greiz o foaniou, ha ma hellint, divennet diouz pep droug, kana gand levez o anaoudegez vad evidoh.

6.-Kinnig a ran ivez deoh ar pedennou hag an ostiou a beoh evid ar re dreist-oll o-deus greet eun droug bennag din, glaharet ahanon, lavaret traou din, pe o-deus noazet din, greet gaou ouzin en eur hiz bennag ; evid ivez kement hini am-eus glaharet, enkrezet, poaniet, douget d'an droug dre va homzou, va oberou, o houzoud¹ hag hep gouzoud, evid m'on-dezo oll diganeoh ar pardon euz ar pehedou ha mankou greet an eil d'egile.

Ho-pezit truez, ho-pezit truez, va Doue, ouz ar re a houlenn trugarez diganeoh ; roit ho kras dezo, ezomm o-deus ; grit ma vevim en heveleb doarema vezim din da gaoud ho krasou ha d'en em gavoud er vuhez eternal.

Evel-se bezet greet.

¹ O houzoud : fazi bet greet abaoe pell 'zo.

KENTEL X

Arabad eo dilezel ar gomunion evid an disterra tra

1.-**Jezuz-Krist.** Red eo dond aliez da feunteun grasou ha trugarez Doue, da feunteun ar vadelez hag ar burete, evid gelloud para euz ho youlou ha techou fall, ha dond da veza kreñvoh ha muioh war evez a-eneb an tentasionou hag ardou an droug-spered.

An enebour, o veza ma anavez an nerz hag ar galloud a gaver er gomunion zantel, a glask e peb giz hag e peb amzer distrei ha pellaad an dud fidel ha devod.

2.-Hiniennou, pa vezont oh en em brepari da gomunia, a vez ar gwasas tentet gand Satan.

An droug-spered (evel m'eo skrivet e levr Job) a deu e-touez bugale Doue da glask, gand e fallagriez anavezet, dalla o spered, lakaad anezo da gaoud aon, da veza ankeniet, evid m'o-dezo evel-se nebeutoh a garantez ; klask a ra diskar o feiz hag ober dezo dilezel ar gomunion pe da vihanna beza klouar o komunia.

N'eus ket da ober van euz e droidellerez hag e ardou, n'eus forz pegen hudur, pegen louz e vije ar soñjou a zegas d'ho spered, med stlapit an traou-ze ouz e benn dezañ.

Red eo deoh disprizoud an droug-spered, ober goap anezañ ha na dit ket da zilezel ar gomunion evid beza heskinet ha tentet gantañ.

3.-Aliez ivez e vez aon o tostaad abalamour ne gaver ket e vije karantez a-walh er galon, pe abalamour ma vezer diêz diwar-benn mond da goves.

Grit hervez ali an dud fur ha desket ha lezit a-gostez an enkreiz hag ar skrupul, rag mired a reont ouz gras Doue da zond, ha laza a reont ar wir devosion.

Evid eun tammig enkreiz pe boan-spered na zilezit ket ar gomunion zantel, med it kentoh da goves ha pardonit a galon vad d'ar re all o mankou en ho keñver.

M'ho-peus hoh-unan ofañset unan bennag, goulennit pardon gand humilite ha Doue ho pardono gand joa.

4.-Petra a dalv chom pell hep kovez ha komunia ?

Gwalhit hoh ene ar henta ar gwella, taolit buan ar poezon diouzoh, it buan da gemered al louzou hag eh en em gavot gwelloh eged o tale pell.

M'ho-peus hirio eun digarez bennag da jom hep komunia, warhoaz marteze ho-pezo eun digarez brasoh, hag e hellfeh evel-se chom pell hep komunia ha dond da veza bemdez e falloh stad.

Kenta ma hellot en em zizammit euz an enkreiz a zo o poueza warnoh hag o lamed diganeoh ho nerz, rag ne dalv netra chom pell da gaoud anken, da veva e-kreiz an enkreiz, ha da dehed diouz an daol zantel war

zigarez ma teu bemdez eun dra bennag da vired ouzoh tostaad ; noazuz braz eo dale pell hep komunia, rag an ene a deu da goll e nerz ha da veza klouar.

Siwaz ! kavet e vez tud klouar ha digalon o-deus plijadur pa vez eun digarez bennag da jom heb mond da goves hag a hoanta ivez gedal a-raog komunia, gand aon da veza dalhet da veilla muioh war o-doare da veva.

5.-A ! pegen dister eo karantez, pegen dinerz devosion ar re a zilez ken êz ar gomunion !

Pegen eüruz, pegen mignon da Zoue eo an hini a vev en heveleb doare hag a zalh e goustiañs ken diskablez ma'z eo e stad vad da gomunia bemdez ha ma karfe hen ober ma vije lezet ha ma ne vije ket sellet re outañ.

An hini a jom hep komunia a-wechou dre humilite pe evid eun abeg mad bennag a zo da veza meulet evid an doujañs e-neus e-keñver ar Zakramant.

An hini, avad, a bella dre ziegi, a dle dihuna, ober ar pezh a hell, ha Doue a deuo d'e zikour, o veza m'endezo diskouezet bolontez vad.

6.-An hini e-neus abeg mad da vired outañ da gomunia, a zalho bolontez ha c'hoant santel da reseo e Zoue, hag evel-se n'ez aio ket frouez ar Zakramant e-biou dezañ.

Rag pep den devod a hell hag en noz hag en deiz komunia a spered ha tostaad evel-se ouz Jezuz heb ma vije netra da vired outañ. Evelato deveziou hag amzeriou a zo ma rank digemeret korv e Zalver gand doujañs ha karantez er Zakramant, ha klask meuleudi hag enor Doue kentoh eged e frealzidigez e-unan.

Komunia a rit a spered ha maget oh gand magadurez an Neñv bep tro ma soñjot gand devosion e misteriou an Inkarnasion hag ar Redampson, ha ma vez ho kalon tomm gand ar garantez evid Doue.

7.-An hini n'en em brepar nemed pa vez eur gouel bennag o tond pe evid ober evel ar re all, hennez a vezo aliez preparet fall.

Eüruz an hini en em ginnig da Zoue e sakrifis bep tro ma vez o lavaret an oferenn pe o komunia.

Na vezit ket re hir na re zifre gand an oferenn, grit evel ar veleien a zo en-dro deoh.

Ne dleit ket ober poan d'ar re all nag inoui anezo, med heuillit ar hiz a zo bet savet gand ar re goz, ha klaskit ober vad d'ar re all kentoh eged senti ouz ho tevosion hag ho karantez.

KENTEL XI

Ar gomunion hag ar skritur Sakr a zo daou dra red kenañ d'an ene fidel.

1.-AN DISKIBL. O Jezuz dous meurbed, pegen mad eo evid an ene devod azeza ganeoh ouz ho taol zantel ; rag ne roit dezañ netra all nemed ho korv hoh-unan, c'hwi e vuia-karet, c'hwi a zo dreist kemend a hellfe c'hoantaad.

Pegen mad e kavjen skuilla dirazoh daelou a garantez, hag evel Mari Madalen gwalhi ho treid gand an dour o tond euz va daoulagad.

Med e peleh ema an devosion-ze ? E peleh kavoud daelou puill ha santel ?

Ya, dirazoh ha dirag an êlez santel va halon a dlefe beza tomm bero ha gouela gand al levenez.

Ganin emaoñ er Zakramant petra bennag oh kuzet dindan spesou ar bara hag ar gwin.

2.-Ma en em ziskouezfeh din gand ar sklêrijenn hag ar sked e-neus Doue, va daoulagad ne hellfent ket selled ouzoh ; ar bed oll ne hellfe ket herzel ouz ho kloar hag ho majeste.

Gand truez ouz va zempladurez eo eh en em guzit er Zakramant.

Ya, ganin ema e gwirionez hag adori a ran an Hini a zo adoret gand an Êlez en Neñv.

N'her gwelan c'hoaz nemed gand daoulagad ar feiz, an Êlez a wel anezañ evel ema en e hloar.

A-walh eo din sklêrijenn ar feiz ; er sklêrijenn-ze e tlean bale beteg an deiz ma houlaouo ar sklêrijenn eternal ha ma vezo skubet an deñvalijenn hag ar skeud.

Pa vezin er stad parfed-se, n'am-bezo mui ezomm euz ar Zakramantchou, rag an dud eüruz e gloar an Neñv n'o-deus ket ezomm da veza sikouret gand ar Zakramantchou ; en dudi emaint hep paouez dirag Doue, gweled a reont gloar Doue dirazo, hag o neui e-kreiz sklêrijenn Doue, e tañveont madelez ar Verb en em hreet den, evel m'edo da gomañs hag evel ma vezo da viken.

3.-Pa zoñjan en traou burzuduz-se, e kavan pounner pep frealzidigez, zoken ar frealzidigez a deu d'am spered, rag keit ha ma ne welan ket Doue dizolo en e hloar, n'eo netra evidon kemend a welan hag a glevan er bed-mañ.

C'hwi a zo test va Doue ; netra, netra krouet ne hell va frealzi, rei din ar peoh nemedoh-c'hwi, va Doue, c'hwi am-eus c'hoant da weled e-pad an eternite.

Med kement-se ne hell ket beza e-pad ma vezin er vuhez-mañ, kondaonet d'ar maro ; red eo din eta kemered pasianted ha lakaad va oll hoantegeziou da bleaga dindan ho polontez.

Rag ho sent, o va Doue, a zo bremañ ganeoh e levenez ar Baradoz, a hede gand feiz ha pasianted e-pad o buhez beza degemeret en ho kloar.

Me a gred ar pezh o-deus kredet, me a zo o hedal ar pezh a hedent, el leh int en em gavet, me am-eus fiziañs d'en em gavoud ivez gand sikour ho kras.

Me a valeo, da hedal e sklêrijenn ar feiz, kennerzet gand sikouriou ar Zent.

Al levriou santel am-bezo d'am frealzi ha da zeski din beva, ha dreist-oll ho korv santel evid va hennerza ha va divenn.

4.-Rag daou dra a zo red-kenañ din war an douar, hag hepto ne hellfen ket dougen ar vuhez paour-mañ.

Dalhet e prizon ar horv, hen anzañ a rankan, am-eus ezomm euz daou dra : boued ha sklêrijenn.

Roet ho-peus eta din, den simpl ma'z on, ho korv santel evid maga va horv ha va ene, hag ho komzou santel ho-peus lakeet evid sklêrijenna va hent.

Anez an daou dra-ze ne hellan ket beva a-zoare.

Komzou Doue a zo sklêrijenn va ene, hag ho Sakramant a zo evidon ar bara a vuhez.

Ar Skritur Sakr ha sakramant an Aoter a zo evel diou daol savet e-kreiz an Iliz santel.

War unan ema ar bara santel, da lavared eo korv prisiuz Jezuz-Krist.

War unan all ema al Lezenn zantel, enni kelennadurez Doue, a zesk deom ar feiz wirion hag a gas ahanom war-eün beteg al lehiou santella, e-kreiz an Templ, el leh ema gloar Doue o para.

5.-Bennoz deoh Jezuz, sklêrijenn eternel, da veza savet taol ho Lezenn zantel ha da veza lakeet ho Profeted, hoh Ebestel ha doktored all da zervicha ahanom.

Bennoz deoh, krouer ha Salver an dud, ho-peus, evid diskouez ho karantez d'ar bed oll, preparat deom eur fest braz a zo roet ennañ da zebri n'eo ket an Oan a Bask, med ho korv hag ho kwad santel evid karga a levenez an oll dud fidel hag o mezvi e kalur ar zilvidigez ; er fest-se ema oll dudi ar Baradoz, hag an Êlez a zo azezet ouz ar memez taol ganeom hag o-deus c'hoaz muioh a joa eged n'on-eus.

6.-O ! pegen braz, pegen kaer eo karg ar veleien a zo roet dezo ar galloud da gonsakri gand ar geriou santel korv an Doue a vajeste, d'e venniga gand o muzellou, d'hen derhel etre o daouarn, d'hen dougen d'o genou ha d'hen rei d'ar re all.

O !, pegen nêt e tle beza daouarn, genou ar beleg, pegen santel e tle beza e gorv, pegen glan e galon, peogwir e reseo ken aliez an Hini a zo eienenn ar zantelez.

7.-Euz genou ar beleg ne dle dond nemed komzou santel, deread, talvouduz, peogwir e reseo ken aliez Sakramant Jezuz-Krist.

E zaoulagad a vez ken aliez o para war korv Jezuz-Krist, a dle beza eün ha santel.

E zaouarn a dle beza glan ha troet war-zu an Neñv, peogwir int boaz da zougen Krouer an Neñv hag an douar. Evid ar veleien dreist-oll eo skrivet ar homzou-mañ euz al lezenn : “Bezit santel, abalamour on santel, me ho Toue“.

8.-Ra vezim sikouret gand ho kras, o Doue oll-halloudeg, evid ma hellim, ni on-eus ar garg a velegiaj, ho

servicha evel m'eo dleet, gand devosion, santelez, gand eur goustiañs kaer.

Ha ma ne hellom ket beza ken santel ha ma vije dleet, roit deom da vihanna ar hras da leñva, evel m'eo red, war ar pehedou on-eus greet, ma hellim, gand humilite ha bolontez vad, ho servicha gwelloh en amzer da zond.

KENTEL XII

Red eo en em brepari mad evid komunia.

1.-**Jezuz-Krist**-Me eo an Hini a gar ar burete hag a ro pep santelez.

Me a glask eur galon hlan, enni e karan chom.

Preparit din eur zal vraz ha kaer, hag e rin ar Pask en ho ti gand va deskibien.

Ma fell deoh e teufen davedoh hag e chomfen ganeoh, taolit pell diouzoh ar goell koz ha nêtaït ho kalon.

Kasit pell karantez ar bed ha trouz ar pehedou.

Chomit evel al labous a welit e-unan war an doenn ha soñjit en ho pehedou gand eun ene glaharet.

Pa vez karantez evid eun den, e vez preparet dezañ ar gwella hag ar haerra plas, rag evel-se eo e tiskouezer dezañ ar garantez.

2.-Klevit mad evelato ; ne hellit ket en em brepari dreizoh hoh-unan, ha goude ma kemerfeh eur bloaz penn-da-benn hep soñjal e netra all ebed. Gand sikour va madelez ha va grasou hepken e hellit tostaad ouz va zaol zantel ; heñvel oh ouz ar paour a zo pedet gand eun den pinvidig da azeza ouz e daol ha ne hell diskouez e anaoudegez vad nemed oh en em lakaad izel hag o lavared : “Mil bennoz Doue deoh“.

Grit ar pezh a zo en ho kalloud ha lakit hoh oll aket, na deuit ket da gomunia evid ober ar hiz, pe o veza ma rankit dond, med degemerit gand doujañs, resped ha karantez, korv ho Toue karantezuz, e-neus ar vadelez da zond beteg ennoh.

Me eo am-eus ho kalvet, me eo am-eus roet urz da zond, me a roio deoh kemend ho-peus ezomm, deuit ha degemerit ahanon.

3.-Pa roan gras an devosion, trugarekait ho Toue, nann abalamour m’ho-peus meritet ar hras-se, med abalamour m’am-eus bet truez ouzoh.

Ma n’ho-peus ket ar hras-se, ma’z eo dizaour ho kalon, leñvit ha skoit war an nor heb ehana, beteg ma veritoh reseo eur vruzunenn pe eur veradenn euz va grasou.

C’hwi eo ho-peus ezomm ahanon, ha n’eo ket me am-eus ezomm ahanoh.

N’eo ket c’hwi a deu d’am zantellaad, me eo an den d’ho lakaad da veza santelloh ha gwelloh.

C’hwi a deue ivez evid beza santelleet hag en em unani ganin, evid reseo grasou nevez ha kemered nerz da vond atao war wellaad.

Na rit ket fae war ar hras-se, preparit atao ho kalon gand ar brasa aket evid degemeret ho muia-karet.

4.-Ouspenn en em brepari mad da gomunia gand devosion, e tleit c’hoaz goude komunia, teurel evez evid en em zerhel e karantez Doue.

Kemend ezomm 'zo da veilla ha d'en em brepari a-raog.

Rag oh en em zerhel mad e karantez Doue goude ar gomuion, eh en em lakeer e stad da hounid diwezatoh grasou brasoh.

N'ez eus netra ober deoh pellaad diouz ar gomunion evel mond dioustu goude komunia da glask plijadur e traou an douar.

Dalhit war ho teod, chomit en eul leh distro gand ho Toue.

Rag ennoh ema an Hini ne hell ket ar bed oll lamed diganeoh.

Din-me eo e tleit en em rei oll ; n'eo ket ennoh hoh-unan, med ennon-me eo e tleit beva heb enkreuz.

KENTEL XIII

A-greiz kalon e tle ar hristen mad goulenñ beza unanet gand Jezuz-Krist er Zakramant.

1.-AN DISKIBL. Piou, o va Doue ! a roio din ar hras d'ho kaoud hoh-unan, evid ma hellin digeri deoh va halon a-bez ha tañva ho madelez evel ma c'hoantaan, evid ma ne vezin disprizet gand den, na troet ouz hini euz an traou krouet, med evid ma komzoh ouzin, c'hwi hepken, ha me ouzoh, evel ma komz eur mignon d'e vignon, evel ma'h azez eur mignon ouz taol e vignon.

Setu petra a houlenñ, petra a hoantaan, beza oll unanet ganeoh ha distag diouz pep tra krouet, ha dond dre ar gomunion zantel hag an oferenn lavaret aliez, da zeski kared muioh madou an Neñv, madou an eternite.

O va mestr, va Doue, peur e vezin unanet mad ganeoh, beuzet ennoh, hep soñjal mui tamm ennon ?

Grit ma vezot ennon ha me ennoh, ha ma chomim en doare-ze unanet da viken.

2.-E gwirionez c'hwi eo va muia-karet, dibabet etre mil, ennoh e-neus va ene greet e zoñj da jom a-hed e vuhez.

C'hwi eo ar Roue a beoh, ennoh e kaver ar peoh gwirion, an diskuiz, pell diouzoh n'ez eus nemed poan, anken, dienez vraz.

E gwirionez c'hwi eo an Doue kuzet, ne garit ket an dud difeiz, med gand an dud a galon izel hag eün hopeus plijadur o komz.

Pegen braz ho madelez, va Doue ! evid diskouez pegement e karit ho pugale e plij ganeoh o maga gand ar bara burzuduz a ziskenn euz an Neñv !

Nann, e gwirionez, n'ez eus pobl ebed, pegen braz bennag e ve, he-dije doueou da zond d'he haoud evel ma teuit, c'hwi va Doue, da gaoud hoh oll vugale, hag evid o frealzi bemdez ha sevel o halon war-zu an Neñv eh en em roit dezo hoh-unan da zebri hag e chomit ganto.

3.-E peleh ema ar bobl par d'ar bobl kristen ? E peleh, a-zindan bolz an Neñvou, ez eus eun dra krouet ken karet gand Doue hag an ene devod a deu ennañ Jezuz d'e vaga gand e gorv gloriuz ?

O ! gras dispar, madelez souezuz, karantez dreist-muzul skuillet war an den hepken !

Petra a hellin paea da Zoue evid ar hras-se, evid kemend a garantez ? Ne hellfen ober netra gwelloc'h eged rei va halon oll hag en em unani stard gand Doue.

Neuze e trido va halon em hreiz, pa vezo unanet mad va ene gand Doue.

Neuze va Doue a lavaro din : “Ma fell deoh beza ganin, me a fell din beza ganeoh“.

Ha me a lavaro dezañ : “Plijet ganeoh, o va Doue, chom ganin, rag me a fell din a-greiz kalon chom

ganeoh“.

N'am-eus ken c'hoant nemed wa vezo va halon unanet ganeoh.

KENTEL XIV

Pegen birvidig eo c'hoant an eneoù santel da reseo korv Jezuz-Krist.

1.-AN DISKIBL. Pegen braz, va Doue, eo ho madelez e-keñver ar re o-deus doujañs evidoh !

Pa zoñjan gand pebez devosion ha pebez karantez e tosta lod euz ho servicherien ouz ar sakramant, neuze e teu mez din hag am-eus c'hoant kuzad, o weled pegen klouar, pegen yen e vezan o tostaad ouz ho taol, pegen seh, pegen digar e chom va halon ; o weled ne verv ket ar garantez ennon dirazoh, va Doue ; o weled n'on ket douget hag evel dibradet beteg ennoh gand ar garantez evel m'eo bet kemend a dud devod. Ar re-ze ne hellent ket mired da leñva gand ar joa o-doa da reseo o Doue hag ar garantez a lakee o halon da vervi ; o spered hag o horv a-bez a oa troet ouzoh, a halve ahanoh, C'hwi, eienenn an dour a vuhez ; ne hellent na terri, na bihannaad o naon nemed o tegemeret ho korv gand joa, gand mall.

2.-Pegen birvidig e oa o feiz ! kement-se a ziskouez a-walh emaoñ e sakramant an Aoter.

Ar re-ze a anavez mad o Doue o ranna ar bara gantañ, peogwir eo ken entanet o halon pa ouzont ema Jezuz oh ober hent ganto.

Me a vez aliez pell diouz eun heveleb devosion, diouz eur feiz ken beo, eur garantez ken birvidig !

Ho-pezit truez ouzin, Jezuz dous ha mad !

Grit d'ho servicher paour, eur wechig bennag, santoud eun elfenn euz tan ho karantez er gomunion, evid ma vezo kennerzet va feiz, ma kresko va fiziañs en ho madelez, ha ma na deuo morse va harantez da zemplad, goude beza bet entanet ; goude beza tañvaet ar man euz an Neñv.

3.-Gallouduz a-walh eo ho trugarez da rei din ar hras a houlenan ha da lakaad, pa blijjo ganeoh, tan ho karantez em halon.

Beza n'am-eus ket ar youl virvidig o-doa ho servicherien devod, evelato gand ho kras e klaskan dond da veza heñvel outo ; goulenn a ran diganeoh beza lakeet e-touez an dud-se a gare kemend ahanoh, beza en o hichenn er Baradoz.

KENTEL XV

Evid kaoud karantez virvidig e-keñver Jezuz-Krist eo red kaoud humilite ha lakaad ar volontez da bleaga da Zoue

1.-**Jezuz-Krist.** Red eo deoh poania da gaoud gras an devosion, ha goulenn hep skuiza, ha goulenn gand fiziañs, ha degemered gand anaoudegez vad, ha derhel gand humilite, beza aketuz d'e lakaad da dalvezoud, ha lezel Doue da verka e-unan an amzer hag an doare ma teuio d'ho kweled.

Red eo deoh dresit-oll en em izellaad pa welit ar garantez o vihannaad pe o vervel en ho kalon, med na dit ket da fallgaloni na d'en em lezel re d'an dristidigez.

Doue a zo aliez en eun taol ar pezh e-neus nahet e-pad hir amzer.

A-wechou e ro da fin ar bedenn ar pezh en-doa daleet da rei er penn kenta.

2.-Ma vije roet gras Doue d'an den kerkent ha ma vez goulennet, an den, dinerz evel ma'z eo, ne hellfe ket he dougen mad.

Abalamour da-ze eo red gedal an devosion gand fiziañs, humilite ha pasianted.

Nebeud a dra a-wechou a zo a-walh evid mired ouz ar hras ha kuzad anezi med n'eo ket nebeud a dra, eun dra vraz eo ar pezh a vir ouz eur vad ken talvouduz.

Pe vraz pe zister eo an dra-ze, m'hen kasit pell diouzoh, ma vezit treh dezañ, ho-pezo ar pezh a houlennit.

3.-Kerkent ha m'ho-pezo en em roet da Zoue a-greiz kalon, hep klask an dra-mañ pe an dra-hont hervez ho c'hoant, pa viot en em lakeet oll etre daouarn Doue, neuze e viot a-unan gantañ, ar peoh a deuio en ho kalon, rag ober bolontez Doue a blijio deoh muioc'h eged netra all ebed.

An hini eta, gand eur galon eün a zavo e zoñj war-zu Doue, hag en em zistago diouz pep karantez ha pep kasoni direiz evid an traou krouet, hennez a verito reseo ar hras ha donezon an devosion.

Doue a skuill e vennoz er halonou a zo goullonderet evid hen reseo.

Seul-vui e tilez an den traou dister an douar, seul-vui e varv dezañ e-unan, seul-vui ivez e teuy buan ar hras, seul-vui e teu fonnuz ha seul uhelloc'h e sav ar galon.

Neuze an den a welo, a jomo souezet, e galon a ledannaio en e greiz gand ar joa, abalamour ema gantañ dorn Doue hag e-neus en em lakeet oll etre e zaouarn evid atao.

Evel-se eo benniget an den a glask Doue a-greiz kalon ha n'e-neus ket bet e ene evid chom heb ober netra gantañ.

An den-ze, o reseo sakramant an Aoter, a virit beza unanet stard gand Doue, o veza ne zell ket ouz e zevosion, e frealzidigez e-unan, med hepken ouz gloar hag enor Doue.

KENTEL XVI

Er gomunion e tleom dizolei on ezommou da Jezuz-Krist ha goulenn e hrasou.

1.-AN DISKIBL. O va Jezuz dous ha kantezuz meurbed, am-eus c'hoant da reseo bremañ gand devosion, anaoud a rit va zempladurez, va ezommou, va foaniou, va fehedou, gouzoud a rit pegen gwasket on, pegen tentet, pegen trubillet, pegen ankeniet !

Dond a ran d'ho kavoud da glask ar pare, da houlenn frealzidigez ha sikour.

Komz a ran ouz an Hini a oar pep tra, a anavez doare va ene hag a hell e-unan hepken va frealzi ha va zikour da vad.

C'hwi a anavez euz petra am-eus ezomm dreist-oll, pegen dister eo va zantelez.

2.-Emaon dirazoh, paour ha noaz, o houlenn ho kras, ho trugarez.

Torrit naon ar paour-kêz a zo o pedi ahanoh, tommit gand tan ho karantez va halon a zo rivet, sklêrijennit, o lugerni dirazon, va daoulagad a zo goloet a deñvalijenn.

Grit ma kavin c'hwero oll draou an douar, ma tougin gand pasianted pep poan, peb enebiez, ma tisprizin, ma troin kein d'an oll draou dister, d'an oll draou krouet.

Savit va halon war-zu ennoh en Neñv ha n'am lezit ket d'en em goll war hentchou an douar.

Ra viot azaleg bremañ va oll joa da viken, rag c'hwi hepken a hell terri va naon ha va zehed, c'hwi eo va harantez, va levenez, va oll vad.

3.-Plijet ganeoh dond davedon da entana, da zevi va ene a-bez, da ober va spered heñvel ouz hoh-hini, ma ne rin nemed unan ganeoh dre ar hras am stago ouzoh hag a deuzo va halon gand tan ar garantez.

N'am lezit ket da vond diouzoh war yun ha seh va ene, bezit trugarezuz evidon evel m'oh bet e-keñver ho sent en eun doare ken burzuduz.

Daoust ha leh a vije da veza souezet ma teufen da veza tan flamm o tostaad ouzoh, ma ne jomfe ennon netra ahanon va-unan, peogwir c'hwi eo an tan atao war elum, an tan ne varv morse, ar garantez a nêta ar galon hag a ro sklêrijenn d'ar spered.

KENTEL XVII

Kaoud mall braz ha c'hoant birvidig da reseo Jezuz gand karantez.

1.-AN DISKIBL. O va Jezuz, me am-eus c'hoant d'ho reseo gand eur feiz kreñv hag eur garantez virvidig, gand oll nerz va halon, evel m'o-deus greet e-leiz a zent hag a dud devod a zo bet ho mignoned dre o buhez santel hag o harantez dispar.

O va Doue, karantez eternel, va oll vad, eürusted dreist-muzul, me a hoanta ho tegemeret gand ar vrasa youl, gand an doujañs santella o-deus bet, o-deus santet biskoaz ar zent.

2.-Ha beza n'on ket din da gaoud eun heveleb devosion, e kinnigan deoh evelato oll garantez va halon, evel ma vijen va-unan o kaoud ar c'honategeziou birvidig-se a blij kemend deoh.

Kemend a hell ivez eun den mad da zoñjal ha da hoantaad, a roan hag a ginnigan deoh gand doujañs, hag a galon vad.

Ne fell ket din derhel netra ganin va-unan, med rei deoh laouen me va-unan ha kemend am-eus.

Va Doue, va hrouer, va Zalver, me a fell din ho reseo hirio gand ar memez karantez, doujañs, enor, gloar, anaoudegez vad, santelez, feiz, esperañs, purete, m'ho resevas ho Mamm Zantel, ar Werhez Gloriuz Vari, pa respontaas gand humilite ha devosion d'an Êl deuet da zisklêria dezi mister an Inkarnasion : “Me a zo servicherez Doue, ra vezo greet din hervez ho komzou“.

3. Hag evel an hini a deuas en ho raog da zisklêria ho tonedigez, ar brasa euz ar Zent, Yann Vadezour ; lemmel a reas dirazoh gand joa ar Spered-Santel, daoust ma n'oa ket c'hoaz deuet er bed ; ha diwezatoh o weled Jezuz o vale e-touez tud all, e lavare gand humilite ha karantez vraz : “Mignon ar pried a zo en e gichenn hag a zelaou anezañ, plijadur e-neus o kleved e vouez“. Evel-se e c'hoantaan beza entanet gand ar youl zantel d'ho reseo hag en em rei oll deoh a-greiz kalon.

Kinnig a ran deoh levenez an oll galonou, o harantez virvidig a ree dezo sevel a spered beteg Doue, beza sklêrijennet gand sklêrijenn an Neñv ; kinnig a ran deoh ivez an oll zantelez, an oll meuleudiou a zo bet kaset hag a vezo kaset deoh gand ho krouadurien euz an Neñv hag an douar ; o hinnig a ran deoh evidon hag evid kemend hini e-neus goulennet diganin pedi evitañ ma viot meulet hag enoret da viken gand an oll, evel m'eo dleet.

4.-O va mestr, va Doue, degemerit va mennoziou hag ar c'hoant am-eus da weled ho meuli, ho trugarekaad heb ehan ha da viken, evel m'eo dleet, rag C'hwi eo an Doue braz dreist pep tra.

Setu aze petra a ginnigan ha petra am-eus c'hoant da ginnig deoh bemdez hag e peb amzer, ha pedi a ran ar Speredou eüruz euz an Neñv hag hoh oll zervicherien da unani o mouez gand va hini evid ho trugarekaad

hag ho meuli.

5.-Ra viot meulet gand an oll boblou, e kemend bro hag e kemend yez a zo war an douar ; ra vezo, e-kreiz al levezeg hag ar garantez, enoret hoh ano a zo santel ha dous evel ar mel.

Ha d'ar re a dosta ouz ho sakramant santel gand doujañs ha devoision d'ar re ho reseo gand feiz, roit ho krasou, ho pennoz, ha me a houlen diganto pedi evidon, peher ma'z on.

P'o-dezo bet diganeoh o hoant, pa vezint unanet ganeoh, frealzet, kennerzet gand ho korv santel, pa zistroint diouz an daol zantel, r'o-dezo soñj ahanon-me, peher paour.

KENTEL XVIII

An den ne dle ket klask kompren mister sakramant an Aoter, med lakaad e spered da bleaga d'ar feiz.

1.-**Jezuz-Krist.** Diwallit da goll ho poan o klask kompren gand ho spered, sakramant an Aoter, mister don meurbed, ma ne fell ket deoh beza lakeet e dañjer da goll ho feiz. An hini a fell dezañ klask anaoud galloud braz an Aotrou Doue a vezo dallet gand e hloar.

Doue a hell ober muioh a draou eged ne hell an den kompren.

Eun dra a hell ober ar hristen eo klask ar wirionez gand devosion hag humilite, gand ma vezo atao o houlenn beza kelennet ha gand ma poanio da vale ouz sklêrijenn ar henteliou roet gand an Tadou santel.

2.-Eüruz an den eün a spered, an den a zilez an hentchou diêz, an traou na gompren ket ar spered, hag a ya gand hent plên, hent sur gourhemennou Doue.

Ar pezh a houlenn Doue diganeoh eo ar feiz hag eur vuhez leal, nann eur spered lemm gouest da gompren ar misteriou.

Ne hellit ket kompren an traou a zo izelloh evidoh ; penaoz e hellfeh kompren an traou a zo dreist ho penn ?

Plegit da Zoue, lakit ho spered da bleaga d'ar feiz, hag e vezo roet deoh sklêrijenn ha deskadurez kemend ha m'ho-pezo ezomm.

3.-Lod a vez enkrezet o spered diwar-benn ar feiz hag ar Zakramant-mañ n'eo ket i a zo da damall, med o enebour.

Na dit ket da veza nehet, na dit ket da zivizoud gand ar soñjou a deu en ho spered, na gand an enkrezh hopeus diwar-benn kredi ar mister-mañ : an droug-spered eo ar zegas deoh kement-se, na gomzit ket outañ.

Kredit e komzou Doue, e komzou ar Zent hag ar Profeted, hag an enebour a yelo pell diouzoh.

Talvouduz eo a-wechou evid servicher Doue kaoud heveleb poaniou da houzañv.

An droug-spered n'en em gemer ket ouz an dud difeiz nag ouz ar beherien, ar re-ze a zo dezañ, her gouzoud a ra ; an dud fidel ha devod a vez, avad, tentet hag heskinet gantañ e pep giz.

4.-It atao gand eur feiz leal ha stard, tostait ouz ar Zakramant gand eur spered eün ha gand doujañs.

Hag e kement tra na hellit ket kompren, en em lakait gand fiziañs etre daouarn Doue oll-halloudeg.

Doue ne hell ket ho lakaad da fazia ; an den, avad, e-neus re a fiziañs ennañ e-unan, hennez a fazi.

Doue a ra e zarempred gand an dud leal, en em ziskouez a ra d'ar re humbl, spered a ro d'ar vugale vihan, dizolei a ra ar wirionez d'an eneoù glan, ha kuzad a ra e hrasou ouz an dud kuriuz, an dud

ourgouilluz.

5.-Spered an den a zo dister ha fazia a hell ; ar Feiz wirion, avad ne hell ket fazia

Ar feiz da genta ; da houde e hellot lakaad ho spered da glask kompren : ar feiz ne dle ket dond goude m'ho-peus komprenet.

Ar feiz hag ar garantez eo a ra ar muia er zakramant-mañ, ken santel ; ken uhel heb ma ouezfem penaoz, hag a zegas deom ar wella sklêrijenn.

Doue a zo a-viskoaz, Doue, gallouduz dreist pep tra, a ra en Neñv ha war an douar traou braz dreist spered an den, ha ne hellot ket kompren e oberou.

Ma hellfe an den kompren hep poan gand e spered oberou Doue, an oberou-ze ne vijent mui oberou burzuduz na souezuz.

Evel-se-bezet greet.